

近代中國史料叢刊三編第十五輯
沈雲龍主編

清議報全編

新民社輯

第二十二卷至第二十四卷
第六集：紀事（庚子國難紀事本末、外國大事記、地球大勢、中外瑣記）

文海出版社有限公司印行

第陸集紀事

庚子國難紀事本末上
庚子國難紀事本末下

清議報全編

橫濱新民主社輯印

清議報全編卷二十一

第六集上之中

紀事二

庚子國難紀事本末上

拳匪源流

雍正五年十一月世宗憲皇帝諭內閣向來常有演習拳棒之人。自號教師。召誘徒衆。鼓惑愚民。此等多係游手好閒不務本業之流。而強悍少年從之學習。廢弛營生之道。羣居終日。尙氣角勝。以致賭博酗酒打降之類。往往由此而起。甚且有以行教爲名。勾引盜竊。擾累地方者。若言民間學習拳棒。可以防身禦侮。不知人果謹遵國法。爲善良。尙廉恥。則盜賊之風盡息。而鬪訟之累自消。又何須拳棒以防身乎。若使實有膂力勇健過人。何不學習弓馬。或就武科考試。或投營伍食糧。爲國家効力。以圖榮身上進。豈可私行教習。誘惑小民耶。着各省督撫轉飭地方官將拳棒一事嚴行禁止。如有仍前自號教師。及投師學習者。即行拿究。義和拳之起原。其可稽考者實始于此。

乾隆三十六年首先傳教之河南商邱縣人郜生文。犯案正法。當時凡入其教者。均稱爲南方離宮頭殿真人郜老爺門下。

嘉慶十三年江南之潁州亳州徐州府。河南之歸德府。山東之曹州府沂州府一帶地方。復

有不法棍徒。煽其餘波。招集徒黨。橫行鄉曲。給事中周廷森據情入告。仁宗命交江南安徽河南山東各督撫認真查辦。諭曰。給事中周廷森奏請嚴懲聚衆一摺。據稱近日江南之穎州府亳州徐州府河南之歸德府山東之曹州府沂州府兗州府一帶地方。多有無賴棍徒。拽刀聚衆。設立順刀會。虎尾鞭義和拳八卦教名目。橫行鄉曲。欺壓良善。其滋事之由。先由賭博而起。遇會場市集。公然搭設長棚。押寶聚賭。勾通胥吏爲之耳目。請飭下三省督認真端緝。清查保甲。密訪爲首棍徒姓名。聚賭械鬪之案。拿獲盡法懲治。並責成地方官嚴定黜陟等語。江南安徽河南山東毗連各州縣。既有此等匪徒。自應嚴行懲辦。以靖閭閻。不可養癰貽患。至清查保甲。雖屬緝匪良法。但地方官寄耳目於里胥保正。設里保之中。皆其黨類。仍不肯據實舉報。總在府縣各官平日留心體訪。隨案查拿。將首犯嚴辦。使脅從者知懼。不敢隨同爲匪。自不致釀成巨案。株累多人。若胥吏等以在官人役。敢於通同包庇。尤應密拿重辦。剔除積蠹。著交江南安徽河南山東各督撫認真查辦。所有穎亳等處各府州縣。遴選廉明幹練之員。取其才堪治劇。而又能寬猛得宜。通曉事體者。責令隨時整頓。如此內有舊係簡僻缺分。而地方今昔情形不同。初任之員。難資治理者。不妨奏明更調。果能化俗宜民。著有成效。加以獎勵。闕茸不職者。立予糾參。

二十年欽差大臣那彥成拘獲部文生之孫部坦焯及劉功等。奏明科以凌遲之罪。此外如

青縣人李八葉。曠明等傳習義和門教一案。固城縣人葛立業。習義和拳棒。頂知逆情一案。青縣人尤明等傳習義和門離卦教一案。先後爲地方官拘獲。明正典刑。那彥成奏曰。奏爲遵旨查辦。並將先已訊出端倪。奏明密拿事。竊臣於十月三十日。承准軍機大臣字寄。十月二十九日。奉 上諭。王秉衡卽王景曾。其族分住直隸灤州及盧龍縣等處。以大乘教。清茶門分往外省。傳徒歛錢。茲王秉衡自直隸至楚省。復來江南。柳有賢轉傳金帛。有得至逆犯方榮。升釀成巨案。該犯實爲首禍。現已拿獲。解赴湖北。訊明嚴辦。昨據那彥成奏於盧龍緝獲王殿魁等犯。並查提王姓充徒各犯。分別審辦。石佛口王姓一族。世傳邪教。歷年久遠。蔓延數省。現已屢次犯案。着那彥成卽派委幹員前往灤州及盧龍等處。將王姓族中傳教之人。全數收捕。勿令兔脫一名。解至省城。嚴行審訊。訊明後。將爲首傳徒者。問擬絞決。其爲從者。分別發遣流徙。并向各該犯家中。嚴密搜查。將所藏九蓮如意皇極寶卷真經。元亨利貞鑰匙經。及一切邪悖經卷。全行起出。封送軍機處呈覽。務令盡絕根株。勿稍留遺孽。除惡務盡。切勿姑息。欽此。伏查臣前在河南辦理教匪。所有拿獲教犯。逐漸審訊。彼時卽係盛泰等隨同辦理。臣卽屢諭盛泰等。令將各處習教之人。何處最多。傳至何人。逐人訊問。逐件留心。以備查辦。務絕根株。庶免別滋事端。而盛泰亦最肯用心存記。又在保定府任內。審辦邪教最多。是以直省傳習邪教源流。惟臣與盛泰稍知梗概。今欽奉諭旨。謹據臣等所知。畧爲陳

叙。當時據獲到教匪各供。滑縣鬧事之人。俱係震卦教。凡有在教者均稱爲東方震宮王老爺門下。其王老爺係首先傳教之山東荷澤縣人王中。已於乾隆三十七年犯案正法。林清徒黨多係坎卦教。凡有在教者均稱爲北方元上坎宮孔老爺門下。其孔老爺係首先傳教之山東甯陽縣人孔萬林。亦已於王中案內正法。至大乘教金丹八卦教義和門如意門等教。凡有在教者均稱爲南方離宮頭殿真人部老爺門下。其部老爺係首先傳教之河南商邱縣人部生文。已於乾隆三十六年犯案正法。又訊有清茶門教係滑縣人王正紀所傳。當卽拿獲辦理。訊係灤州石佛口王姓分支。當時卽已飭令密記存查。臣於到任後。查辦各項教匪。查得嘉慶十六年經溫承惠審辦過鉅鹿縣民孫維儉等。係以吳二瓦罐所傳之好話教。卽離卦教。改名大乘教。賄串孔傳標借修尼山祠宇爲名。惑衆歛錢一案。將大會首孫維儉等五名。分別擬以絞決監候。二會首宋連捷等九十餘名。連吳二瓦罐一併擬遣。其散會首盧珍明等一千六百三十餘名。奏准取具悔結存記擋冊。再犯加等治罪。十七年又經溫承惠拿辦過前案內散會首復圖興教。私雕偽寶。印蓋護道榜文之劉峒名等三十餘名。口分別斬決發遣。是年又拿獲灤州李家民董懷信等三十餘名。傳習金丹八卦教。審出曾經入教男婦五千一百餘名。將董懷信等分別斬決發遣。其餘男婦取具悔結存案。十八年冬。大乘教案內擬絞監禁之大會首李經。在監勾結同教田克岐。散旗謀逆。經署督臣章煦及

臣在軍營訪聞。分起委員拿獲李經等。奉旨當下辦理。旋又究獲八卦教內首要逆犯張九成。楊遇山。宿元謨。劉坤并河南離卦教首部生文之孫部坦。炤劉功等。分案奏明。擬以凌遲斬遣。惟查愚民私相傳習邪教。一時原難稽查。是在地方官時刻留心。於曾犯教案之犯。曾經習教之家。不動聲色。嚴密稽查。務使不驚不擾。隨案究其源流。庶可斷其傳習。臣仰荷皇上畀以畿輔重任。秉成指示。夙夜實力整飭。不敢稍存疏懈。斷不肯令邪惡復萌。釀成巨案。除陸續拿獲滑縣潛逃逆各犯。並林清案內應行緣坐餘黨不叙外。其離卦一教。仍未改悔之案。如所獲平安縣傳習離卦教之楊俊等。究出首先傳教吳二瓦罐之子。仍稱少當家之吳洛雲。並其徒大頭目路運等一案。交河縣傳習一炷香離卦教之齊聞章等。搜出遞背十王經卷一案。滄州吳久治路老等傳習佛門教一案。青縣李八葉幅明等傳習義和門教一案。又青縣邊二從習白陽教預知逆情一案。景州葛華等從習離卦教預知逆情一案。祁州邢士魁等傳習如意教。搜獲妄造表名掛號總冊一案。故城縣葛立業傳習義和門拳棒預知逆情一案。均經訊明。教名雖別。俱係離卦教之子孫徒黨。遂起奏明。分別凌遲斬遣在案。現又訪獲青縣尤明等傳習義和門離卦教一案。東鹿縣馬楊氏傳習紅陽縣搜飄高老祖經一案。亦經奏明從嚴究辦。至石佛口王姓傳教一案。臣先即存記。前在湯山差次面奉諭旨。飭拿赴楚傳教之王姓。當經臣派員在盧龍縣安家樓莊。訪獲自江南回籍之王殿

魁並其子王朝萬三犯。提省嚴訊。據王殿魁供認於乾隆五十七年即在淮安溧水泗州江甯等處傳徒。伊即在山陽開糧食店。五六年回家一遍。據供出伊族人在湖北傳教。共有三人。一名王書魯。一名王泳太。一名王興建。王書魯先在江南儀徵縣傳教。即在彼住家。王泳太王興建俱在廬龍縣安家樓莊住。又有在山西傳教犯案王如青之次子小名來子。伊族石佛口有兩支俱在。旗分東西兩院。王如青是東院人。其餘在安家樓莊及闢家莊係屬一支。俱係民人等語。續又據委員稟在安家樓莊拿獲王三樂王三畏二名訊據。供稱伊等均未習教。惟伊次兄王三聘。又名王紹英。曾在山西傳教犯案。業已奏辦。伊三兄王三顧前亦往山西。回家後旋患瘋迷。於本年四月內外出。不知去向。臣以王三樂王三畏所供。全係狡卸。且該族之人類多傳教犯案。因查從前辦過王烈案內。有王際昌王漢倬王秉鈞三犯。分發邢臺等縣充徒。行司提省質訊。至王殿魁供出在湖北傳教之王書魯二犯。現准湖廣咨會內開樊萬興案內之王姓。即王大鼻子。已准江蘇省拿獲。核與王殿魁取供形貌相符。其王泳太王興建二犯。亦在湖北傳教。當即飛檄各委員飭拿。一面奏蒙聖鑒在案。今據白齡等奏。將緝獲之王秉衡即王景曾。解楚嚴辦。查與王殿魁供出在湖北傳教之王書魯名不相符。復提王殿魁研訊。據供王書魯原係景字排行。又名王景曾。即王大鼻子。屬實等語。臣業經咨會湖廣督臣審究。至王姓世習邪教。分往各省傳徒。蔓延數省。屢次犯案。怙惡不悛。且深

州。盧龍等處。附近京畿。並係盛京往來要路。斷難容習教匪犯。潛踪誘煽。誠如聖諭。必當將該族習教之人。全數收捕。分別懲辦。嚴密搜查。邪悖各經卷。務令盡絕根株。不使稍留餘孽。前經派委保定府同知汪洞。前赴該州密拿。已據獲到教犯王三樂。王三畏。王鳳吉。王來子等四名。已飭提省審辦。並仍令該員在於該州石佛口。盧龍縣安家樓及闌家莊等處。實力查拿。現又恭錄聖諭。密飭前委查勘永平府屬一帶道路之清河道韓文綺。令其遵旨就近督拿該族習教之人。並搜查各項邪悖經卷。解省嚴行訊辦。斷不敢稍存姑息。以期仰副聖主除惡務盡之至意。

光緒今上初年。直隸冀州有土匪名黑虎者。滋事勢甚猖獗。官兵屢次勦辦。皆不能擒獲。維時李秉衡適為冀州知州。乃設法招撫匪首徐某等。編成義利團。惟黑虎抗不就撫。是為義和團所自始。今團匪總頭目聞即是黑虎也。

二十五年。毓賢任山東巡撫。當時省內已漸有多人借保護鄉閭為名。學習拳棒。浸假且有與外教為仇者。毓賢並不勦辦。且縱成之。故追原禍始。毓賢實首尸。其咎云。拳匪係離卦教。色尚紅。故紅巾紅帶。間有黃帶藍帶者。女童習紅燈罩。婦人習藍燈罩。降體之神。多半小說所云。樊梨花。劉金定之類。男子降神。更屬不倫。有曰李太白者。孫行者者。豬八戒者。楊香武者。並有曰祈禱藻者。其稱頭目曰大帥。曰老師父。小頭目曰大師兄。二師兄。每傳拳法一。

處。必須招集二十五人。是謂一團。每團立一團首。一團之人聚散皆從其令。故城縣拿獲山東大貴和尚。供稱該教咒語甚屬鄙俚。咒云。日出東方一滴油。驚動弟兄天下行。弟兄驚動李君王。李君王驚動楊二郎。楊二郎驚動封炮王。封炮王驚動老君來顯靈。納不解其義趣何在。因練拳而致邪祟附身。竟成瘋癲者。傳聞藉藉。愚民之愚。令人不解。有一兵官姓朱。自言係泰安府人。在濰縣二十里堡店中。言人入大刀會習學其藝。不怕槍刀火炮。欲學者並不爲難。其法即念咒燒紙燒香涼水潤身手足伸縮。一日即可成功。練拳之時。聚無知童子數人立向東南。傳教者手提童子右耳。令童子自行念咒三遍。其咒言爲我求西方聖母阿彌陀佛數字。咒畢童子即仰身倒地。氣幾不續。遲即促令起舞。或授以棍棒。當刀矛兩兩對戰。如臨大敵。實則如醉如夢。久之。師向該童子背心用手一拍。喚童本名。則豁然醒立。若木雞。拳法亦盡忘。與戰鬪時判若兩人。又別有咒語數種。或八字。或十二字。或十六字。二十字。以及十數句不等者。誘十數齡之童子。教其鬪時念咒。向南三揖。該童子即仰臥地上。移時躍然而起。自報姓名。要皆前朝英傑也。報畢。即作拳勢。往來舞蹈。或持竹竿。秫秸。木槌等物。長者以當長槍大戟。短者以當雙劍單刀。各分門路。支撐衝突。勢極兇悍。幾于勇不可當。每演時必聚童子數十人合練之。其初學之一二日。由臥躍起。仍閉目跳舞。若置人物於其旁。則決無觸碍。舞畢欲退。則向南三揖。口稱老師父請回。該童子即復如常。由是練至數日之外。即不仰臥。不鬪時矣。欲演拳勢。惟念咒一通。即時手舞足蹈。頗極超距之能。退時則一揖。

而罷。詢以練此何意。則衆口一詞。皆以預備殺逐洋人爲言。且云此等拳勇技擊。不過體操一端。將來尙須練習呼風喚雨飛雲走霧等術云。

喉拳實紀

二十六年四月。滿洲貴族世家多入義和團。王公貝勒等皆允爲保護。

五月初二。一問召見董福祥二次。面授以抵制西兵機宜。董福祥慷慨自効。有仰體慈意。誓立寸功之話。宮中內侍及年女宮女等。習學練拳。不時操演。○初十日。命順天府尹乘軍機大臣趙舒翹出京招撫團民。榮祿至馬家堡保護鐵路。或云實係會商董福祥力阻西兵不許入京。皇太后在宮內召集各大臣密議團匪亂事。爲時極久。旋即決議定計。不得將義和團勦除。以該團皆忠心于國之人。如以上等軍械好爲操演。即可成爲國家勁旅。以之抵禦洋人。頗爲有用。榮祿慶王端王剛毅啓秀趙舒翹等俱同聲附和。謂不可勦辦。乃即定議。時團匪幾于到處皆是。入會者口數百人。且均彰明較著。並不避忌。凡屬滿人。不分大小老少。均係義和團中人。其腰間均束紅帶。以作記號。御史王培佑召見時。太后問你是本處人。義和團究竟如何。王奏義和團忠君愛國。太后言惟願他莫亂動爲是。王奏臣家大小均練義和拳。太后大喜。三日卽擢府丞。○十一日剛毅奏言趙舒翹往撫團民。恐致決裂。奴才請卽行。于是至涿州。趙舒翹欲留聶士成勦匪。剛素惡聶。謂其私通洋人。決不可用。趙微笑。

即回京。有言官數人。奏請速發大兵。勦辦拳匪。以免匪勢蔓延。語頗切直。其疏留中不發。又有某御史專摺奏稱。拳匪滋事。皆剛毅釀成。非立賜罷斥。無以謝天下。聞者爲之動容。○十二日。剛毅奉派至北京一帶鎮撫團民。○十三日。董軍入都。先是董軍屯南苑。端王剛毅以城內空虛。請調入都。初四日召見。至是入都。先鋒差弁各持令箭。聲言奉太后命勦滅洋人。命義和團爲先鋒。我軍爲接應。○十四日。命端王管理總理衙門事務。團匪一隊與武衛軍相遇于某處。團匪謂之曰。爾敢拿我否。武衛軍答以不敢。團匪謂然。則爾可將帽除去。武衛軍即應聲悉將帽除下。武衛軍皆甚精壯。堪任戰事。董軍尤爲西人所推重。惟皆力助團匪。○十六日。董福祥呈請効力。願親自率帶所屬甘肅各兵往阻西兵進京。董軍約有二萬五千人。大半俱有極好機器快鎗。并機器快砲。以及刀鎗等類。大阿哥請義和團教師二人。教以各種幻術。以及拳棒等項。另有親王四人爲伴一體學習。○十九日。剛毅從涿州回京覆命。力主開戰之議。官兵在北京城外築造土壘。嚴加防堵。以阻西兵進京。又將砲位對准美國教堂。及英國使館安放。○二十日。董福祥偃與團匪聯合。并招集陝兵一同入會。召見王公貝勒六部九卿及翰詹科道。先召王公貝勒及榮祿。剛毅密議後。復同各漢臣進見。太后宣布開戰之議。王文韶許景澄袁昶曾廣漢惲毓鼎朱祖謀那桐等皆力爭云。現在各國兵艦雲集。萬不能戰。剛云。有團民足恃。袁云。曾徵服往東交民巷見匪中鎗而死。

者。伏尸徧地。並不能避鎗炮。究不足恃。太后云此係土匪。決非團民。若係團民。決不至中鎗炮。曾云昔與日本一國開戰。尙不能勝。今與各國開戰。豈有勝理。那云城內斷不能作戰地。俾云即欲開戰。所有各使館宜照公法一律保護。朱云宜召近省知兵大員入京再議。王文韶及徐川儀以保護使臣爲主。剛遽云無論如何。現在總以阻截西兵入京爲第一要事。許景澄熟識洋務。當可派往。于是太后即加派那桐同往。而開戰之議遂定。朝中諸人無日不稱述團匪神奇。某大臣至向衆明言此等義和團皆是天生奇材。有無窮法術。可以包打西人。故西兵如欲進京。我等亦不必阻止。聽其與團匪打仗。俾知團民之利害。某御史封章入告。謂義和團志在保衛國家。其志可嘉。其技可用。請爲酌給口糧。編成制兵焉。當團匪滋事以後。太后曾召見諸大臣商議勦撫事宜。諸臣皆無定見。惟徐桐叩首力爭。謂團匪立意扶清滅洋。實是中國義民。不宜勦辦。以挫其氣。太后以徐爲老臣。所言必不悞。故一意主撫。○廿四日。甘軍在王府大街長安牌樓北與奧署洋兵開仗。鎗砲聲大作。飛彈如雨。忽忽有聲。竟夜不絕。榮祿之命也。當議發令時。皇上痛哭言曰。如此則數千萬生靈。必遭塗炭。三年宗社。必致不守。諸臣爭之甚力。太后不能作主。遂即下令。○廿五日。下開戰之諭。其言曰。我朝二百數十年。深仁厚澤。凡遠人來中國者。列祖列宗。罔不待以懷柔。迨道光咸豐年間。俯准彼等互市。並乞在我國傳教。朝廷以其勸人爲善。勉允所請。初亦就我範圍。遵我約束。

詎三十年來。恃我國仁厚。一意拊循。乃益肆梟張。欺凌我國家。侵犯我土地。蹂躪我民人。勒索我財物。朝廷稍加遷就。彼等負其凶橫。日甚一日。無所不至。小則欺壓平民。大則侮慢神聖。我國赤子。仇怨鬱結。人人欲得而甘心。此義勇焚燒教堂。屠殺教民所由來也。朝廷仍不開釁。如前保護者。恐傷吾人民耳。故再降旨申禁。保衛使館。加恤教民。故前日有拳民教民。皆吾赤子之諭。原爲民教解釋宿嫌。朝廷柔服遠人。至矣盡矣。乃彼等不知感激。反肆挾。昨日公然有杜士蘭照會。令我退出大沽口炮臺。歸彼看管。否則以力襲取。危詞恫喝。意在肆其披猖。震動畿輔。平日交鄰之道。我未嘗失禮於彼。彼自稱教化之國。乃無禮橫行。專恃兵堅器利。自取決裂如此乎。朕臨御將三十年。待百姓如子孫。百姓亦戴朕如天帝。况慈聖中興。宇宙恩德所被。浹髓淪肌。宗祖憑依。神祇感格。人人忠憤。曠代所無。朕今涕泣以告先廟。慷慨以誓師徒。與其苟且圖存。貽羞萬古。孰若大張撻伐。一決雌雄。連日召見大小臣工。詢謀僉同。近畿及山東等省義兵。同日不期而集者不下數十萬人。下至五尺童子。亦能執干戈以衛社稷。彼仗詐謀。我恃天理。彼憑悍力。我恃仁心。無論我國忠信甲冑。禮義干櫓。人人敢死。卽土地廣有二十餘省。人民多至四百餘兆。何難剪彼兇燄。張國之威。其有同仇敵愾。陷陣冲鋒。抑或尙義捐資。助益餉項。朝廷不惜破格懋賞。獎勵忠勛。苟其自外生成。臨陣退縮。甘心從逆。竟作漢奸。卽刻嚴誅。決無寬貸。爾普天臣庶。其各懷忠義之心。共洩神人之

憤。朕實有厚望焉。下嘉獎義和團之諭。曰。裕祿奏洋人肇衅。猝啓兵端。連日接仗。獲勝一摺。覽奏實深嘉慰。我華與各國和好有年。乃因民教相仇之故。竟至決裂。恃其堅甲利兵。攻我大沽口炮臺。又由紫竹林分路出戰。經裕祿四處分應。經我義民竭力相助。以血肉之軀。與鎗炮相薄。二十一二二十三等日。擊壞兵輪二艘。殺敵不少。衆志成城。民心既固。兵氣亦揚。所有助戰之義和團人民。不用國家一兵。不糜國家一餉。甚至耆齡童子。亦復執干戈以衛社稷。此皆仰託祖宗之昭鑒。神聖之護持。使該團民萬衆一心。有此義勇。若先行傳旨嘉獎。餘俟事定後再行加恩。爾團民等惟當同心戮力。禦侮効忠。始終勿懈。朕有厚望焉。命各省督撫招集團民以禦外侮。命莊親王載勛補授步軍統領。○二十六日。命莊王剛毅統率義和團。英年載瀾會同辦理。文瑞爲翼長。命戶部札放粳米二萬石交剛毅分給義和團民食。○二十七日。命各督撫將軍分飭各營。將舊存槍炮刀矛各種軍械。趕緊修理。並添造子藥。酌帶專件。以備民團領用。○二十九日。太后命賞給神機營虎神營義和團民銀各十萬兩。甘軍武衛軍再各賞銀六萬兩。○三十日。太后命賞給八旗滿蒙漢驍騎營銀一萬兩。兩翼前鋒八旗護軍一萬兩。天津開戰各兵士及助戰團民十萬兩。宋慶武衛左軍十萬兩。上諭中外開衅以來。我皇太后迭次頒發內帑。徧給將士義團。慈恩優渥。有加無已。當此時局艱危。爾將士等必當感激圖報。共建殊勳。其有奮勇力戰。殺敵致果者。定予

以不次之賞。如有臨陣退縮。畏葸不前者。卽在軍前正法。並將統兵各員嚴治其罪。現在大沽炮臺已被洋人佔據。著裕祿督飭羅榮光等各營。並義和團民迅圖恢復。毋稍遷延。至行軍以紀律爲先。各營弁兵。如有搶掠財物騷擾地方等情。除將滋事弁兵就地正法外。並將該管營哨各官以軍法從事。倘統帶各員不能嚴加約束。亦必一併從嚴治罪。勿謂言之不預也。上諭昨已將團民仇教勦撫兩難。及戰釁由各國先開各情形諭。李鴻章李秉衡劉坤一張之洞等矣。爾各督撫度勢量力。不欲輕搆外衅。誠老成謀國之道。無如此次義和團民之起。數月之間。京城蔓延已遍。其衆不下十數萬。自民兵以至王公府第。處處皆是。同聲與洋教爲仇。勢不兩立。勦之則卽刻禍起肘腋。生靈塗炭。只合徐圖挽救。奏稱信其邪術以保國。似不諒朝廷萬不得已之苦衷。爾各督撫知內亂如此之急。必有寢食難安。奔走不遑者。安肯作一面語耶。此乃天時人事相激相隨。遂致如此。爾各督撫勿再遲疑觀望。迅速籌兵籌餉。力保疆土。如有疏失。唯各督撫是問。上諭團軍與洋人爲難情形。前曾疊諭李鴻章張之洞李秉衡等會同籌議覆奏。茲據奏到言兵衅萬不可開。團軍急宜勦除等語。誠老成謀國之見。無如此種團軍。京津一帶。已不下十餘萬人。聲勢赫翼。誓與洋教爲難。甚至宮禁前後。所在多有。勦之轉恐患生不測。不若因而用之。尙可轉危爲安。此乃天時人事相迫而成。各督撫毋得再行觀望。徒事委蛇。務須振刷精神。籌餉練兵。各保疆土。倘有疎虞。惟各督撫

是問

六月十六日上諭統帶武衛前軍直隸提督聶士成。從前著有戰功。訓練士卒。亦尙有方。乃此次辦理防勦。種種失宜。屢被參劾。實屬有負委任。昨降旨將該提督革職留任。以觀後效。朝廷曲予矜全。望其力圖振作。藉贖前愆。詎意竟於本月十三日督戰陣亡。多年講求洋操。原期殺敵致果。乃竟不堪一試。言之殊堪痛恨。姑念該提督親臨前敵。爲國捐軀。尙非退蕙者比。着開復處分。照提督陣亡例賜卹。用示朝廷格外恩施策勵戎行之至意。○二十一日上諭各國開釁。京津各軍尙皆可用。惟聶士成一軍。平日第講洋操。臨敵爲洋教習所制。以致未戰先潰。委械授鉞。兵弁中有人洋教者。甚至倒戈相向。甘心從逆。而其沿用洋裝洋號。輒動自相猜疑。自相鬪殺。誤國亡身。實堪痛恨。各路統兵大臣。凡夙習洋操。及用洋操式洋口號者。務即悉數更換一律。仍歸舊日兵制。其中如有入教及私通洋人兵弁。尤宜嚴加分別。認真淘汰。俾兵爲我用。不以資敵。將此由六百里通諭知之。○二十二日上諭義和團民爲國宣力。人數旣衆。良莠不齊。甚且有意尋仇。肆行無忌。本月竟有僞義和團戕殺副都統慶恒家屬一案。當經該統率王大臣查明將該僞義和團正法五人。乃聞尙有人嘵嘵不已。竟將慶恒凌虐至死。殊屬不知法紀。着該王大臣確切查明。務將真正義和團衆。盡其恪守戒規。義以和衆。其有匪徒假託義和團之名。尋衅焚殺。着照土匪之例。即行嚴辦。經此次淘

汰後。義和團之真心向善者。益當愛惜聲名。同心禦侮。其僞託之匪徒。自無所逃於顯典。從此涇渭攸分。當亦該團之所深願也。

七月初一日。命李秉衡幫辦武衛軍務。節制張春發陳澤霖萬本華夏卒西四管。○初四日。吏部左侍郎許景澄太常寺卿袁昶以諫阻請勦匪忤旨正法。先是五月間。三次召見王大臣。許袁二公卽力陳團匪不可信。宜勦不宜撫。卽會銜密奏。六月初旬。團匪攻使館益力。二公復相約曰。當冒死力爭。又會銜上疏不聽。而袒護拳匪者啣之。謀害甚急。至六月下旬。西兵屬集。勢將直撲都城。乃又會銜上疏請速勦匪。並請誅袒護拳匪之人。遂於先一日逮刑部獄。至是奉旨正法。許袁共上疏三次。其第一疏曰。竊見自本月十六七日。拳匪倡亂京師。連日召見王員勒內外廷臣工。聖躬焦勞。爲宗廟社稷深維至計。廣諮下問。臣等不能弭患。事先紓君父之憂勞。負罪無狀。內愧且憤。伏查嘉慶十三年七月。上諭卽有山東河南一帶匪徒設立八卦教義和拳名目。實係白蓮教餘孽。奉嚴旨密拿懲辦。去年吳橋縣知縣勞乃宣說帖。考之最詳。前月東撫袁世凱遵旨覆陳。言萬無招撫編爲營伍之理。言之最爲切實明白。前東撫毓賢辦理平原縣邪匪一案。稱匪首朱紅燈。自稱明裔妖言煽亂。各處響應。幸被官兵掩捕擒獲。就地正法。絕無能避槍砲刀斧之妖術。此其明証。上年臣詢提督程文炳。該提督乙未年駐軍近畿。有山東義和拳。自稱金鐘罩紅燈照名目。四五十人投効。以火

槍利刃試其技。立時見血傷斃。是妖術全不可信。確鑿無疑。而其匪首廣樹黨羽。久蓄逆謀。妄稱明裔煽亂。其爲邪教爲亂民。又確鑿無疑。臣於上年十一月十三日蒙恩召見。其時東省拳匪借仇教爲名滋事。臣曾面奏。係邪教倡亂。應預爲撲滅。各情旋經東撫袁世凱實力禁撲。止滅十餘巨股。東省晏然。始而士紳誤信騰謗。謂該撫不應用勦。此皆不學無識之徒。以邪爲正。近亦帖服。以該撫辦理爲是。臣去年冬。曾以勞乃宣說帖商之總署。諸臣奏明請旨飭下東撫辦理。旋因東撫辦有頭緒。遂寢未奏。不意東省漸次肅清。流入直隸。直隸督臣觀望遷延。養癰成患。聽其蔓延。始謀不臧。咎實難辭。及涿水戕官。督臣裕祿見該邪匪借仇教爲名。叛逆昭著。乃電奏力請勦辦。而內外議有異同。遲延未決。涿州踞城不已。延及永清霸州。涿水戕官未痛辦。遂致匪膽愈張。焚燬蘆保鐵路京津鐵路電桿。又毀京津至張家口電線。此皆國家派員出內帑借洋款所經營。一旦焚毀。數百萬巨貲。深堪惋惜。又焚殺教堂。教民數百處。將來議償亦不貲。伏以民教互仇。積成憤毒。地方官稟承國家律令。自有平心讞獄辦法。但憑案情曲直。不分是民是教。斷不容匪徒自行報復。乃自本月十六七日。該匪膽敢潛入京師。盜兵輦轂之下。焚毀教堂。攻擊各使館。縱橫恣肆。放火殺人。震驚宮闕。實爲罪大惡極。萬不可赦。二十日。焚燒前門外千餘家。京城財產精華所聚。焚掠一空。士民搬徙。十室九逃。商賈盡行閉歇。失業餉項亦艱於匯兌。給發氣象蕭索已極。自有亂民不法。任其

焚殺叫喊。實貽鄰國之恥笑。各洋公使因匪仇教。畏其凶鋒。情急自衛。現兵祇有四百十餘人。各保性命。是其實情。十六日樞臣啓秀等傳懿旨慰問各使館。並及公使之語。該公使等感戴聖慈。淪肌入髓。口稱調洋兵爲衛館保命。絕不干預中國國家公事。匪平無事。卽行撤回。指天誓日。其詞決非虛僞。爲今之計。惟有先清內城之匪。以撫定民心。慰安洋情。乃可阻其續調之兵。必中國自勦。乃可免洋兵助勦。情勢顯然。臣伏思兵事最忌多立統帥。意見參差。事權不一。以致互相觀望。轉誤事機。現在歷奉嚴旨飭令步軍統領武衛中軍與各御營禁兵。嚴拿首要各犯。刻卽解散脅從。將城內外設立壇棚。盡行拆去。乃官兵觀望拳匪橫行如故。步軍統領順天府五城。前遵旨所擬十條章程。實止虛文。何曾實力做到。此事權不一之故也。拳匪磨聚京城。久且煽惑愈多。致生巨變。伏乞皇太后皇上赫然震怒。恭行天討。上安九廟。下靖兆民。宜專責成大學士榮祿。兼用且勦且撫之法。得以便宜從事。先肅清內城地面。遵旨立即出示徧諭軍民人等。凡遇頭繫紅布。身繫紅帶。持刀放火殺人。之匪。准其格殺勿論。並懸重賞之格。縛獻匪首。所謂老祖師大師兄者。賞銀二萬兩。立即超擢官階。擒斬該匪團長。賞銀五百兩。餘匪計首一級。賞銀一百兩。均准報名候予奏獎。該大學士爲國重臣。應扼要坐鎮。不宜勞以細事。須差委得人襄助。乃可分理。伏見武衛軍幕僚。記名道府樊增祥。素有謀畧。內閣學士桂春。忠勇明決。編修王廷相。御史黃桂馨。素有清操。通達事理。

府丞兼署府尹陳夔龍勇於任事。請旨交大學士榮祿參贊謀畧。遴派武衛中軍得力將弁。挑選勁兵。分爲十餘隊。隊長如得力。每隊止槍手刀斧手三三百人。已足。請旨暫閉前三門。嚴禁游民。祇准其出不准其進。分路搜捕匪徒。務令各空廟廢祠。根株淨盡。復命提督衙門刑部遴派明幹司員多人。分駐各汛段官廳。隨將所拏匪徒。畧訊口供。稟明統帥。即行就地正法。以儆凶頑。餘者解散。驅逐出外城之外。遞解回籍。事平再行將正法若干匪。造冊奏報。或謂該匪人多不可勦。不知祇匪首倡亂。餘多愚蠢村農。幼壯不一。或謂匪有邪術。臣愚以爲漢末張角黃巾。元末破頭潘關先生。皆有妖術。卒歸擒斬。該匪晝伏夜動。動言請神。此乃符咒扶鸞。請仙五鬼搬運之邪術。一遇聲光並見之物。陽氣熾烈。如槍砲等物。立即轟斃。若云匪術能避槍礮。何以十六七等日。該匪連攻東交民巷使館。洋兵放槍立斃數匪。昨又擊斃帥府胡同拳匪四十餘名。拆毀其壇。京師軍民數百萬。受國厚恩。實無一謀叛者。叛逆祇拳匪首要數人耳。一經擒斬。申國法儆人心。匪膽即寒。民志自大定。外五城御史街道廳。亦應督同綠營練勇水會一體照辦。城匪既清。各公使館蒙天恩保護。感激再生之恩。則續調之洋兵。自可阻其來。即來亦可以城匪既清。無庸自行保護。折之。令其撤回。總之周禮稱治亂國用重典。康誥稱用其義刑義殺。內匪事在必勦。無可游移。若因循不勦。招撫之亦不受命。各國勢大怨深。並舉報復。禍敗不可勝言。與其外兵干預代行勦辦。必至拳匪洋兵互

相鬪。閔喋血京師。轉致玉石不分。殺害無數良民。大局糜爛。不可收拾。不如我自行勦辦。尙可示以形勢。杜彼族之口實。以維持大局。廟社不驚。萬民幸甚。其第二疏曰。竊自上月二十四日。德國使臣葛德祿。途遇槍斃之後。該匪遂攻擊各國使館。提督董福祥所統甘軍。尤與聲勢相倚。狼狽爲虐。使館附近居民。遭池魚之殃者。不可勝計。東城一帶。京官私宅。劫掠殆盡。該匪旣以仇教爲名。波及使館。復以攻使館之故。波及官民。輦轂之下。任彼亂軍亂民。縱橫盪決。伊古伊今。實爲罕見。當匪徒初攻使館時。莫不謂旦夕間。便可剷除。董福祥且屢以使館盡燬告矣。今已二十餘日。洋兵死者寥寥。而匪徒骸骨狼藉。徧於東交民巷口。平日妖言惑衆。自詡能避槍礮之術。而今安在。夫以數萬匪徒。攻四百餘洋兵所守之使館。至二十餘日之久。猶未能破。則其伎倆。亦可概見。尙得恃其血氣之勇。收禦侮之效哉。若云眞義和團。確能爲國宣力。其尋釁焚殺。皆依附其間之僞義和團所爲。一類之中。旣分眞僞。擾亂已極。且旣容附入之僞者。無惡不作。則眞者亦非善類可知。况歷奉嚴旨禁止持械尋仇。焚燬劫掠。并令解散出城。該匪竟置若罔聞。橫行如故。無論眞僞。總之藐視王法。均爲冥頑不靈。罪在不赦。愈撫則愈聚。愈縱則愈驕。臣前次奏請。宜專責成大學士榮祿。用且勦且撫之法。未蒙俞允施行。今禍亂日亟。愚妄之見。尤不敢不冒死瀆陳於聖明之前。伏以春秋之義。兩國構兵。不戮行人。泰西公法。尤以公使爲國之重臣。蔑視其公使。卽蔑視其國。茲若任命

該匪攻燬使館。盡殺使臣。各國引爲大恥。連合一氣。致死報復。在京之洋兵有限。續來之洋兵無窮。以一國而敵各國。臣愚謂不獨勝負攸關。實存亡攸關也。我國家與泰西各國通商。垂六十年。准其各省傳教。平日教民。倚勢魚肉鄉里。以洋教士爲護符。地方官或者希圖了事。抑制平民。亦屬不免。民心怨忿。仇視教民。是皆臣等辦理不善。貽害至今。負罪實甚。臣何敢謂民教相仇。其曲全出於民。特任命自相報復。殊失國體。譬如鄉里之間。兩家有隙。而子弟僮僕。肆行鬪狠。燬隣居之室。而殺其閹人。爲家主者。不能禁止。而鄰居之詰問。必不向子弟僮僕。而向家主。爲家主者。又烏得以子弟僮僕。不受約束。而置身事外。以小喻大。其理相同。且泰西各國之教。有宗天主者。有宗耶穌者。傳天主教者曰神父。傳耶穌教者曰牧師。該匪亦不辨爲所傳何教。統以洋教呼之。而俄國向宗希臘。日本向宗佛教。該二國從無入內地傳教之事。該匪更不知何國有傳教之人。何國無傳教之人。見異服異言者。統呼之爲毛子。銳以彌薙爲快。無論勢有所不可。理有所不宜。且我駐洋各使臣。非銜命而出者乎。若各國以我殺其使臣。而不勝忿忿。先殺我使臣以償之。是直易刃而自殺其使臣也。朝廷方賜各使館蔬果米麥。以示懷柔。該匪乃倚驕。將爲護符。肆行攻擊。外人轉疑朝廷陽欺陰袒。謂非縱令恣意凌轢。其誰信之。夫使館無恙。將來與各國復歸於好。各使臣受皇太后皇上懷柔之恩。自當激發天良。剖言禍之肇自拳匪。猝不及防。非朝廷姑息所致。釋其本國疑忌之

心事半功倍。轉圜較易。若使館盡燬。使臣盡戮。則我皇太后皇上。此時懷柔之恩。外人烏從而知之。欲自釋於各國。雖百喙亦無從解免。今各國紛紛調兵。以代勦匪爲辭。疑之者謂乘機窺竊。信之者謂其心無他。臣愚莫測其究竟。而拳匪種種無法。早當痛勦。本不待外人諄請。更何待外人代庖。臣愚請保全使館。爲將來轉圜地步。一面嚴旨切責提督董福祥。飭令甘軍悉行退紮城外。不許重至東交民巷。比暹匪徒。向各使館攻擊。違者即行正法。使兵相離。匪勢較弱。則勦除亦較易。一面仍請責成大學士榮祿。尅期將拳匪一律驅逐出城。以救燃眉之急。再圖勦洗。永杜後患。臣亦知飛蝗蔽天。言出禍隨。顧念存亡呼吸。區區螻蟻微忱。不忍言亦不忍不言。是用冒死具奏。其第三疏曰。竊自拳匪肇亂。甫經月餘。神京震動。四海響應。兵聯禍結。牽掣全球。爲千古未有之奇事。必釀成千古未有之奇災。昔咸豐年間之髮匪。捻匪。負隅十餘年。蹂躪十數省。上溯嘉慶年間之川陝教匪。淪陷三四省。竊據三四戰考之。方略見當時興師振旅。竭中原全力。僅乃克之。至今視之。則前數者皆手足之疾。未若拳匪爲腹心之疾也。蓋髮匪捻匪。教匪之亂。上自朝廷。下至閭閻。莫不知其爲匪。而今之拳匪。竟有身爲大員。謬視爲義民。不肯以匪目之。亦有知其爲匪。不敢以匪加之者。無識至此。不特爲各國所仇。且爲各國所笑。查拳匪揭竿之始。非有槍礮之堅利。戰陣之訓練。徒以扶清滅洋四字號。召不逞之徒。烏合肇事。若得一牧令將弁之能者。蕩平之而有餘。前山東

巡撫毓賢養繼於先。直隸總督裕祿禮迎於後。給以戰具。附虎以翼。夫扶清滅洋四字。試問從何解說。謂我國家三百餘年。深恩厚澤。浹於人心。食毛踐土者。思効力馳驅。以答載覆之德。斯可矣。若謂際茲國家多事。時局維艱。草野之民。具有大力。能扶危而爲安。扶者傾之對。能扶之即能傾之。其心不可問。其言尤可誅。臣等雖不肖。亦知洋人窟穴內地。誠非中國之利。然必修明內政。慎重邦交。觀釁而動。擇各國中之易與者。一震威權。川雪積憤。設當外寇入犯時。有能奮發忠義。爲滅此朝食之謀。臣等無論其力量何如。要不敢不服其氣概。今朝廷方與各國講信修睦。忽創滅洋之說。是謂橫挑邊釁。以天下爲戲。且所滅之洋人。指在中國之洋人而言。抑括五洲各國之洋人而言。僅滅在中國之洋人。不能禁其續至。若盡滅五洲各國。則洋人之多於華人。奚啻十倍。其能盡滅與否。不待智者知之。不料毓賢裕祿爲封疆大員。識不及此。裕祿且招攬拳匪頭目。待如上賓。鄉里無賴棍徒。聚衆千百人。持義和團三字名帖。即可身入衙署。與該督分庭抗禮。不亦輕朝廷而羞當世之士耶。靜海縣之拳匪張德成。曹福出。韓以禮。文鞠之王德成等。皆平日武斷鄉曲。蔑視官長。聚衆滋事之棍徒。爲地方巨害。其名久著。土人莫不知之。即京師之人亦莫不知之。該督公然入諸奏報。加以考語。爲錄用地步。欺妄君上。莫此爲甚。又裕祿奏稱。五月二十夜戌刻。洋人索取大沽礮臺屯兵。提督羅榮光堅却。不允。相持至丑刻。洋人竟先開砲攻取。該提督竭力抵禦。擊壞洋人停

泊輪船二艘。二十二日。紫竹林洋兵分路出戰。我軍隨處截堵。團民分起助戰。合力痛擊。殺燬租界洋房不少。臣詢由津避難來京之人。僉謂擊沈洋船。焚燬洋房。實屬並無其事。而我軍及拳匪。被洋兵轟斃者不下數萬人。異口同聲。決非謠傳之說。甚有謂二十日。洋人攻擊大沽砲臺。係裕祿令拳匪攻紫竹林。先行挑釁等語。此說或者衆怨攸歸。未可盡信。而誑報軍情。竟與提督董福祥。詐稱使館洋人焚殺盡淨。如出一轍。董福祥本係甘肅土匪。窮迫投誠。隨營効力。積有微勞。蒙朝廷不次之擢。得有今職。應何等束身自愛。仰答高厚鴻慈。乃比匪爲奸。形同寇賊。迹其狂悖之狀。不但辜負天恩。益恐狼子野心。或生他患。裕祿歷任兼圻。非董福祥武員可比。而竟憤憤乃爾。令人不可思議。要皆希合在廷諸臣。謬見。誤爲我皇太后。皇上聖意所在。遂各倒行逆施。肆無忌憚。是皆在廷諸臣。欺飾錮蔽。有以召之也。大學士徐桐。素性糊塗。罔識利害。軍機大臣協辦大學士剛毅。比奸阿匪。頑固性成。軍機大臣禮部尙書啓秀。膠執已見。愚而自用。軍機大臣刑部尙書趙舒翹。居心狡獪。工於逢迎。當拳匪甫入京師之時。仰蒙召見。王公以下內外臣工。垂詢勦撫之策。臣等有以團民非義民。不可恃以禦敵。無故不可輕與各國開釁之說進者。徐桐剛毅等。竟敢於皇太后皇上之前。面斥爲逆說。夫使十萬橫磨劍。果足制敵。臣等凡有血氣。何嘗不願聚彼族而殲旃。否則自誤。以誤國。其逆恐不在臣等也。五月間剛毅趙舒翹奉旨前往涿州解散拳匪。該匪勒令跪香。語多

經問。趙舒翹明知其妄語。其隨員人等。則太息痛恨。終以剛毅信有神術。不敢立異。僅出告示數百紙。含糊了事。以業經解散覆命。既解散矣。何以羣匪如毛。不勝翮薶。似此任意妄奏。朝廷盍一詰責之乎。近日天津被陷。洋兵節節內逼。曾無拳匪能以邪術阻令前進。誠恐旬月之間。勢將直撲京師。萬一九廟震驚。兆民塗炭。爾時作何景象。臣等設想及之。悲來填膺。而徐桐剛毅等。談笑漏舟之中。晏然自得。一若仍以拳匪可作長城之恃。盈廷惘惘。如醉如癡。親而天潢貴胄。尊而師保樞密。大半尊拳匪神而明之。甚至王公府第。聞亦設有拳壇。拳匪愚矣。更以愚徐桐剛毅等。徐桐剛毅等愚矣。更以愚王公。是徐桐剛毅等實爲釀禍之樞紐。若非皇太后皇上立將首先袒護拳匪之大臣。明正其罪。上伸國法。恐廷臣僉爲拳匪所惑。疆臣之希合者接踵而起。又不止毓賢裕祿數人。國家三百年宗社。將任謬妄諸臣。輕信拳匪。爲孤注之一擲。何以仰答列祖列宗在天之靈。臣等愚謂時至今日。間不容髮。非痛勦拳匪。無詞以止洋兵。非誅袒護拳匪之大臣。不足以勦拳匪。方匪初起時。何嘗敢抗旨辱官。毀壞官物。亦何敢持械焚劫。殺戮平民。自徐桐剛毅等。稱爲義民。拳匪之勢益張。愚民之惑滋甚。無賴之聚愈衆。使毓賢去歲能力勦。該匪斷不致蔓延至直隸。使今春裕祿能認真防堵。該匪亦不至闖入京師。使徐桐剛毅等。不加以義民之稱。該匪尙不敢大肆其焚掠殺戮之慘。推原禍首。罪有攸歸。應請旨將徐桐剛毅啓秀趙舒翹裕祿毓賢董福祥。先治以應。

得之罪。不得援議貴議親爲之末減。庶各國恍然於從前縱匪肇釁。皆謬妄諸臣所爲。並非國家本意。棄仇尋好。宗社無恙。然後誅臣等以謝徐桐剛毅諸臣。臣等雖死。當含笑入地。無任流涕具陳。不勝痛憤惶迫之至。

拳亂實紀

二十五年十一月廿六日。山東肥城縣境內義和拳肇亂。殺害英國教士卜克斯。是爲拳亂之始。上命山東巡撫袁世凱奏參肇亂該管地方官。并一面勒限嚴拿懲辦。旋捉獲匪首孟洗汶吳方城吳經明龐燕木李潼關等多名。

二十六年。斬決肥城縣案犯孟洗汶吳方城。給卹建造教堂銀九千兩。天津附近百八十里地方。團匪勢漸猖獗。官兵往勦。敗焉。

三月初三日。山東拳匪蔓延至直隸境內。各國擬派兵至京。官兵與團匪戰于任邱。統帶官及知府負傷。兵士死者甚衆。○十三日山東團匪搶掠高密城外鐵路公司。管路工人紛紛逃至濰縣膠州避難。政府派兵七千名向山東進發。天津城內外幼童演練義和拳。幼女演練紅燈照。謠言四起。保定東呂村團匪蠢動。與教民爲難。幾釀禍端。團匪竄至保定。約合萬人屯扎于南門外。徧貼匿名揭帖。聲稱于某日起事。人民驚惶異常。○十五日直隸境內匪勢孔亟。張南登鎮新店一帶。共聚有千餘人。保定府官沈某檄令清苑縣令馳往查

辦。白河溝匪聲言定期拆燬教堂。榮祿電飭督標張某前往相機辦理。文安霸州安州固安雄縣一帶匪卒蠢動。直隸總督裕祿札飭督標派員督兵彈壓。山東東昌團匪擄去教士男女四。直隸河口附近一帶匪黨甚衆。爲首數人由山東至。改名其莊爲義和莊。每當夜靜。到處焚表讀咒。清苑縣南鄉之張天莊謝莊蔣莊張登等村附近一帶。拳匪與教民爲難。教民先有準備。相持至兩點鐘之久。西苑縣令帶練軍馳往彈壓。兩下皆互有損傷。○二十二日團匪潛至京師。徧黏招帖于教堂。聲言三月杪起事。與教民爲難。法教士某見之。咨照步軍統領衙門派勇保護。○二十七日保定南門外姜家莊團匪聚集二千人。相約往攻有教民之村莊。教民逆知之。先期整備以待。至日方晨。拳匪網至。彼此相持許久。互有損傷。總署派馬兵一隊至通州以爲防禦。四月初三日。山東臨清匪勢漸盛。大有發難之勢。山東各處徧貼招帖。其詞云。神助拳。義和團。只因鬼子鬧中原。勸奉教。乃霸天。不敬神佛忘祖先。男無倫。女鮮節。鬼子不是人所生。如不信。仔細看。鬼子眼睛都發藍。不下雨。地發乾。全是教堂止住天。神爺怒。仙爺煩。伊等下山把道傳。非是謠。非白蓮。口頭咒語學真言。升黃表。焚香烟。請來各等衆神仙。神出洞。仙下山。扶助人間把拳頑。兵法易。助學拳。要擯鬼子不費難。挑鐵道。把線砍。旋再毀壞大輪船。大法國。心胆寒。英吉俄羅勢蕭然。一概鬼子全殺盡。大清一統慶昇平。京城內外團匪布造。

謠言云。在溫泉山煤洞中掘出前明劉青田所書石碑一方。其文曰。庚子之年。日照重陰。君非桀紂。奈佐非人。最恨利約。誤國殃民。上行下效。民冤不伸。原忍至今。羽翼洋人。趨炎附勢。肆虐同羣。逢大曹怒。假手良民。紅燈下照。民不迷津。義和團教。不約同心。全重漂洋孽。時逢本命宮。待當重九日。剪草自除根。京城東安門內河沿各巷。有人自號義和團教師。小兒從之。練拳。日繁有徒。○初八保定附定出有私黨。名曰紅燈照。專十夜間出外行事。日間並不見蹤跡。直隸各處匪勢甚盛。焚毀距北京西南二百里之來順村法國教民房屋。殺戮教民七十三名。○廿一日各國使臣集議調兵入都。教民避禍于京師者踵趾相接。涿水村天主教民爲匪圍殺。教民七十三人。半爲所焚斃。有欲脫逃者。亦被截殺斃命。○廿三日。楊雲峰副將奉派至涿水縣彈壓拳匪。中伏陣亡。所部馬隊七十餘人。悉遭屠戮。督署聞報。添派馬兵一隊前往痛剿。初涿水定興交界處村民奉教者衆。有武舉某相遇必怒色向之。而教民亦不之懼。兩不相下。積嫌成仇。一日該舉人與教民某訟於官。不得直。罰令該舉人出制錢四百千。酒菜二十席。該舉人引以爲恥。欲報之而苦無良策。會山東義和團方起事。聞有異術。於是破家傾產。聘數人至該村。教平日附從於己而能爲出力者。此數人儼然以大教師。二教師。三教師等自名。誦咒弄鬼。焚香播神。幾無虛日。教民知禍將及己。即報於官。縣令祝大令據報詳稟上臺。皆以爲若輩徒自擾。何足爲大患。旋各教士亦懇請豫爲保護。

姑令馬隊營分統楊雲峰副戎率其部下往。僅僅七十餘人。合計一哨半。是時由保定調至之玉統領部下馬隊尙未至。團匪得信語。人曰。本期衝成而後發。今事急。且試之。號召大眾。連日非焚教堂。即殺教士。紅光四起。橫屍徧衢。巨禍已成。警信疊至。當道於此。方悔初時之失算。然猶未拒官也。無何楊副戎督隊至。十九日遇團匪。知難理喻。與之戰。不及裝彈。幾覆軍。下令速退。匪襲其後。未數步。轉身發槍。皆應聲倒。殺匪甚多。次早屍可檢者得十八人。所謂二教師神通廣大。能赤手抵當槍炮者。亦與焉。餘匪逃時。回頭誓曰。必得楊某而後甘心。二十日副戎出。復殺十數人。及至二十三日。匪衆之裝束。大非昔比。巾帶皆紅色。衣紫衣。副戎領兵直前。大股匪復退去。蓋誘兵計也。副戎不悟。追過村落。深處伏發。馬驚竄。副戎先中槍。刺傷胸部。急以刀抵格。而第二槍已中喉。不可救矣。從員二名。亦被刺死。查辦團匪之某道。即以馬隊覆沒。楊副將亦死之語。飛報直督裕祿。即日撥馬隊一營。次日復撥耿鳳鳴所帶之練軍二營。相繼往。二十七日更添派馬隊二營。步隊一營。○廿五日。清苑縣附近某村團匪殺斃天主教民六十餘人。京中順直門外南下窪地方。時有團匪教童子習拳。日凡數起。或向詰問。則自稱爲扶清滅洋之大會。並云京中大員某某。京外大員某某。皆入會爲頭目。吾輩奉命教練童子若干萬人。保定南城旁之文昌宮及東關王家胡同。均有愚民集衆練拳。日盛一日。一遇教民。便加非禮。○廿八日。京城四處徧貼揭貼。聲稱二十九日將

拆毀同文館大學堂等。所有師徒均不饒放。各堂學生聞之。適是日禮拜。相率托故暫避。○廿九日焚毀琉璃河車站。

五月初一日。團匪進襲長辛店盧溝橋二車站。火之。截斷電線。津城戒嚴。各公使齊至總署。督將調兵入衛。慶王以敵國可妥爲照料。毋庸趣召外兵慰之。語聞於端王。竟謂有此舉。然後來此人。亟宜撤而去之。俾外人無可鬧處。慶王謂幸有此舉。外人始遇事來商。否則各任縱橫。禍伊胡底。○初二日太后在頤和園得信大驚。調兵一二營保衛頤和園。燒燬京津鐵路。拳匪由京犯關。焚燒豐台車站及機器局。法國工程師受傷。比國工程師被圍。天主教民五百餘人。逃避北京法國大禮拜堂。京榆鐵路停車。榮祿出京巡察馬家堡豐台一帶。端王諭虎神營將校督率軍士分赴永定門內外。與武衛營聯絡一氣。步軍統領添派兩翼兵丁在城內東交民巷各使館左近晝夜巡守。豐台村民藉勢焚站搶物。總署聞信。調兵百餘人保護東交民巷各使館。步軍統領崇禮親往長辛店。榮祿率兵隊數百人。到馬家浦。再至豐台。將全村逐家搜索。抄有車站物件者即行斬決。○初三日。燬斷蘆保鐵路。京津鐵路不通。裕祿聞豐台之警。檄飭武衛前軍統領聶士成撥調部下三營。于初一夜間特開兵車運往豐台。○初四日修復京津鐵路。火車仍可通行。在長辛店之法國工程師安抵北京。官兵二十名駐扎長辛店。藉資保護。武衛後軍駐北京鐵道之南。神機營駐鐵道之北。楊

統領駐高牌店。帶武衛前軍三營。邢統領帶前軍馬隊駐保定西關。查察定興安州一帶。開平馬隊保護原處。不便調動。唐山有武衛左軍撥營駐扎。永定門外卒獲毀鐵路電杆之匪徒八名。經鐵路公司審問後。押解順天府懲辦。永定門駐紮之武衛中軍移營至蘆溝橋駐扎。河間府臥佛堂地方聚集團匪數千。焚燬教堂。戶部札調神機營保護倉庫。支搭棚帳四十餘座。由蘆赴津之武衛前軍後路隊伍分撥五處駐防。一教場。二武庫。三河東溝子。四南製造局。五開口。○初五日長辛店地方團匪縱火橫行。西人均避匿近處一小山內得免。團匪俱係紅布繫腰。其中以二十歲內外之人居多。所持者皆木棍長槍鐵刀之類。旂幟紅色白邊。中嵌白圓心。大書保甲義和團字樣。涿州雄縣兩處拳匪最熾。各城門均爲其把守。稽查出入。○初六日蘆保鐵路工匠廿三人逃至天津。皆比利時人也。傷疾交作。外有七人並無下落。○初七日法比二國工匠三十餘人并婦稚多人由保定至京。沿途遇阻力戰。致傷且死者四人。不見六人。總署因比使往吉力詆華兵庇匪藐客。允許調派俄國可薩克馬兵前往彈壓。○初八日焚毀黃村車站。京津鐵路不通。當亂作時。聶士成部下武衛前軍禦之。斃匪一二十人。官軍亦有傷亡。裕祿派天津練軍左營步隊兩哨。星馳往助。焚掠津郡南梁王莊郭村及西北炒米店等處。裕祿飛檄武衛前軍後路勇丁堵剿。團匪蜂聚涿州涿水各山內。官兵按兵不動。匪效死自守。天津紫竹林租界各國自

行派兵護守。督署派何統領撥左營隊伍二哨在紫竹林一帶嚴防。裕祿以機器局並冰師管輪等學堂爲洋人出入之地。難保團匪不乘間覬覦。特准該局總辦之請。迅撥練軍移駐該營。以防意外。德兵五十名與兵三十名到京。統崇禮迎護入城。端王諭撤虎神營兵歸入各廠聽候調遣。後選營中所用名爲神威炮者十尊。運至北流內設防。東華西華兩門安設柵欄。只容一人出入。北洋大書院相近之泥城門外。上貼有揭帖。其言云。我皇即日復大柄。義和團民是忠臣。只因四十餘年內。中國洋人到處行。三月之中。都殺盡。中原不准有洋人。餘者逐回外國去。免被割據逞奇能。國聞報上多謬妄。亂語胡言任意登。該報因有日人保。故意造謗。誣我們。茲特示爾國聞報。此後下筆要留神。倘敢再有誹謗語。定須毀屋不留情。衆家弟兄休害怕。北京今有十萬兵。待等逐盡洋人後。即當回轉舊山林。○初九日天津匪勢益熾。西兵登岸。西人出入佩鎗。京津火車不能如期開放。保定大亂。容城縣有兩教士被殺。聶士成督武衛前軍中路右營。暨後路右營步隊全數合于親軍馬隊一營。馳赴黃村及蘆溝橋等處。勦辦拳匪。清晨乘坐火車前赴蘆發。見有一隊手執軍械之人。將鐵路佔住。不任前進。聶士成諭令速退。不聽。因令各兵一衝上前。一面又諭之曰。鐵路乃國家產業。豈可作踐。該匪民等卽破口詈罵。謂爾等得有洋人賄賂。故將我等虐待。實與仇人無異。并將石磚拋擲。又復開放槍彈。甚至罵各兵爲洋人。當被擊斃兵士四人。軍門以若

輩無知。仍約束各兵不得鹵莽動手。一面令一哨官前去解散。不料復爲匪目槍傷。軍門知不可以理喻。即命開放洋槍。斃匪十餘人。匪等即四散。開放洋槍。向兵士轟擊。致又被轟斃兵士六七人。軍門乃令機器快砲兵上前攻打。連珠開放。其時兵士又被轟斃三人。致各兵等悉皆怒不可遏。捨命追擊。一路追至村中。當時房屋什物等項。概行焚毀。所有亂民亦悉行擊斃。是役共焚去村莊四處。斃匪四百八十人。兵士損失十二人。守備一人。至四十八點鐘後。上諭到來。將軍門中斥。不應擅自攻打。着飭退往蘆台。蘆漢鐵路工程師並鐵路辦事西人二十五名。欲避匪之亂。由長辛店逃出時。均被匪殺傷。匪聲言將于是日燒北堂。爲樊主教所聞。于是向法德意奧各公使處借兵四十名。往西安門保護該堂。焚耶坊車站。俄使以廷訓告總署曰。貴國願藉客兵以平禍亂。敝國願承斯乏。北方不足憂也。俄使遣派可薩克兵一隊。前往蘆漢鐵路工程處保護俄人回京。途中被匪截擊。該匪愈聚愈衆。卒爲俄兵擊斃十五人。始行星散。俄人二名受傷。英國教士二人在京城附近被害。焚燒直隸萬全車站。拆毀京津軌道。各國公使電請天津各該國提督各派衛隊一百名晉京。美國水師提督時在大沽。即行派兵登岸。以便入京。○初十日。京津消息中斷。直督命發火車一帶以探之。行抵耶坊。鐵路已斷。車站已焚。有比國工程師二人在離天津五里之某處。爲拳匪所殺。該拳匪揚言定于今晚侵犯天津。天津嚴加防備。拳匪大隊由

京乘坐鐵路火車至津。一路將鐵路拆毀。并焚燒黃村車站鐵路橋梁。盡遭燬去。焚安定車站。京城某處地方殺斃英教士二人。俄兵四人因遭拳匪殺傷。俄國特調可薩克馬兵五營火速進京。拳匪恐俄兵即至。將天津鐵路毀壞。以阻俄兵。政府派兵二營駐扎保定。一營駐扎涞水。以資彈壓。保定清苑縣令陳鴻保以不能將肇事之團匪首犯擒獲。被議革職。天津西兵入京。第一次英美意三國兵進發。第二次俄法奧日四國兵進發。行至楊村停車。天津華官允西官之請。欲發火車載西兵入京。惟鐵路毀壞。車不能行。○十一日。太后將由順和園還海。各大員眷屬多逃。京津車路仍阻不通。拳匪橫亘鐵路。政府不許西兵乘火車。西兵乃改就水程至通州。西兵陸續到天津。聶軍與拳匪戰于楊村。不分勝負。副都御史何乃瑩出京往查順天府屬永清縣團匪滋事。殺英教士孫孟二君案。天津各國兵艦派兵登岸。豐台焚站。亂耗傳入京師。總署咨照步軍統領崇禮撥兵百餘。往保東交民巷各使館。崇禮旋親赴長辛店查辦匪黨。京津鐵路再被拳匪拆毀。○十二日。匪踞涿州。保定火起。盧保路斷。亂事愈迫。各教士皆避入使館。耶坊蘭佛車站俱火。英水師七十帶兩機器砲往探。京師永定門外之東管村居民多奉耶教。團匪率眾網至。戕殺老少男女數百名。并火其村。焚羅發車站。京津消息不通。天津有西兵六百。大砲六尊。人心惶惶。異常驚駭。團匪到北倉。官兵在涿州附近殺斃拳匪六百名。拳匪殺害北

京附近耶教士三十名。美國派兵于通州。保護教士。團匪與俄法日三國兵戰于天津城外。拳匪敗退。死二十餘人。○十三日。火京師跑馬廳。聶軍與拳匪戰于楊村。各國公使堅請覲見皇上。面奏機宜。焚燬羅發鐵路車站。官兵與拳匪接戰。殺斃拳匪六百人。天津西兵預備進京。爲鐵路官員所阻。不果。命聶士成帶兵三千人保護京津鐵路。英美教士一大隊并比利時工程師多名。由保定乘船至津。中途爲拳匪擊斃四人。受傷四人。天津西兵携帶軍械前往保護。初聶軍與拳匪戰于落堡。炮燬匪村五處。斃匪六百餘人。政府聞之。以聶軍不分良莠。不判首從。燬村多至五處。殺戮多至六百餘人。大爲震怒。嚴旨申飭。中有倫因此激成變故。惟該提督是問等語。聶軍聞遂即遵旨率隊仍回蘆台。○十四日。各使館勢甚岌岌。美使致電天津求援。團匪日夜持械。百十爲羣。揚言奉旨逐殺洋人。董軍入都約千人。其所聲言亦相同。匪佔深洲。火通州。京中派兵一隊前往救援。京師內外各城門。每門防守之神機虎神各營兵二百餘名。各按本城本旗分防。各旗以次而分。慶王府戶部街南御河橋等處。各駐兵二百名。統計防守官兵有四千餘名。其兩營未經調遣者。每日赴各城兵廠內。以便點名調遣。焚燬通州郵政局。安徽姚提督某自甘肅人。都在市上遊行時。徧地皆紅巾紅帶之團匪。聲言須殺鬼子。姚叱之曰。昇平世界。汝輩勿得妄言。汝輩今欲殺鬼子。當看汝輩將爲鬼子殺也。匪譁然曰。二毛子來矣。匪稱洋人爲毛子。稱入教及稱揚西人之華人。

爲二姚力言非是。匪不聽。曳下馬。姚力辨。匪乃爲燒香焚表。凡人不自承爲二毛子者即爲燒香一
燒不盡即以爲真 二毛子必殺無赦。匪已將殺姚。有京營官李某馳馬至。力爲剖辨。乃言須待大師兄至再說。良
 久至。則瞠目時許曰。此人必須殺。無須再辨。即殺之。李爭曰。頃汝輩已允不殺。何忽背前言。
 匪欲并殺李。李策馬馳去。李身携銀數百。及一金鑊馬等。咸爲匪持去。有營官撫尸痛哭。并
 爲匪所殺。○十五日。西兵自津乘火車進京。沿途修築車路。俄法兵二百七十五名繼進。與
 英美兵合。拳匪焚通州電報局。四出劫掠。官兵不能彈壓。殺日本書記生杉山彬。董
 福祥之兵也。先是杉山彬出城迎視。由京入津之西兵。董軍呵問何人。對以日本使館書記
 官。兵斥曰。書記官乃僭坐紅拖帷車乎。即提其耳下車。杉山知不可理論。乃好言曰。請見大
 帥。當面謝罪。兵曰。無庸。杉山又曰。然則將來當請大帥至敝使館。敝公使當爲謝罪。營官等
 遽抽刀破其腹。事聞日本公使。請與尸入城殮。爭良久。乃許之。端邸後見董。伸五指稱之曰。
 汝真好漢。○十六日。團匪數千擾北倉。武清縣屬馬家場。范莊。洪家墳。牛房。龍莊。韓村。各
 處教堂。及教民家。團匪均毀之。焚毀通州各教堂房屋。各教士紛紛逃往北京。殺戮美教
 會內華教民廿人。普魯脫斯頓教堂之人。棄教堂而去。約有西人七十餘名。携帶教士無數。
 均屯聚于美國之監禮會堂內。有西兵一小隊保護。匪占靜海縣。塘山各工程師。請派兵
 前往保護。殺害距天津六十餘里地方之華教民五十餘人。焚燬蘭坊車站。政府以匪

亂甚亟。無人可勝。派往辦理團匪之任。軍機處各大臣會議時。榮祿謂急宜趕調李傅相接。任直督。蓋以裕祿上摺乞休也。各國兵一千七百名向北京進發。俄兵一千七百名帶同大砲十五尊。當于今晚晉京。西兵與團匪戰于京津鐵路之中。匪徒死者六十人。燒燬外城姚家井一帶教民房屋。及彰儀門外之西人賽馬場。○十七日團匪擬縱火焚燒各國公使館。及西人跑馬廳。比意法工程師六人。由保定逃至天津避難。在途爲團匪所殺。焚燬東城內天主教堂。倫敦會大教堂。美教堂。海關辦公各洋房。以及他項房屋。董福祥部下之兵與西兵開仗。董軍戰死六百人。董軍本奉命保守鐵路。適西兵到來。阻不使前。西兵不從。遂致開仗。團匪一隊內有兵士多人。攻擊在蘆發之各西兵。各西兵接連開鎗回擊。轟斃拳匪五六十人。受傷多人。駐京英美日各公使。以京師情形岌岌。疊次會議。定欲呈謁皇上。懇請復行新政。俄法兩國公使。以爲難得機緣。豈容錯過。不如此瓜分之爲愈也。○十八日。焚通州。焚燬北昌馬家舖車站及教堂。教士由美兵保護入京。河間府有教堂數處。亦爲匪所毀。人無損傷。政府派神機營兵士二十名駐扎長辛店。團匪侵犯天津城內天主教堂。暨各教堂。以及城中房屋。半遭焚燬。匪等旋即竄至鐵路車站。適與俄兵相遇。彼此相距祇五十碼地。俄兵開放大砲十五門。斃匪三四百人。大隊團匪旋又兩面來攻。租界時英國兵士二百人。經已調往塘沽防禦華兵。幸有俄兵二千人。在界內保護。暫免于難。

是晚京城火聲鼎沸。皆在東西大街。已而槍聲大作。因頭條胡同西口爲王府大街之南。即長安牌樓十字街也。街之西爲奧國使館。團匪鼓噪逼近奧署。洋兵以槍擊之。又燒順治門外教堂大柵欄。教民所開之糧食舖兩家。○十九日。官兵在北京城外築造土壘嚴加防堵。以阻西兵進。又將砲位對准美國教堂及英使署安放。團匪圍攻使館。鎗死十餘名。傷者多人。因即敗竄。前門大街一律閉市。縱燒天津各教堂教士住宅爲之一空。燒毀鐵路車站。計值三百餘萬金。俄使向總署索賠。總署難于對付。轉電催盛宣懷入京商辦此事。○二十日。侍郎那桐許景澄出都。行至豐台。爲團匪所截。牽入壇內。將甘心焉。二公再四申說。皆不聽。曰。吾國民知有祖師之命。不必問朝廷之命。二公此行。必將通情洋人。以害我等。然旣爲朝廷大臣。未便遽加誅戮。升表請祖師示可也。乃升表至三道。皆不起。至四道。乃有轉機。團匪曰。赦則赦矣。然公等毋得前行。即回京覆命可也。縱火燒焚大柵欄德記藥房。延燒糧食店燈市街觀音寺珠寶市廊房頭二三條胡同楊梅竹斜街燈籠胡同羊肉胡同排子胡同西河沿東西荷包巷正陽門城樓。共計店舖四千餘家。火至天明未熄。當火起時。匪禁火會救火。德記藥房。隔壁廣德樓。用水撥救。匪謂是穢水。致干神怒。是以延燒至此。故被災各人。不怨匪徒縱火。反恨廣德救火。○二十一日。停泊大沽口外之中國魚雷船之管帶及其餘諸人。先行逃遁。爲西兵擄去。西后簡端王管理總理衙門事務。各公使照會

政府不認之。西兵入京與團匪交戰。團匪死傷甚多。天津武備學堂起火。武備學生向租界開砲。英德兵應之。團匪居民死者頗多。焚燒京城電報局。各國艦隊向大沽砲臺開砲。先是我國在大沽口沈設水雷。以拒各國水兵登陸。各國限我國以某日即行將水雷撤去。若于期限內不撤去。即開砲轟擊。我國官兵不允從。各國兵艦至是開砲。大沽砲臺開砲轟擊。英德二國兵艦受傷。各國艦隊開砲還擊。俄國陸兵在陸上夾攻。砲臺爲之粉碎。及至天曉。各國水兵上陸。追逐我國官兵。殺斃數百人。羅榮光死之。我兵逃遁一空。砲臺遂爲各國占領。○廿二日。天津地方官召團匪頭目至署。詰以既稱義民。因何有搶劫物件之事。該匪力言必非團衆所爲。及出署。即率衆往查劫物之人。當時殺斃四人。捉獲三人。解至縣署。以分自白。團匪在途中遇見官長。亦謬爲恭敬之狀。惟遇有短衣窄袖以及平素所稱洋務人員。必以刀叉相向。俄國山旅順發遣陸兵四千人往大沽。我兵與西兵戰于老龍頭及軍糧城。○廿三日。德國公使克林德乘轎至總理衙門。行至單牌樓北爲團匪轟斃。或云董軍與武衛軍所爲也。初總署王大臣東請各國使臣至署會商。各國使臣聞有埋伏。風聲。故均未前往。德使帶同護兵前去。甫至總署時。即有一隊華兵僞爲迎迓。不知即係埋伏。故德使戾止後。立即開鎗將其擊斃。其時適有一英國武員帶同藍衣兵在彼見之。擬欲上前援救。亦爲華兵擊傷。德使屍骸。即由德兵趕緊搶出。一面即縱火將總署焚燬。團匪

焚燒直隸總督衙門。○廿四日。甘軍在王府大街長安牌樓北與奧使署洋兵開仗。鎗砲聲大作。飛彈如雨。忽忽有聲。竟夜不絕。○廿六日。官兵開砲攻擊天津租界。勢甚危急。京城各衙由董軍把守。馬玉崑自山海關帶八營入都。宋慶帶二十五營陸續進發。董軍武衛軍大肆焚掠。孫中堂徐中堂錢尙書宅及肅王府。○廿七日。攻擊租界之華兵。被西兵擊退。是役救援天津之西兵共有二千人。督帶者爲都司華勒君。當經將天津砲臺擊至一無聲息之後。英美二國兵士。即首先進入租界。他國兵士亦接踵而入。是日俄兵陣亡者四人。受傷者三十人。他國兵士受傷甚輕。命聶士成克復大沽砲臺。○廿八日。團匪又攻使館。槍聲四起。御河橋一帶尤甚。因翰林院後面爲英使署。各國防衛之兵。皆聚於此。方對擊有教民多人。自使署竄出逃生。携有槍械。逢人便擊。官兵團民亦追擊之。以故道無行人。連日搜殺教民焚燬房屋。所殺教民多置燈市口燃其屍。驗看月官大臣陳侍郎學棻。驗看回時。行至東華門。被官兵阻截。先被槍擊倒地。復以刀刎其頸。隨即斃命。月官十三人均受傷。有斃命者。董軍專以焚殺爲事。內城各參舖均遭其毒。端王之營官哈吉成。亦被董軍殺斃。京官出城有坐車者。悉被董軍將車搶去。幾至無車可坐。六月初一日。攻英使署。西兵走入堂子胡同。至夜槍聲愈密。○初二日。天津大火。○初三日。山東高密工程處。于是夜被匪攻擊。德工程師等力拒之。華人死傷甚多。房屋多被燬。德人

僅以身免。○初四日。拳匪華兵復攻天津租界。相持至七點之久。兵匪大敗。○初六日。盛京團匪焚燒教堂醫院。殺戮教民。西教士逃至牛莊。○初七日。在京西人被圍于英使館中。情形危急。政府電飭新疆巡撫將遣戍之戶部侍郎張蔭桓就地賜死。○初八日。京城各國使館除英法德三國未被焚燬外。其餘房屋盡已遭焚。禁城內門爲拳匪所佔。內城中門爲德兵所據。并將所奪華人之大炮二尊安置於上。以爲抵禦之計。其餘城門則仍歸華兵拒守。并亦置有大炮。京津中間。由董福祥軍門帶二萬名駐守。又有陳澤霖軍門亦帶兵一萬名。一處屯紮。以阻各國援兵。馬軍十三營駐河東。練軍駐馬家口。每夜彼此遙擊。勝負不分。團匪三萬餘佔據衙署公所。有詢以何日出仗者。僉曰時未到。不輕舉。○初十日。天津華軍炮隊於天明時帶炮六尊由租界東北進攻。各國聯軍即用英艦運岸之十二磅彈大炮及法日二國炮數尊還擊。英艦炮手炮無虛發。能中三千碼之遠。共開放一百四十五門。轟斃華兵頗多。兩邊炮聲不絕。直互擊至十二時之久。津城所駕炮位開放過多。先行損壞。又用兩小炮相助轟擊。是役也。水師軍死二人。其餘各軍中死傷數目。尙未訪聞。華軍於下午三點鐘停炮。統計華軍中所開各炮內。惟四門甚爲準則。迨至停戰。津城東南兩處均被攻毀不堪。後由水兵一隊。暨英國所招之頭隊華兵營兵士帶一九磅大炮往攻津城外。面所過之處。房屋均遭焚燬。情形頗厲。當爲城外華兵開放槍炮抵禦。以致不能前進。祇得退回。

英統兵官勃魯斯君左脇受有重傷。部下兵士兩名亦爲炮擊斃。其餘無甚死傷。○十一日東交民巷尙存英國及某國欽使一署。亂兵陸續陣亡二千餘名。拳匪死傷尤夥。頭目多被快槍擊死。連日亂兵拳匪莫敢逼近使署。拳匪法術被西兵破盡。有瓦解之勢。○十二日華軍開炮轟擊天津租界。其故因日本馬兵先於昨日在東邊尋擊華人。故華軍遂由原處進攻。此次華軍炮手技藝甚精。幾使各聯軍有退避之勢。○十三日各國聯軍總統調齊兵士六千名及日本馬隊五百名。攻擊天津府城。行近賽馬場。遙見直隸提督聶士成所部華軍約四千名在彼扼守。營中有克虜伯炮六尊。遂一面互相鏖戰。一面令日本馬隊繞道他處包圍。相持至二點鐘之久。聶軍炮聲漸止。聯軍遂飛步狂追。聶軍無從抵拒。紛紛散逃。而日本馬隊已繞至陣後。揮刃亂砍。從屍林中衝開一路。聶軍旋逃入城中。爭先入門。以致擁擠蹴踏。聯軍自後以炮猛擊。聶軍幾無一生者。惟見屍身仆於血泊中。縱橫狼藉。所携六炮悉被聯軍奪回。是役也。日本馬隊死六人。傷者不少。俄英日步兵則死傷寥寥無幾。華兵死三百五十人。聶士成陣亡於天津城西八重台地方。○十四日官兵攻租界北面。與西兵相距不及二百碼。槍已上矛。爲俄德法合力擊退。兩軍死傷之數最巨。天津城內扼守甚嚴。華軍於西北一帶次第梭巡。內河之處亦安置大炮。間阻各國傳遞軍情。曾有通信之人。爲華軍開炮擊傷數人。○十七日聯軍佔領天津。自各國洋兵與華兵鏖戰。直至今晨爲止。始將天津

佔據。進城以後。於十二點鐘之內。華兵尙在四圍用炮攻擊。奮力巷戰。無異鼠鬪於穴。殺斃者幾難數計。華人死者尤衆。攻城洋兵約七八千名。英兵統帶爲陶華將軍。日兵統帶爲福島將軍。美兵則由白勒將軍督率。德兵則由某將督帶。俄兵則爲阿西米洛夫統帶。尙有奧兵數名。亦與其事。當將洋兵分兩大隊而行。由日兵爲前鋒隊。於未經攻城之前。先行前進。洋兵共帶炮四十五尊。英國四寸七分徑之水師炮。日本八生特之虜克伯炮。亦均在內。第一隊爲英日美三國兵士。暨奧大利國之水師兵。首先攻擊。于清晨時。即將各炮一起開放。攻打城垣。華兵踴躍還炮。準頭極準。所放開花彈炸裂。亦頗得勢。其狀似有洋人在內相助。上禮拜英水師提督西摩爾君已曾據有西局。後竟棄而不守。致使華兵復行佔據。即在西局中安置大炮。暨麥格星炮多尊。以及一磅頭之快炮。肆行開放。華兵數目有二萬五千至三萬不等。當洋兵前進時。因華兵在西局以火炮轟擊。不利前進。遂先行攻取西局。再行攻城。計戰有三點鐘之久。死傷頗衆。始將西局奪得。局內華兵屍骸堆積。高等人胸。當第一隊洋兵攻擊西局時。第二隊俄德法三國兵士。即進攻駐守天津北首鐵路之華兵。亦是一場惡戰。旋將華兵攻散。據有其地。并奪炮八尊。東北一面。尙有中國土炮臺一座。亦在彼開炮轟擊。俄德法兵遂於槍彈如雨之際。冒險往攻。將該炮臺奪獲。當洋兵兩大隊攻城時。日本游擊兵即乘不備。襲取城門。并用藥將城門炸開。立即佔住。其奮勇處直非等閒可比。惟進

城之後。時已薄暮。然總以日兵爲首先入城。至晚炮聲雖已稍減。然尙不時開放。直至天明。各國洋兵始相率入城。當未進城之先。即在城外暫宿一宵。是役洋兵死亡雖多。然尙不及華兵之以千數計也。洋兵攻殺華兵。幾與刈草無異。華兵死者究竟若干。尙不知其實數。美將軍白勒身受重傷。副將臘斯恭亦受重傷。其帶領水師兵之戴斯船主。死于陣。○十九日。團匪縱火焚燬天津城內各教堂。西教士見機先遁。幸未及難。○二十日。華兵全數退出天津。駐紮于西沽左右。○廿三日。裕祿以天津失守。率兵逃往北倉。旋奔至河間府。○廿九日。李秉衡統兵行至直隸景州。殺教士二人。焚殺教民一千餘家。提督宋慶帶兵一萬退守楊村。以大船二三十號滿裝石塊。沈之河中。并在鐵路上塙有大坑。馬玉崑自天津失守後。頗有叛志。與裕祿之兵一萬人同駐北倉。糧食甚缺少。

七月初一日。蓋州城中拳匪萃聚三百人。日夜演習拳棒。其領袖老師父爲楊某。自稱濟公。長老奉法旨降。凡扶清滅洋等語。先一日匪首分派弟子十二名至城東相距五六十里之山村幽谷中。謂有教民若干。宜盡殲之。于是該匪果由此村搜出教民二百餘名。蓋由城廂內外逃避於彼者。所有婦孺老幼盡屠之。尸橫山野。前日該匪首領又謂縣署差役曰。城南某村某井有人置毒藥於內。宜急向西追之。可獲。於是差人偕其弟子某同往。果獲三人。訊之。直認不諱。遂告村人將井淘淨。又將此三人帶入衙中。官欲詢其所以。而楊某不允。謂

此人皆洋人所指使。以毒吾民。而洩其忿。宜亟殄之。當場一人被人保出。餘二人立斬於階下。官亦末如之何。該城中有紅燈照多人。皆女子也。○初三日山東巡撫袁世凱之軍與甘軍及團匪戰於德州。袁軍小挫。營官二人陣亡。○初六日官兵及團匪圍困直隸河間府之西教士。殺害十一人。○初十日直隸藩司廷雍奉命進京。被匪拘獲。欲加殺害。再三求解。始釋之。惟謂之曰。我之權力祇能及涿州。過此以上。爾之性命。尙未可保。團匪攻營口租界。交戰竟日。俄國砲船二艘。以炮擊營口城。華人及道臺以下各官均沿途逃去。俄兵與各西人均無死傷。○十一日前東撫李秉衡奉命與榮祿會統武衛軍出京統帶大兵。以阻西兵前進。○十八日各國聯軍進入通州城。一直進京。并無阻擋。○廿一日皇上出狩。聯軍破京。先是二十晚十一點鐘。英俄美聯合軍向東便門攻擊。銃炮轟擊之聲甚烈。內俄兵當先激戰。蓋偵得東便門之守兵最少。易于攻破。遂豫意欲先登。然城兵雖奮勇死抵。以衆寡不敵。終不能支。至午後六點鐘時陷落。俄兵先入。各國隨之。方聯合軍之由正面攻城。忽傳有少許印度兵已入城內。原來英公使館與日本公使館之間。有一濠遠通城壁之下。值是時濠水乾涸。可以潛渡。印度兵素知之。遂由此潛入。又城內絕不用意防禦。此處並無一兵一卒守禦。故印度兵得安抵英公使館時。不過午後兩點鐘。日本第九旅團之前衛四十一聯隊。於朝陽門外紅橋左近。由午前六點鐘時分開炮攻擊。城兵應之。激戰愈烈。日本陣地兩便。

皆爲人家屏掩。朝陽門牆壁甚高。日兵不能攀登。且城門裝置又甚堅固。不易輕破。是時日本矢崎少尉率第一中隊之一小隊。南山大尉率第十中隊。進擊城門。亦終不能入。佐伯少佐率前衛大隊。工兵前衛已着手裝置爆藥。欲爲炸城。但城上之彈丸如蝗。風馳雨驟。然日兵尙冒死裝置爆藥不退。城上之砲彈擊下更烈。日兵死傷不少。卒不能完其裝置爆藥之事。於是日本山口師團長命砲兵攻擊城上之守兵。日兵之砲兵陣地在朝陽門外約三一千二百尺之高臺。永田大佐指揮之。以十八門野砲。三十六門山砲。速斷射擊。轟轟不絕。聲震天地。城上之砲亦不少。但奈砲彈欠乏。不能應戰。然尙可間斷發砲抵拒。日本砲兵在朝陽門之北。南向城上砲兵陣地攻擊。城兵難禦。故當其砲之擊發時。隱避。俟其稍息。又出抵之。日兵終不能進。日將南山大尉及矢崎少尉恐有傷失。故於午前十一點鐘引退。未幾。日兵值民家之掩護而進。城上彈丸雨下。將日兵橫斷。日將矢崎少尉遂死於陣中。其後日兵屢欲裝置爆藥。終不能成功。是日傍晚有雨。陰雲密布。月色烏掩。四面悉暗。日將山口師團長遂欲乘機炸城。命工兵第二中隊長土屋善龜爲指揮官。使少尉圍坂等八九人當第一門。伍長杉本周一等七八人當第二門。恐爲城兵所覺。命軍士皆裸體。九點鐘前。先爲準備。由九點鐘着手裝置火藥。未幾城兵忽覺之。以銃炮猛烈擊下。然日兵已敏速配置停當矣。故至九點三十五分鐘時。二門皆爆烈破壞。方朝陽門戰鬥之中。有朝鮮時報記者與觀。被

彈子誤傷頭部。日本二大隊經東便門沿堀而至崇文門。時城門緊閉。此城門與地之間有尺許間隙。日將林大尉携輕便電燈潛入間隙中探頭窺伺。見城內並無人影。遂率兵十餘名由門下入。俄兵隨之。午後八點鐘達公使館。至翌朝留一大隊護衛公使館。以一中隊入戶部掠得白銀二百萬兩。東直門之陷落也。亦是被日兵用黃色爆藥所炸。此門之堅固更勝於朝陽門。故日兵無法可入。至午前十一點鐘時欲裝置爆藥。然城上之射擊猛烈。日本之步兵工兵不能進。只得由其砲兵陣地用炮轟擊東直門城壁上之兵。城兵不能支。遂退下坂壁。日兵遂欲乘此機以破壞城門。然城兵已復盡登壁上。其數益增。俯瞰擊下。日兵不能抵。於是暫退。至夜日將等又暗率工兵裝置爆藥。迄八點半鐘後用三十黃色火藥點以燐寸。遂炸破第一門。時濛濛滿布。四方黑暗紛亂。遂被日兵直至第二門。又下爆藥。將至九點半鐘時又被其破壞第二門。○二十二日各國協議分定區域。由朝陽門至府城劃一直線。俄法占領其東。英美占領其西。日本占領其北。各自設立民政廳。

聯軍移國

二十六年三月初三日。山東亂匪蔓延至直隸。各國皆擬派兵至京。○初七日。駐京英美德法四國欽使奉其政府密諭。聯名致哀的美敦書於我政府。請兩月以內。悉將義和團匪一律勦除。否則將派水陸各軍馳入山東直隸兩省代爲勦平。○十三日。英美法俄各國艦

隊羣集於大沽。致詞政府。謂山東亂匪勢益猖獗。政府若於兩月以內不能鎮撫。則各國聯合以兵力伐之。○十六日。四國欽使所致之書。總督尙未有回文。英兵艦兩艘由滬到津。停泊於大沽口外。英租界工部局運到新式快炮一尊。每點鐘可放一千餘响。以備不虞。英領事葛梅甫君在濟南。迫請東撫竭力設法。將義和拳匪務絕根株。

四月二十一日。美國駐京使臣特調炮艇一艘。駛赴大沽口。英國保護使館之水兵。因牛莊拳匪滋事。本已奉命前往。忽留駐京都。○二十四日。各國駐京公使。因見義和拳匪勢力日甚。北京事勢甚屬吃緊。共相聚議。援中日戰事時調兵士進京之例。各調兵士進京。以便保護使館。法使深以爲是。而美使則頗爲不然。故未定議。○二十六日。各國駐京使臣會銜相請領袖使臣照會總署。逼請速將義和拳匪勦除。否則各國將自行調兵辦理。○二十七日。總理衙門允駐京各國欽使之請。即行勦辦義和團。並許嚴禁該會。

五月初一日。日本兵艦派兵五名。保領事署。英美德艦水師亦將登岸。○初二日。北京至天津之鐵路被義和團毀壞。不能通行。駐京比國使臣率帶護兵百人入朝覲見。各國議定各調兵士進京。以護使館。所調兵士至少以二百人爲額。共計一千四百人。俄國於旅順口亦調集兵士一大隊。一切部署停妥。一得號令。命往保護蘆漢鐵路。即可立刻北上。威海衛英國阿求靈及奧蘭度兩兵艦。載有水兵百名。大炮一尊。起碇駛赴大沽口。○初三日。直隸

總督裕祿傳命不准美兵艦所派進京保護使館之水兵由鐵路火車上裝載進京。駐京各國公使聞信。即行會議。向總署責問。逼請速將洋兵載運進京。總署答以翌日照覆。駐京各使臣因復嚴詞照會總署云。倘果不能立刻任洋兵由津搭坐火車進京。各國即須多調兵士到來。不問華人是否阻止。定須用強進京。英美法德俄意日七使。議各調兵二百名自護使館。德國由青島調派兵艦二艘駛赴大沽口。其餘德國各兵艦俱屯泊於青島。以便事急續調。○初四日。各使聞直督令鐵路委員毋許載送西兵入京事。立刻照會總署。迅咨天津。總署答以詰朝再酌。各使復照稱此禁不除。即當再增大兵。自乘火車入都。不論貴國之允否。美國兵艦奉急命迅速開赴北上。下午四點半鐘。天津特開專車由津至京。所有各國所派之兵數。英國官三名。兵七十二名。法國官三名。兵七十二名。美國官七名。兵五十六名。意國官三名。兵三十九名。日本官二名。兵二十四名。俄國官四名。兵七十一名。兼帶快炮五尊。德兵五十名。○初五日。總署怵公議。電直督諭鐵路委員。備車送各國衛隊入都。今來英美意日兵三百餘名。分護使館。是夜天津俄領事聞警。商請本國三武弁於明晨帶馬隊三十迎護被難西人。○初六日。泊于北直隸海灣及大沽口外兵艦計俄九艘。英德日各三艘。法美意各二艘。俄艦更載陸兵近萬。是晚俄弁帶馬隊行至獨流縣地方。爲村民所圍。俄弁以曾受不准妄發槍彈之軍令。拔刀格鬪。初殺二人。村民仍猛進。有

額束銅箍腰繫紅帶者五人。策馬前導。口中喃喃不絕。俄兵疑即彼中謠言之祖師。即揮刀殺之。更殺其黨二三十人。餘衆始逃。俄弁取其束髮銅箍及刀械旗幟而還。旗係紅邊白心。大書保甲義和團六字。刀械則鏽澀不堪。英使有布告天下公電。內開北方慢客之事。本大臣讓至今日地步。已到盡頭。無可再讓。試觀輦轂之下。拆路燒站。斷電踞城者。延五日之久。華官並不過問。猶未已也。歐美人數輩。竟被華匪謀害於帝鄉。而京津一帶之奉教華民。慘遭劫殺。禮拜堂同被焚掠。甚至在京諸教士。不得不避至本使館。本使館尙有水師七十。五。聊堪保衛。華政府見各國似動公憤。因遣大臣就匪黨而與之議。然仍不以鋤姦平亂爲心。中國雖弱。治區區拳匪。必能掃穴擒渠。第反目爲義民而惜之。則永無撥亂反正之望。且華兵多與匪通。心尤叵測。我等使館。惟且夕間容可苟安耳。德國巡船開色靈奧噶斯達暨芝非安以及益爾的斯共三艘。駛抵大沽口。派兵百人進京保護使館。○初七日。美國首相海約翰照請英國政府相助美國辦理中國目下要務。如中國事勢孔亟。即須相請英國以兵力協助。以保各教堂及各洋人之性命產業。想英國亦斷不致於推却。況中國今日情形。更已不堪聞問。正應使其夢醒之時。何可失此機會。且我英美二國如能合助中國辦事。必較他兩國相助爲優。而中國事機亦定可變而至於上乘。斷不致再有喪失土地之事矣。即關門通商一事。亦可因此而成。不禁拭目以俟也。○初八日。英俄法日意美等國調來保

護使館居民之兵士水手等抵京。共三百三十七人。○初十日。大沽口西兵六百名帶炮六尊登岸。俄兵二千人由旅順口調入京城。俄國公使往告總署云。義和拳匪猖獗太甚。近日以來。日聚日多。恐貴國權力不能壓制。故不得不出爲幫助。團匪一隊與俄法日三國水兵在天津城外小戰一次。西兵得勝。擊斃團匪二十餘人。餘即一閃而逃。日停泊大沽口之俄法兩國兵艦。共有十七艘。○十一日。俄法日本三國之兵與拳匪在天津開仗。西兵獲勝。拳匪死二十餘人。美國續運兵二十五名至大沽。俄兵船泊大沽者共十三艘。俄國政府有明文致中國政府。請准俄國來華代勦團匪以平北省亂事。日本二等鐵甲巡艦喀薩機計載重四千九百八十噸。調赴中國大沽口。俄兵八十四名。法國兵九十二名。續到天津。○十二日。俄兵二千連槍彈等從窪壘沙海口登程。尙有六船預備濟師。英國後路水師提督乘坐巴魯弗兵艦由威海衛至大沽口。華官初尙不准西兵登岸。後因聞西兵不問准與不准。總須上岸。華官無法。祇得言每國只准三十人登岸。不得逾數。言雖如此。然西兵之登岸者三十五。仍不等。華官無奈之何。各國到京之兵士計英國三百零八人。美國一百五十六人。法國一百四十一人。俄國一百零五人。日本九十五人。德國意大利國各八十人。統共九百六十五人。是晚駐京各使電致駐津各領事。皆謂京事甚危。請即火速派兵進京保衛。夜半各領事會議。各派水師弁兵乘坐火車沿途修理鐵路。趕緊北上。當

各西員聚議時。俄法兩領事時至旁邊私議。俄國參將聲稱此時如欲入北京。非有萬人不可。祇俄國能辦之耳。各領事均不應。由是俄法兩國不肯合辦。美國守備言諸君會議若是之久。毫無成見。予惟念我國使臣在京危險。故不問諸君意見。定須趕緊帶兵往援。衆始怦然心動。各國派兵進京之事遂定。而推英提督西摩爾爲聯軍總統。○十三日。俄日等國照會華廷。呈請代爲勦辦團匪。平定亂事。政府拒之。特命趙舒翹前往保定查辦一切。團匪焚燬郎坊鐵路車站。英兵七十人帶機器快炮及九磅頭大炮數尊。乘坐鐵路火車衝突前進。查探確信。聶士成督兵將團匪攻打。擊斃團匪五百人。英相沙侯電諭駐華水師提督。如亂事緊急。准其便宜行事。務須保全英國權勢。以及商務等情。英水師提督西摩得英使三電告急求援。提督即傳令辦嚴發水勇千五百人臨陣結束。持三日糧。自將之。於翌早出塘沽進發。俄國兵艦機略克山西貢抵滬。停泊於楊樹浦。該艦俱俄鋼皮鐵甲。載重九百六十三噸。長二百尺。桅高三十七尺。有一千匹馬力。於一千八百九十七年在聖彼德堡造成。其速率每點鐘可行海程十二英里。船上裝有四寸七分徑口之機器快炮一尊。三寸徑口之機器快炮五尊。二寸六分徑口之炮二尊。一寸八分徑口之炮四尊。并有魚雷管子二個。英國兵五十一名。俄國兵三十五名。德國兵三十一名。共抵天津。各國合兵八百名。英兵居大半。英水師提督西摩將之。美艦統帶某爲副。携機器炮及修路器具木植等乘火

車向京進發。遇鐵路中斷處。即任乘修之責。未幾復有英俄法日兵數百續乘火車而去。泊沽各艦。再以水師登岸。北京各使商定入覲太后。面請速壓拳匪。不然各國將代治。俄廷定計發兵代遏拳匪。惟尙願與各國合辦。香港步兵受命北行。總署不准西兵乘坐火車至京。祇准乘船。○十四日。前德兵由膠州調往北京。到津後有某國出而阻止。堅不許德兵登岸。德兵不從。各國調派進京之水兵。仍未動身。因中國政府不許乘火車進京。故也。西國水兵一千人由津乘坐鐵路火車前往楊村及北京等處。俄兵四千人在北帶河登岸。起程進京。天津續到日本兵三十八名。官一員。英國兵四百七十三名。官八員。炮三尊。德國兵五百零三名。官十七員。法國兵六十一名。官四員。俄國兵二十一名。官一員。炮五尊。○十五日。督帶駐津各西兵之英守備培雷欲借火車一串載兵進京。鐵路督辦唐紹儀以上憲有命不准再借。卻之。培雷不與之言。即命部兵逕發火車。唐命工人拆毀鐵軌。培雷大怒。傳令各兵滿裝槍彈以待。唐亦怒曰。爾可知予爲是路之督辦乎。培雷曰。予不問爾爲如何人。爾倘必欲拆路阻拒我兵。予必先將爾擊斃。唐始不再言。初政府不許西人發電至津。各公使無如何。乃共派一人坐小舟轉輾至津。致信兵船。所有駐紮大沽各兵艦。立即派兵登岸。由火車入都。內以英國兵爲最多。仍隨地屯紮時。所有火車鐵路均由西兵佔踞。俄兵五千人欲在大沽登岸。適遇該國教堂被焚。華官更不能阻止。德國水師提督

彭德門奉德廷命。令其力保德國利益。准其便宜行事。日本續調巡船兩艘。駛赴大沽口。英國水師艦隊。或在威海衛。或在北直隸海灣駐泊。○十六日。停泊塘沽之英兵艦派兵一隊。隨帶機器快炮四尊。在該處登岸。英國阿爾及林兵艦時亦停泊於大沽炮臺口外。裕鼎兵艦亦在大沽口停泊。與各大艦傳遞信息。其飛姆一艦。裝載別艦兵士。駛入大沽口內。德國巡艦依爾的斯。派兵一隊。由大沽乘坐鐵路火車至津。同時有華兵一千人。亦坐火車至津。駐京美國公使調派水兵一隊。由京起行。馳往通州。救護美國教士。天津之俄兵艦派兵一千七百四十六人。馬二百七十七匹。登岸。隨帶有大炮二十四尊。續至兵艦兩艘。載兵千人。旅順之俄兵一千八百人到天津。隨帶大炮十五尊。是晚由津起程進京。英水師提督督帶水兵進京。正在督率工程師等修理鐵路。時突遇團匪等蜂至。滋鬧。當與接戰。各西兵一無損傷。團匪斃者六十餘人。受傷者六七人。各國匪被英兵擊退時。美兵適在該處。兩面開炮夾攻。故得斃匪多人。當若輩初至之際。以爲槍炮不入。無懼軍火。膽量甚壯。其中尤以小孩居多。而擊斃若是其衆。可知若輩之言。實不足以憑信。而愚民竟信之不疑。殊令人有所難解也。○十七日。西兵八百三十四人。內有英兵四百人。携帶大炮數尊。由英水師提督西摩統帶。乘坐火車。趕赴京中。并隨帶修理鐵路之材料無數。及鐵路工程師數名。以便沿途將已經損壞之鐵路修理。該鐵路即爲西兵永遠佔據。以便調派援兵進京。美水

兵數人折回天津。因途中糧食不敷。故特回津購備五日食物。再起程復往俄法兩國兵士二百七十五人乘坐火車前進。以便與各西兵一路進京。駐京日使照會總署。謂如許俄國調大隊兵士進京。則日本調派進京之兵數。自必照加一倍。○十八日。俄兵五千餘名帶炮二十尊。本欲入京。旋俱屯紮於北帶河。候駐京俄欽使命令一到。即由該處乘坐火車前赴天津。因此聶宋兩軍門各帶所部各兵奉命赴北帶河至天津鐵路各要隘駐紮。英德日三國續調之援兵。帶炮多尊。續至天津。美兵艦約克當俄巡艦石皮賈同於是日內上海起程北上。香港駐防英兵四隊。並炮隊兵二隊。准是夜乘恒山輪船駛往天津。此外尙有輕騎兵三隊。俟下禮拜一日由英巡艦隨後載運赴津。是日有廷寄到直隸。不許洋兵入都。責成裕祿聶士成二人竭力阻止。當飭關道照會各領事。領事以三事相屬。一力勦拳匪。二請保護各公使眷屬出都。三各國有兵一千進京。如所屬之事果能照行。可不再加。駐京各國使臣宣明各國已不認再有中國政府。如華官等仍欲阻拒進京西兵。各國當以兵力從事。英美各使署內時皆安置大炮。○十九日。俄國再徵兵三千。美國再徵兵二千。均約於二十二日可抵塘沽。天津情形危急。租界雖有各國兵士巡防。而城內又有團匪蹤跡。恐一旦竟爲所據。故各國集議。擬於二十三日將城外之各國兵分出一半駐紮天津城內。俄國巡船派兵帶械坐小船赴塘沽鐵路碼頭登岸。坐火車赴津。是日停泊大沽口各

國兵艦共三十二艘。內俄國淺水炮艦三艘。不時進出。甚形忙碌。俄國團練艦隊輪船載兵向塘沽進發。法國炮艦及俄水師提督之文書船停泊塘沽。俄國小魚雷船兩艘來往遞信。駁船兩艘運艦兵前赴大沽登岸。英兵登岸擬坐火車進京。英水師提督西摩所部兵士約有一千四百人。情形頗爲拮据。蓋因糧餉缺少。前有華兵阻拒。後有團匪追逼。故甚形危急也。○二十日。駐防大沽口各國艦隊統帶官函致我國炮臺守將羅榮光。略言比見華兵多從山海關來此。臺上復常添巨炮。恐於代平匪亂之各本國水陸將士有所未便。懇暫借砲臺以敦陸誼。旁晚華官發到覆書。不允所請。各國水師將領視爲事理之常。並未計議辦法。是夜子正砲臺開砲轟擊兵艦。各西人莫不驚惶失措。其時俄國高麗支艦泊岸較近。被擊斃弁四人。兵十二人。傷弁兵四十七人。受創最重。德國壹爾的斯艦死三人。傷七人。法國雷安艦死傷各一人。英國阿極靈艦死一人。傷三人。時中國新巡船海容。并魚雷船四艘。悉爲西兵所獲。日本某砲船統帶官陣亡。此外兵士受傷者三十五人。是役也。本約於兩點鐘時開砲轟擊。至一點鐘砲臺上忽開砲。第一砲擊中英兵艦阿極靈。尙未傷。各砲艦即還砲轟擊。黎明時極北第一座砲臺被日本兵佔住北邊。外面砲臺被英兵佔據。繼而南面砲臺已懸德俄兩國旗幟。○二十一日。各國兵士佔據大沽砲臺。將分四路。遣兵入京。中國官在北河安排魚雷。以防各國兵船由沽至津。美總統電命駐紮小呂宋之麥亞透速由小呂

宋遣調兵士三營五千人。前赴天津。并命水師提督黎密速調哇黎剛兵艦一同駛往。英國大登及斐留斯兩巡艦本駐泊於泊脫蘭地方。奉調駛往中國。英國海軍大臣籌備遣調兵艦。多載兵士前赴中國。長江著名各口岸駐紮。英國調赴中國之印度軍。計頭隊孟加拉蘭瑟斯營兵士一營。頭隊麥登臘斯品尼斯營兵士一營。第二十二隊孟買步兵一營。第二十四隊噴嘯步兵一營。頭隊錫克兵士一營。第七隊孟加拉步兵一營。炮隊兵一營。麥登臘斯薩潑斯兵士一營。內有兩營專爲防守之川。餘均從事疆場。○二十二日。烟臺美領事履定日輪一艘。開赴楊家口。以救英美兩國教士并山東西部及河南等處之各西人。英參將鮑華督率頭隊華軍營兵士二百人。由英兵艦奧蘭度載送前往大沽。○二十三日。大沽口領袖水師官員出告示一道。謂目下北省團匪作亂。各國之所以調兵進京者。不過爲救援各國人民起見。並非另有他意。茲當拔隊進京。如有團匪或中國人民敢于阻禦者。定即痛加攻擊。苟不阻拒。亦斷不侵犯地方。○二十四日。北省之英國陸軍暫歸英參將陶華特督帶。俟賈色黎及巴魯二將軍到後。再行定奪。英國調駐紮地中海水師艦隊內之二等鐵甲巡船兩艘。一名台杜。一名愛錫斯。各載重五千六百噸。駛往中國。并又調派運船極龍茄裝載水軍八百人。迅速赴華。法巡船巴斯克爾由大沽口駛抵烟臺。俄兵大隊。美兵一百五十人。德兵二百人。在大沽登岸。印度派兵至香港補大沽去兵之缺。美國

派呂宋兵五千到華。呂宋水師提督派窪麗根兵船護送。英添派兩巡船至華海。部顧爾遜曰。今將派兵往防楊子江各口。○二十五日。法國派三艦帶水師及車炮兩副往華。德派水師兩營至華。○二十六日。聯軍諭西兵作事各有界限。平亂之外。不干華事。○二十七日。各國兵士進入天津租界。當先者爲美英兩國兵士。美兵所放大炮極佳。華兵祇接連開放排槍。並不以大炮從事。是役美兵陣亡三人。受傷二人。英兵陣亡二人。受傷一人。德兵陣亡十五人。內有將弁一人。受傷二十七人。俄兵陣亡十人。受傷三十七人。至租界中婦女小孩。並無一人傷損。英都司劉克部下水兵等。已將天津陸師學堂奪據。旋即擊毀。天津西人防兵守禦極堅。惟俄人大受疾傷。在鐵路車站之俄人。被逼甚緊。華兵向租界開放大炮轟擊。絡繹不絕。租界幾全被焚燬。各國水師共八千名。前晚在大沽口登岸。擬設法攻勦團匪。法水手三百餘名。由馬家舖至津。住海軍公所。電報學堂兩處。英政府飭水師二千餘名。英政府遣印度馬步兵七八千名往華助戰。以提督葛利斯爲統領。日本政府定遣大軍五萬人。刻日赴華北。先遣頭隊七千人。○二十八日。香港陸軍英人三百餘名。印度人九百餘名。抵大沽登岸。會同各國西兵。計日本兵三千。俄兵二千。德兵二百四十。共六千餘名。前往天津救援租界。英運船恒勃由北帶河抵烟台。載有開平礦局並北帶河等處避亂男女西人三十名。北帶河保護英兵亦於是時調回大沽。日本政府添派八重山

高雄二艦駐紮上海保護商賈。○二十九日。各國水師提督在大沽口聚議。命美兵艦莫諾開賽之統帶官惠斯鎮守塘沽。所有遺發火車調撥糧餉等事。俱歸惠斯督理。英兵艦透立勃爾批壳克二艘。日艦二艘。同到烟臺。俄皇諭令鮮卑及黑龍江一帶文武俄員。即日起兵。兼及鄉團預備戎裝。即往東三省及北直等處勦匪。美政府擬起水陸大軍。刻日前赴中國北省勦匪。並防不虞。印度陸兵八千餘名奉檄往華。英政府恐兵力單薄。擬添兵一萬四千名。刻日續往。○三十日。日本參謀本部決計籌辦在華軍務。傳諭通國。後備兵一律調集。候令施行。英國政府一意經營中國軍務。恐師旅在華。或須度過寒冬。特預備頒發冬衣及皮帽等項。解運至華。給予各兵應用。英水師提督西摩在天津北首九英里地方。爲華人所圍。勢頗危急。部兵六十二人被殺。二百人受傷。惟尙能支守兩日。六月初一日。英俄德三國合力取機器局水師學堂。爲俄提督佔住。西兵三千人帶小炮數尊。四寸七分徑炮兩尊。繫於鐵路之旁。英兵艦奧蘭度武弁皮的及雷脫二人受傷。英國畢克畢噶米兩兵艦。魚雷船黑脫。在香港起程赴滬。得英水師提督西摩同其部下兵士在離天津北面八英里地方築壘屯紮。其部下兵士有多人被殺。抱病及受傷者甚多。天津派兵一隊前往接應。英戶部裴爾福在議院宣言云。泰西距華甚遠。中國北省有事。大軍不能即到。若有他國能先征勦拳匪。固係妙事。我英國甚悅於心。決無懷疑。蓋如能早日

平靜。則可早定中國大局也。○初二日。英水師提督西摩之圍已解。率部下殘兵回天津。兵士死六十二人。傷三百十二人。美國第九營步隊一千餘名。乘美國羅根兵船。由小呂宋開往大沽。鐵路總理工程司金達督率副工程司等十五人。前往大沽修補津沽鐵軌。時在津沽一帶之西兵除海軍外。計一萬六千二百名。各國在大沽口登岸之兵士。以是日爲止。計德國武弁四十四員。兵一千三百人。炮四尊。英國武弁一百八十四員。兵士二千七百。人。砲十五尊。機器快炮十四尊。奧國武弁十二員。兵士一百二十七人。美國武弁二十員。兵士三百二十九人。炮兩尊。機器快炮三尊。法國武弁十七員。兵士三百八十七人。炮三尊。意國武弁七員。兵士一百三十一人。炮一尊。機器快砲一尊。日本武弁一百十九員。兵士三千七百零九人。炮十四尊。俄國武弁一百十七員。兵士五千八百十七人。炮十四尊。機器快炮八尊。○初三日。英兵艦畢克及畢喀米哈脫三兵艦。由港起程駛赴吳淞。以保上海租界。天津有各國洋兵五千人駐守。英水師提督西摩奪得華人麥格星炮五十尊。克虜伯炮數尊。天津至北京之鐵路被毀。津沽鐵路復有九英里之鐵軌。被華人所拆。各國西兵將村庄數處。縱火焚燒。所有華人。可以埋伏及藏躲所在。均經西兵收拾一空。英國各兵艦中。受傷最重者爲巴福魯兵艦。英國捉魚雷船斐姆統帶官。開依士君。開放炸彈。將離大沽口十二英里之炮臺一座。轟成齏粉。英屬澳大利亞大吏。稟英政府。略謂中國北省拳匪

奸臣之亂。願派水軍二千名。陸軍三千名助剿。○初四日。天津各國領事電稟各本國政府。言目下北省拳匪亂兵猖獗。無所不爲。在京公使恐遭患害。請速行知照北京主亂官員。若有違背公法。害及使臣。各國大兵一到。定將清朝諸皇陵。概行焚燬。以報深仇。○初五日。洋兵之保護租界者。西面英美兩國兵士。南面德日兩國兵士。東北俄法兩國兵士。西兵思欲驅散華人。衝突前進。力戰有五點鐘之久。未能取勝。祇得退回。是役日兵陣亡武弁兩人。兵士一人。法兵陣亡一人。受傷十二人。俄兵傷折更重。華人炮火準頭甚準。頗爲利害。○初七日。聯軍與華兵惡戰。自清晨八點鐘起。至下午四點鐘始止。大沽口由各國西兵守禦甚堅。在津西兵皆堅行防守。由天津至鐵路車頭一帶。則於小河中行駛小輪。以通消息。天津城內盡行毀壞。其裝載糧食及一切什物車輛。均堆積於鐵路之旁。拾物匪徒。時有所見。是以西兵現已嚴行軍律。遇有搶劫物件之人。一經捉獲。卽以軍法從事。德皇以中國亂臣拳匪猖獗異常。深恐所遣各軍。尙不足恃。諭令海部大臣。卽日增調海軍戰艦六艘。速往津沽助剿亂民。○初八日。惡戰自下午三點至六點鐘止。是時雷雨交作。雷聲與炮聲相雜。德皇命水軍一隊。部署一切預備。趕緊起程赴華。當起程之前。德皇親自誓師曰。中國現在仇視洋人。甚至將我德使殺戮。實與野蠻無異。此仇必當報復。爾曹其各勉之。朕須視德國國徽。暨他國旗幟。均高懸於北京城上。於心始安耳。列國西兵陸續至大沽者。幾於無日不

有。因英水師提督西摩爾之意。以目下兵數尙嫌不足。須調大軍到來。方可奏功。故俟大軍一到。必有大加殺戮之事也。英國部外大臣巴福爾在議院宣稱。無論何國。能就近趕緊立調大軍平定華亂者。英國政府深爲喜悅。法國水陸軍共二千名。帶大炮六尊。定於二日內當抵津沽。德皇前遣新造之俾士麥鐵艦帶大小快炮四十尊。水手五百七十名。會同摸爾格巡艦。卽日往華。及聞欽使被害。又遣鐵艦四艘。巡艦一艘。並陸軍二萬人馳赴華北。印度奉調至華之兵。共計二萬左右。部署妥當。頭隊約初十日可抵香港。十五日連北印度兵一切成行。東南印度亦有馬步兵共四千名。於本月下旬駛往津沽。德軍之出也。德皇親送之。且面諭之曰。卿等往華。必須代國雪恥。與我欽使報仇。聞者皆曰。德皇注意於報仇一事。故說到此二字。聲色俱厲。○初十日。英政府照會羅稷臣星使豐祿。請速通知華政府。若北京各國西人再有遇害等情事。非有攸歸。決不稍貸。並請以此言轉致各省督撫。俄政府於月朔照會日本政府。請速遣陸軍往北京救援各欽使。且言日政府已允各國遇事合辦。俄豈有阻日軍往北之理耶。○十三日。聯軍進攻天津城。美兵艦統帶官臺維斯陣亡。副將臘斯公游擊白勒亦同時受傷。天津之所以不能早日平定者。實因各國相忌之故。此次華兵戰守之法。實爲盡善。頗爲洋人所不及料。其勇敢亦迥異尋常。洋兵則以日軍爲最勇。一切軍械。最稱齊備。屢次交戰。華軍中均有洋人在內相助。查曩者曾有俄官數名。

在華營內充當武備教習。及開戰後。不知所往。有水兵數名。出外巡哨者。報稱確見有洋人在華軍砲隊之內。其中有一洋人爲炮所斃。又有一俄人反縛兩手。自華軍中逃回。據云。華軍力逼俄人爲之放炮。放而不準。卽虐待之。是役也。各國之兵。因互相妒忌。以致不能聯絡。如美軍自戰場裝回傷兵數十名。竟無讓出房屋。妥爲安置者。至俄人則居然夜郎自大。先將塘沽車站之名。改川俄字。所有車輛。亦盡改俄名。查是處鐵路早已改歸英人管理。以抵借款。而俄國竟視爲己物。殊可笑也。俄兵自願修理鐵路。而五日之內。所修不及一里。其故皆因俄兵無意修路。祇知搶奪物件耳。九日以前。華兵槍上加矛。搶奪鐵路車房。常被奪車數輛。洋兵與之大戰。法兵逃跑。祇存印度兵一小隊。在彼死守。亦用長矛攻逐華軍。適有日軍前來助戰。始得大敗華軍。計印度兵死者四人。日兵死者二十二人。華人死者以百數計。前禮拜四情形吃緊。俄人有預備兵六千名。及大炮十尊。並不肯派兵相助。旋得其故。蓋以日軍二萬五千人。其糧餉均係英國所給。俄兵遂有欲撤回之說。次日俄人始行心悔。派軍相助。攻取天津。總而言之。華兵軍械充足。其所用者皆最新式之槍炮。至少亦需數日。方能平定耳。○十五日。香港總營兵士及勞合惠爾斯輕槍隊兵士。俱奉英兵部電諭着令。迅卽起程前赴大沽。○十六日。日本豐橋艦於是夜載水兵三百名。開赴天津。高砂秋津兩艦同時派赴天津。○十七日。意大利派兵士五千赴華。第一批定於十八日起程。○十八日。法

國除已派三千人外。復派全軍一隊。計一萬六千人。由佛倫將軍統帶來華。又派有水師提督卜地安統率水師艦隊一同赴華。○十九日。興山輪船由香港載兵三百五十人駛赴大沽。其餘各兵。因船中裝載不下。故未前往。兵艦透立勃爾裝有惠爾斯洋鎗隊兵三百名起程赴津。水師提督西摩奉命准其便宜行事。○二十日。英國香港兵艦恩蕩脫特炮艦羅薩遼。奉有急命。着令迅即開行至津。小呂宋英國兵艦僕納文邱奉命迅速開行北上。俄人將津沽鐵路修復。常有火車來往。俄國統兵大員愛立克齊咸甫。偕辦理交涉大員兩名至津。○二十三日。西沽武庫。爲俄兵所據。有尙未毀之軍火。計炮位十尊。并子藥洋槍甚多。俄日等國。特派管理天津地方之官。設法勸諭居民回轉。城外窮民。約有二十萬。逃出者俱係貿易中人。津沽鐵路。歸俄人管理。所有辦理鐵路一切事務。仍用舊人。俄軍有十五生的米特之攻城大炮六尊。日兵急欲前進。頗有迫不及待之勢。津城之所以能早日攻陷者。亦係福島將軍立意。尅日進攻之故。該將軍深知中國川兵情形。各國將帥均服其知兵。英國與各國助戰之兵。日有至津。俄軍定於明日別派兵弁往西沽北倉一帶相度形勢。○二十四日。烟臺有英美兩國武員帶同馬隊共二十二。人往津城西面一帶哨探。奪獲營壘一座。二十磅克虜伯大炮四尊。九磅炮兩尊。野戰炮兩尊。以及小槍車輛等物。天津攻破後。津沽鐵路已通。天津附近各處。尙有戰事。西沽已由洋兵復得。俄兵據有蘆台。

所有至塘沽之路。亦爲所據。暫時設官辦理天津諸事。○二十八日。使館中糧食尙可支兩禮拜。惟華兵圍攻甚力。駐守使署之兵。難以支持多日。計死者共四十四名。傷者倍之。英國政府加籌陸軍經費計英金十一兆五十萬磅。已將清單發交議院詳議。

七月初一日。英國統兵官西摩由威海衛南來。今日到滬。係乘坐文報船阿臘格立。其座船森邱利安亦同來寄旋吳淞。各西兵已向京城進發。英俄兩國之兵。據有北倉。華軍並未相阻。駐津各國洋兵。深願尅期進發。惟英軍頗有不願之意。各軍奉有政府號令。一同進京。惟俄日兩軍並不奉命。業已起程進京。天津駐津洋兵共一萬一千人。京中使署。雖萬分吃緊。而駐津洋兵。尙未定於何時拔隊。有言宜冒險前進者。有言須持重者。議論紛紜。莫衷一是。惟美軍已爲該國政府催令速進。各國洋兵因此或可早日起行。俄軍已逐漸向東北進發。係與在山海關登陸之俄兵會聚。以便一同入京。○初二日。德國頭批兵士自勃勒墨哈凡起程來華。德皇德后暨各王子以及外務大臣等。均經親臨。未批不日起行。計來華之兵共一萬二千名。以運船二十一艘分載。德法美三國均禁止軍火出口。德國運船三艘。當在勃勒墨哈凡地方開行赴華時。德皇親自送行。并勉勵各將士曰。爾等至中國。須與華兵力戰。務使華人千載以後。亦不敢正視我德人。烟臺有日本馬兵兩隊前往天津。迤西十英里之地。相度形勢。俄軍前隊遠出二英里。并將大支人馬分爲三隊。一駐城廂。

內外。一駐東局。一駐西沽。至俄督阿立克雪甫。已回旅順。俟雷尼惠處將軍到時。所有駐津俄軍。即當悉歸統帶。各國大兵。擬於西歷本月初旬。拔隊向京前進。日兵在河之右。各國兵在河之左。以河西爲頭站。至彼處時。料無敵軍攔阻。英人之意。欲留曾經與華軍接戰之兵。駐紮天津。以通饋運。并作爲後隊。印度兵則隨大軍前進。自今日起。英兵改歸葛斯利將軍統帶。各國之兵。均極踴躍。無不盼望。即速進京復仇。各國所派管理天津事務之員。頗能和衷共濟。美軍已安設電報。自津達沽。美國馬隊八百七十人。自小呂宋開行。不日至津。英國裝載印度兵之第四艘。連船行抵大沽。美德兩政府電催各該國駐紮之兵前進。不必等候英兵。英國葛斯利將軍。今日至津。○初三日。各國洋兵在白河兩岸相度形勢。至北倉地方。爲華兵所阻。○初四日。華兵與俄兵在熊岳城交戰。該城旋爲俄兵所陷。意奧英三國快艦各一艘。并英國運船兩艘。今日抵港。○初六日。洋兵定期兩日內進兵。此次大軍計英兵二千三百名。美軍一千六百名。奧兵五十八名。意人五十三名。日兵一萬二千名。俄兵四千五百名。俄軍因恐將有大雨。頗不願偕衆前進。英美之兵。從河道而進。○初八日。英水師提督西摩。坐文報船於下午開往南京。以赴江督之約。各國大隊向京進發。共計有三萬餘人之多。內有日兵一萬六千人。各國兵頗爲酷暑所苦。○初九日。日兵二萬人。英兵一萬人。美兵五千人。起程進京。其餘各國之兵。尙在天津。華兵在天津附近駐紮者約二萬

人。駐楊村者約半之。英國進京兵士大半係印度人。餘爲英國惠爾斯兵隊。暨香港兵隊。隨行帶有海軍十二磅炮三尊。德人預備修理京津鐵路。甚爲忙碌。○初十日。華軍向聯軍左翼添派炮兵。又於北河左岸另築炮臺以拒敵聯軍。日兵相度駐紮北倉之華兵情形。探得該處有步兵七千人。馬隊一千人。築牆駐守。所有華兵前鋒將河之兩岸佔據。約有十餘里之長。因華兵先將堤壩挖開。故華洋兩軍之間。悉皆有阻隔。當日本兵相度形勢時。爲華軍所擊死者三人。受傷者三十五人。當由俄兵從左岸炮攻華軍。以爲日兵之助。各國由津赴京之頭隊兵。行至中途。被華兵及拳匪萬餘人所阻。當即開仗。勝負未詳。西兵因此不能刻期前進。○十一日。各國聯軍在北倉與亂兵團匪血戰良久。始紛紛敗北。北倉爲聯軍佔據。李秉衡所統勤王之師。實未與戰。聞警先行潰散。所云華軍奮勇死戰。及西兵用列低毒藥炮始行攻退之語。皆訛傳也。是役也。英國兵三千人。美國兵二千五百人。日本兵一萬人。直至佔據之後。俄法兩國之兵始至。因河之右岸。爲水淹沒。是以遲至。日兵往襲華兵營寨。奪得大炮五尊。華軍作正角形。頗不易拔。且炮子槍子勢如雨下。聯軍爲之稍退。最後南倉砲隊在對河者出阻。因之遲至二點半鐘。尙不得進。至五點半鐘時。華軍炮聲已停。而槍聲尙不止。且其勢甚烈。日軍奮厲無前。與軍華相離極近。聯軍以日軍與華軍相去不遠。故亦不敢竟放大炮矣。華軍所紮之步位。已爲日軍所衝。日軍死者頗多。華軍亦爲之

却後。由英軍以砲隊攻之。華軍始由北倉浮橋東遁。所守處遂爲聯軍據守。未幾地雷忽作。聯軍亦爲一驚。幸發之稍早。未傷一人。是役所有華軍約六千人之譜。死者約二百人。傷者業已運去。華軍隨身之物甚少。槍子均藏於衣袋之中。此役並無義和團助戰。英軍死者二人。傷者十二人。○十二日。英俄日本向北京進發之兵與華兵在北倉交戰甚久。華兵敗退。日本兵死傷四百餘人。英兵死傷百二十人。俄兵死傷六百餘人。○十三日。美政府徧致各國公文云。中國近事已在垂危。尤宜將我國政策略一聲明。溯一千八百五十七年。我國與中國立約。訂明保護財產。振興商務各節。應仍力守。倘我國商民有被傷害者。卽嚴辦犯事之人。北京情形。反亂無主。所有各事。自應責成各省督撫。有能勦捕土匪。保護洋人身家財產者。我必以友誼相待。本總統之意。深願與各國同心合力辦理。下開數事。一、救北京美國公使。與使署各員及教士商民人等之遭難者。二、保護各處美國商民身家財產。三、保護美國商務。四、協助各省。以免再釀禍端。惟目下不能預料宜用何法以辦上開數事。我政府之意。亦不外乎保守中國太平。不致分裂。各口通商。仍各國同沾利益而已。法人甚恐中國從此分裂。再越一二月。各國必因此紛爭。自相殘害。法人謂英國之意。甚願南北分辨。似有意以南京爲東南數省之都城。如果實有其事。法國爲自保起見。亦不能不有事於滇粵之邊矣。前俄國駐京公使喀希尼時在巴黎。曾謂如駐京公使實已被戕。將來如何處置中。

國。萬難預料。惟各國目下似不宜與中國開戰。恐一經戰鬪。非華人所能支持。況各國現雖和衷共濟。恐一開仗之後。亦將有嫉忌之心矣。日本某大員條陳中國善後之策云。一、嚴辦端王與其黨羽。並責令中國政府認過賠禮。二、應請光緒皇上復辟。所有軍機應用維新大臣。三、中國應籌借銀五六百兆兩左右。以賠兵費。其所借之款。應以關稅抵押。至出進口稅。應加至值百抽十。釐金一概豁免。○十四日。聯軍進據楊村。華軍前次所決河水。業已退盡。凡有所過之處。皆易行走。各國兵已佔據楊村。美國兵爲先鋒。約死傷七十餘人。營口爲俄人所踞。後漸覺平靖。惟土人深爲畏懼。多避往烟臺。其海關及炮臺。已高懸俄國旗幟。在營口之日本兵船。並未助俄開仗。惟水兵之已上岸者。皆在租界防禦。華軍見聯軍安營已定。遂以民船二十。滿載兵士。隨帶大炮。往劫聯營。及至駛入聯軍炮線限內。聯軍開槍擊之。華軍卽退。並未開炮。○十五日。各國兵艦之駐泊牛莊者。計俄國七艘。日本兩艘。英國一艘。城廂內外事務。暫歸俄砲船管帶官名得哥魯克者管理。德廷派統兵大元帥瓦德西伯爵前來中國統帶各國洋兵。法國因中國事變。由議院議定。籌借軍費一千四百萬元。日本軍隊與英國某艦艦長商議。擬於塘沽至海關間設一小市廛。自立國旗以爲卸貨之用。列國擬於塘沽仁川間設海底電線。以便通信。聯軍離京僅三十英里。積久不雨。路極易行。華兵亦甚稀少。○十六日。洋兵已至楊村之上。當攻據楊村之役。美日英三國兵

士死傷最多。華軍大敗。軍心業已渙散。洋兵可望直至通州。途中當無敵兵攔阻。駐華法國公使電稱。總署照會遵照各國來文。當將各使臣護送出京。各使臣答以須俟接到本國政府命令始可出京。法使又云。除非洋兵力量能將洋人八百名華教民三千護送。方肯就道。否則亦不願輕出也。英美兩國公使意亦相同。○十七日。聯軍行至河西務。○十八日。各國兵士入通州。日本兵佔據製造局。獲米五萬石。○十九日。俄國預備派兵十二萬五千名。前往海參威。所有載兵船隻均已雇定。歐美各國均已允奉。瓦德西伯爵爲總統。聯軍大帥。法國未與其列。德國派駐中國洋面之海軍。所有官員水手。已屆互調瓜期。奉德廷諭旨。著仍令蟬聯毋庸更調。○廿日。俄國在大連灣所調之援軍一隊。已抵離大石橋三十餘里之地。不日即將開仗。○廿一日。聯軍破京。○廿五日。聯軍在都中徧貼告示。大旨謂此次聯軍入京。意在勦拳匪。誅首謀。保公使。與良民毫不干涉。○廿六日。盛京海城縣爲俄兵所陷。○廿八日。西兵入京後。從大沽至京城一帶。仍有西兵駐扎。以顧後路。從烟臺至天津之水線。由西人趕緊修理。以通京津消息。

八月初二日。美國兵部大臣調兵四千名。由小呂宋前往大沽。俄國提督爾倫能開姆甫。在齊齊哈爾之北。戰勝華兵。俄兵死傷甚少。吳淞新到德國鐵甲快船一艘。名畢士麥。載重一萬。○六百五十噸。馬力一萬四千匹。船上人數五百六十五人。配有九寸四口徑快船。

四尊。五寸九口徑快炮十二尊。機器砲二十八尊。北京宮殿經聯軍衛守甚密。不准閑人出入。○初三日。日本外務省擬派警察二名。巡查三十九名至津。以便保護旅居日民。遴選已定。擇期啓程。并準備北方日軍禦冬之具。○初四日。新到德水師兵二千一百人。及砲隊二隊。先鋒隊二隊。○初五日。俄國前在德國厄爾平地方所造之魚雷船四艘。開駛來華。○初六日。英兵三千六百五十一人。將于半月內由好望角起程赴華。聯軍統帥德國伯爵瓦德西行抵蘇彝士河口播塞德地方。○初七日。俄人將其在滿洲各處運兵大意布告天下。略謂刻下。俄兵因保護鐵路起見。將次遣兵佔據滿洲各處。○初八日。各國聯軍將分兵進窺保定。美都預備兵士寒衣。以及冬令行軍必需各物。○初九日。京中聯軍撥出二千五百名回守津郡。並保護西教士及婦孺出京。○十一日。俄國倡議撤退北京聯軍。○十二日。聯軍暫時停戰。聽候各本政府調度。各國在天津新設政府。其章程如下。一、使城廂內外地方平靜。二、設法使地方無瘟疫之災。三、幫助聯軍尋覓駐兵地方并糧食轉運一切。如六畜車馬船隻工人之類皆是。四、編錄號冊。以收管中國國家或中國人民棄而他去者之產業。五、設法勿使土人有饑饉之苦。天津政府應設總理事官三員。權無大小。即歸聯軍兵官舉選承充。該政府在應管管下有自主之權。聯軍各官及各國領事所請者。如天津政府意見與之不合。則歸聯軍各兵官或各國領事官齊集和同斷辦。如仍無歸宿。則可告知其各

屬政府聽辦。右爲政府應辦之事。一、設立應有章程。二、收取土人地稅并中國應有之進口稅。三、各項字據以及貴重之物。無論中國國家或民人棄去者悉歸看管位置。四、中國國家可以携動之產業。除軍裝外。悉任憑調度布置。而土民棄去之各項產業。亦任從發售。五、政府所有籌備之款。任從支取應用。現時政府初設。其款應由該總理事官三員所屬之國家籌措。日後收到稅項即須交還。政府除設立巡捕外。亦有刑審之權。土人有罪。悉歸審判。有罪者即放流之。或置之死罪。亦無不可。但所有西人犯罪。該政府祇能飭捕管束。限二十四點鐘內。即交原管兵官或所屬本領事究辦。右爲政府應有之權。政府應設以下各員以輔佐之。一、總理部。二、巡捕部。三、考驗身體部。四、戶部。五、辦理公私產業部。六、武備部。七、刑部。八、主管大衆糧食部。政府總理官三員。各設參謀官一員。以上各部應盡之職。可由其名知之。其瑣雜之事。應候各總理事官諭下辦理。各部應設之員。可以事之多寡而分派之。所有各員。不論文武。一概准其承充。其已有其國家差事者。准其兼差。○十四日。列國占領北京之地業已議定。日軍自朝陽門畫一直線貫通于北。俄法則守正陽門。英美則守其西。各設民政廳。以理庶務。日本民政官爲柴中佐。

清議報全編卷二十二

第六集上之下

紀事三

庚子國難紀事本末下

教士遇難

二十六年正月。英國教士卜魯克見殺於山東之泰安。此爲拳匪殺教士之始。蓋大刀會實拳匪之一支。有匪孟洸汝者。因平原拳匪爲官軍所勦。思欲報復。偕同黨王某張某至肥城之南郭頭。包紅布。招人爲匪。有胡方正胡景明龐延茂等匪從之。先一日自肥城西行三十里至張家店。六匪同寓。明晨方早餐。適卜君乘馬自泰安至平陰。途經該村。六匪聞之。立意殺害。卽出。追趕至村外。卜君見伊等持刀疾追。知有惡意。卽下馬以待。孟洸汝先至。其刀被卜君奪得。用以自衛。二胡等趕上。猛砍。傷卜君之額頰手臂等處。卜君棄手內之刀。奔入路旁屋內。匪拖之出。剝其外服。祇剩衫褲。時值嚴寒。積雪未融。卜君之苦可知。該村地甲劉秀義見六匪牽卜君西行。並不阻止。亦不立刻入城稟官究辦。乃尾之行若干里。然後折回。與村中父老商酌。入城報官。則爲時已久。不及救援矣。匪挾卜君西行十餘里。至一村曰下城子。向李大椿所開食物店買飲。飲時將卜君拴於近處。李大椿憐之。給以熱水一碗。又行五里。至馬家鋪。午飯。給卜君粥一碗。村人見之。無敢援救。午後。匪又挾之折回。向張家店而

行。再過下城子。卜君困乏無力。不能再走。匪釋其縛。卜君因告伊等。不如同往大官莊。在彼有教友。或可付銀取贖。匪從之。再西行。未幾。卜君疾奔思脫。衆匪追上亂砍。割其首棄尸於道旁谷內。該六匪後由袁世凱捕獲正法。地甲等入刑罰有差。

六月。英教士挪耳滿樂平生爲拳匪所殺。是時拳匪之亂已亟。二人於北京附近處遇害。○二十七日。太原附近之拳匪劫燒壽陽會之醫院。女教士一人被焚死。壽陽公會爲教士畢君所主。事急時在西國之眷友願以洋五萬元募人救之。卒不能脫。醫院被焚時。醫士勒未德攜眷避之。教士范新家。後爲毓賢所殺。女教士戈司不及走避。焚死室內。○二十九日。山西朔平府殺內地會男教士五人。女教士五人。○三十日。山西孝義縣殺女教士二人。二教士皆屬內地會。爲拳匪殺死。縣令見之。不加禁阻。○三十日。保定殺長老會教士五人。小孩三人。拳匪攻長老會教士之住宅。戴勒耳教士尙欲與衆分說。匪衆猛如野獸。將戴君亂刀砍死。其餘諸人俱焚死屋內。

七月初一日。保定殺公理會教士三人。內地會教士三人。小孩一人。長老會堂旣被焚劫。明晨。拳匪攻公理會屋宇。教士畢根以槍自衛。未幾受重傷倒地。爲匪所殺。蓋附近居民先劫物件。懼西人不敢近。招拳匪來攻。一女教士戈姓因驚悸而驟卒。一女教士馬姓爲匪所掠。百般侮辱。割其二乳。終則支解之。內地會教士顧某等見事已危。急欲避入附近營內。因與

營官某素友善。度必容納。攜銀五十兩。衣箱一具。投之。詎料營兵受其銀物。拒人不納。反交於拳匪。帶入城內。與馬女教士同陳於一廟內。任人侮辱。至晚。牽至城外斬首。同時天主教士遭害者六十人。至縱匪殺害之護督廷雍。及拒而不納。營官某。後俱爲聯軍槍斃。○初九日。山西巡撫毓賢。殘殺耶穌教士三十五人。天主教士十人。華教友數十人。自六月二十七日。匪焚醫院之後。在太原府之耶穌教士。皆避難於教士范新家。二十八二十九日。公同商酌稟地方官求護。並無覆音。三十日。毓賢遣委員四人來。謂城內民情洶洶。官吏勢難兼保。望諸教士移居官所備之屋內。乃可保護。教士不知其詐。從之。遂受禁錮。天主教神父十人。亦囚於此。既而壽陽教士畢某等七人。縲紲而至。外有重兵。跬步難越。至七月初九日。衆見攜至巡撫署前。洗剝拴縛。一如重囚。毓賢問伊等爲何國人。一教士答曰英國。毓嗤之。持刀手斬三人之首。衆兵將餘人斬決。梟首署前。棄其尸。與其難者計壽陽會教士駐太原者七人。駐壽陽者七人。大英聖書會六人。內地會五人。大英浸禮會十人。神父十人。華教友七十人。慘矣。先自五月間。團匪由山東至山西省。其始人數尙少。沿路亦不張揚。但見各處徧貼匿名揭帖。其中略謂我等扶清滅洋。爲國宣力。今欲招集童男童女。教練神拳。精之能槍炮不入。藉以殲滅西人。共伸大義等語。嗣後愚民被惑者日漸繁多。城中徧地都搭立高棚。逐日下午。教師糾聚各童操練拳棒。並畫圈念咒。謂練習至四十九日即可成就。迨至六月

初。竟集有數百人之多。每日招搖過市。結黨橫行。該團等均頭繫紅黃二色包巾。腰束紅帶。手執單刀。路遇穿洋布衣服者。立時拉住。將衣扯碎。偶一挺撞。即以單刀相向。諸如此類。種種不法情狀。難以言盡。日則沿途滋擾。夜則羣宿廟宇。乃於六月中旬。有匪黨三百餘人。一闕而起。先將省城中董家巷之耶穌教堂縱火焚燒。並將男女各教士肆行殺害。所有教民。該團匪均勒令叛教。有不願叛教者。即遭殺戮。毓賢亦出告示。逼令教民叛教。免致受害。故匪膽愈豪。匪勢愈盛。至六月下旬。又將北門內之天主教堂相繼焚燬。○十二日。山西絳州河津縣殺內地會教士六人。小孩一人。內有二教士自吉州往河津。偕之同行。欲往陝西。行近黃河。爲匪所殺。○二十一日。浙江衢州府殺內地會教士五人。小孩二人。而其釁由土匪。實官紳主之。戕殺之狀甚慘。○二十二日。浙江常山縣殺內地會教士三人。小孩一人。○三十日。山西太谷縣殺公理會教士六人。殺斃華教友甚多。是七月間。山西隰州殺內地會教士四人。岳陽縣殺內地會教士二人。

八月十三日。山西大寧縣殺內地會女教士三人。三女教士自七月十一日已離家往山僻教友之處僻匿。遷移無幾。時事機日迫。乃改匿山穴內。近村之教友爲之炊食。令一童送之。如是者數日。一日童子方攜食往。途遇一人詢曰。汝饋何人食。童曰。田間工人耳。其人曰。吾不信。汝必饋洋人食。若不告我以匿處。我先殺汝。童子無奈引之至山穴。其人即招村人咸

集。時偕女教士在場者祇教友楊某。村人立斃之。押教士至城內。交於拳匪。剝其服。斬於西門外。大甯之匪。自以爲降神之術未成。借河南來之客。匪殺三教士。棄尸道旁。前一日拳匪捕丐人重刑迫。其自認爲洋人所雇。專放紙人衆。乃利之曰。是眞實憑據。遂殺丐人并華教友六人。○十六日。山西汾州府殺公理會教士四人。小孩三人。內地會教士二人。內地會教士三人。本駐介休縣。避入汾州。自太原壽陽首先受禍。而太谷繼之。汾州教士日待死亡。地方官佯爲護送出城。行不多路。護兵反槍擊之。盡斃。是非死於匪而死於官者也。○廿日。山西曲沃縣內地會教士二人。小孩一人。猶有三教士匿山穴內。歷盡艱辛。幸免於害。○八月間。山西沁州殺大英浸禮會教士六人。沁州教士避入山內。已二月。官吏索得之。佯許保護。誘之出。乃盡殺之。○七八月間。山西平遙縣潞城縣等內地會教士避難至漢口。途中被擊死女教士一人。因傷而死者女教士二人。小孩五人。平遙縣官初允保護。并出示嚴禁謠言。既而卜司札下。意在盡殺西人。乃遣役洗去前示。而禍作矣。六月廿六日。亂民齊起。毀城內之教堂。攻城外西人之住宅。教士挈眷投縣署。官拒不見。久之。乃許派兵護送至太原。將抵太原。遇一華人告以太原教堂盡燬。城門緊閉。正搜殺教士。教友遂不敢進。擬折向東南之潞城縣。兵丁不肯護送。自行前進。沿路匪棍勒索銀兩。不計次數。至潞城二日。邑人亦羣起而攻。潞城縣置之不理。謂上諭已降。無力保護。於是自潞城起行往漢口。男女大小共十四人。

雇二驢。負行李。行未數武。一驢即已走失。蓋驢夫以物遁矣。俄而二百餘人持刀仗迎。劫行李銀錢盡失。衣亦被剝。赤身行。夏日中。膚爲之皸。一女教士爲日炙死。死之日。皮肉皆爛。蠅蚋羣集。傷矣。行二日。至長子縣。此二日中。無食無飲。每歷一村。受居民環攻。刀砍棍擊。未有稍息。種種苦况。筆不能罄。長子縣聞其至。不准入城求食。稍與之餅。憊甚。求息。即臥城墻下。地上。城上有人。時以石擊之。知縣連夜備車。送至境上。迫令下車。困憊乞憐。送者不理。竟去。又步行四十里。至高平縣城。途中無飲食。欲爲乞丐。而不可得。所有衣服。又遭剝掠。高平縣官見教士求食。擲以數餅。與之桶水。坐地飲食。既又送之境外。再步行至澤州。中途二女教士弱甚。不能行。臥道旁小舍內。爲匪所得。凌虐備至。其一立時殞命。其一被牛車滾過腰際。延數日而斃。至澤州境。民方恨礦師比天主教士更甚。屢欲殺害。至此衆誤以爲礦師也。幾瀕危。澤州府備文解之。視如囚犯。經河南全省。俱畫則縲紲。夕則囹圄。歷懷慶武涉鄭州。確山信陽。而入湖北。鄭州官恨其來之不早。已奉保護之上諭。不得逞志殺西人矣。至湖北境內。則情形迥別。待如上賓焉。山西大同府殺內地會教士六人。蒙古各處殺瑞典教士九人。小孩一人。山西省內殺瑞士教士二人。小孩一人。

各省防衛

山東巡撫袁世凱告示 爲出示曉諭事。照得英教士卜克斯於光緒二十五年十一月

十八日。在肥城縣境內四槐樹被匪戕害一案。當經本部院電奏。十二月初四日奉旨諭。袁世凱電奏山東平陰肥城兩縣匪徒聚眾滋事。將教士架至毛家舖地方。該署撫設法購救。並派馬隊兜拿。卒以防護不及。教士被匪徒殺害等語。覽奏殊深惋惜。各國傳教。載在約章。疊經諭令各該督撫督飭地方官。隨事隨時認真保護。奚止三令五申。乃山東地方。竟有教士被害之事。該地方文武各員。事前疎於防範。已屬咎無可辭。若不即將兇犯趕緊緝獲。尙復成何事體。著袁世凱迅將疎防之該管各官。先行參處。一面勒限嚴緝兇犯。務獲懲辦。以靖地方。而敦鄰好。欽此。當即恭錄。轉行在案。查各國教士來華傳教。載在約章。疊經欽遵諭旨。督飭地方官認真保護。各在案。此次卜教士中途遇害。聞之殊深惋惜。電奏奉旨趕緊緝獲兇犯懲辦。當即嚴飭肥城縣金令猷大等。欽遵辦理。旋據金令等先後報獲案犯吳方城。吳經明。龐燕木。孟洸。汝。李潼。關等多名。批飭解省。發司審辦。並承准總理衙門電咨英國駐京寶大臣委派領事甘伯樂來東觀審。旋經臬司提犯訊明。將孟洸。汝擬斬監候。吳方城擬絞監候。該兩犯秋審。應入情實案。關交涉情節較重。業經奏明請旨提前懲辦。已先後於二月十六日。將孟洸。汝處斬。二十三日。將吳方城絞決。以昭炯戒。吳經明聽糾共毆。素不安分。應永遠監禁。龐燕木夥同滋事。應徒二年。李潼。關屢有案犯。本擬監禁十年。惟現已報病故。應毋庸議。地保路秀。繹。劉日香。石長安。徐榮。湘等。事前既不竭力救阻。事後又未從速報官。

不知所司何事。應答責革役。永遠不准復充。並議及卹款。及建造教堂經費銀九千兩。又該處鄉長捐給立碑費銀五百兩。均由司庫先行墊發。交由洋務局。逕送英領事核收。此外議在平陰縣給地約五百畝。以爲建造教堂之基址。亦已飭縣撥給。所有疎於防範之文武各員。昨已附片奏參。候旨定奪。除再嚴飭各地方官隨時認真彈壓保護外。合行出示曉諭。爲此諭仰軍民人等一體知悉。爾等須知各教士入內地傳教。係奉諭旨允准。亟應共敦輯睦。悉泯猜嫌。以仰副朝廷柔遠善鄰至意。斷不得再有糾衆鬧教情事。致干嚴辦。其各凜遵毋違。切切特示。光緒二十六年二月三十日。

直隸布政司覺羅廷告示 爲凱切曉諭嚴禁邪教惑人匪徒搆毀事。照得好匪設立教會名目。拜師傅徒。恃衆生事。定例重則斬絞。輕則遣軍。罪名何等森嚴。近來義和拳匪。假託邪術惑衆滋事。並拒敵官軍。不服彈壓。實屬罪不容誅。各州縣已將拿獲之匪首。訊明實情。稟請督憲批示。就地正法。在該匪首等甘心爲亂。目無法紀。死有餘辜。而被誘習拳者。多係鄉愚無知。誤信神靈附體。能避槍炮之說。羣焉相從。不知該匪首假言欺人。盡屬虛誕。前蒙督憲派委文武大員。帶兵前往河間府一帶查辦。所有拒敵官軍之匪首。或已臨陣拿獲。或竟當場擊斃。可見能避槍炮之說。顯不足信。爾等果係安分守法。專爲保衛身家鄉里。自有別樣武藝可學。豈可聽其邪術。誤入迷途。以致身陷重罪。該妖僧匪首等。專以殺滅教民爲名。

或只圖飲錢。或另有狡計。多係無業之徒。毫無顧忌。輾轉脅從。凡有生業之人。何苦自投法網。要知教民雖奉外國之教。仍是中國之民。歸中國地方官管理。如犯一切科條。仍照中國律例治罪。約章具有明文。該教民居住城鄉。除迎神賽會費用得免攤派外。其餘糧租差徭雜稅。及一切有益地方等項。與民人一體完交。毫無歧異。朝廷一視同仁。羣蒙涵育。凡在食毛踐土。自應各具天良。勿忘根本。爾等同居鄉里。非親即友。何可歧視相仇。而教民亦應自知大義。斷不可自外生成。且天主耶穌兩教。本是勸人爲善。自應謹守教規。同遵王化。嗣後教民與民人。務當各敦和睦。永保平安。遇有爭訟到官。應聽官公平判斷。民人固不得逞志妄爭。教民亦不得捏詞誣告。慫恿教堂教士。妄佔便宜。自然嫌疑俱解。不致積怨日深。而拳匪亦無從妄布謠言。勾結滋事。除通飭各州縣將著名首要拳匪。會同防營協力嚴緝務獲究辦外。合行出示曉諭。爲此示仰闔省紳民諸色人等。一體知悉。自示之後。如有從前被拳匪引誘習學者。即速悔悟。准其免罪。不許輕信邪說。再行學習。亦不得聚衆生事。致干重咎。以後不論會不會教不教。但敢爲匪肇釁者。定當嚴行拿辦。不稍寬貸。倘再有拳匪前來煽誘勾結。無論何項人等。不得容留該處。地保或將拳匪捆送。或赴官署密稟。拘案嚴辦。自應酌量給賞。如敢徇隱不報。察出同干咎戾。該教民等。亦當謹守教規。專心爲善。不得欺凌平民。有意尋釁。如遇爭訟到官。尤當聽官公平審斷。不得捏詞胡賴。致干反坐之條。爾紳民人

等。亦毋得妄信謠言。歧視教民。總期畛或俱化。民教相安。共敦和睦之風。同享昇平之福。本司實有厚望焉。各宜凜遵毋違。切切特示。

直隸總督裕祿告示 爲剴切曉諭事。光緒二十六年正月二十二日。本大臣欽奉上諭。總理各國事務衙門奏請飭嚴禁拳會一摺。上年據山東巡撫電稱。各屬義和拳會。以仇教爲名。到處滋擾。並及直隸南境一帶。疊經諭令直隸山東各督撫派兵彈壓。此種私立會名。聚衆生事。若不嚴行禁止。恐無知愚民。被其煽惑。蔓延日廣。迨釀成巨案。不得不用兵勦辦。所傷實多。朝廷不忍不教而誅。著直隸山東各督撫剴切出示曉諭。嚴行禁止。俾百姓咸知。私立會名。皆屬違禁犯法。宜革除惡習。勉爲良民。倘有執迷不悟。復蹈故轍。即行從嚴懲辦。勿稍寬縱。至民教同是編氓。凡遇詞訟案件。地方官務當秉公審斷。但宜曲直顯分。民教不得稍有偏倚。用副朝廷一視同仁之至意。將此各諭令知之。欽此。查定例遊手好閒。不務本業之流。自號教師。演弄拳棒。教人及投師學習。並掄義舞棒。徧游街市。射利惑民者。嚴行禁止。如有不遵。一經拿獲。將本犯杖一百。流三千里。學習者杖一百。徒三年。限滿遞籍。嚴加管束。如坊店寺院容留不報。地保人等。不行查拿。均照不應重律杖八十。是教習拳棒。射利惑民。本屬大干例禁。况近日無知愚民。惑於外來匪徒。持符念咒。降神附體。能禦槍炮之說。輒私立義和拳會。練習拳棒。蔓延各處。以仇教爲名。滋事擾害。迨兵役捕拿其兇惡之徒。猶敢恃

衆抗拒。更屬目無法紀。屢經文武地方官示諭勸導。仍多陽奉陰違。迷而不悟者。試思民教同係國家赤子。即有相處不平之事。亦當告官審理。乃輒敢持械拆毀房屋。搶掠財物。甚至擄人傷人。抗拒官兵。其情與強盜土匪何異。爾等各有所身家性命。何苦被匪煽惑。執迷不悟。自蹈刑章。除通飭地方官嚴行查禁。有犯必懲外。用特別切曉諭。爲此示仰各屬紳民諸色人等知悉。爾等須知招引徒衆。私立會名。演習拳棒。均屬違禁犯法。其聚衆滋事。倚強肆掠。尤爲法所難容。所有設立拳廠煽惑滋事。首要匪犯。務必嚴拿懲辦。斷不能俸逃法網。其無知愚民。被誘入會習拳者。極宜各自悔悟。革除惡習。勉爲安分良民。如能迅自改悔。自當寬其既往。儻猶不知悔改。復蹈故轍。再有設廠習練拳棒。射利惑民情事。即由地方官會營捕拿。從嚴懲辦。決不稍從寬貸。至民教同係編氓。朝廷一視同仁。原無歧視。遇有詞訟。應聽官爲審理。該民人等不得妄逞私忿。橫肇釁端。教民人等亦不得生事凌人。砌聳教士與民爭勝。該地方官亦當恪守約章。審斷案件。不論民教。但分曲直。持平辦理。不得有所偏倚。該民教人等。務各安分守法。盡釋猜嫌。共敦雍睦之風。本部堂有厚望焉。各宜凜遵。毋違特示。

欽命巡視五城察院告示 照得義和團會拳法。延及京師。奸民借此名目。符咒煽惑無知。聚集通衢僻巷。誘教年少健兒。更有張貼揭帖。惑人愈出愈奇。此等擾害地面。科斷何止杖笞。急應迅速籌辦。毋使邪術潛滋。嚴飭司坊局委。輕則解散爲宜。情節重者拿辦。罹罪後悔。

已遲。派勇晝夜梭緝。專查形跡可疑。責成甲捕牌長。防範在乎先時。分段傳諭。禁止清查。五日爲期。父兄容縱子弟。鄰右瞻徇親私。發覺一律懲責。慎勿伊戚自貽。前曾示禁在案。須悉言出法隨。總思消息未然。因而告誡無遺。本院再行曉諭。故違重治。凜之。四月二十六日。直隸總督裕祿奏收撫義和團協助獲勝摺。竊奴才於本月二十一日。將洋人欲佔大沽炮臺情形。急迫請旨飭派董福祥統帶所部來津接應等情。馳奏在案。旋據羅榮光專差來津。聲稱二十日夜戌刻。各國官兵向該提督索取炮臺屯兵。該提督未允。恐啓釁端等語。隨又接據該提督函報。洋人因至丑刻未讓炮臺。竟先開炮攻取。該提督現在竭力抵禦。擊壞洋人停泊輪船二艘。天黑遠望不真。不知沉否等情。奴才當查洋人既在大沽開炮。兵端已開。津防萬分吃重。即分飭駐紮天津之武衛軍。並本處練軍各營隊。嚴加準備。以防不測。並因天津義和團民。近已聚集不下三萬人。日以焚教堂殺洋人爲事。當將該團頭目傳入。示以收撫之意。該頭目等均稱情愿報効朝廷。義形於色。正在籌辦。據各營報稱。火車十餘輛。裝載洋兵。由陳家溝北上。該軍拆鐵路攔截。彼即開炮攻打。致傷數兵。我軍亦遂開炮回擊。隨有洋兵麇至。意欲包圍營盤。我軍相機抵禦。戰至夜分。始行收隊。二十二日。紫竹林洋兵復分路出戰。我軍隨處堵截。各營炮臺轟擊。義和團民亦四處分起助戰。合力痛擊。至日暮始將洋兵擊回。而紫竹林租界洋房。已焚燒不少。二十三日卯刻。復出隊攻擊。洋人因巢

穴難保。力戰尤猛。我軍會合團民與之鏖戰。良久。敵勢力漸不支。各隊盡力攻擊。午後愈形窮蹙。紛紛竄匿。奴才與聶士成商酌。現事已如此。決裂似難輕易挽回。擬即一鼓作氣。使洋兵巢穴盡覆。以壯我軍之威。而奪彼族之氣。再議併力大沽。至大沽距津一百餘里。電線不通。防守情形若何。尙未能得確信。傳有藥庫被焚之信。危急可想而知。現已將軍糧城一帶鐵路拆毀。並啓陳家溝鐵閘。洩水以杜洋人續行進兵之路。並探聞各國前次進京兵隊千餘人。因前後鐵路全燬。爲拳民困於楊村一帶。欲由水路竄回天津。亦經分隊往禦。此洋人開釁。連日力戰獲勝。並現籌防守之實在情形也。奴才伏查此次中外開釁。實緣民教相仇。勢不並立。情形所迫。遂致猝起兵端。自開仗以後。民心極固。軍氣甚揚。將領胡殿甲何永盛及各營官弁。均能齊心努力。奮往無前。奴才唯有妥爲聯絡。竭力盡心辦理。但彼族經此大創。斷不甘心。各國之兵勢。必尙有大舉。以一服八軍。軍事萬分棘手。以天津現有兵力。待八國麇至之師。其何能支相應。請旨調撥大軍。星速赴津。以維大局。理合由六百里恭摺馳陳。伏乞皇太后皇上聖鑒訓示。再京城各國使館。尙有洋兵四百餘人。聞拳民仇教。亦尙在城內。現天津情形如此。勢迫與前不同。應如何妥籌權變之方。伏候宸斷。施行謹奏。五月二十九日拜發。

裕祿奏進攻紫竹林勝仗摺 竊奴才前將本月初八日以前各軍戰守情形。並籌進剿機

宜。馳奏在案。初九日復與馬玉崑聶士成會商。現在武衛左軍進紮火車站。以扼紫竹林西北要路。其南門外海光寺一帶。係屬南路要隘。商令聶士成率領步炮等營移紮該處。分投擇地修築炮臺。以爲三面進攻之計。初十日聶士成在於小西門圍牆土臺上。安設八生七脫炮兩尊。布置已定。即燃炮轟擊。焚燬紫竹林洋樓一座。洋兵馬隊五六百人。奔回跑馬廠地道內潛藏。少頃復出。將往馬道口接仗。又經開炮截擊。適中其隊。洋兵隊伍四散奔竄。是晚聶士成由該軍內挑選奮勇百名。乘船渡河。潛至跑馬廠。將近子刻。見有洋人及教匪三百餘人。遂用手雷拋擊。傷斃甚夥。餘俱驚潰。我軍哨官柴得貴。亦被地雷擊傷甚重。當將該處洋樓三座焚燬。即飭前左右各路砲步隊。馳往跑馬廠及八里臺扼紮。又馬玉崑一軍。連日在火車站一帶進攻。與洋兵日夜鏖戰數次。並用炮轟擊紫竹林。兵氣甚奮。初九日會同武衛軍之隊。三面圍攻東局。守備胡殿甲親率所部。極力往攻。我軍開炮五次。該局烟霧彌天。洋兵紛紛敗竄。我軍乘勢亂擊。槍斃甚多。洋人恐我軍追及。自將紫竹林浮橋拆斷。維時駐紮鹽塚之軍。亦開炮助轟。洋兵以急渡中炮落水者無算。並擊死敵馬四匹。駱駝四頭。初十日我軍復在東局與洋人接仗。東西兩路。川炮互擊中。以伏兵突起。三面夾攻。傷斃洋兵多名。餘仍退回東局。斯役我軍亦有傷亡。是日晚間。復有洋兵多人。向馬家口潛進。其地係淮軍營官蔣順發周行彪防守。適義和團張德成亦率團民數千。在彼處駐紮。登時併力擊

退洋人。即乘勢追下。並抵紫竹林交界。將附近租界一帶之洋樓。焚燒多處。洋人竄匿樓房一所。抵死守禦。至夜半始行收隊。十一十二兩日。我軍仍三面燃炮環擊紫竹林。擊焚洋樓不少。洋人亦在小營門。暨租界樓房用砲還擊。並時向河北及城內施放開花炮彈。官署民房炸壞多處。間有傷斃人口。十一日夜。聶士成率隊前往攻小營門。洋人攜炮遁去。軍駐紫該處。仍與馬玉崑聯絡攻擊。其各隘口洋人仍於每夜出隊窺伺。我軍分路防守。隨時抵禦。均尚嚴密。此初九至十二日連日接仗之情形也。至大沽一帶。近日迭據偵探內河停泊洋船十餘隻。並未有續行進口兵艦。唯每日皆有帶水小輪。上下拖帶民船數艘。或裝來洋兵數十人數百人不等。其被傷洋兵。運回大沽者。亦復不少。並據副將韓照琦稟稱本月初八日。該營在火車站地方與洋人交戰。洋人馬隊百餘人。由河堤而來。步隊三百餘人。自新城夾攻。該副將分隊奮擊。戰至一時之久。洋兵傷亡數十人。始行敗走。該軍斬獲首級二顆。奪得戰馬三匹。槍刀衣帽數件。兵丁陣亡一名。受傷三名等語。口內曾否續有戰事。尙未據有稟報。此大沽一帶近日之情形也。查洋人恃其租界樓峻牆堅。又因炮火之利。彼以俯擊。我以仰攻。負隅甚固。奴才與馬玉崑聶士成商酌。必查探其安設炮位。及儲子藥之所。先用巨炮轟燬。方可會合兵團一氣進攻。無損精銳。並尤須設法包剿後路。使彼進退失據。易就驅除。現四川提臣宋慶奉旨幫辦北洋軍務。月內即可抵津。奴才謹當遵旨隨時會同該提

督與馬玉崑聶士成熟察機宜。督飭將士穩慎進取。以期迅掃敵氛。所有紫竹林連日接仗。並大沽近日情形。理合由六百里加緊恭摺馳陳。伏乞聖鑒訓示。謹奏。奉硃批。另有旨。欽此。六月十三日拜發。

裕祿奏連日戰守情形摺。竊奴才前於五月二十九日。將洋人分路竄擾官軍竭力抵禦。情形恭摺馳陳在案。廿九日早。有洋兵數百名。並教民多人。由火車站緣鐵路竄至錦衣衛橋。意圖接應。竄擾武庫之洋兵。經練軍會同武衛前軍並義和團奮力擊退。是日午間。又出西沽武庫圍牆。出有洋兵數百人。攜帶洋炮。在武庫對面白廟地方。隱身樹林一帶。直攻我軍營壘。我軍開炮對擊。戰至一時之久。始仍退回西沽。該洋兵因連日被我軍攻擊。無路可走。又無援兵接應。遽於是夜在武庫三面放火。乘間竄逸。我軍望見火起。即一而出隊追擊。一面會合民團水會。將火撲滅。洋兵均紛紛繞路。向老龍頭火車站奔竄。我軍將火救熄。察看分存兵械子彈及炮位所用引信等庫九座被焚。其餘鎗炮等庫。尚皆無恙。是日午間。洋人又在紫竹林川砲向我南門外海光寺旁之製造局轟擊多時。不期炮子落入海光寺廚房。登時火起。燒及廟宇。致延局中木料廠。並廠房數十間。仍存五十餘間。廠內機器。雖有損傷。尚可修理。西沽武庫未被洋兵佔據。南製造局洋人亦未闖入。現均分飭嚴守。又東門外距城二十餘里之機器局。洋人屢圖撲犯。自二十七日至三十日所來洋兵。均經隨時擊退。

迭有斬獲。六月初一日早。該局西面。又有洋兵來攻。經護守西面之武衛前軍營。有潘金山嚴飭營兵潛伏不動。挨其將近。川排鎗轟擊。退而復來。如是數次。擊斃洋兵多名。我軍正在傳餐。遙見紫竹林突出洋兵二千餘人。仍攻西面。該軍統領姚良才。恐潘金山衆寡不敵。復抽調防護。東北兩面哨隊援助戰。未逾時。而軍糧城又突出洋兵馬隊千餘。與洋兵會合。四面包裹。我軍仍竭力抵禦。鎗砲子彈如雨。潘金山右腋被鎗子洞穿。裹創至申刻。忽有砲彈墜入該局棉花藥庫。洋兵即乘勢闖入。其時四面火起。我軍抵禦不住。遂退至堤頭。我軍傷亡營哨弁勇共計三百餘名。洋人亦傷亡不少。該局周圍延袤二十餘里。地方遼闊。洋兵入圍。僅佔一面。查探祇焚棉花藥庫等處。機器各廠。尙未損壞。仍嚴飭該軍聯合民團趕緊設法擊退。是日常機器局被攻吃緊之時。又有洋兵由河東上竄。在陳家溝。搶修鐵路橋座。希圖分我兵勢。武衛前軍後路統領胡殿甲會合民團截擊。連開巨砲擊斃洋兵不少。並將陳家溝洋人所修鐵橋轟毀。洋兵紛散奔回租界。初二三等日。洋兵並無大隊出犯。唯在租界馬家口一帶。日夜出隊誘戰。並分兵由火車站於河東哨探。致燒鹽坨民房。均經我軍隨時擊退。此上月二十九日以後。連日戰守之情形也。至大沽一帶哨探。仍有各國小火輪兵船十餘艘停泊塘沽。其來津之兵。皆以帶水小輪拖帶民船。裝載兵以俄國爲多。並有該國所雇修鐵路工人及教民在內。大沽通新城大路之萬年橋。被洋兵拆毀。軍糧城以上。民拆鐵

路均未修復。現浙江提臣馬玉崑督帶所部於初三日已抵天津。得此大枝勁旅援應。津郡民心均稍安定。奴才與該提督面商進戰機宜。必須先將紫竹林洋兵擊退。然後會合各營節節進剿。直抵大沽。方可得手。當由奴才與馬玉崑聶士成羅榮光隨時相機商辦。總期迅將大沽砲臺恢復。以固門戶。所有連日戰守情形。理合由六百里加緊恭摺馳陳。伏乞聖鑒訓示。謹奏。奉硃批知道了。着卽會商馬玉崑節節進剿。尅期將大沽砲臺恢復。以資扼守。欽此。

直隸總督裕祿 稱辦北洋軍務大臣四川提督宋慶奏連日接仗情形摺 竊奴才裕祿前將本月初九日至十二日。進擊紫竹林戰事。並提督聶士成十三日力戰陣亡各情形馳奏在案。茲查十三日聶士成在八里臺。自丑至卯。與洋人血戰三時之久。力盡捐軀。該兵隊因主將陣亡。勢難抵敵。遂退至西教廠。洋人由海光門衝入。並海光寺縱火。該軍後路哨官潘鴻生帶快砲二尊。在南關外小橋扼守。極力抵禦。擊斃洋兵多名。旋因衆寡不敵。陣亡哨長一名。軍士受傷不少。敵鋒仍未稍挫。淮軍前左營趕到抵敵。該統帶卞長勝率隊接應。練軍統領何永盛亦帶新槍隊中營弁兵向前迎擊。洋兵始向紫竹林退走。又武衛前軍統領胡殿甲是日早間。在河東興隆街燃放巨砲。將租界洋樓轟壞。傷斃洋人甚多。下午復親率本隊並快砲二尊。會同義和團長張德成。並團民多人。由馬家口進攻紫竹林。用砲轟毀洋

樓一座。斃死洋兵數十人。洋人遂紛紛竄出。卽在租界接仗。該兵團等衝出復入。洋人用排槍亂擊。互有傷亡。日暮團民不能支持。因各將隊撤回。十四日夜。提督馬玉崑親率該軍左路統領參將郭殿邦。右路統領記名總兵李大川。帶領步砲隊六營。由老龍頭火車站進攻。冀可毀其鐵路。李大川率隊鼓勇先趨。當將鐵路奪佔。郭殿邦隨後接應。方將得手。乃洋兵避於墻垣之後。槍砲雨集。李大川中砲陣亡。營官守備孫祥雲。遊擊蘇豁然。亦先後歿於陣中。弁勇傷亡甚多。力漸不支。適奴才宋慶督率後隊接應。始得撤隊。是夜探聞洋人死傷不少。十五日黎明。洋人分隊來攻興隆街鹽坨等處。我軍開砲轟斃多名。均各退走。午間洋人復至馬家口安砲。向水師營遙擊。致將該營望樓擊燬。幸不久卽行撲滅。其開花炸彈城內東門南門。城外河南河北。均有被擊之處。經武衛前軍統領周鼎臣。以鹽碼頭所安大砲。向敵旁擊三十七砲。洋兵不能安守。始收砲停放。此十二至十五日接仗之情形也。奴才宋慶奉旨幫辦北洋軍務。已於十四日抵津。與奴才裕祿及馬玉崑察看近日戰事。熟參進勦機宜。伏查洋人固守租界。恃其地廣而牆堅。各巷口俱有埋伏地雷火彈。我軍肉薄。攻堅最爲兵家所忌。然又不可任其久踞。以致勢燄愈熾。且探聞大沽口外。各國兵輪來去無定。時有數十艘在彼停泊。口內現有兵船十隻。魚雷艇三隻。軍糧城以下。火車尙可通行。鐵路兩旁。亦暗下地雷。防我攻奪。就目下軍情而論。勢非斷火車及小輪船之路。不能制其死命。而天

津現有兵力戰守。僅敷分布。實無餘力兼顧。山東撫臣袁世凱現准奏派登州鎮總兵夏辛酉統帶所部六營。尅日來津援助。不日即可到防。藉資接濟。惟將來攻取大沽。節節進剿。仍必須厚集兵力。方可相機區畫。奮迅圖功。至此次武衛左軍在老龍頭與洋兵血戰。該軍統領記名總兵李大川。營官守備孫祥雲。遊擊蘇豁然。身先士卒。中砲捐軀。死事極爲慘烈。合無仰懇天恩。勅部從優議卹。以慰忠魂。而昭激勸。出自逾格鴻施。所有連日接仗情形。謹由六百里加緊集詞恭摺馳奏。伏乞聖鑒訓示。謹奏。奉硃批李大川等力戰捐軀。死事慘烈。覽奏殊深惋惜。均着交部從優議卹。以慰忠魂。該部知道。欽此。

劉宮保通飭禁止造謠嚴辦匪徒保護商教札文。照得北地匪徒鬧教。至肇鉅燬。若東南一帶再滋事端。大局不堪設想。迭經電檄通飭保護商教。拿辦匪犯。現因各國均欲以兵艦入江自衛。恐致驚擾。會同湖廣張部堂飭令滬道。正與各國領事議訂長江一帶。由我自行力任禁止造謠。嚴辦匪徒。保護商教。不使疎虞。以期各不相擾。俾得保守東南。以待大局轉機。惟現富北地糜爛。人浮心動。匪徒思逞。防範固宜周密。辦匪尤必從嚴。倘有造謠生事。卽行嚴拿正法。以遏亂萌。至保護之法。值此兵單餉絀。分防要隘。尙多不敷。斷難分撥內地。惟保護商教。卽所以自衛地方人命產業。事關切己。禍福與共。必能一體曉悟。協力圖維。經此次通飭之後。若再稍掉輕心。必致貽誤大局。斷非參辦所能蔽辜。爲此札仰各該道府嚴飭所

屬一體。稟道是爲至要。切切特札。

吳粵楚齊督撫等電致各國駐使。略云。拳匪滋事。中外商民均遭蹂躪。然朝廷並無與各國開釁之意。深恐各國旅人。快會致傷。利局請即迅商外部。電致各統兵官。暫緩添兵進京。俟李中堂到京。必能與各國公使妥爲調停。總之各國不開釁端。中國乃能專力勦匪。若一旦決裂。則長江一帶匪徒。必致乘機響應。中國亦難於兼顧。請酌奪轉商。見覆。江督劉廣督李楚督張東撫袁皖撫王湘撫。俞。

疆臣會銜電奏稿。各國洋電。皆以拳匪妄殺生衅。我不速勦。致動衆怒。日本電謂若肯勦匪。尙有轉機。京城危急。北望焦灼。查拳匪符咒惑人。傳教煽亂。實不能避槍砲。嘉慶十三年。久經諭禁。若置係直隸義民。何以陝西李來中爲首。是爲邪教。應勦一也。不遵詔旨。解散內外。亂殺華洋。均受其害。且要挾欽使。請殺新城萊水兩知縣。日無法紀。是爲亂民。應勦二也。旗書助清滅洋。乃各省會匪。故套若助朝廷。何以抗旨。北自京城。東至天津。西至河間。周圍千餘里。均被滋擾。勒派供糧。其中不盡教民。亦濫遭焚殺。畿輔災旱。民不聊生。是爲土匪。應勦三也。燬壞國家所設電線鐵路。值數百萬。阻詔奏。誤軍行。又焚燬京外洋房民房無算。是爲劫盜。應勦四也。卽不與各國開釁。亦應痛勦。況無故戕害洋人洋房。殺日本參贊。今海口已被佔奪。都城布滿洋兵。增兵增船。且匪無械無紀。在東在直。皆不能敵官兵。近日在落位。被洋兵擊斃無數。在東交民巷。又被洋兵擊斃。未見其能避槍砲。若謂烏合亂匪。能與大隊洋

兵拒戰。斷無其事。仰懇皇太后皇上聖斷。念宗社之重。速持定見。勿信妄言。明降諭旨。力勦邪匪。嚴禁暴軍。不准滋事。速安慰各使館。力言決無失和之意。告以已召李鴻章來京。李到當與各國妥商辦法。聞美國在大沽。並未開砲。宜先託美使調停。勸令停兵息戰。我方可專力勦匪。並請速發電旨。述皇太后皇上之意。飭駐各國使臣。令向外部道歉。日本被戕。參贊優加撫恤。力任以後保護。明諭各省保護洋商教士。衆怒稍平。庶可徐商挽救。宗社安危所關。問不容髮。再過數日。大局決裂。悔無及矣。焦思悚惶。坤一等意見相同。謹合詞籲懇聖鑒。請代奏。因道路梗阻。分遞兩處。一呈總署。一呈榮中堂。均請代奏。以冀必有一路可到。并懇中堂示復。劉坤一張之洞鹿傳霖王之春于蔭霖俞廉三謹奏。

江督劉坤一覆奏江防疏稿 竊臣承准軍機大臣字寄。光緒二十六年六月初七日奉。上諭。現在中外業經開戰。斷無即行議和之勢。各直省將軍督撫。平日受恩深重。際此時艱。惟常戮力同心。共扶大局。謹守封圻。惟爾之功。坐失事機。惟爾之罪。功多有厚賞。不廸有顯戮。各將軍督撫等。務將和之一字。先行掃除於胸中。膽氣自爲之一壯。所有一切戰守事宜。即著一面妥爲布置。一面迅即奏報。務各聯絡一氣。以恤彼族之驕橫。以示人心之固結。朕於爾將軍督撫。不得不嚴其責成。加以厚望也。將此由六百里加緊。各諭令知之。欽此。跪誦之下。欽棟莫名。竊維此次戰事。本非朝廷意料所及。顧臣屢次電奏。不免颺颺過慮者。則以各

國同時開釁。有敵衆我寡之虞。然時勢所迫。實偏處此。軍事一日不了。防務即不可一日稍鬆。兵法所謂毋恃敵之不來。恃我有以備之。此誠千古不磨之論也。臣受恩深重。具有天良。南洋濱海沿江。關繫尤鉅。當此變生意外。時局艱危。上念宵旰之憂勞。下念責任之重大。敢不殫精竭慮。奮勉圖維。業經迭次電令各路防軍砲臺備足子藥。晝夜嚴防。先後飭將吳淞之盛字五旗。濟浦劉河等處之開字三旗。江陰之合字五旗。鎮江之新洲五旗。上海儀徵之奇兵左右兩旗。一律改旗爲營。每營添足五百人以厚兵力。復將自強軍馬步炮隊各營。加添哨隊。並飭令總兵劉光才添募親軍兩營。總兵楊金龍接統護軍三旗。改旗爲營。另添兩營。合成五營。駐扎江甯以備調遣。長江水師提臣黃少春所部江勝六營。本係游擊之師。何處有警。即行馳往援應。各路炮臺砲勇較少。亦飭由各就近防營。營內挑選熟習砲法之勇丁。加給津貼。協同操習。一面調集各項兵輪雷艇蚊船。暨北洋駛來之海圻海籌海琛海天復濟通濟飛鷹七兵艦。分泊江陰等處。俾收水陸夾攻之效。又以上海機器局爲製造軍械重地。並飭添募營隊。嚴密防護。此江海要隘布置之大概情形也。沿江港汊紛歧。敵人處處可以登陸。所幸沙線縈曲。敵艦吃水較深。不能近岸停泊。經臣商准黃少春調集長江師船。分泊江陰鎮江一帶。並另招新勝水師一營。沿江梭巡。無事則緝捕梟匪。保護商旅。若遇敵艦內犯。乘放杉板。希圖登岸。則會合師船奮力抵拒。復咨會江南提臣李占椿及蘇松狼山

福山三鎮總兵。將所轄之廣艇領江等項戰船於崇明任家港激浦等處分投扼守。此沿江港汊布置之大概情形也。從來軍務倥傯之際。往往有內匪乘機滋擾。矧大江南北人心浮動。鹽梟會匪出沒其間。黨與衆多。行蹤飄忽。當此江防吃緊。謠譟繁興。深慮揭竿起事。爲害地方。各標制練兵丁。近年裁節餉需。人數太少。實不足資分布。臣體察情形。先將督標新兵練軍五營。提標練軍兩營。淮揚鎮標練軍一營。狼山鎮標練軍一營。各照從前舊額。添足人數。俾期得力。如有匪徒濶跡。煽惑滋事。卽行相機勦捕。毋任蔓延。復嚴飭各州縣整頓團練。巡緝奸宄。責成該管道府隨時稽察。如敢虛應故事。稟請撤參。此內地等處布置之大概情形也。淮安徐州二府地屬通衢。爲南北最要關鍵。幅員遼闊。民悍盜多。現值軍情緊急。轉運糧餉軍械。皆係必由之路。駐紮淮徐之武衛先鋒左右兩軍。及提督陳鳳樓所部之馬步七營。次第北上。地方實覺空虛。經臣檄飭徐州鎮總兵劉青照添募馬隊一營。步隊四營。填紮邳州宿遷等處。並商准漕臣松椿飭令淮揚鎮總兵潘寓才招募四營。駐防清淮。此又防守北路兼護運道之大概情形也。目下庫儲奇絀。籌餉萬分艱難。惟添勇設防。爲大局安危所係。無論何款。總當先其所急。竭力騰挪。並電商安徽江西兩撫。臣如下游有警。卽由該兩省分撥得力勁旅。以期聯絡聲援。共扶危局。總之疆臣有守土之責。倘有敵人貿然侵犯。必當激勵將士。奮勇堵擊。庶人人有敵愾之心。以副聖主諄諄誥誡禦侮保疆之至意。除蘇防布

置一切事宜。另由撫臣奏報外。所有籌辦防務情形。理合恭摺。由驛馳陳。伏乞皇太后皇上聖鑒訓示。謹奏。

湖廣總督張之洞。湖北巡撫于蔭霖。遵旨保護告示。照得北方因匪徒滋事。以致各國生。此人心搖動。大局攸關。本部堂院奉到五月二十九三十等日寄諭。有現在京城仍極力保護各國使館。及各省督撫務須相機審勢。保守疆土等語。自當欽遵此次諭旨。設法辦理。已會同兩江督部堂劉。詳加籌畫。將東南各省。均行一律保全。現與各國領事商定。但使各國水師艦隊不入長江。則內地各省所有各國人口產業。均歸地方官極力保護。業經妥議辦法。電奏在案。此乃保衛地方百姓身家性命之至計。誠恐民間未知此次奏明辦法。土匪莠民。藉端騷擾。致害全局。爲此亟行出示。曉諭一切軍民人等知悉。爾等須知此次北方戰事。本非朝廷意料所及。此次諭旨。現在京城仍保護使館。與各省現在仍遵照歷年頒行約章。保護租界教堂。同爲保護大局起見。現在各國既願歸我保護。水師艦隊不擾長江。則居民商務。均可安靜如常。土匪不致乘機作亂。其所以保全沿江內地各省百姓之身家性命者。裨益良多。斷不宜輕啓弊端。庶可仰體朝廷顧全大局之意。紳耆人等。尤當剴切開導。如此乃所以保安國家完善之疆土。卽所以益彰聖朝如天之至仁。經此次示諭之後。如有捏造謠言。煽惑人心。及聚衆擾及租界教堂者。定卽嚴密查拿。按照土匪會匪懲辦。其有匪徒藉

端騷擾。意圖蠢動者。各處均已駐有重兵。立行痛勦。各兵勇差役有滋事擾害者。卽照軍法懲辦。務使商民安業。地方平靖。以仰副諭旨相機審勢保全疆土之意。各宜凜遵勿違。切切特示。

兩江總督劉坤一湖廣總督張之洞瀝陳時局摺 竊臣等奉二十四日寄諭。欽遵續准東撫密電二十五日寄諭。拳匪在京。助官獲勝。降旨嘉獎各等因。欽此。竊謂此次大患。在與各強國一齊開釁。目前大沽已失。京都危急。拳匪謹恃邪術。各國非比流寇。雖幸獲勝仗。各國斷不甘心。勢必增調重兵報復。俄日兩國陸兵最多。其來最速。現俄用裝茶輪船改赴旅大。裝兵。英調印度兵。美調小呂宋兵。日本調廣島兵。法調西貢兵。連德國陸兵。尙不下八九萬。斷非董宋聶諸軍所能抵禦。拳會無紀律。可勝不可敗。敗則四散。以京師之重地。當孤注之一擲。危迫甚矣。論兵力一國烏能敵各國。不敗不止。論大勢各國焉肯讓一國。不勝不止。豈有拳會可操常勝而無一敗之理。鑿戰旬日。藥彈必竭。接濟無從。更何能以血肉之軀。與炮火相持。一旦兵敗拳散。各國大隊直入京城。宗社乘輿。何堪設想。此臣等痛哭流涕。不忍言而不敢不言。不得不萬叩以請朝廷亟思變計者也。沿江一帶會匪。鹽梟安慶道友甚多。與拳會各自爲黨。平時專以掠剗爲事。名號皆悖逆之語。並無拳會之黨可招。臣等已將防務密爲籌備。但就目前計。北方已決裂至此。東南各省。若再遭蹂躪。無一片乾淨土。餉源斷絕。

全局瓦解。不可收拾矣。唯有穩住各國。或可保全疆土。昨寓漢口英國領事。迭來臣等署中面商。欲派兵艦多艘。入江保衛商教。臣等以力任保護。堅詞却之。該領事已允。不再派艦。上海各領事處。並經飭令江海關道密爲轉商。亦各允許。蓋長江商務。英國爲重。各國覬覦已久。懼英而不敢先發。英亦慮各國干預。而不敢強佔。以啓各國戎心。在我止可就其所忌。而羈縻牽制之。若觸怒一國。勢必羣起聚攻。大沾覆轍。可勝追鑑。此實委曲求全之策。現在尙屬安靜。自可暫與周旋。仍一面嚴密籌備。唯沿江防軍兵械不能一律。雖酌量增募訓練。仍無把握。一經宣戰。各國封我海口。滬局軍火不能運出。將士戰守奮勇。亦無藥彈接濟。沿海各省紛擾可慮。防不勝防。閩浙廣東兵力亦薄。從前法越之戰。日本之戰。開釁皆止一國軍械藥彈。尙可設法分購密運。勉支半年。故一國尙可力戰。若謂可以抵拒各國。臣等決不敢作此矜夸之語。以欺君上而誤國家。外釁一開。內匪四起。更難措手。總之能聯絡一氣。長江以內。當可使外人無從逞志。倘各國必欲以干戈從事。派大隊兵艦。攻我營臺。實偏處此。臣等受恩深重。有守土之責。自當盡力抵禦。存亡與共。事機甚緊。所關甚巨。謹披瀝上陳。再出使各國大臣。此時請勿遽行召回。各使臣下旗回國。即是明示決裂。自認攻毀各國人命物產。以後更難轉圜。擬仍令暫住各國爲要。在京各國使臣。亦宜設法挽留。勿遽聽去。合詞瀝陳。此奏係電由東撫。今爲具摺交驛六百里加緊飛遞。以期迅速。不勝急迫之至。合并聲明伏

乞聖鑒訓示。謹奏。

江督劉鄂督張川督奎皖撫王浙撫劉護理蘇撫聶會銜奏稿。竊查此次戰事。由於匪徒藉口仇教。肆行燒殺。致釀大患。各國亦以勦匪救使及保護商民教士爲詞。調艦增兵。合而謀我。軍事既起。各省自應力籌戰守。臣等已將防務嚴密籌備。倘彼族前來侵犯。即當奮力抵拒。不敢稍涉疎虞。竊維中朝寬大。聖澤如天。懷柔遠人。無不仁至義盡。目前辦法。總須將朝廷萬不得已之苦衷。及並行不悖之德意。切實宣諭。庶匪徒不敢藉端滋擾。爲害地方。臣等於戰事初起之時。即行出示曉諭。務各相安。不必妄生疑慮。並接出洋華民稟電請保護各國洋人。以免報復。情詞極爲迫切。臣等遂乘各領事來商保護商教之時。會飾江海關道余聯沅與之訂定章程。長江一帶及蘇杭內地。各國如不侵犯。我當照常保護。經各領事電商各外部。臣等亦電各使臣向各國切實聲明。德因戕殺使臣頗持異議。嗣因各國牽制。遂亦帖然就範。恭繹五月二十九日諭旨。現在各使館勢甚危迫。我仍盡力保護。並飾臣等各盡職守。所當爲相機審勢。竭力辦理。六月初三日寄諭各使臣。現仍嚴飾帶兵官照前保護使館。惟力是視。各該大臣在各國遇有交涉事件。仍照常辦理等諭。是朝廷於天津開仗之滿人。則嚴行懲創。於未與戰事之洋官商教。則曲爲保全。威德並施。昭如日月。臣等屢次奏請保護公使。亦以聖慮之所重。時局之所係。首在此舉。不容稍緩。迭准各出使大臣楊儒等

來電。總以保全公使暨在各省之洋人爲第一要義。擬懇天恩。節下在京得力各軍保護各國公使。正所以自保使臣。飾令各督撫保護在華洋人。正所以保在洋華民。不勝急迫之至。謹合詞恭摺具陳。伏乞皇太后皇上聖鑒訓示。謹奏。

直隸總督李鴻章告示 本閣爵部堂昔任直隸二十餘年。畿輔良民。皆吾赤子。去任六年。爾等之念本閣爵部堂。猶吾之念爾等也。今者恭承恩命。重蒞畿疆。凡安分守己者。皆吾良民。視如子弟。其犯上作亂者。即係賊匪。必加誅夷。拳匪倡亂。動以攻教爲名。實則焚掠刦殺。坐使生靈塗炭。宮禁震驚。罪大惡極。法難寬宥。爾等一爲所惑。身家性命。盡付東流。豈不可痛。本閣爵部堂眷懷舊治。不忍不教而誅。爲此剴切示諭軍民人等知悉。爾等以後務宜堅持定見。知拳匪乃害我性命之人。陷我身家之事。父教其子。兄率其弟。深惡痛絕。勿聽邪言。其有爲拳匪脅從者。悔罪來歸。許其洗滌。本閣爵部堂爲保全合省人民起見。爾等從則免害。違則受禍。各宜三思。勿貽後悔。凜之。切切特示。

鄂督張江督劉致上海英德法俄美日本六國領事電兩道 頃接烟臺來電。內開聯軍十九據通州。擬攻東直門等語。查現在並未得我兩宮出京確信。如聯軍果攻京城。炮火所至。勢必震驚。宮禁萬一有意外之危險。全國人心憤激。從此將不知禍之所止。况南方保護之局。各督撫均係奉旨辦理。倘各國不顧兩宮。則何以處南方之督撫。萬望貴領事飛電聯軍

各兵官。切實詢明。如何辦法。萬萬不至震驚我皇太后皇上之實據。使南方各督撫及各省民心。不至激成大變。務望二十四點鐘內電復。萬急至盼。七月二十四日。昨電請貴領事飛電聯軍。不致震驚兩宮。急盼兩日復電。係天下臣民急切盼望之意。頃接出使大臣電各國外部。語意均甚好。並接出使日本大臣李電。日本政府已允保護兩宮。想各國篤念邦交。用意亦必相同。是兩宮可以平安。南方各督撫聞之。萬分感慰。東南保護之約。各督撫必當盡力自任。請速電知會貴政府爲感云云。七月二十五日。

護撫端中丞曉諭泰民告示 爲示民各安本業以靖地方事。照得津沽民教相仇之案。此間已有傳聞。深恐爾百姓知之勿詳。又復惑於謠言。無端滋事。自維官長之於百姓。以分論之。則爲官長。以情論之。無異家人父子。何嫌何忌。而不肯爲百姓苦口一言。閱傳拳民練習身技。不畏槍炮。此曠語也。或當民教積不相能之時。其黠者意圖報復。而又欲齊一人心。設此權詞。川動公憤。亦未可定。愚百姓不察。以虛爲實。至兵連禍結。死者不能復生。而其體已殘。其迷不悟。謠言遍布。遠道傳來。近京數百里。積尸纍纍。不得謂已死者。皆習技未精之輩。未死者。爲學法已成之人。其不足信者一。義和拳名目由來已久。嘉慶年間。已奉諭旨嚴行拿辦。凡有所獲。立予駢誅。現既効命疆場。成事不說。但以理審之。恐無斧鉞可以亡身。而槍炮不能喪命之事。其不足信者二。咸同時。粵匪起事。治兵者爲曾文正。胡文忠諸公。奇材異

能。罔不羅致。而論槍炮之毒。但云。惟有激勵忠義。以血肉之軀博之。不聞有此異術。爲朝廷効尺寸之勞。其不足信者三。曩年河南湖廣等省。白蓮教起事。皆藉術愚人。及大兵雲集。邪難敵正。其身不保。其術亦不靈。以彼例此。恐亦同爲假託。其不足信者四。本護部院夙知秦民敦重節義。重公戰而恥私仇。即學習藝能。亦敵愾同仇之義。但與國爲敵者。在邊海入犯之洋兵。不在內地寄居之教士。若奉敕征調。急難從戎。奮忠義自矢之心。守戰陣無勇之戒。本護部院適官斯土。亦與有榮。若侮此瑩瑩孤弱之數洋人。希圖財物。是直苟且無賴之事。何預急公奮義之爲。不唯法所不容。並爲爾百姓愧之。向來各處匪徒多駕名於助清滅洋。中國自有威權。何敗乎若曹之助。外人但安本分。何至用若曹之滅。祇恐助清者適爲清憂。滅洋者益增洋算。現在各省入衛之師。星羅雲布。天戈所指。櫓槍立銷。萬無需於爾百姓。爾百姓但當各安恒業。勿信謠傳。即云事變難知。而官府設兵以衛民。豈有不代爲防維之理。又如去年欽奉上諭。各屬應辦理團練。聖意諄諄。尙欲百姓勤於守望。藉保地方。不過此等無據之言。按之於理。多屬不經。審乎其情。尤恐無用。邇來近京一帶地方。父老子弟。無業可執。無家可歸。兵燹餘生。痛定思痛。覆車未遠。爾百姓何堪循之。兼之真正拳民。皆籍隸直隸山東等省。該處正敵兵四集。外侮頻加。欲圖報國。彼必不能來。欲求保家。彼亦不肯來。祇恐百姓所擬而冀之者。適召異方之遊勇。以及不法之奸民。求伸忠憤之心。輔墮匪徒之黨。本

護部院用是惻然。特申勸戒。爲此示仰軍民人等一體知悉。爾等須知謠傳之說萬不可憑。恍惚之術萬不可恃。官長之誠萬不可違。兵禍之烈萬不可肇。明理君子。從今絕口不談。安分良民。亦復束身自愛。父禁其子。兄戒其弟。士農工商。各安各業。如有馳心謬說。聽信訛言。聚徒拜師。藉端起釁。則國法具在。寬典難邀。禍集厥身。孽由自作。不得謂本護部院不教而誅也。凜之慎之。鄉愚不通文理。所賴讀書明理之士。將此示明白宣講。以發其蒙。切切特示。

會商保護電 劉宮保電致盛京卿內開保護中外人民產業。已電商香帥。得覆即辦。頃駐英羅星使覆電稱。遵告沙侯。據云。英政府注重保全民命產業。絕無侵佔意。水師只在口外。不致分兵喧擾。承示竭力保護。心感云云。張香帥亦電致劉宮保盛京卿云。來電均悉。請卽刻飛節上海道與各領事訂約。上海租界歸各國保護。長江內地均歸督撫保護。兩不相擾。保全中外商民人命產業爲主。並請聲明敝處意見相同。杏翁思慮周密。敢懇希同與議指授。滬道必更安速。尤感。但恐各領事必須敝處派員。擬即派陶道森甲迅速赴滬與議。惟請告上海道及盛京卿先與速議。不必候陶云云。

阻止調兵電 江督劉電致英水師提督西摩。謂前因領事而言。美擬調兵保護租界。英亦不得不調兵。當以美英或有成約。切囑務宜從少。貴軍門爲保商務起見。本大臣爲保地方起見。皆欲力求安靜。是以遇事無不推誠相商。通融辦理。今貴國調兵來滬。各國旣均不願。

是美國並無先欲調兵之意。可知目下滬上民心甚爲驚惶。各口亦復因此震動。若各國復援例而來。民間更不知若何駭畏。不得不請免調。以示鎮靜。務望設法安籌。已行者如何折回。未動身者即行阻止。云云。

中西官議定保護長江內地通共章程 一、上海道臺余現奉南洋大臣劉兩湖督憲張電示。與各國駐滬領事官會商辦法。上海租界歸各國公同保護。長江及蘇杭內地均歸各督撫保護。兩不相擾。以保全中外商民人命產業爲主。二、上海租界公同保護章程已另列條款。三、長江及蘇杭內地各國商民教士產業均歸南洋大臣劉兩湖督憲張允認切實保護。並移知各省督撫及嚴飭各該文武官員一體認真保護。現已出示禁止謠言。嚴拿匪徒。四、長江內地中國兵力已足使地方安靜。各口岸已有各國兵輪者仍照常停泊。惟須約束水手人等不可登岸。五、各國以後如不待中國督撫商允。竟自多派兵輪駛入長江等處。以致百姓懷疑。藉端啓釁。傷害洋商教士人命產業。事後中國不認賠償。六、吳淞及長江各炮臺各國兵輪切不可近臺停泊。及緊對炮臺之處。兵輪水手亦不可在砲臺附近地方操練。彼此免致誤犯。七、上海製造局一帶各國兵輪勿往遊弋駐泊。及派洋兵巡捕前往。以期各不相礙。此局軍火專爲防勦長江內地土匪。保護中外商民之用。設有督撫提用。各國毋庸驚疑。八、內地如有各國洋教士及遊歷洋人。遇偏僻未經設防地方。切勿冒險前往。九、凡租界

內一切設法防護之事。均須安靜辦理。切勿張皇以搖人心。○中西官議定保護上海租界城廂內外章程。一、租界內華人以及產業。應由各國巡防保護。租界外洋人教學教民。應由中國官妥爲巡防保護。遇有警急之事。互相知照妥辦。二、地方流氓土棍。遇有聚衆滋事。或搶劫傷人。無論華洋地界。均須一體嚴拿。交地方官從重嚴辦。三、現因各處商貨停滯。各項小工傭趁較難。擬請租界工部局。添辦新擴各界路工程。城內則令疎通河道。並由道臺挑選精壯充當勇丁。務使閒民有事。可致消息無形。四、添辦各項工程及添募勇丁口糧。中外官商公議捐助章程。五、滬市以錢業爲大宗。而錢業須賴銀行零拆轉輸。若銀行不照常零拆。或到期收銀迫促。錢市一有擠倒。各行生意必皆窒礙。市面一壞。人心即震動不安。應請中外各銀行東。及錢業董事。互相通融緩急。務使錢行可以支持。六、鈔票應照舊行用。祇須道臺會同各領事出示曉諭。聲明各行票未收銀。搭幾成鈔票。由各錢業照付。七、租界內大小各戲館。應令照常。不可停歇以惑人聽。八、租界內救火章程。甚備。租界外浦東。亦應仿照。多備救火器具。若有火警。附近居民。不可亂動。一面由火會分馳往救。一面分派巡捕兵丁。分班巡護。認真彈壓。應請先行出示曉諭。九、租界巡捕應請添募。晝夜輪流梭巡。大小街路均有巡捕。城廂內外以及浦東南市。亦應添募巡捕。多派員弁。分班輪流巡查。十、查明租界四至。出入總散路徑。租界內邊地。則由工部局於各要路多派巡捕。每處若干人。

建造捕房。常川駐守瞭望界外。倘有遠處成羣來界亂人。即鳴警知會局中。派捕抵攔。租界外邊地。則由華官派兵搭蓋棚帳。常川駐守。勿令成羣亂人闖入租界以內。

江督劉鄂督張會銜電奏密陳大計摺。竊以此次拳匪肇亂。中外搆兵。馴致決裂不堪。實爲千古所罕見。各國因聽各駐使之言。歸罪於誤信拳匪之王公大臣。必欲嚴速懲辦。方可議和。臣坤一臣之洞。每晤各國領事及經過洋員。剴切開導。示以閏八月初二日諭旨。囑其轉達外部。催令開議停戰。而各國以事未施行。疑係空言搪塞。固執前說。衆口一詞。觀於德日所覆國書及美總統之言。其情可見。若不迅速懲辦。現在聯軍已抵保定。並聞將趨正定。似此深入不已。萬一漸引而西。斷非程文炳董福祥等所能敵。亦非百二河山所能阻。不得不仰懇宸斷。立將該王公大臣分別治罪安置。毋令隨扈。以平各國之憤。以釋各國之疑。當可早日開議。該王大臣誤用拳匪。或出一時愚昧。惟各國嘖有煩言。勢將危及宗社。即應以身任咎。古來當國輔臣。每遇水旱盜賊。輒以佐治無狀。自請罷斥。義固應爾。史冊可徵。况輕開鄰釁。乘輿播遷。該王公大臣應亦體諒及此。且由我速辦。尙存自主之權。去可復還。奪可復與。若遷延日久。時局日非。深恐將來要素益堅。轉非該王公大臣之福。此外各省有釀成拳禍殺戮無辜之員。應行重辦。朝廷自有權衡。臣等自五月以來。驚魂欲斷。血淚將枯。自維

待罪疆圻。何敢妄預內政。第事關存亡大計。不得不冒死瀝陳。伏乞皇太后皇上聖鑒。謹奏。各省督撫將軍會銜電奏摺。奏爲偏安必不可成。京師必不可棄。籲懇降旨明示。以定人心而安大局。恭摺具陳。仰祈聖鑒事。竊自拳匪肇亂。構釁列邦。津京相繼失陷。遼東亦多失守。以致宗社震動。乘輿播遷。薄海臣民。皇皇失措。莫不謂拳黨釀禍。貽悞國家。疾首痛心。同切憂懼。迨疊奉明詔。車駕暫幸太原。勦撫匪徒。議及親貴。仰見我皇太后皇上昔者之苦衷。今者之明晰。雖外人尙未滿意。而天下士庶。已莫不欽仰感動。鼓舞歡欣。方冀畿輔廓清。指日回轡。上慰九廟在天之靈。下遂億兆蒼生之望。日昨恭讀電傳本月初六日諭旨。現定閏八月初八日。啓鑾西幸。長安等因。欽此。臣等私憂過慮。有不得不具陳於我皇太后皇上之前者。伏查自古國家多難之時。亦有遷都之舉。然必須敵人不能懸軍深入。即深入亦不能持久。我始能立國圖存。今日聯軍謀堅勢衆。實與古來不同。況陝西自宋元明至同治以來。屢次兵火。商稀民瘠。古稱天府。今非雄都。又與新疆甘肅爲鄰。新疆近逼強俄。甘肅尤爲回藪。內訌外患。在在可虞。較之京師。素云完善。即就目下言之。各國方以新勝之師。聯合圖進。我能往彼亦能往。不畏數萬里之海。豈畏數千里之陸。恐山川之險。未可憑恃。即偏安之局。不可幸成。且京師根本重地。四方所拱極而朝宗者也。宗廟宮闕。列祖列宗之神靈所式憑者也。二百餘年來。邦基固矣。一旦棄之。不特失臣民之望。度亦非聖心所安。前聞各國會請

選兵回鑾。不佔土地。無論所請果否。出於至誠。正可藉回鑾之說。以速其撤兵之議。倘西幸愈遠。挑各國之請。阻就款之忱。萬一激變宗旨。洋兵不撤。京畿從此淪胥矣。遼東不復。陵寢從此鼎革矣。一國變計。各國爭先。外而沿江沿海。處處侵佔。內而奸宄生心。紛紛擾亂。瓜分之局成。糜爛之禍亟。人心愈搖。餉源愈竭。運道愈梗。而朝廷徒局促偏安。爲閉關自守之計。夫以偏僻彫敝之秦隴。供萬乘百官之資糧。久將不給。以屢次挫失之弱兵。抗合縱連衡之強國。勢必難支。存亡關鍵。實在於此。臣等萬死奚足補救。伏乞皇太后皇上。追念列祖列宗。創垂之艱難。俯念滿洲八旗生齒之蕃衍。外順各國迎駕之請。內慰臣庶戀闕之心。擬請睿裁。收回幸陝成命。若乘輿已發。駐陝伊邇。勢難折回。亦乞明降諭旨。以告天下。具言此次幸陝。亦係暫計。俟畿輔稍定。即行回鑾。並簡派王大臣致祭宗廟。恭謁諸陵。示天下以朝廷不忘宗廟陵寢之重。斷無終不回鑾之理。一面飭令全權大臣等。婉告各國使臣。果眞退兵。示以必返。庶足以定人心而安大局。臣等愚慮所及。不敢不昧死瀝陳。謹合詞電由護陝撫臣端方繕摺具奏。伏乞皇太后皇上聖鑒訓示。謹奏。再臣等正會商電奏間。續奉本月初七日諭旨。太原荒歉。供億維艱。且電報不通。輾轉延誤。不得已西幸長安等因。欽此。仰見天心仁愛。體念民生。並以時局急迫。深慮要件或有遲誤。故爲此不得已之舉。是駐蹕長安。可暫不可久。已在聖明洞鑒之中。願臣等颺颺過慮者。則以宗社爲重。深恐各國以自棄京城爲

言。變其宗旨。分佔要地。停戰無日。開議無期。大局不可收拾。仍懇俯如臣等所請。明降諭旨。以慰臣庶之心。以遂各國之望。請附片具陳。伏乞聖鑒。謹奏。再接使俄大臣楊儒電述外部之語曰。勢必大舉西向。恐未成咸陽之居。又將稅蘭州之駕等語。臣等所聞各國議論。大率皆同。今日幸陝之舉。議者必以爲秦中遠隔海口。有黃河潼關爲限。險隘可守。敵來較難。拒敵較易。不知古今兵事實有不同。八國環攻。與一國搆兵。又不同。今日戰鬪。須憑槍力。守禦。須憑炮力。潼關同州等處之黃河。僅寬四五里。愈上愈狹。外國陸路行營。快砲七生的口徑者。及八九生的口徑用馬拖運者。可擊七八里。新式長田雞炮。可隔山遙擊數里。中國皆無之。僅憑土砲小洋炮。豈能守河守關。各省槍少彈缺。自造無多。假使洋兵深入中原。運道必然梗阻。不過數戰。彈子即罄。雖有忠義軍民。徒手亦難擊敵。蓋一國則深入難。八國則接濟易。此陝省拒敵之難也。又查外洋通例。凡係有利約之國。必駐公使。若其國爲公使所不暇駐者。即不視爲與國。一立和約。即使遷都陝西。各國肯允。亦必各遣公使來陝駐劄。經此次變故以後。使館必派洋兵保護。距海愈遠。洋兵愈多。且山西河南直隸一路。必節節皆駐重兵。是無論遷都何處。必有使館洋兵。徒使中原數千里。皆爲洋兵盤踞。此陝省遷都之難也。總之遷都之計。全在平日經營。若戰敗以後。敵人必不許我矣。守險遠海。亦禦敵之一策。若海口既已屬人。內地素無守具。則險者失其險矣。各國併力。各省分擾。彼有接濟之便。我

無持久之力。腹背受敵。跋前疐後。則遠者失其遠矣。此須俟事定以後。從容籌之。遇一國生釁之時。必先結援數國。移蹕陪都。軍械充足。炮臺周密。再行開戰。最爲要著。然非所論於此時也。以上各情。恐議者或未詳考。不敢不據實上陳。以備朝廷裁度。合詞附片奏陳。伏祈聖鑒。謹奏。

陝西護撫端芳保護教民告示 爲凜遵諭旨一體保護事。光緒二十六年六月廿一日奉
上諭。此次中外肇釁。起於民教之相鬪。嗣因大沽炮臺被佔。以致激成兵端。朝廷誼重鄰交。仍不肯輕於決絕。迭經明降諭旨。保護使館。並諭各省保護教士。現在兵事未弭。各國商民在中國者甚多。均應一體保護。着該將軍督撫查明各國洋商教士在通商各埠及各府州縣者。按照條約一體認真保護。不得稍有疏虞。又於六月廿三日奉上諭。春秋之義。不戮行人。一月以來。除德使被亂民戕害。現在嚴行查辦外。其餘各國使臣。朝廷幾費經營。苦心保護。均各無恙。各等因。欽此。查陝省地處西偏。向無商埠。惟教堂則所在多有。該教士重洋萬里。遠道而來。與爾百姓耦俱無猜。從無變生意外之事。現在畿民遍地。謠誣紛傳。誠恐有不法匪徒。故意與教堂尋釁。屢經本護部院札飭各州縣認真保護。茲復欽奉諭旨。惟恐各教士不得其所。至再至三。朝廷懷柔之恩如此。其摯。官府體恤之意如此。其周。爾百姓賦有天良。誼均地主。必欲故違朝旨。搆釁遠人。於法則當誅。於情亦爲不順。兼之人心好尙。天心應

之。和氣致祥。災氣致厲。自然之理也。現在旱象已成。雨澤不能深透。旱魃之虐。迄無已時。未始非爾百姓造謠生事。居心不靖。有以上干天和。若安靜自持。各循本分。揆之作善降祥之理。自必立迓和甘。即如直隸山西本屬太平世界。皆因百姓騷然不靖。自興亂端。遂使闔境生靈慘遭荼毒。本護部院洞鑒及此。是以委曲周折。力維大局。冀爲爾等謀一日之安全。若再執迷不悟。眞是不遵教化之民矣。爾時執法以繩。其無怨悔。抑本護部院所爲三令五申者。並非欲爾等低首下心。不復作其忠義之氣也。同爲大清之臣民。世受累朝之豢養。誠宜作忠義之氣。務遠大之圖。值此軍餉難籌。必當捐輸以濟用。倘或敵兵猝至。誓捐軀命以同仇。或爲國而忘身。或毀家而紓難。必如此方爲善類。必如此方爲義民。或輕信扶清滅洋之浮言。誤奉惑世誣民之邪教。逞一時之血氣。戕孤弱之洋人。無補於時。徒然生事。目前既不仁而不義。事後必喪家而亡身。朝廷目爲亂民。鄉黨受其毒害。以吾秦崇禮義尙氣節之民。必不爲此。其敢於爲此者。不過借仇教之名。而遂其發洋財之願。其實秦中教堂無幾。洋財幾何。於是拏教堂。不能不波及富室。燒洋房。不能不延及民居。戕教民。不能不殃及無辜。狡黠者已得財而遠颺。愚懦者必向隅而受累。歷查各省鬧教之案。事定之日。無非百姓吃虧。言之可爲痛惜。本護部院所以不避毀譽。竭力維持者。恐一鬧教。則目前地方大亂。而事後百姓遭殃也。爲此諭仰軍民人等。一體知悉。爾等須知保護教堂。皆迭奉特旨實力遵行之。

事。務各父戒其子。兄戒其弟。恪遵功令。期於民教相安。自足以感召太和。地方靜謐。如有妄聽浮言。無端尋釁。定即治以背違詔令之罪。爾百姓等。但當各安本分。毋蹈危機。致負本護部院誥誡之苦衷也。以上所言。或恐吾民不能盡通文理。所望讀書之士。勤爲講解。開其顛蒙。不勝厚望。切切特示。

西狩慘狀

二十六年七月廿一日。兩宮西狩。是日行七十里。駐蹕貫市。宿清真寺。東光裕李姓楊姓進麵飯。小粗粥。蔬菜並二馬車轎。先是十一二日。裕祿由北倉兵敗。退扎楊村。又退至蔡村。乃用手鎗自盡。十四日。李秉衡抵河西務。所統張春發陳澤霖兩軍。不戰自潰。李秉衡亦服毒自盡。洋兵進逼通州。十六日。即有西巡之旨。因車輛不齊。遲遲未行。至十九晚。城外大砲隆隆不絕。二十早。喜雀胡同一帶。炮聲如雷。炮彈如雨。下午尤甚。至二十一黎明。兩宮即倉皇出城。其狼狽悽慘情形。不堪言狀。○二十二日。行九十里。駐蹕盆道。辰刻大雨。行抵關溝。山水漲發。鑿輿冲水而過。午間過居庸關尖站。內監向土民索得粗瓷茶碗。進凉水一盞。延慶州秦牧奎良進藍呢轎。是處無供給。苦甚。○二十三日。行五十里。駐懷來縣。駐蹕一日。懷來縣令吳永進燕席並漢裝女。皇上衣大阿哥衣。當出京之時。兩宮均穿便衣。太后穿藍布夏衫。並不梳頭。皇上穿黑長衫。黑布駢裙一條。鋪蓋行李一概未帶。數日均睡火炕。無被無褥。

無替換衣服。亦無飯吃。以小米粥充飢。至是始由懷來縣令絡繹進奉。稍覺舒服。太監及宮女均未帶出。太監及諸王貝勒等隨行者甚少。只有端王慶王那王肅王倫貝子肅貝子剛毅趙舒翹王文韶溥興等各部院司員一二人。滿小軍機二人。漢小軍機一人。神機虎神營八旗練軍約千餘人。馬玉崑保駕及各營官弁兵丁約千餘人。各兵到一處。空一處。因各舖均閉門逃走。實無處買物也。其時途遇拳匪甚多。仍然劫掠。後剛毅至。匪中有識之者。爲具雞黍之饌。剛毅然曰。我爲汝等竭心力。汝等皆將餓斃之人。今日乃有衣食。積蓄皆厚。而我已家破人亡。未知如何。旋以箸指後來車曰。我待汝輩不薄。如我家某人來請。看我之面。好好護衛可也。言罷徒行而去。涕淚彌襟。○二十五日。行六十里。駐蹕河城。江北道進綠嶠。並進旗衣。是日出行。在降諭布告西幸之故曰。七月二十一日。洋兵猛攻入城。圍撲宮禁。勢甚危險。朕不得已。恭奉慈禧端佑康頤昭豫莊誠壽恭欽獻崇熙皇太后。慈駕暫行西幸。此次釁起。民教互鬪。朝廷辦理爲難。情形已歷次備國書詳告各國。彼方以代除亂民爲辭。於國家並無他意。而似此舉動。殊屬不顧邦交。未符原議。且中國於駐京各使臣。始終委曲保全。未嘗失禮。尤不應如此相待。昨已派榮祿徐桐崇綺留京辦事。然當各國氣勢方張之際。恐在京未能遽與開議。該大臣公忠素著。平日威望。亦爲外人所信服。國事如此。不知該大臣正復如何憤激。着即迅籌辦法。或電各國外。或商上海各總領事。從中轉圜。務期竭

盡心力。爲國家捍此大患。朕不勝翹盼之至。○二十六日。行四十里。駐蹕雞鳴驛。○二十七日。行六里。駐蹕宣化縣城。召見宣化縣令陳本。太后頗獎厲之。

八月初一日。自宣化啓鑾。行六十里。駐蹕懷安縣屬之左衛。行宮狹隘。絕無預備。○初二日。行六十里。駐蹕懷安縣。供張草率。○初三日。行八十里。駐蹕天鎮縣城。夫蓋縣知縣額令騰額先期知奉天金蓋失守。是以自盡。是日在兒嶺尖站毫無預備。岑春煊進荷包雞蛋。宿站典史楊守性供給。視尖站稍周。○初四日。行六十里。駐蹕聚樂堡。○初六日。行六十里。駐蹕大同府城。地方官供張稍周備。○初十日。自大同啓鑾。行九十里。駐蹕懷仁縣。供張草率。○十一日。行一百里。駐蹕山陰縣之岱嶽鎮。行宮湫隘。○十二日。行八十五里。駐蹕代州之廣武鎮。○十三日。行七十五里。駐蹕代屬之陽明堡。過雁門關。慈輿在關上稍停遊覽。岑春煊進野黃花百握。太后勞慰之。並賞乳茶。○十四日。行八十里。駐蹕原平鎮。行宮係民房。知縣王令失于覺察。內有舊存空棺數具。經岑春煊查出。馳馬面奏。太后謂可移則移。如不在握要地方。不移亦可。駕未到時。部郎俞啓元督回兵丁全行移出。○十五日。行八十里。駐蹕忻州城。是日在二十里換乘黃轎三乘。綠轎一乘。○十六日。行六十里。駐蹕陽曲縣屬黃土寨。○十七日。行六十里。抵太原府城。駐蹕撫署。一切供張陳設儀物。係純皇帝幸五台時舊物。燦

然如新。極爲可觀。太后謂爲宮中所未有。端王莊王肅王那王倫貝子肅貝子桂公溥公孔公志公瀾公剛毅王文韶趙舒翹英年內務府乾清門各大臣太醫院各官甘軍岑春煊武衛左軍馬玉崑皆隨扈。當乘輿初至太原時。兩宮及各王大臣均以未帶衣服。擬即購辦。緞疋而不可得。幸東撫袁世凱所解貢緞二百疋運至。兩宮始得藉製衣服。太后見晉省兵備空虛。各省援軍雲集。乃命一律在固關以東駐扎。不得闖入。以防兵變。

閏八月初八日。兩宮啓鑾西幸長安。岑春煊率隊前導。此次西行。扈從各大臣俱不以爲然。且慶親王曾請兩宮先在太原駐蹕。蓋慶王之意。以爲不久太后必有機會。可以安返北京。皇上亦極欲東歸。有請西行者。皇上必蹙額皺眉。太后與各大臣會議。其意似亦以慶王所言爲然。惟鹿傳霖忽跪奏慶王之策不善。因而涕泗交流。又言臣願以死保國。惟兩宮冒險而自投於聯軍。殊屬非計。且聯軍旣欲太后皇上回京。則何以將北京一城俱行劫掠。刻下北京情形。已甚不堪。且無居民。一空城而已。何足爲都。設使聯軍真願太后東歸。則攻保定府則又何說。太后聞奏。頗爲所動。鹿起時。端王董福祥馬玉崑俱跪言鹿傳霖所奏可從。并言兩宮須即刻西往西安。以絕聯軍之望。且陝西有潼關之險。聯軍必不願往。如及今不行。恐聯軍將由保定府前來太原。前者北京出走時。狼狽之狀。將復見矣云云。因此太后意決。即下諭定於是日西行。江督劉坤一鄂督張之洞東撫袁世凱奉到是日西幸。

發旨。即聯銜電奏。力諫緩圖西幸。並懇鑾輿即行回京。蓋欲和議速成。捨此別無長策也。畧謂在京各國聯軍。設聞御駕回京。定必歡迎道左。倘竟遠幸西安。各國必以爲中朝無意求和。則和議難成。軍興無已。亦且建都西安。與東南各省不無隔絕之虞。凡夫轉運糧米。解送餉項。節節遲滯。諸多不便。若值太平之日。不過多費周章。尙可源源接濟。不至無以爲繼。倘一遇軍興。東南道路梗阻。則將何以處之也云云。聞皇上覽奏之後。決計回京。力請西后同行。而端王莊王並剛毅趙舒翹等。則力主西幸。西后無所適從。皇上在旁力辯其謬。西后意亦爲所動。始許皇上定奪。時行在軍機處。正在辯論此奏。忽得署直隸總督藩司廷雍電奏。聯軍現在往襲保定。該城危在旦夕。且有往攻太原之信。應請太后皇上速行西幸云云。西后覽奏。因是西狩之意益決。○十三日。聖駕抵趙城縣駐蹕。○十七日。聖駕抵平陽縣駐蹕。○二十四日。聖駕抵潼關駐蹕。○二十八日。由潼關起蹕幸長安。

九月初四日。兩宮駕抵西安。駐蹕巡撫衙門。陝西紳士自聞兩宮西幸之信。深恐陝省亦爲團匪所累。乃上公呈於護撫端芳。有迎駕拒團之議。而大紳及無知小民均大譁。以爲義和團乃忠義之民。無拒之之理。端芳乃出示略謂。如係真正團民。必已親臨前敵。現來陝者。必僞團無疑。如聽其入陝。必滋事端。於是阻撓者始無可藉口。乃迎兩宮入陝。其餘董軍及隨駕之義和團。皆駐紮潼關外。而端莊二邸亦因之留駐潼關。行宮始駐南院。後移北院。南院

總督府也。北院巡撫府也。北院公事廳堂較南院爲多。故移駐之。移蹕以後。北院兩轅門皆釘閉。上懸豎額。書行宮二字。內左中二門亦閉。唯留右門出入。門內則侍衛及一切儀仗在焉。兩傍則軍機處之朝房在焉。六部九卿之朝房在焉。撫藩臬各員之朝房在焉。各房名目。皆以紅紙貼出。而本堂則一無所有。左爲內朝房。右爲退息所。越三門入內。第一堂設寶座。張黃布。第二堂亦同。有召見房在左。有親王辦事房在右。第三堂有寶座。太后寢室所在。皇上之寢室。在二堂之東三棟。其後三棟。皇后居之。三堂之西三棟。大阿哥居之。各室之內。所用皆洋燈也。自着西安以後。太后常患腹痛。晝不嗜食。夜不穩睡。時令太監捶背。不分日夜。皇上比在京時稍強健。偶與太監遊息。嘗怒罵之。如有所恨者。凡各省進貢之物。太后直以之賜羣臣。其着內務府時。太后見之。常悲喜交集。皇上對之。唯飲泣而已。皇上時或遊步園中。見太監入。必走避。故有疑其有隱疾者。兩宮御膳。每日約二百餘兩。乃岑春煊之所定者。太后或謂岑曰。在京日食。豈止此哉。今減數倍矣。每晚太監呈菜單。雖開至百餘種之多。所點者不過鴨魚雞肉數種。皇上好用黃芽菜。不食腥物。太后雖好麵類。亦不多用。平日百餘種之處。今則十餘種。皇上不過一二種而已。大阿哥好伺小狗。一日皇上索之而去。大阿哥復從之取回。遂爲皇上所痛責。軍機處實榮祿一人之舞臺。王文韶因人爲可否。鹿傳霖榮之黨羽也。一日三人自朝出。先有一太監捧圓盤。蓋黃綾。前行。次王文韶。次榮祿。次

鹿傳霖。王日髮蒼蒼。面目清瘦。似舉步亦甚艱難。榮髮微白。面扁而黃。足有疾。脊不甚高。鹿頭垂面腫。垂頭低腰。步諸人之後。一望而知其爲無精神之人。每召見。奏對者唯榮祿一人。王俯首聽之。鹿連聲稱好而已。

和議彙紀

二十六年五月十九日。命兩廣總督李鴻章迅速來京。

六月十五日。命李鴻章調補直隸總督兼充北洋大臣。○初七日。皇上致書英皇命總理衙門投交英國公使轉遞。聲言此番中國之事。因受匪人之累。致有今日之變。仍請英國出場代爲排解斯難。

七月十二日。命李鴻章爲全權大臣。商請各國外部先行停戰。開議和局。○二十三日。某大員電請政府派一議和大臣會同赫德即往西國兵官處商議停戰。○二十七日。美國總統麥堅尼因皇上求請美國出力主持和局。乃與我國約曰。一北京得與他處通信。所有官員教士等。盡須救出一。中國各處所有美國人民房屋權利。均須保全。一設法平定各處土匪。并使後來永無土匪之患。一事平之後。美國仍向中國索取兵費。一所議之事。與各國須無防礙。設使中國能使各國徧知中國實在未與土匪相聯。此次事起。實因不更事之故。以致土匪蔓延。至今不勦平。并許美國後來索取兵費。美國即時爲中國設法向各國開議。以冀事得

早結。○二十日。命全權大臣李鴻章准其便宜行事。將應辦事宜迅速辦理。不爲遙制。八月初一日。美國政府以前所請各款。中國未能辦到。不允李鴻章請派康公使主持和議之請。○初二日。德政府決意不與李鴻章議和。○初七日。命兩江總督劉坤一、兩湖總督張之洞與李鴻章函電會商議和事宜。○初十日。李鴻章接到七月廿七日皇上在懷來縣所發廷寄。仍派爲全權大臣。與各國商議和局。○十一日。美政府致書各國。言願認李鴻章爲全權議和大臣。○十四日。命慶親王由行在回京。會同李鴻章與各國議辦一切事宜。并命榮祿會同辦理。准其便宜行事。○二十日。命慶王爲全權大臣。會同妥商應議事宜。劉坤一張之洞仍遵前旨會商辦理。並准其便宜行事。○二十二日。慶親王電致各省督撫。言洋兵進京。兩宮西狩。本爵奉便宜行事諭旨。會同李傅相議和。即須開議。宗社安危。關係重要。希嚴飭各屬竭力保護。在華洋人及教堂教民。如有匪徒滋擾。立即盡法懲治。勿任再生枝節。致誤大局。○二十三日。慶王與各國先行商議停戰事宜。各西使先以四款相要素。一、東三省暫作公地。一、天津暫作公地。一、交辦拳匪頭目。一、各處通商口岸准西兵駐扎。○二十八日。德國政府電請各國。俟中國將擾亂禍首獻出後。始可開議和局。并宜先請北京公使指出罪魁。分別治罪。雖其中兆亂之人過多。不能一一明正典刑。而罪魁則不可不辦。英法兩國均以德國之意爲然。并言此乃第一要着。○二十九日。我國求各國暫時停戰。閏八月初二日。法意奧三國已許。德國政府先懲禍首之請。獨美國不允。其覆電德國云。懲

辦禍首。所以嚴防將來。但此事須歸中國政府自辦。其效驗尤爲神速。刻下可畀中國政府機會。使得復舊。且此事可俟議和時再議未晚。美政府已認李鴻章及其他議和人員爲議和大使。且諭令駐華康公使與之會議。某日法政府擬定議和條款電致各國。一縱匪滋事之王大臣及他匪首等。應由駐京各公使公定其罪。以憑懲處。二、和議雖成之後。中國不得向外國購辦軍裝進口。三、中國應酌量賠償各國兵費。四、各國所派入京使署之衛隊。仍當戍守京師。並不撤退。五、大沽所有砲臺。應令悉行拆毀。六、京津之間。應由各國自行派兵擇要扎守。德政府提議十二款。一、和議議定之後。北京方可退兵。二、所有此次護匪肇亂之人。不可與開和議。三、各國議和大使。祇派一人以總其事。四、懲治罪魁之法。必須着實嚴辦。使其有所懾懼。五、光緒皇上倘能復辟則已。否則別立新君。不得太后所寵愛之人嗣位。至端郡王之子大阿哥。當令其廢置。太后亦令其退居。勿使干預政事。六、各國不得向中國割地賠償。均須極力保護商務爲要。賠款須以中國全國地稅人稅等項作押。惟關稅已經抵押者。及各省常年開支款項。不得作抵。七、財政須歸西人派員治理。必先革除侵蝕。並須設立歐洲軍隊屯扎要隘。以備勦辦亂民。及保護地方。俟中國果有振興之日。再議撤免。八、中國所有自行製造並向外洋購辦水陸兩軍所需槍砲藥彈器械。均須立有限制。不得逾額。九、中國四處首要通商口岸三十英里之內。不得建造砲台。駐扎軍隊。即他埠通商

口岸。沿江沿海水師輪船所經之處。亦不得建築砲台。除首要四口岸外。其餘各通商埠頭。凡華軍屯駐三十里之內。必須立有嚴密章程。以爲限制。十、華官不能輕責教士教民。而教士亦須自安本分。祇許宣傳教道。開人知識。十一、必將此次禍亂原由。並勦撫先後一切事歷。刊印告示。遍佈各省府廳州縣。遇有漂沒。即當補貼。○十三日。俄國致書美國。請將北京駐兵退回。曰。敝國並無向中國索地意見。所求者。祇欲保敝國駐京使館。并助中國勦匪而已。至東三省。敝國邊界用兵。亦不過以之自守。若佔據牛莊。則又專爲北省用兵起見。俟地方平靖後。倘各國無與敝國爲難。敝國即時將該處俄兵退回。刻下中國政府業已不在北京。敝國使臣可無須在彼駐紮。已令駐華使臣及隨員等退出北京。其駐紮北京之兵亦將退去。俟中國政府願與各國商議。敝國可再派使臣前來。以上所言。乃敝國之意。深願美國政府與敝國同心也。美國政府回書曰。敝政府得貴國來書。深爲喜悅。因知貴國政府無意向中國索地。且與他國同心所欲者。不過救護貴國駐華使館。并助中國勦匪而已。貴國之所布告者。與他國之意相同。他國自然亦無向中國索地之意。北京圍解之後。此節又復聲明。如各國協同會議。則與中國結束一事。當不其難。既與中國結束。則各國約章應有之權利。以後當能永遠保全。而外人應有權利及其產業。自可無虞。其已受害者。亦必得有抵償。聞中國各省大半尙是安靜。中國亦極願保護外人身命及其產業。已有數省督撫極力

勦除團匪。我歐美各國已令駐華領事官及水師官激勸之矣。刻下各國使臣業已救出。尙有應辦各事如下。一、中國各處外人身命產業及其應得權利均須保護。一、中國各省未亂者均須先事預防。如力量不及。各國理宜助之。一、設法使中國永遠安靜。一、保全中國土地。不使瓜分。其國政仍歸中國人主持。一、各國應有約章利權。悉宜保護。使天下各國均可與中國各處通商互市。貴國政府刻據牛莊。實爲北省用兵起見。俟地方平靜。倘他國無與貴國爲難者。貴國即刻將兵退去。敵國政府聞之。甚爲感激。敵國政府萬萬不肯與貴國爲難。敵國政策已定。且已屢次布告天下各國。俾得周知矣。某日法國政府曾致各國一書。請將以下各款爲議和之基。一、兆亂罪魁。悉行按律懲治。其罪名一切由各國駐華使臣公擬。二、以後仍舊不准軍裝炮火進口。三、中國政府應賠各國必需兵費。四、各使館永遠設兵保衛。五、大沽炮台不准再設。六、天津北京沿途歸各國設兵。○二十一日。美國之意欲早爲開議和局。以便全撤兵隊回小呂宋。○二十四日。德國政府已覆法國政府請辦中國和議之書。日本亦經允許。惟有一節尙未言及。○二十七日。德英兩國立有應付中國之策。將來極有關係。所有各口岸與各河道。一任各國通商。德英兩國並不欲得中國土地。即使別一國或數國有窺伺之意。德英兩國力保中國疆土無缺。至該兩國應享利益。亦已立約。將來彼此可免齟齬。兩國請各國照此辦理。

九月初一日。慶王李鴻章致書各國公使。願賠兵費。并許格外通商利益。以請各國停戰。法國公使答言。須俟罪魁治罪。方可照辦。○初二日。皇上致書各國政府。請將和議速行開辦。○初三日。日本政府呈請各國派其所屬使臣。先行會議如何賠償之法。再與中國開議和局。○初四日。行在軍機處電致京中全權大臣。囑令轉詢各國所言欲治罪魁一語。究屬如何治法。○某日駐京各使臣擬定條款十一條。預備開議。一、賠償列國軍費四萬萬兩。限六年繳出。二、中國此後一切釐金關稅鹽稅等。悉歸外國人之手。三、在京之聯軍。盡行撤退。將北京歸還皇帝。四、凡主持匪仇殺外人之頑固大臣。皆當查察明確。分別處罰。若端親王則禁錮終身。以示懲儆。五、此後各國常置衛護兵于北京。以爲使館備萬一之虞。然總計以二千名爲率。但兵費仍要中國擔負。六、天津塘沽之地。永歸各國占領。七、各國于中國。無論何地。可隨時開闢通商口岸。八、和議成後。各國禁將軍器售與中國。以免生後變。九、總理衙門必選外國人爲顧問官。以監理交涉事件。十、凡滿洲人概不能就總督巡撫之職。十一、限中國三箇月內。鎮定團匪。其後各國可將滿洲歸還中國。○是日李鴻章與各公使開議和局。內有數條堅執不從。各國公使電告各本國政府。俟得回電再行定奪。李鴻章電致各省督撫。言各國要素賠款。爲數甚巨。請各督撫自度能否擔承。○十八日。各國公使告李鴻章云。各國必須端莊兩王暨剛毅趙舒翹載瀛載瀛英年統賢

董福祥等均經懲治後。和議始可開辦。惟中國政府既有自行懲治之權。當可不必交出也。
○二十二日。李鴻章托總稅務司赫德將賠款一事。代向各國商議。○二十三日。英日俄美
四國于和局。已議有端倪。專俟德法允許。即須開議。各國同聲必俟禍首十三人全數交出。
皇上回鑾歸政。懲辦滿漢縱庇拳匪大小官員數條。全行辦到。方能議和。○二十四日。李鴻
章告某國兵官云。夫遣發專使前往德日二國。道達惋惜之意。乃中國應爲之事。即各國公
使並不提及。中國政府亦將辦到。本大臣業與慶王議及其餘各國所索各事。除索地外。倘
中國財力所及。亦必照辦。○二十五日。各國公使將以下數節呈交我政府以爲議和始基。
一、中國政府爲被戕德公使克林德男爵。置立石碑。一、中國政府應派親王前往德國謝
罪。一、將總理衙門撤去。一、嚴辦兆亂禍首。一、廢去大沽口及直隸各處砲臺。一、禁止軍裝砲
火入口。一、各省有曾經殺戮西人者。停止考試五年。一、有事須直達中國皇上。一、駐華各使
館永遠設兵保護。一、由京至海所有電報郵政設兵保護。一、國家公司以及私產均須照賠。
○某日慶王李鴻章照會各國公使擬定廿七日開議和局。照會曰。照得本年入春後。義和
拳匪擾及近畿一帶。以致向所未聞之奇禍。層見迭出。始則各國使館被圍。繼則各國兵隊
彙至京中。隨至乘輿播遷遠地。試憶此事未出以前。若語人曰。數月後當有此事。誰其信
之。今者朝廷始知左右諸王大臣之縱庇拳匪。妄啓禍端。是以一面將該王大臣等照中國

例交各該衙門嚴議。一面派本大臣爲全權大臣便宜行事。俾得迅速開議和局。以了此事。惟應與議者並非一國。且應議之事。各國又有不同。加以事出非常。應議一切種種較難。再四思維。不若先將其事之綱領。與與議各國會定通行之專約。後將其事之詳細。按照各國情形。各定分約。此外俟通商條約應否改定。均已辦妥。再將約內關繫各省應行事宜者。另定善後章程。以期彼此獲益。永無窒礙。茲將擬先議之通行專約。特擬底稿。附送查閱。以便各國大臣會閱。並請將中國現在如何辦法各情形。電達貴國外部。俾期速將應辦之事。早日完結。除將擬稿附送並鈔錄分送各國大臣查閱外。合即照會。爲此照會貴大臣。請煩查照可也。并附通行專約擬底數條。

一、圍攻使臣公館。極犯萬國公法之要條。爲各國萬不准行之事。中國一面自認此次之大誤。並應許以後必不致再有如此之事。一、所有此次應行賠補之各事各款。中國自應認賠。一面由各國分派人員查明開單送交再行酌定商辦。

一、至日後貿易交涉一切事宜。應由各國擇定如何辦理。或照舊約。或另立專條。將舊約略爲增改。或將舊約全行作廢。另議新約均可。即由中國照行。復將善後章程分別酌定辦理。

一、此次所定之專約。係中國與各國通行之大綱領。俟此大綱領定妥後。各國大臣在總署各處所加之封條。均可起去。一面由辦交涉之各大臣照舊赴署辦公。此外另應由各國將此事之詳細。與中國分定某國之分約。次第妥議。俟應賠之各事各款。全行辦妥。或定有如

何辦理之法。即由各國陸續退兵。六、此次各國派兵。專爲保護使臣起見。並無他意。現既彼此開議和約。各國應先行停戰。○二十九日。法國外務大臣宣言。各國刻宜設法聯結。無使自相解散。吾意各國宜定一合約。各國均不得私行訂約。則此事自然可免。再各國宜執定主意。務將罪魁誅戮。此外尙有三事。亦在應辦之列。一、嚴禁軍伙運赴中國。二、各國駐華公使宜使中國格外保其無虞。三、保護中國土地。推廣中國商務。

十月初一日。李鴻章因各國不肯開議。電請先示回鑿日期。以便與各國關說。○初三日。李鴻章咨行各省督撫。言和議成後。各省每年至少須額外籌集三千萬兩。俾得歸還賠款。然湏滿五十年始得清償。各公使定每禮拜聚會兩次。以商議和局事宜。○某日。各公使照會慶李兩全權。謂各國于董福祥。實不能容其再在朝列。○初十日。榮祿電請慶李兩全權早爲議和。因兩宮因此一事。頗爲懸繫。慶李言嚴辦罪魁一節。萬不可行。董福祥尤難懲辦。各國亦知所索各款有難行者。如不放鬆。則和局斷難速成。德國亦許將嚴辦罪魁一節。不再堅持。○十三日。慶王李鴻章與各國公使會議。并勘驗議和大臣文憑。○十八日。各公使允許美國之請。將和議條款稍加更改。而賠款一節。則從法國所請。行在政府之意。謂和議一有端倪。當易就緒。惟恐各國相持不留餘地。致有礙中國自主之權。不無疑慮。○二十二日。各國公使驗過議和大臣文憑後。因無皇上私印。皆不肯承認。旋致電西安。請即派員

加印。以免延擱。○二十三日。太后准慶王李鴻章以御寶自隨。以大內御寶共有五六十之多。俱未帶往行在也。○二十四日。慶李兩全權將所擬和議底稿電致江督劉坤一。請爲逐款議覆。法德兩公使以皇上雖已允懲辦罪魁。獨于辦理端王一人。不能俯從各國之請。因此不肯會議。

十二月初三日。各國公使議定和約總綱十二條。照會慶李兩全權云。本年五、六、七、八等月。即光緒念六年四、五、六、七等月。在中國北方省分釀成重大禍亂。致成窮兇極惡之罪。實爲史冊所未見之事。殊悖萬國公法。並與仁義教化之道均相牴牾。茲將其情節尤重者開列於左。一、西歷六月二十日。即中歷五月念四日。大德國駐紮中華便宜行事大臣男爵葛德祿前赴總署之時。被奉令官兵戕害。二、同日京師各使館被官兵與義和團匪勾通。遵奉內廷諭旨。圍困攻擊。直至西歷八月十四日。即中歷七月二十日。聯軍救至方止。而彼時中國國家。乃令使臣向各國政府宣傳。就承保全使館之旨。三、西歷六月十一日。即中歷五月十五日。大日本國使館書記生杉山彬奉差公出。被官兵在城門戕殺。又客居都中及各省之諸國人民。均被拳匪官兵慘加戕害凌虐。或被圍攻。僅賴極力抵禦。方獲保全。而其各項房屋。無不毒遭焚劫。四、各國墳塋之被汗瀆在京者爲最甚。至墳塋被掘。骸骨殘暴。因以上各節。遂至各國爲保衛各本國使臣。以及人民之性命。並戡定變亂起見。遣派軍隊前來。乃當

此各國聯軍赴京之時。遇中國軍隊抵敵。祇得奮勇擊敗。而中國既自表明悔過認責。並願挽回。因此事變所生情勢。於是諸大國公定允如所請。但由各國酌擬懲前毖後。必須定而不移之要款施行。今將各款臚列於左。第一款。原任德國葛大臣被害一事。欽派親王專使前赴德京代表中國皇帝國家慚悔之意。遇害處所樹立銘誌之碑。與葛大臣品級相配。用辣丁德華各文列敘中國皇帝惋惜此等凶事之旨。第二款。西歷九月念五日。即中歷閏月初二日。上諭內及日後各國駐京大臣指出之人等。皆須照應得之罪分別輕重。盡法嚴懲。以蔽其事。諸國人民被害凌虐城鎮五年內。概不得舉行文武各等考試。第三款。因日本使館書記生杉山彬被害。中國國家必須用優榮之典。以復日本政府。第四款。中國國家須在各國墳塋。曾遭汗毒發掘之處。建立銘碑。以昭滌垢雪侮之意。第五款。運進中國之軍火。暨專爲製造各種軍火之各種器料。照諸國後定之則。仍不准運入中國。第六款。凡有各國各會各人等。以及爲他國執事之中國人民。因近來各事。身家財產所受公私各虧。中國均認公平賠補。中國國家須籌定各國所能允從之理財辦法。以爲擔保如何賠補。以上所開虧損。以及如何措還國家措款之地。第七款。各國應分自主常駐兵隊保衛使館。並將使館所在境界自行防守。中國人民概不准在界內居住。第八款。京師至海道。須留出來往暢行通道。故與其有礙之大沽砲臺。一律削平。第九款。爲京師至海道暢通。不使有斷絕之虞。由諸

國應分自主酌定數處。備兵駐守。第十款中國國家務須在各屬廳州縣將聲明上開兩端之諭旨。張即兩年。俾衆周知。永禁軍民人等入仇視諸國各會。違者問死。至開列各犯所定罪名。及殺害凌虐各國人之城鎮。停止各項考試。亦在此列。中國皇帝務頒諭旨一道。通行布告。以各省督撫文武大吏。及有司官於所屬境內。皆有保持平安之責。如復肇傷害他國人民之亂。再有違約之行。必須立時彈壓懲辦。否則該管官員即行革職。永不叙用。亦不得借端開脫。別給獎叙。第十一款。凡通商行船各約。以及關乎通商各地事宜。各國以修改爲有益者。中國認與商議更改。第十二款。總理各國事務衙門。必須革故更新。及諸國欽差大臣。覲見中國皇帝禮節。亦應一律更改。其如何變通之處。由諸國酌定。中國照允施行。兩全權據情電奏。行在。旋于二十六日奉。上諭批准。兩全權乃照會各公使曰。爲照會事。照得本月初三日。接各國欽差全權大臣公議和約十二款。業經本爵等電奏。現奉大皇帝電旨。慶親王李鴻章電奏並條款。均悉。曷深感慨。值此時局艱危。不得不委曲求全。所有大綱十二款。應即照准。其餘詳目。仍應竭力磋磨。該親王等務當勉爲其難。惟力是視。以期挽回全局。欽此。除恭錄知照外。本爵等展閱各條款。有尙須引申其義。詳細聲明者。並有體查中國情形。不得不與諸貴國商酌者。係爲永敦睦誼。共保太平起見。茲將各條開列於後。望准照復。是荷。爲此照會。須至照會者。第一款。此次肇禍。由於民教不和。懲前毖後。當將永遠相安。

辦法。公同妥議和平詳細章程。以資遵守。第二款。內載諸國人民被戕害凌虐之各城鎮。五年內概不得舉行文武各考試等語。查各府廳州縣所管城鎮甚多。查明何城何鎮地方。如有戕害凌虐諸國人民之事。按照條約。將該城該鎮住籍人民。不得舉行各考試。其他城別鎮並無干涉。仍應照常考試。以分良莠而示勸懲。第三款。此次和約簽字批准之後。凡外國兵隊除第七款酌留保衛各使館。及第九款由京至海邊暢道酌留屯兵外。所有在京以及天津保定之兵。請酌定日期。全數撤回本國。未撤之前。不可分往各州縣城鎮。致令居民驚懼。無以爲生。其有被軍隊拘留之地方官。應即即釋回。第四款。各國現與中國重敦陸誼。所有各軍隊占據北京之地面宮禁城垣衙署倉庫。以及一切公家物件。均應酌定日期。全行交還中國國家。第五款。使館屯紮衛隊。酌定兵數。詳訂約章。以期彼此人民相安。第六款。凡各國各會各人等。以及爲他國執事之中國人民。所受公私各虧。中國自應認賠。惟中國所入賦稅有限。亦各國所深知。必須通盤籌畫。此次賠款。爲數不少。將來入口貨稅。不得不商議加增。應如何加增之處。俟後另議專章。第七款。內載各使館所在境界。自行防守。中國人民概不准在界內蓋屋等語。其境界係由何處起。至何處止。應將公所劃出。並須先行勘定界址。以便傳諭該處居民遷徙。第八款。中國內地土匪隨處皆有。日均執有洋鎗火器。中國兵勇若無精利槍械。僅恃內地土槍。難以抵禦。所有第五款禁購外國軍火。並製造各

種器械之物料。似應酌定禁止年限。一俟限滿。仍可照常購買。第九款內載京師至海邊暢道諸國。應分自主。請酌定數處留兵駐守。以免附近居民驚懼。至此暢道中國人民任便行走。各國不得攔阻。中國國家並力保護。各國人民由津至海邊。決不使有斷絕之虞。如果保護得力。三年後各國亦可酌量撤去各處駐守之兵隊。第十款內載凡通商行船各約。以及關乎通商各事宜。各國以修改爲有益者。中國自應認與商議更改。

二十七年七月和約議結。其全文曰。大德欽差駐札中華便宜行事大臣穆默。大奧欽差駐札中華便宜行事全權大臣齊幹。大比欽差駐札中華便宜行事全權大臣姚士登。大日欽差駐札中華全權大臣葛絡幹。大美國欽差特辦議和事宜全權大臣柔克義。大法國欽差全權大臣駐劄中國京都總理本國事務便宜行事鮑渥。大英欽差便宜行事全權大臣薩道義。大美欽差駐札中國世襲侯爵薩爾瓦格。大日本國欽差全權大臣小村壽太郎。大和欽差駐札中華便宜行事全權大臣克羅伯。大俄欽命全權大臣內廷大夫格爾思。大清欽命全權大臣便宜行事總理外務部事務和碩慶親王。欽差全權大臣便宜行事太子太傅文華殿大學士北洋大臣直隸總督部堂一等肅毅伯李鴻章。今日會同聲明核定。大清國按西歷一千九百年十二月二十二日即中歷光緒二十六年十一月初一日。文內各款當經大清國大皇帝於西歷一千九百年十一月二十七

日即中歷光緒二十六年十一月初六日降旨全行照允。足適諸國之意妥辦。(附件二)

第一款 一大德國欽差男爵克大臣被戕害一事。前於西歷本年六月初九日即中歷四月二十三日奉諭旨(附件二) 親派醇親王載灃爲頭等專使大臣赴大德國大皇帝前代表大清國大皇帝暨國家惋惜之意。醇親王已遵旨於西歷本年七月十二日即中歷五月二十七日自北京起程。二大清國國家業已聲明在遇害該所豎立銘志之碑。與克大臣品位相配。列叙大清國大皇帝惋惜凶事之旨書以辣丁德漢各文。前於西歷本年七月二十二日即中歷六月初七日經大清國欽差全權大臣文致大德國欽差全權大臣。(附件三)現於遇害處所建立碑坊一座。足滿街衢。已於西歷本年六月二十五日即中歷五月初十日興工。

第二款 一懲辦傷害諸國國家及人民之首禍諸臣。將西歷本年二月十三二十一等日即中歷上年十二月二十五日本年正月初三等日先後降旨所定罪名開列於後。(附件四五六) 端郡王載漪。輔國公載瀾。均定斬監候罪名。又約定如皇上以爲應加恩貸其一死。即發往新疆永遠監禁。永不減免。莊親王載勛。都察院左都御史英年。刑部尙書趙舒翹。均定爲賜令自盡。山西巡撫毓賢。禮部尙書啓秀。刑部左侍郎徐承焜。均

定爲即行正法。協辦大學士吏部尙書剛毅。大學士徐桐。前四川總督李秉衡。均已身死。追奪原官。即行革職。又兵部尙書徐用儀。戶部尙書立山。吏部左侍郎許景澄。內閣學士兼禮部侍郎銜聯元。太常寺卿袁昶。因上年力駁殊悖諸國義法極惡之罪被害。於西歷本年二月十三日即中歷上年十二月二十五日奉 上諭開復原官。以示昭雪。（附件七）莊親王載勛已於西歷本年二月二十一日即中歷正月初三日英年趙舒翹已於二十四日即初六日均自盡。毓賢已於念二日即初四日啓秀徐承煜已於念六日即初八日均止法。又西歷本年二月十三日即中歷上年十二月念五日 上諭將甘肅提督董福祥革職。俟應得罪名。定讞懲辦。西歷本年四月念九日六月初三〇月〇〇等日即中歷三月十一四月十七〇月〇〇等日先後降 旨將上年夏間兇慘案內所有承認獲咎之各外省官員分別懲辦。二 上諭將諸國人民遇害被虐之城鎮停止文武各等考試五年。（附件八）

第三款 因 大日本國使館書記生杉山彬被害。 大清國 大皇帝從優榮之典。已于西歷本年六月十八日即中歷五月初三日降 旨簡派戶部侍郎那桐爲專使大臣。赴 大日本國 大皇帝前代表 大清國 大皇帝及國家惋惜之意。（附件九）

第四款 大清國國家允定在於諸國被污瀆及挖掘各墳墓建立滌垢雪侮之碑。已與

諸國全權大臣會同商定。其碑由各該國使館督建。並由中國國家付給估算各費銀兩。京師一帶每處一萬兩。外省每處五千兩。此項銀兩業已付清。茲將建碑之墳墓開列清單附後。(附件十)

第五款 大清國國家允定不准將軍火暨專爲製造軍火各種器料進入中國境內。已於西歷一千九百一一年八月十七日即中歷本年七月初四日降旨禁止進口二年。嗣後如諸國以爲有仍應續禁之處亦可降旨將二年之限續展。(附件十一)

第六款 上諭 大清國 大皇帝允定付諸國償款海關銀四百五十兆兩。此款係西歷一千九百年十二月廿二日即中歷光緒二十六年十一月初一日條款內第二款所載之各國各會各人及中國人民之賠償總數。(附件十二)(甲)此四百五十兆係照海關銀兩市價易爲金款。此市價按諸國各金錢之價易金如左。海關金一兩即德國三馬克零五五。即奧國三克勒尼五九五。即美國圓零七四二。即法國三佛郎克五。即英國三先零。即日本一圓四零七。即荷蘭國一弗樂零七九六。即俄國一魯布四一二。俄國魯布。按金平算即十七多理亞四二四。此四百五十兆按年息四釐正。本由中國分三十九年按後附之表各章清還。(附件十三) 本息用金付給。或按應還日期之市價易金付給。還本於一千九百零二年止。月初一日起。至千九百四十年終止。還本各款。應按每屆

一年付還。初次定於一千九百零一年正月初一日。付還利息。由一千九百零一年七月初一日起算。惟中國國家亦可將所欠首六個月至一千九百零一年十二月三十一日之息展在自一千九百零二年正月初一日起。於三年內付還。但所展息款之利。亦應按年四釐付清。又利息每屆六個月付給。初次定於一千九百零二年七月初一日付給。

(乙)此欠款一切事宜。均在上海辦理。如後諸國各派銀行董事一名。會同將所有由該管之中國官員付給之本利總數收存。分給有干涉者。該銀行出付回執。(丙)中國國家將全數保票一帑。交駐京諸國欽差領銜手內。此保票以後分作零票。每票上各由中國特派之官員畫押。此節以及發票一切事宜。應由以上所述之銀行董事各遵本國飭令而行。(丁)付還保票財源各進款。應每月給銀行董事收存。(戊)所定承擔保票之財源。開列於後。一、新關各進款。俟前已作為擔保之借款各本利付給之後。餘剩者又進口貨稅增至切實值百抽五。將所增之數加之。所有向例進口免稅各貨。除外國運來之米及各雜色糧麪並金銀以及金銀各錢外。均應列入切實值百抽五貨內。二、所有常關各進款。在各通商口岸之常關。均歸新關管理。三、所有鹽政各進項。除歸還泰西借款一宗外。餘剩一併歸入。至進口貨稅增至切實值百抽五。諸國現尤可行。惟須二端。一、將現在照估價抽收進口各稅。凡能改者。皆當急速改為按件抽稅幾何。改辦一層。如後以

爲估算貨價之基。應以一千八百九十七八九年卸貨時各貨率算價值。乃開除進口及雜費總數之市價。其未改以前。各該稅仍照估價征收。二北河黃浦兩水路。均應改善。中國國家及應撥款相助。至增稅一層。俟此條款畫押兩個月後。即行開辦。除在此畫押日期後至遲十日已在途間之貨外。概不得免抽。

第七款 大清國國家允定各使館境界以爲專與住用之處。並獨由使館管理。中國人。概不准在界內居住。亦可自行防守。使館界線於附件之圖上標明如後（附件十四）東面之線。係崇文門大街。圖上十一十二等字。北面圖上係五六七八九十等字之線。西面圖上係一二三四五等字之線。南面圖上係十二一等字之綫。此綫循城牆南址隨城堞而畫。按照西歷一千九百零一年正月十六日即中歷上年十一月二十六日文內。後附之條。中國國家應允諸國分應自主。常留兵隊分保使館。

第八款 大清國國家應允將大沽礮台及有碍京師至海通道之各砲台一律削平。現已設法照辦。

第九款 按照西歷一千九百零一年正月十六日即中歷上年十一月二十六日文內。後附之條款。中國國家應允由諸國分應主辦會同酌定數處留兵駐守。以保京師至海通道無斷絕之處。今諸國駐防之處。係黃村郎坊楊村天津軍糧城塘沽蘆台唐山灤州

昌黎秦王島山海關。

第十款 大清國國家允定兩年之久。在各府廳州縣將以後所述之 上諭頒行布告。

一西歷本年二月初一日即中歷上年十二月十三日 上諭以永禁或設或入與諸國仇敵之會。違者皆斬。(附件十五) 二西歷本年□月□日即中歷□月□日 上諭一道。犯罪之人如何懲辦之處。均一一載明。 三西歷本年□月□日即中歷□月□日 上諭。以諸國人民遇害被虐各城鎮停止文武各等考試。 四西歷本年二月初一日即中歷上年十二月十三日 上諭各省撫督文武大吏暨有司各官。於所屬境內均有保平安之責。如復滋傷害諸國人民之事。或再有違約之行。必須立時彈壓懲辦。否則該管之員。即行革職。永不叙用。亦不得開脫別給獎叙。(附件十六) 以上 諭旨現於中國全境漸次張貼。

第十一款 大清國國家允定將通商行船各條約內。諸國視為應行商改之處。及有關通商各他事宜。均行議商。以期妥善簡易。按照第六款賠償事宜。約定中國國家應允襄辦改善北河黃浦兩水路。其襄辦各節如左。 一北河改善河道。在一千八百九十八年會同中國國家所興各工。盡由諸國派員興修。 一俟治理天津事務交還之後。即可由中國國家派員與諸國所派之員會辦。中國國家應付海關銀每年六萬以養其工。

現設立黃浦河道局。經管整理改善水道各工。所派該局各員。均代中國及諸國保守在滬所有通商之利益。預估後二十年。該局各工及經營各費。應每年支用海關銀四十六萬兩。此數平分。半由中國國家付給。半由外國各干涉者出資。該局員差並權責進款之詳細各節。皆於後附各文件內列明。（附件十七）

第十二款 西歷本年七月二十四日即中國六月初九日降 旨將總理各國事務衙門按照諸國酌定改爲外務部。班列六部之前。此 上諭內已簡派外務部各王大臣矣。（附件十八） 且變通諸國欽差大臣覲見禮節。均已商定由中國全權大臣屢次照會在案。此照會在後附之節略內述明。（附件十九）

茲特爲議明以上所述各語。及後附諸國全權大臣所發之文牘。均係以法文爲憑。大清國國家既如此按以上所述。西歷一千九百年十二月二十二日。即中歷光緒二十六年十一月初一日。文內各款。足適諸國之意。妥辦。則中國願將一千九百年夏間變亂所生之局勢完結。諸國亦照允隨行。是以諸國全權大臣奉各本國政府之命。代爲聲明。除第七款所述之防守使館兵隊外。諸國兵隊即於西歷一千九百零一年□月□□日即中歷□月□□日全由京城撤退。並除第九款所述各處外。亦於西歷一千九百零一年□月□□日即中歷□□年□月□□日由直隸省撤退。今將以上條款繕定同文十二

分。均由諸國全權大臣畫押。諸國全權大臣各存一分。中國全權大臣收存一分。

一千九百零一年 月 日
光緒二十七年 月 日 在北京定立



第陸集紀事

外國大事記
地球大勢
中外瑣記

清議報全編

橫濱新民主社輯印

清議報全編卷二十四

第六集下

紀事四

外國大事紀第一

比較英俄東方權力

倫敦頗路壓路報

俄派駐旅順兵約四萬人。故人皆謂其可以隨時進據北京。今中國政府要與俄親厚。若偶一呼之。彼便乘機闖進。夫俄厚蓄兵力於北中國如此。故奴符華連也報聞之。特將英國駐北河一帶之水師。與俄兵一較其勢力。遂謂英兵遠不及俄之強。乃有士典達報。轉駁其所論不確。其言曰。英國沿海皆有屬土接濟。該報不審而妄言之。不觀巴黎各報常言乎。海權以英爲最大。在法國實無策以奪之。且不獨法人信之。即俄京之識時務者。亦無不以爲然。他且勿論。據現今英提督西摩所統之海軍。已將北直隸之港要。盡行扼定。俄兵若欲渡至唐沽。非得英提督允肯。則俄軍一卒不能飛渡。既不能由海而至。勢將轉向牛莊。由陸路進發。惟自牛莊至北京。計程不下四百五英里。夫驅四萬大兵而行中國四五百里之路。非兩月不能達。英國即於香港星架坡諸地調不得兵。亦可從印度加拿大兩地派調來援。不然。又可從澳大利移師而至。統計印度常備兵有二十萬。一遇有事。必能接應。加拉吉打、孟米、馬得律士、卡打刺諸屬。船艘極夥。即以二、三萬之兵。儘於七日內可成行。由以上諸埠至唐

沽。水程約二十五日可達。則至遲一月內。便可由印度調二萬五千兵到北直隸。如大沽各砲台阻拒登岸。吾又可決西摩提督不難攻退之也。至於加拿大政府。素能效力於國。若有事於中國。必能應援。且該省之鐵路總公司。及太平洋之輪船總公司。常預車輛輪船。運載兵士至北直隸。雖加拿大之溫哥華域多利兩地皆英屬之在北美洲者諸埠。合於載兵之船有限。惟到日本各埠。我國鐵行公司之船。儘可調用。計由溫哥華至唐沽。水程約行二十日。由加拿大起運大兵。所有購運糧食軍械。又須二十日。乃抵溫哥華。緣加拿大之陸軍。非比印軍當時預備開戰。故起運倍費日力。有事時。惟望該處官司。聞警便迅速辦事耳。然實按由加拿大運兵至唐沽。三十五日內可得五千人。五十日內可添至一萬。且至行及中國海面。則英水師便可保護。據以上所談。於中國北方施設之策。頗得要領。祇望我英政府諸臣再行悉心經營。以保我權利。則俄軍雖屯有四萬於旅順。亦不足畏矣。

西伯利亞鐵路將成。人皆注目視之。謂從此又多一路以達東方。凡游客自倫敦起程者。十七日便可到上海。惟是該路果便於行旅否。尙須俟其路開行。始知其詳。然考其築路所用之材料。皆極粗惡。與歐美鐵路初興所用之料相同。可知乘坐必不相宜。至於由加拿大左轉至東方之一路。必非快捷。蓋由倫敦往繪壁。或改往哈利佛士。海程已有七日。又由此兩地改搭火車往溫哥華。須程五日。由溫哥華搭船往上海。須程十二日。總計應需程二十四

然以行路之安然。此一路又爲通地球之冠也。

美人演說

日本太晤士報

前十二月廿五日。美人准巴列。於日本東京東邦協會演說。准巴列前曾出使暹羅國者。是日在會議員皆位望甚高。聚會聽說之人極多。外務省派日本翻譯生一人傳語。演說甚詳。謂日本維新之後。一切仿效西法。歷觀西國史記中所記各國變政。無如日本之速也。在美國變政之時。凡一切製造新法。及政治學問。事事皆有記載。地球各國無不稱羨。今日日本再變至四十年之後。其維新之盛。當可與美國相等。但各國皆望日本變政。然真心屬望於日本者。仍不若美國也。日本進步之心極銳。其志欲與歐洲并駕齊驅。美人實切望之。美之與日本如兄如弟。一在東方。一在西方。交誼聯絡。斷難分解者也。日本今得聖明之君。又得諸臣輔佐。正如華盛頓時得人才之盛。合衆國之始基政治。布置美善。由撥亂世界。引至昇平景象。其功業萬世所不能忘矣。日本耐心考求。蒸蒸日上。仿如美國時之進步。豈不盛哉。今日本西曆一千八百九十九年正月起增稅。六七月許各國人雜居內地。與歐洲各國律例相同。惟雜居條款。初時必難盡洽。須逐漸修改。以期妥善。各國公使亦須將其條約改良。使彼此無齟齬不安之處。全球各國皆以爲將來條約必臻美善而止。不用再多更張也。惟我是美國人。亦即如日本人一律。望日本政府所定之例。必顧外國人利權。不分畛域。則全球各

國人亦仰戴日本之恩德矣。然雜居之約於日本亦大有利益。但仍須顧外國之利權爲望耳。合衆國今初來亞洲得一島嶼於美日兩國皆有利益。美日東西如比隣而居。中隔太平洋五千英里。一望無際。輪船行十五天乃到。以今日計美國之土地與日本相距三百英里。朝發夕至。由臺灣之南至非獵賓島之北。往返不遠。由日本橫濱直抵非獵賓島京城。相隔一千五百八十五英里。比由橫濱抵香港之水程相等。由舊金山抵非獵賓京城。路經檀香山。中隔七千英里。今按地圖一觀。知日本與非獵賓島有無限利益均沾也。其與日本商務利益之處。於兩島出產之貨物及地形之相接可知矣。日本在北邊。非獵賓島在東南。其當太平洋之衝要相等。惟他日兩島之要害。尙未能明言。因到亞洲北方之船。日本可一望而收其形勝。而到東南方之船。非獵賓島已據其要道也。香港西貢新架坡等埠。與非獵賓島依相望。由香港至非獵賓島之西北邊。距六百三十英里。行兩天可到。由新架坡至非獵賓島西南邊。距一千二百八十五英里。若四天可至。商務船由歐洲至東方。或由東方至歐洲。經蘇彝士河。經馬叻加海頸。必取道於非獵賓島。則他日非獵賓島京城必爲通商來往之最要口岸矣。仿如日本橫濱之在北邊。與美國至亞洲爲中樞之地也。非獵賓島總計其島屬大小。共有一千五百島之多。惟看地圖。或以遊歷得之。或已通商畧有人民居住者。僅記其二十五島。至非獵賓島。統屬各島地形之廣大。尙未查悉其里數。因西班牙政府尙未稽

核其數。卽或曾經稽核。亦未有將其島之實數著列版圖。使各國知其詳細。了然於其地形而無疑也。今推測之。此地約至少有五萬方里。至多約十五萬方里。惟曾經確考之。約一十一萬五千方里。此說最近。其最大之島。名雷詢。此島長五百二十英里。闊一百五十英里。島之南長而窄。內容五萬方里。其非獵賓島京城之海灣。至冥開岫地角。共長二百六十英里。扯計約闊一百二十五英里。內容三萬二千五百方里。在雷詢島之中其次之海島。名面地拿啊。此島約至少有三萬方里。在極南邊。計雷詢與面地拿啊共已有八萬方里。其餘諸羣島未計。則以爲其共有十一萬五千方里之說亦不謬也。我之極留意於此島之廣大濶窄。自開埠以來。未有人查察清楚。又因欲知其地利如何。必先考查其地形之廣濶。且其土地饒沃。更宜種植。可不詳細稽核之乎。

天生此島。土質肥美。以我遊歷羣島中之城邑。又考查其海濱與內地。較之遍遊天下各國土地。以非獵賓島人民之寡。地形之小。而其種植礦產之繁。山林材木。尙多未闢。實爲天下各國所不如也。我今將前日着蝦罷報登錄所云。對諸君再說。此島不獨有金銀鐵煤各礦。更不獨有大林木。可以作裝船造屋等材料。更不獨有美木。可以造器皿椅棹等用。不獨有種植糖、蔗、麻、菸、五穀、椰子、香料、咖啡之地。然有未經墾闢之地。待有善政良法之邦。治理而墾闢之。更有火車鐵路一二條。惟火車鐵路。此地必須多設矣。更有大小海島。不可勝計。惟

往來船隻不多。此地必須多設小火輪船。以通來往。運載各貨為要矣。以上所說皆查察此地之人所公論。非我一人之私見也。我憶前到非獵賓島之時。見其樹林暢茂。曾將其土產之物登錄。木則有柏木、蘇木、酸枝木、膠木、實木、及竹林等等。樹木有無限之多。種植及野生之果木。則有麻、糖蔗、烟、蕉、咖啡、薑、五穀、玉桂、胡椒、藍靛、橙、柑、椰子、波羅、大麥、細麥、棉花、佛手、枸杞、萍果、及種種果園。礦產則除金、銀、鐵、煤以外。有銅、水銀、硝、硫磺等。海產則有龜壳、珊瑚、瑪瑙、珍珠等物。山則有雲石、石羔。尚未開採。有用之獸。則有馬仔、野牛、豬、鹿、草羊、棉羊、及別種野獸。其形狀精奇。惟此地所出產各處所無也。獵人所取野豬、野鹿、沙追雀、山鷄、木鷄、野鴨。無論四時。皆有獵獲也。現與外國通商。出入口貨計共值六十二兆銀元。此乃現時查確之實數。其出入口貨銀約相等。然出口貨比之入口貨銀。常有多數兆銀之譜。以我意測之。五年之後。通商日旺。出入口貨銀必增至一百兆元。此非妄言也。出口貨最大宗者。乃蘇木、烟葉、蔗糖、樹膠、假珍珠等物。入口貨最大宗者。乃曾經製造物件。棉花物、棉紗、經鑄鐵料、機器、瓦器、鐵片、刀斧利器、玻璃器皿、酒水、罐頭、麪粉、火水等物。該島出入口貨。本可加增。惟向歸西班牙管轄。不善經理。自歸美國之後。出入口貨。日興旺。以我所列之出產。與入口各貨。由各國運來。或轉運往各國。即知此島商務。與日本商務之交涉如何矣。因又論合眾國如何酌議海關稅則。專顧美國之利權。或公定萬國均沾之利益。此一著。萬國通商皆觀望。

欲知其主義。仍候議院及國中。新報參酌。或准通商與否。許久乃能定奪。現非獵賓島所立如何憲法。海關稅項等。不獨美人不能預料。即總統亦未能言之也。政治關稅。現各人議論紛紛。彼此集議。或有以爲無可無不可者。以我意見。中國尙議多開口岸通商。四方鼓噪。何有於非獵賓島。不爭欲得爲通商口岸乎。惟國中政治家。則議欲抽重稅。以試驗其能否。然又有人辯論。謂若抽重稅。恐斷難持久。即觀法國於西貢。比之英國於香港。新架坡。商務之興盛。可以知其取法矣。所謂非獵賓島必開作通商口岸者。其意何居。不獨可以聯絡各國。及與各國互相協力。逼中國開遍通商口岸。且以今日美國商務之在東方。正在蒸蒸日上。其貨物直凌駕歐洲而上之。則非獵賓島。豈可閉關不開作通商口岸哉。以我論之。則必應開作萬國通商口岸矣。惟若不抽稅。則公款無從支給。即如合衆國及日本。亦均有抽稅。現時非獵賓島。無論何國入口之貨。皆有抽稅。若酌定永遠征收之稅。則仍俟華盛頓政府。將此島之政治議定。乃能舉行。即使舉行新章。亦須遲十二個月。乃能照辦。我曾探知各議員之意。合衆國斷無忙速遽定草率之法。必從緩計議。不獨爲非獵賓島一處之情形。計暨且爲美國今日干預東方大局。開闢利權而計也。且論非獵賓島形勢。及其人民。計全島人民有八兆。內有五兆。居雷詢海島。其土人形狀舉止言語。頗類馬來暹羅人。其性懶惰。不喜工作。亦是在熱帶人情性一律。以同緯度計之。則其勤力。又勝於別處之土人也。倘得文明之

政府。善法治理之。可以教其耕植。使其地可比緬甸爪哇之肥美。然其土人又分兩種。言語不同。狀貌舉止則同。土人亦有自治之權。其有一種族名託基羅士。多寓於雷詢海島。其第二種族名威西也是。居於南邊海島。土人鴉君阿度。現統轄其種族。各處新報談論極多。將來土人若果有意拒絕美國治理此島之權。我則心實爲其憐惜。不敢稱讚之矣。倘其善於調處。美國必以優禮相待。最可稱羨者。其人頗有才能。兵力亦頗可用。除非獵賓島。京城歸美國治理。其餘雷詢全島。彼亦有法律章程。可能自治者也。其間有內務省。外務省。陸軍省。大藏省。又有議院。內有一百名議員。又有陸軍一校。約三萬人。新式鎗炮均極齊備。初時助我美人擊退西班牙兵。美人互相保護。復回雷詢海島。將來如何治理。非獵賓島。亦當與其有干涉。我知其已深悉美國政治之美善。美員識見之高超。亦可免以兵戈相見。如此則其土人歸美國統屬。他日共享昇平之樂。彼此商務利益均沾。豈不盛哉。非獵賓島。京城有三十萬人。其屋舍大半多效西式。其餘尙仍舊俗。其海灣甚宜灣泊。其京城商務頗旺。內地各貨多經此地出口。西人亦多在此建設行棧。另有意理奧路城。在偏呢海島。另有除罷城。在除罷海島。除雷詢島以外。商務出產之處。以面地拿啊島。及偏呢島。除罷島。呢各羅士島。面多士島。波何島。璃地島。巴拉溫島。蘇六島。爲最多。至我今日所談。僅將其大畧言之。使知我美國於東方新得之土地。正與日本南邊接連。向來所未經稽核者也。我所以論此島之情

形甚詳。實因與日本商務彼此交涉。甚關緊要。此島於四百年來未有認真治理。昨歲藉關威提督將此土用兵力開闢。化爲文明之地。除舊布新。豈不令人仰慕哉。茲又再言暹羅國。居亞洲之東南。近亦逐漸開化。倘能效日本之章程。維新治理。天下萬國皆當稱羨。今其商務漸通。於日本商務亦大有利益。日本前派往暹羅某欽差。曾將其出產貨物。地方情形。詳調查核。通告國人。其所說亦與我之意見相同。倘日本人有才智者。在暹羅開闢地利。鼎力襄助。以圖商務日興。日本與暹羅交相利益。豈不甚善乎。查暹羅每年出入口貨物。約值四十兆元。其出口貨較多於入口貨。其出口貨。以米、麻、栗木爲大宗。入口貨。頗類非獵賓島人民。約有七兆。通國地約二十萬方里。山水秀媚。樹林陰翳。田土肥沃。其京城名彭各。內有五十萬人。爲亞洲興盛之一區也。其出產可供國家富強之用。我曾在此地四年。經熟識其土人之性情等事。今記憶之。真堪稱羨也。日本正當鼓舞之。使其政治人心日爭進步。然我亦深知日本之人。必竭力襄助者也。因日本君民之識見極高。善於維新圖治。使小國之弱。變爲富強之國。又幸暹羅今得聖明之君。其所發議論。一切施行。自然維新盛業。大有可觀。其國土如是肥沃。出產如是繁多。雖強國亦不能輕視之也。且其國變法治理以來。并無變亂阻礙維新之事。我實厚望日本。斷不可輕視其國。應趁此時扶助而振興之耳。

非島人誓抗美軍

日本時事新報

非律賓諸島之事。至今未決。雖美人亦有議占地之非策者。而島人氣焰甚熾。萬口一辭。誓死稱自主。美人與島人勢日決裂。巨魁希都托者。自稱大統領。近日公布一書。議論激昂。意氣甚壯。曰美西之戰。微島人助美人。美人不能驟成功。及功既成。美人乃疎忌島人。詭秘百端。欲削島人之力。島人豈甘心束手。唯命之從哉。云云。雖然。微美人之兵。則島人不能脫西班牙苛虐。而微島人之助美人。亦不能上非律賓島之岸。當此時。只應問希都托才幹威望如何耳。假令其才幹威望能統御島民。則美人豈遽能相抗哉。然美人往往貪戰勝之光榮。欲擴張殖民政策。目非律賓島爲東洋貿易不可少之域。故于希都托有才幹威望與否。全不過問。直決併吞之策。以遂其志也。今伊路伊路府形勢甚急。朝不保夕。將軍阿幾士命希都托政府城而去。而彼不肯應命。於是島民憎忌美人益甚。漸傾心英人。

西班牙弊政

倫敦太晤士報

有一西人。拿是阿欽批羅者。嘗遊歷西班牙京城。見其築造宮室石牌坊等。甚壯麗大觀。其地天朗氣清。令人讚賞者不置。惟沿途男女駢豎。百千成羣。隨而叫苦者。求懇者。喧嘩不絕。團團環撲。至不能駐足。欲一息與友立談。或四顧觀覽。亦不暇及。前行數步。乞丐即牽衣揭帽。討取錢銀。此等貧民。行路者無不憫之。而其本國固視爲平常之事。不少設法以除其弊。以我論之。貧民污穢叢積。最易滋生疾病。其地方官吏。當抱愧矣。要其京城究竟有無施濟

院。我曾查考之。各大城邑施濟院之多。莫京城若矣。即如京城內沙斂滿哈之地。其貧民受施濟院賑濟者。每日不下千五百。又廢疾育嬰老人等院。所在多有。可稱博濟。然沿途貧民。仍復如是之多者。蓋其巡捕靈屬無川等輩。專奉承貴人及有名望者而保護之。其新聞報館。則查拿其訪事之人。恐其登錄時事。觸犯當道劣跡。以至巡捕費耗時日。專辦此事。沿路乞丐。則不事彈壓。當道官員。所謂司理國政者。更無暇以及此。乞丐之多。固無怪矣。以是全國大局。盡已敗壞。官員巡捕。雖有緊要公事。吾亦知其不能辦矣。其公衆博濟等院。日壞一日。不能善持其終。亦在意計中也。更可憫者。童豎餓不得食。寒不得衣。身被籃襖。跣足而立於叢雪堆中。日凡兩三下鐘之久。其地賭風又極熾。人或立於閘門之間。羣即以爲賭博之徒。若給以錢財。則不說上天他日報應等話。只說上天必與爾以好機會。蓋指賭博而言也。其乞丐之中。或有少年美女。藏匿其內。欲以色求乞。其實此等婦女。皆有手業謀生。巡捕雖知之。亦置之不理也。

更有一最壞之風俗。乃乞丐之中。租人嬰兒。認爲己生。置懷抱中。故打罵使之啼哭。以觸動路人之憐憫。其母亦願將其孩子租人。日取回租銀一阿里路士。呂宋銀元然查其乞丐之夫。究非極貧。常有爲旅客店之主人者。有租房屋與人者。嘗見有一丐婦。在街上行乞。搜查其身。乃有八千個批錫他士。呂宋銀元內或係金錢。或係銀紙。有一銀行。乞丐貯款其

中者甚夥。忽傳該銀行將倒閉。即有數百乞丐環繞門外。索回所貯款。羣將其付銀摺呈上。今日散後。異日仍復在此求乞。查其故。乃因寺廟庵堂。日見增加。而製造局及學校。反一切關閉。統計教門之人。需年款四十兆。乃足供養之。又其寺觀禮拜堂等。多斂民財。以爲富厚。貧民艱於得財。稍有贏餘。安得不深自藏匿。以避苛斂哉。

檀島新政條例

大坂朝日報

檀山自歸併美國後。新政府推行新例。舉要如下。一檀山政府稱地方政府。統立法行政司法三部之權。一立法部置二院。曰元老院。曰代議院。一曰元老院議員。定十五人。每四年選舉一代議院議員。定三十二人。每三年更選於各選舉區。一有選舉權者。爲有民權。而住居選舉區。且定有年例。一檀山地方政府置長官一人。一檀山地方政府長官。經美國元老院協贊而後授之。任期爲四月。一地方長官給俸七千多路。其內秘書俸給二千多路。雜費五百多路。一大審院爲最高司法部。設置地方裁判所。一自檀山選出元老院議員。以上法律自西曆一千八百九十九年七月一日施行。

英俄協商彙譯

英俄兩國。協商對清處分。雖業已成立。而先是四月二日。俄都聖彼得來書。記兩國間之形勢云。今也清國問題。大起於歐洲對清處分之協議。開始於英俄。昔者俄國之欲得牛莊也。力

排英國。以英之國情。爲非可與協商也。然某新報則曰。駐俄之英公使。提出俄國政府分割清國之意見。以前禮拜五。達俄國外務大臣之手。該書云。歐洲列國。不能深謀遠慮。英俄二國。宜爲之指導。東亞之整頓。無復望矣。雖然。得我二國聯合。則可決此問題。而加以以法德意三國。無不可爲。此英國公使之謨也。俄國對此意見。曰。列國會譁。是擾亂分割東亞之秩序。且終局必不能決。宜加以以奧美日三國。然日美兩國。不宜使之分割清國。而防歐洲之希望也。與英國公使之意。大相刺謬。夫英國有此意見與否。雖未可知。然與俄國協商。則甚明。俄國不同此意。亦自利害得失上起見者也。進而言之。則俄國將來所求之大欲。更有過於此者也。若夫清國之祖。非崛起滿洲而席捲天下哉。

曩者俄國之意向如此。而今忽變其態度。與英國協商者。其間消息。豈可不深思乎。清國清國。其如何饒此羣虎乎。東京朝日報

英俄協商交涉。英國公使在俄京聖彼得堡。與俄國外務大臣定議。其要領尙未至日本政府。故不能知其詳。聞協商支那鐵道之事。互定其權。俄國讓英者尤大。以地圖觀之。俄地雖與北支那相接。交通杜絕。故不能懸軍長驅。據旅順一角。永與英國爭。英國海軍雖強大。于陸上亦不能舉事。兩國皆鞭長不達馬腹。故不如無爭也。昨歲八月之擾。予私爲英俄兩國協商時機已至。日候其消息。延至今日。乃適如意中所料也。青木外務大臣。見路透電傳英

俄協商。為之大驚。端坐室中。以鎮其慮。又一時唱日英同盟者。及論日英德美商業同盟者。

皆嗒然若失。大阪每日報

英相沙侯。莅亞嘎的美學士會。響筵演說云。余信英俄盟約。必足防弭兩國利益之爭端。於將

來也。東京時事新報

據路透電英俄盟約。約款首章。有兩國均許扶持清國之安全及獨立之語。東京時事新報

譯者曰。瓜分而曰扶持。衰亡而曰安全。無權而曰獨立。此種陰滅人國之新法。最毒最酷。

而當局者猶夢夢焉。吁悲夫。

意大利近政畧述

大阪朝日新聞

意大利歐洲之一半島國。自西北向東南。斜伸出于地中海面。北負阿爾普蘇山。接壤大陸。西南二面臨鑊烈尼安海。東瀕阿德理亞底克海。統西西里撒丁也爾巴等之島嶼。區分全國為六十九州。

初分為數小國。至一千八百七十年始歸一統。現王國即是也。爾來列於歐洲強國之一。與奧法二國訂三角聯盟。號為地中海上雄鎮。祇皇張軍備。需款過鉅。財政為之耗斁。

今王稱溫伯都第一世也。馬奴烈第二世之長子。千八百七十八年一月九日父王殂。乃嗣位。今茲年五十有七。

客歲六月路底爾內閣退位。陪路克士內閣代焉。即現政府也。陸軍大將律是陪路克士爲總理大臣。兼內部大臣。海軍中將葛捏法駱爲外部大臣。福益諾察羅爲法部大臣。陸軍大將桑麼薩諾爲陸軍大臣。海軍中將巴容玻爲海軍大臣。哈紀也力爲學部大臣。加爾葛諾爲財務大臣。法之利爲出納大臣。法底司爲農部大臣。落喀發爲工部大臣。拿是爲郵政大臣。

現今所行之憲法。係增補千八百四十八年三月四日。加羅亞彼達王之所允於撒丁人民之法章者。行政權專屬國王。大臣奉命行之。立法權屬國王與議會之協商。議會成於元老及代議之二院。現今元老院議員。凡三百七十二人。代議院議員。凡五百零八人。

意國本土面積十一萬零六百六十五英方里。人口二十九兆六十九萬九千七百八十五人。其增殖之度。每歲爲千分之四或八。於千八百九十六年。移住海外者三十萬六千一百二十七人。其殖民地皆在非洲。即亞比仙尼亞、地理士利亞、素麻爾海岸等是也。

陸師凡十二軍團。其常備軍。將校一萬七千六百人。下士以下兵卒六十五萬二千六百十二人。第一豫備軍。將校一萬八千四百二十四人。下士以下兵卒五十九萬二千一百十二人。第二豫備軍。將校一萬八千九百四十人。下士以下兵卒九十一萬二千一百人。總計將校五萬四千九百六十四人。下士以下兵卒二兆五十五萬六千八百二十四人。昨年度

豫算陸師經費總計十五兆六十五萬九千六百零九弗。

水師之威力頗雄大。頭等戰艦凡十隻。其載重一萬一千噸者三隻。九千八百噸者二隻。一萬四千四百噸。一萬四千三百八十噸。一萬三千八百六噸。一萬三千八百二十五噸。一萬三千三百七十五噸者各一隻。二等及三等戰艦凡五隻。其四千二百六十八噸者二隻。一萬一千二百噸。一萬一千一百三十六噸及四千噸者各一隻。裝甲巡洋艦亦凡五隻。其六千八百四十噸。六千五百噸各二隻。四千五百八十噸者一隻。二等及三等巡洋艦凡十四隻。其二千二百零八噸者四隻。三千六百噸。三千五百三十噸。三千四百七十五噸。三千零六噸者各一隻。二千七百噸。二千五百五十噸。二千五百噸。二千四百零七噸。二千三百八十噸。二千零八十八噸者亦各一隻。魚雷艇隊凡一百九十四隻。其頭等艇九十八隻。二等艇七隻。三等艇七十一隻。毀壞艇十八隻。

對東政策

優勝劣敗。適種生存。

即天演論物競天擇之說也。

此列國興亡之大公例也。抑方今列國中西洋之國。駸駸

以興。東洋之國。駸駸以亡。所以者何。夫東洋者。世界中最大最強之國民。而今日

以文明號于世界。如彼歐洲之政治者。其文物。其風俗。其羣態。

日本謂之社會。

凡所稱十九世紀中盡

善盡美之。一切制度。其始無一不自東洋來。故西人有恒言。謂亞細亞者世界之母也。其意蓋

謂泰西之文明皆東洋人腦質中出產之物也。試觀全地球之人類。實起自東洋之小亞細亞。歐人所奉之耶穌教。生于東洋之猶太。其他如印度之文學。支那之制度。比兒沙之稗史。亞刺伯之算學等。悉屬東洋人之產物。此產物經歷年所。物換星移。駸駸西漸。遂變爲西洋人所專有。其發達之結果。最者爲我東洋人之門弟子者。今一變却爲我先輩之國矣。今所謂西洋文明。恰如野燒。如洪水。烈烈汨汨。而歐羅巴。而亞細亞。而澳洲。而亞非利加。席卷六合。風靡汎濫。其勢力之猛烈。豈人而知之矣。夫西洋之文明。其實即東洋之文明。既如前所言矣。惟今日西洋人所以得專此名者。譬之有財產於此。其主名之人。自甲而偶變于乙。昔者世界之文明。爲東洋人主名下所有者。今偶移其主名之權利于西洋人。如斯而已。苟東洋人能自振乎。則一轉瞬間。物歸原主。決非難也。使其終不自振。終不自悟。其究也。則終爲東洋自滅之大原因而已。

何以言之。蓋世界之文明。一因乎適種生存優勝劣敗之公例。國民之或興或亡。其分歧之結果。罔不由是也。文明之國民。其國強。其民富。野蠻之國民。其國弱。其民貧。貧而弱者必亡。強而富者必興。今歐美之國民。以富強著于天下者也。而其所以有今日之進步。皆文明之收效而已。夫文明之趨嚮。必在自強。而自強之結果。不得不他弱。即弱人以強己也。因之。此列強以攘奪之力。轉弱而爲強。轉貧而爲富。國際上國際即各國交涉之義。取孟子交際之義也。生存之法。惟在外交。外交善者。能

使不適之國民。變爲適者。能使劣敗之國民。變爲優勝。

抑泰西文明之收效。其第一義。在使人身生理之發達。民家處世之整頓。其效也。則人口繁殖。人口繁殖。故各國民生存競爭。不得不盛。各國民生存競爭愈盛。則其所需衣服飲食居處之物愈多。所需之物愈多。則殖產興業製造貿易之事。不得不與之俱進。於是乎列國相競。所謂市場政策。不得不講焉。所謂殖民政略。不得不務焉。自十六世紀哥倫布。參鴉麻達。冒險探地以來。至於今日歐羅巴之國民。擴其市場。增其殖民地。殆徧于全世界。澳大利亞者。昔爲歐洲罪人流竄之荒島。今乃爲白色種人生存競爭一大富源焉。印度者。素所稱流金鑠石世界之污地獄也。今乃爲英國之一大倉庫焉。土耳其城內之諸州。削而爲歐洲國民之小獨立國。亞非利加。茫茫之大地。剖其爲各國之大市場。彼西洋人者。於六大洲中。拓未開之天地。蒐未發之遺利。嗚呼。天何獨厚于白種之西洋人。而禍黃種之東洋人若是哉。於是石中日戰爭之事。

昔我日本者。彼素所視爲東洋之一野蠻國也。于明治二十七八年間。忽倡大義。助朝鮮之獨立。導支那之開國。擗四千萬人之鐵血。以有戰事之結局。不圖當我日本內顧未備之時。却惹起耿耿逐逐之歐洲列強。以促支那瓜分之慘禍。俄國削其北。德國取其東。法也自南。英也自西。曾幾何時。而意大利亦睨其旁。思分一杯羹。不及數年。雖比利時奧大利和蘭瑞

與丁抹之小國。皆得以羣獸爭肉之勢。聚而噉其財源者。年復一年。有加無已。不見乙未以來。至于今日乎。支那之鐵路。礦山海灣。凡歐美列國民所得之權利。真所謂兵不血刃。一言制敵者。先則俄國於東清鐵路。蘆漢鐵路。其他于滿洲蒙古內外。得一切專有之利益。其勢將施及我台灣之沿岸。迄于福建。德國則占領膠州灣。得山東全省之利益。法國則得廣州灣。若英國則自九龍至廣東。自上海至南京。自太原至新安。自天津至鎮江之各鐵路。不必論。如德英美協。得自漢口至廣東之鐵路。及其他煤礦金礦開採之權。昔者支那所有物質之利益。今也著著爲歐美人蒐而收之。還顧我邦對清之政畧。則外交之間。殆如空無一人焉。不見戰後之日本乎。除與支那約福建一省不割讓他國之外。無一所得。所謂名譽之紀念。鐵血之殘碑。果何在哉。

今十九世紀之歷史。僅餘一年耳。一交入二十世紀。則全世界之大問題。在於處置支那之法。無可疑也。而支那之若何處置。則以我日本國民之優劣勝敗而斷。雖然即使日本國民與支那古來絕無關係。而爲助世界之平和與文明。猶當揮力以干預此事。况支那者。位于日本之西隣。歷史人種。人情風俗。悉出于一。三千年來。兩國之關係。不啻唇齒輔車。加以甲午之役。我國民之大活動。即所以紹介支那于世界者也。然則處置支那之事。日本當有權利也明矣。而外交之事。有所失無所得也如此。他日我國民生存競爭之餘地。不知于天壤

之間何處求之

韓廷政變

東京日本報

據漢成來函云。春來漢城之政界。安靜無事。蓋近年之所絕無也。雖時非無負商輩之蠢動。而獨立協會既箝口。萬民公會既解體。皇國協會既消斃。其他曰某曰某。一切公會。咸既歛迹。消息杳然。無復可聞矣。於是乎。志士徒撫脾肉。逸士齊謳昇平。然爭權勢如彼。貪苞苴如彼。道義之頹廢。士風之萎靡。亦如彼。惡所得確立內政。刷新外交乎哉。今也。政府由奏請四十七郡守之選擇。更任一案。忽觸逆鱗。霹靂一聲之下。議政府參政沈相薰。處流十五年。內部置理大臣閔丙漢。處流十年。其他外部朴齊純。度支閔永倚等。悉被免黜。唯宮內大臣李載純。以其職無涉政務。法部俞箕煥。學部申箕善。以或抗奏請之議。或不署名奏疏。並僅免焉。於是乎。沈氏所構成之政府。全歸土崩瓦解。申氏轉議政府置理。閔種默自議政府贊成。任內部署理。僅保舊政府之餘喘。以待新政府之成而已。構成新政府者誰。蓋趙秉式也。夫此次政變。固雖發于奏請一案。深詢其原由。蓋有數因焉。外間傳云。俄國駐韓欽使。向強索韓廷以訂捕鯨合同條約。而韓廷弗聽。俄使患之。陰用詭計。遂及於此。又云。嚴貴人之覬覦椒房也。久矣。而未得其志者。以沈氏之黨在朝也。乃與趙氏竊相結托。乘有此次之奏請。百方誣之。遂及於此。二說必有所由。然貴人之幹旋。若爲最得主因者然。趙氏之構成新政

府。彈冠者何人。紛紛飛語。不知所歸。而列國使臣之於此變。亦僉如聾如啞也。嗚呼噫嘻。內外多事之時。國情如此。可勝慨哉。

記俄今皇失權之事

東京外交時報

今日地球上。擅第一主權者。誰不推俄皇爲首哉。然俄皇果能躬攬大權乎。抑有暗持其實權而爲之敷布乎。世人罕能知其秘鑰矣。蓋當先皇之朝也。政無大小。獨斷乾綱。皇謨之盛。古今實罕其匹。然至今皇則大權歸於太后。而自擁其虛器耳。試歷溯其前朝以誌彼原因。即以其政概矣。先皇亞歷山大第三。英資颯爽。剛方自持。介立歐洲政局紛糾之場。其運籌往往凌壓老雄卑斯馬克之上。時其父亞歷山大第二世仍在位也。夙憂虛無黨之禍。擬布憲法。準民參政。以輯其氣。不幸此志未遂。一旦斃於毒手。皇走赴父皇之難。目擊其慘狀。拊膺痛哭。因手裂父皇所遺憲法。而叫絕曰。嗚呼。朕誓不允俄民以自由矣。既即位。稱亞歷山大第三世。鑑父皇末路之慘。萬機之政。必親攝之。雖其愛后。不容參喙焉。忌虛無黨如蛇蝎。常存勦滅之心。出入宮闈。常以兵士自衛。所搭火車。製有二車。狀相彷彿。一以載皇及諸皇族。一以載自衛之徒。使人不辨。避暗害也。當其在破爾其地方。曾有虛無黨一女傑。欲弑俄皇。因預埋爆彈於鐵路。以俟之。既到。其黨類料皇必在第二車。乃俟第一車既過而爆發。時皇適在第一車。幸不被傷。自有此變以來。皇之志氣益銳。戒備愈嚴。蟄居宮中。不敢出外。且猜慮日

甚時存虛無黨窺我之想。舉凡起居飲食。必令皇后親調。於是心神懊惱。漸以得病。然剛健之性。未曾稍挫。仍焦心密慮。謀殄醜類。侍臣或勸休養。則艱然不悅曰。朕不行其志。則死亦不瞑目也。既而命太子尼哥刺斯出遊列國。或謂太子之觀光。固非異例。無足怪也。或謂太子此行。因與其父皇之行政有異焉。或謂太子嚮欲納一猶太女而不諧。今此一遊。或慰其宿念焉。及別父皇而到日本。不期行近大津。有兇徒謀刺。報達俄京。滿都騷然而俄宮中絕無驚狀。時人頗以爲怪。既而召太子還。則忽有冊立太子妃之事。傳說俄皇將崩。乃召太子而誓戒之曰。朕死後。爾無忘我志。太子退出。怒而發赤。雙淚滂沱。此可以察其父子政見大相扞格也。先皇崩。太子即位。稱尼哥刺斯第二世。生長於嚴父之膝下。爲人溫順寡言。頗有祖父皇亞歷山大第二世之風。嚮傾心於德國之學術。竊期一洗陋政。以布嘉猷。其即位也。乃即除去宮中奢侈之習。粗衣蔬食。宵旰勤勞。聽斷庶政。悉自裁之。常至宵漏向盡。宮人悉寢。皇仍擁案視事。燈火熒熒。於是俄人喜出望外。皆謂有聖皇出。我輩得浴新政。可指日而待。然皇圖治既急。而仍因循舊制。未能解其民之倒懸。以安撫其民者何也。蓋因太后黨主持先皇之遺詔。以阻撓其新政也。查俄國宮中。自古以來。有二黨角立。互相攻伐。歷朝皇帝被其弑害。如爲其犧牲者。不遑具數。如彼得第三世。亦爲彼黨。將其身上之帶縊殺於食桌焉。凶殺之氣。常充滿宮掖間。則尼哥刺斯第二世。繼承皇緒。安能獨免此禍乎。今也愛自由

而喜更新。以期布新政者。則今皇之徒是也。而主持先皇遺意。以便其私者。則太后之徒是也。太后名瑪里弗啞特洛那其形勢彷彿似清帝之於西后矣。但其所異在於太后不敢喉私黨。頡頏皇上而已。然俄皇之所設施。苟有異於先皇之舊者。太后則下旨曰。若先皇而仍在。則不爲如此政策矣。今皇孝順性成。曷敢違背。旨下恰如觸電。故所經營之策。一併裁撤。不能復伸。守舊黨乃以先皇之舊訓。及太后之懿旨。奉爲金科玉律。以之箝制今皇也。嗚呼。堂堂俄皇。奄有廣土。國富兵強。威名隆隆。世無其比。而顧其宮廷之狀。則煢然孤立。奸雄之徒。心日間獨有皇后亞歷山大弗特洛那而已。不亦慘乎。今歷舉太后黨中之領袖。則有如希臘正教大司教波喜特那斯尺氏。又有如內務大臣特維爾那氏。此二人者。常侍太后帷幕。奉行舊政。以阻撓新政者也。一千八百九十六年五月十八日。今皇行即位之禮於俄京也。在何的因斯其曠野。救恤窮民。欲得者爭先。互相踏藉。死傷者以至三千餘人。嚮來有警官與守舊黨互相結託。以欺壓下民之弊。皇憂之。有意改定警察章程。以安其民。至是乃歸咎於警察總監武刺維斯其。立褫其職。遂下令宮內大臣並內務大臣。凡有類此之警官。則嚴爲處罰。民人聞之。靡不感泣。皇上體恤下民之厚。然太后藉口稱武刺維斯其係先皇寵臣。擢爲宮中之顧問。晚那維斯其者。係其先帝之軍務大臣。恃勢專柄。當今皇即位之初也。俄國各新報主席等。聯名上書。請公開言路。皇乃下之內閣審議。晚那維斯其則極力排斥。遂罷其議。烏夫頓

斯其侯。爲俄京報館主筆中之有力者。乃詣皇前。具訴晚那維斯其之無狀。皇即下旨革之。彼乃乞哀太后。遂亦列於宮中顧問。蓋在先皇之朝。晚那維斯其與武刺維斯其不合。常欲乘隙陷之。而今轉歸同班。致犬猿携手。亦可笑也。宮內大臣啞連錯誇伯。初爲今皇之所最信任。而實則通欵於太后黨。以欺瞞今皇者也。其後知其與波喜特那斯尺。表裏阻撓皇意。遂罷其職。舉此數者。則太后黨之強梁可知矣。而其中最擅威福者。則大司教波喜特那斯尺也。彼常揚言曰。獎教育。開民智。所以虛無黨日盛。而最害於國家。萬年之長計也。凡我國人。宜遵崇正教。禱頌上帝。則足矣云。其愚民也如此。彼之所謂正教。蓋固陋之教義。與歐洲文明之氣相背。非始於今日也。故獎教育。開民智。即所以滅正教。正教滅。則彼輩何所恃以自立。宜乎彼之所以極力排斥之也。則今皇所布之教育令。不能奏效而廢弛矣。要之。今皇夙愛自由民權。以舒民氣爲心。惜乏英俊爽颯之氣。終不能以運行新政也。況又有太后黨之強梁者。常以箝制之乎。今也俄國之勢。其一顰一笑。殆關於列國之休戚。而顧其內情則醜陋如此。亦人生之終不能加意者歟。

德國經營膠州

東京時事新報

德國政府以去年十月杪。施行于膠州灣之政策。報告本國議院。一曰。政府于買賣地皮之際。防有貪猾投機漁利。因先盡買收之。然後賣却於欲買者。二曰。政府爲求進口貨之便起見。開辦中國稅關于德屬碼頭。使其照收中國定法之關稅焉。三曰。政府爲防鴉片密入起見。

制限該商賈。課以重稅。且使警官監視其業。四日。政府爲不許壟斷起見。任商賈之隨意競銷。五日。刑法雖從本國定制而施行。亦斟酌於中國。答刑姑存用之。惟婦人止之。其他中國所川酷刑。一切廢之。六日。港口前面一帶地皮。收爲政府公地。不敢斥賣於人民。一以政府手腕開築埠頭。祇屋舍倉庫之類。任人民私設。七日。青島市街。擬做波爾幾克海濱市街與築。是則欲誘致旅居南清人之遊履起見焉。

威海招練華軍

日本希露西報

英人在威海衛所招募中國之新兵。已得一千零四十五人。約歸營三年。隨處調用。此是步兵。俱用媽地泥蔑潤鎗。此鎗在亞非利加各處試用。皆稱利物。軍人薪金每人每月八元。餘尙有利益。人必樂從。無難募集。最難者。初募來之時。衣食異宜。不易馴服。現時供給兵丁之物。俱未修備。服式亦未定。異日必須畧仿中國款式爲之。務極壯觀。惟華人。之技勇。尙未知其確可用否。今極意操練。使成勁旅。華人勇敢之心。本極可用。惜未經操練。不受範圍。若得英員督練。必成最強之陸軍。即如埃及人之無用。一經操練。亦能成材。何況中國人之勇銳乎。一千八百八十二年。我英始招埃及人爲兵。當時視埃及人。以爲必不可用。自歸英用之後。即成大戰功。華人之強。亦人所素知。以中人與埃及人較。決不至徒糜軍餉也。

英人經營威海

日本希露西報

頃聞美國擬在威海衛創設船澳。此船澳即頭等至大之兵輪。皆可以進澳修造。過數日。又接英倫路透電云。水師次官。布置威海。防禦極嚴密。其如何整頓之策。皆曾稟知議院。凡創造船澳。堅築砲臺。建立兵房衙署等項。所費極夥。至少亦須金二兆磅云。夫英所以必批威海之故。皆因俄國索批旅順也。旅順與威海均批二十五年。然其整頓既費此重款。則名爲批二十五年者。實則永遠占據矣。倘照二十五年批期。而費如此重款。文明之國。必不爲也。英國之於中國。南有香港。北有威海。其規模景象。遙遙相若。均可駐紮水師。屯泊兵艦。且威海居中國之北。凡百工藝。皆可聚集此地。其商務必陸續興盛也。如香港初開時。不過一荒蕪之島。今竟爲東亞一極盛市場。即非律賓之興旺。亦取給之焉。

非律賓戰耗

香港孖刺西報

有一西人往游孟尼拿。初到之日。即見美人與非島土人開仗。將其前後情形。編爲一論曰。西二月四號。四下鐘。余抵孟尼拿港口。是晚尙不見其有何舉動。惟至九下鐘。即聞柳鎗之聲。所有兵丁。一聞號聲。羣由酒肆而出。紛紛奔馳于街上。其車亦異常快捷。一切鋪戶。亦皆關鎖。初聞柳鎗之聲。繼聞砲聲隆隆。如撼山岳。可知美兵屯聚一區矣。其砲聲縣延不絕。知美人與非島土人已交鋒矣。斯時砲聲震天。令人不能成寐。至晚美兵船披地路。楂利士頓。加路灣在披錫河北。放砲以攻非島土人之房屋。纍纍不絕。直至十一下鐘。有數彈打至一

酒店。時余適睡。休息約一下鐘。亦不能寐。衆人皆徬徨無措。慮土人之攻酒店。至明早砲聲復競發。美人進兵。土人曳尾而退。至于城北禾田下。美兵直進。勢如破竹。適至中國人墳墓之地。據一高邱以爲駐兵之所。此地本土人藉爲根據地。忽而爲美兵驅逐。因捨而去之也。上所言土人駐紮之禾田者。其右有一路。再右有一大禮拜堂。外有牆壁圍繞之。附近禮拜堂有一木屋。爲土人所據。美兵排隊而進。直達木屋。左右圍困之。方晨起時。有一羣酒店之人。登城一寺塔。以觀仗。望見檣利士頓刊葛加路數兵船。在河之北。放砲以攻土人房屋。河之南。則有一摩溺鐸兵船。亦放砲。不久檣利士頓。即起碇駛至河之南。與摩溺鐸一同放砲。所有情形。在塔上即一望了然矣。遠望之。可見加肥地方。近觀之。即見美兵船灣在孟尼拿港口。商船亦遠遠離城灣泊。又見英國及德國巡洋艦灣泊不遠。美兵船最近。見其放砲不絕。以攻土人房屋。又見鄉落茅屋。處處被燒。竹林之中。時見炮烟騰上。步兵所燃鎗。其烟亦隱約見之。觀以上情形。即知美人已一路進兵矣。在塔觀望一番。約三下鐘之久。羣客乃回酒店。

下午余外出。往視一木屋。在電局前面。正欲尋視摩溺鐸、檣利士頓兩艦之砲。攻至披哥地方之情形若何。至則見有一大禮拜堂。然砲彈所轟擊。皆被燒毀。烟燄滿天。計其被燒之時。蓋十五下鐘之久。聞土人之在其中者。有一千二百人。皆被燒斃。附近此地者。有美兵第

二十三隊圍攻土人之左右翼。土人反攻之。殺斃美兵四十人。有三四西班牙囚徒。助土人以攻美兵。致被美人擒去。至五號天曉時。美兵齊進與土人爭自來水局。土人被逐于局外。後美人據之。而汲水機器已被土人毀去。搜尋許久乃見。全副機器蓋即在於煤堆之中。至八號。通城之自來水皆絕。後三兩天。即已如前修復矣。

當美人進兵至內地。路旁多茅屋。茅屋之中。有許多土人放鎗而出。甚至有執長槍奔出。以爭殺美兵者。有一美兵被其斬去一手。此人即入于酒店中。時美兵憤極。以爲殺死一同羣。將來誓殺其三十人。以報其怨。美軍紀律嚴明。氣象甚爲可觀。其田利施省之兵。則高而瘦。少時即善操鎗法。據美兵所說。受土人詈罵甚久。不得已隱忍而未發耳。其心銜之。直欲攻滅之久矣。鴉君阿度于禮拜日打電埃地士武員云。此一場戰。非吾號令所出。乃其屬員心極憤激。忽動干戈耳。孟尼拿四處皆信之。謂鴉君阿度現時情形。已成狼狽之勢。土人皆怒。鴉君阿度游移不決。不與美人決戰。大不喜之。皆不欲奉之爲統領。倘以後土兵戰沒過多。鴉君阿度必被刺。而身命不保矣。鴉君阿度之書吏。在城內被擒。又有地方官由伊路伊路搭船至孟尼拿。一登岸。立即被擒云。

大隈伯演說之語

大阪每日新聞

諸君。今承諸君招宴于中華會館。不勝光榮之至。今日與諸君面晤。暢談中國現時時事。是

予之所尤喜也。又以知爲東洋之利益也。抑予對清意見屢借內外新報而發明之。又在外務局之時。公言對清意見。外國繙譯之。於三年前已廣爲傳布。然二年之後。中國形勢大變。有甚可悲者。予友愛中國之情。不能自禁。所以切與中國人同其憂患也。既于前日應大阪有志者之邀請。公言對清意見。今來此會館。自陳其所志。以煩諸君聽。卽披其精神。求諸君留心。此必不可忽者也。大凡國家盛衰存亡。非依外面勢力者。皆己之所自致。故政治劣惡。人心離散。外力然後得而乘之也。小國尙有自守之力。況大國乎。環球皆然。近世如波蘭。雖已滅亡。其始文明發達。與俄德奧接境。一時有強國之名。然國內之爭。政治之劣。爲敵所乘。遂自滅亡。夫天下不幸之事雖多。莫過於亡國之民。言未畢。伯疾聲壯語曰。予讀波蘭亡國史。不覺泣下。愛國之志士。曾謀其恢復。然大事一去。勢難恢復。終不得其志矣。抑今日與昔日異。文明利器。日益進步。運輸交通。又兵器軍隊方法。大相革改。其盛衰亦非如昔日閑閑而來也。此大可以注目焉。支那四萬萬人民。素性謙讓。且勉勵親睦。未受保護。各自謀生。所謂不扶而殖。實可驚嘆。人民不知有何事。而地球外交家。已隱規地圖而畫其領地。故託言租借者紛紛。迫令蓋印。四萬萬民。毫不與其議。一爲北京政府所恣。然國民厚於忠義。不可不留心也。三年以前。我邦人論東洋平和。極言保持海陸權力爲不可久。其時各國議論雖多。然諒清國情。意論旨。尙有恢復國權。改革政治之機。各國謀共保全清國。使入文明之域。

革易其國政。今則祇聞有平和之議。而要衝港灣。既爲各國所分奪。歐洲議論。各欲以其勢力定其區域。殊堪驚駭。夫以他國向人之邦。欲定其勢力區域。豈非離奇可駭之事乎。乃清國人民多不知之。而各國既劃勢力線於其地圖上。其他鐵道鑛山。亦莫不稱爲外國有權力開築。於是更有支那分割論。昔日五胡亂中國之事。又將見於今日也。雖然欲防眠中有指外交家也魔術師指以上所論者而言也以爲奸。四萬萬人。宜奮起而抗爭之。然則雖有百魔術。可自消亡。至爭之而流血。雖素非所好。然事至不得已。即宜拔劍而立。方不負四千年有歷史之清國。夫文明時代。永占人之土地。殊非國際公法。流血亦背人道。故俄國皇帝。開萬國平和會。今日支那國民。若設自危之思。而求所以自保。誓以不趨進文明爲大恥。如此立至誠以肩義務。必克當大敵。可無疑也。雖然事不可獨以氣力而厲行之。先養成其強毅之性。以結團體。可應用力於商業及教育。予雖非敢排斥孔子之學。惟當今天下變局。多集同志相與修今世之學問。方可做天下之事。蓋國人無欲爭地球之大勢者。則防外患之志少。且並愛國之意亦少矣。今又受外人侮辱。畢竟由國力薄弱之故。故在外者。須勉盡其愛國之心。以圖免侮辱。即自外及內。以救垂死宗國。今復健完。余親愛之士。梁君啓超。忠義之人也。事與政府意違。不能盡其志。遠流寓于我邦。昔晉文公在外十九年。具嘗苦楚辛艱。終能興晉。君實鑑之也。夫居外國至悉知地球大勢。及人情風俗文明狀態。於救衰運何有。而神戶、橫濱、長崎。

香港、新嘉坡、暹羅、南洋、大西洋。所在與諸君同志者。必有之。散在地球之志士。到處勃興。以盛其教育。且講支那擴張策。其挽回決非難也。今日大勢雖迫極。然決非急遽而來也。觀本年所印行英國政治年鑑。其變化實多。亞非利加之分割。香港對岸九龍等。既有英版圖符印。地圖變化如斯。此國民之所不可不知也。夫地方一旦變易主權。風俗性情兩不相習。其中苦況。不言可喻。在彼則叛徒起。在我則義兵起。四萬萬人一心一德。彼必不能防之。然則今日割地圖上而已。不川一彈一劍。而魔術師藉魔術以令眠。竟分捕之。然眠則有醒時。醒之。諸君之任也。

記中國人請雜居事

日本與歐美各國更訂條約。收回治外法權。而許各國人雜居於日本內地。自今年陽曆七月。即爲新條約實施之期。我中國因條約未嘗定有明文。不得與諸國均沾利益。故日本政府頗欲援美洲澳洲之例。禁制華人仍限於居留地。橫濱、神戶、長崎、函館諸商。恐自此以後。華人商務必爲西人所奪。憂之久矣。自去年以來。曾數上書於領事公使。請其向日本政府提議。公使領事經數月未答覆。迄於今日。爲期已迫。而公使又避暑漫遊。不在東京。衆紳商恐日政府遂定議事不可挽。乃通函各埠齊集會館。自爲設法請求。乃公舉總代人鮑煒昭、盧榮彬、羅謙亭、羅偉堂、孔雲生、吳植垣、鄺餘初、吳泰生、盧棟生等入東京運動。於本月二十

日在芝區之紅葉館。設宴招待各報館主筆。凡日本之大報館如時事新報、東京日日新聞、朝日新聞、每日新聞、讀賣新聞、中央新聞、國民新聞、報知新聞、人民新聞、都新聞、萬朝報、千代田新聞等皆來會。入席後鄭君餘初起述會集之意。次梁君啓超演說中國人雜居之利。及不許雜居之害。書其文而託日本名士柏原文太郎君代演說之。文曰。

今者大日本國新條約實施之期。在於旦夕。我支那因國權不振。政府所訂條約。未能援最惠之例。即條約中所云照最優之國相待故聞關於內地雜居之事。有排斥支那人之議。我支那在留紳商等。於大日本之行政。雖不應置喙。然其事有關於兩國之利害。及東洋之情勢者。亦不敢默然。故準公理。竭私情。欲有所請求。謹述其理由。以質於大日本之政家。之關心東方大局者。伏望垂聽焉。

竊思日本政府執排斥支那之議。必非漫然爲無理之排棄。或者於他國之交涉上。與日本之內治上有他種之窒礙。不得已而始然。其所執之理由。必非無據。今我等且置之緩論。請先述我等所見。關於支那雜居所影響之利害。而加一言。

第一排斥支那人。即窒日本東洋商務擴充之機也。

我支那人在日本之商務。輸出輸入統計。當不落他國之後。此誠可爲兩國賀。然亦由地勢緊接。風俗相同。所以有此。此實東方商業發達之樞紐也。他日雜居以後。支那與歐美

人所占地位。大相懸殊。支那之受失敗。自不必論。然爲日本計。欲增進國力。必以擴充商業爲第一義。雖然。欲求市場於世界。全支那之外。無更佳者。此一般人之所公認也。然白種人競爭之力。轉戰已及於東方。東方地主。漸有不保其權利之勢。日本人之資本權術。固自未足與白種人相角於戰場。所持以制勝者。地勢之相近。風俗之相習。人種之相同。故着着可占機先。而此最良好之市場。爲日本前途最有望之地。雖然。日本欲得志於大陸。非與我支那人聯合營業。其勢有所不能。如商業上之習慣。如貨幣之複雜。如交通之不便。如傭雇人之可信與否。如工人之用命。皆必待我支那人協同辦理。始能就緒。否則適招損失而已。日本新開蘇杭二埠。於今五年。分毫未能擴充。媾和條約。許設製造會社。於我內地。而至今無一焉。其故皆坐不能與支那人結組合也。故日本人苟不注意於此。則所謂在大陸市場占優先權者。終屬空言。數年以後。一切權利。將爲歐美所占盡。日本人雖抱遠志懷大略。將何所憑藉以展布之。故我等望日本之有識者。定一主義。曰與支那商人爲切實親密之聯絡是也。然欲實行此主義。則以內地雜居爲之媒介。實最便利之事也。雜居以後。支那人之在日本者。不能不與日本人爲切實之關係。關係既習熟。因移之以共營支那內地之業。則其事自甚順。今日本之識者。非不知彼我聯絡之爲要也。然我支那人常有所徘徊審顧。蓋利害之關係少。而情意未親洽故也。倘一旦排斥雜居。

我支那居留商。驟受損失。則現在者漸覺無味。未來者裹足不前。懲前毖後。聞風相戒。恐彼我商人之親交。永無復合之望。我支那人之損失固屬不少。而日本經營大陸之前途。毋乃自塞其源。坐失事機乎。我等願日本之有志者深思百年之長計也。

第二。歡迎支那人。可利用我支那之資本力。以助日本工商業之發達也。

日本人之才力與慧術。皆不讓歐人。而商務未能敵之者。全國之資本力遠出彼下也。我支那擁厚資。善經商。欲起會社營大業者。固不乏人。然本國商法不立。官吏干涉。會社之業。易陷危險。故營之者少焉。故支那人每患有資本而無投之之地。若日本許一律雜居。以日本法律之嚴明。能使營業者安心從事。而兩國地勢密邇。種俗相親。我支那資本之家。自必樂爲趨就。工場之設愈多。則日本之勞働者愈受其利。支那富於天產。爲今世界原料品之淵海。支那人自購求之。便利必多。利用支那人之資本工業。於日本商界與勞働社會。殆非無益也。且支那人營業於日本內地。不能不借日本人之力。與日本人營業於支那內地。不能不借支那人之力。其情勢正相同。譬我輩欲在日本內地。設一會社興一工場。其株式及役務。不能不與日本人共之。是日本人得兼享有支那人自享之利益者。蓋不少也。况因是聯絡。漸使彼我商家。有異邦同體之親。其於東方商權之發達。豈有量耶。然則支那人雜居。但見其利。未睹其害也。

第三。排斥支那人。害彼此之感情也。

我支那人在日本三港者。每歲貿易輸出入總額自八千萬圓乃至一萬萬圓。其中輸出之部。比較他國。常占高度。殊海產一科。爲海國之特別利益。其發達全賴我支那人之手。工作之物。銷費者亦多。其餘日本產物。經我支那人之手而運售于南洋美洲者。不知凡幾。或遇歉歲。則運米以濟之。我支那人於日本商界。不爲無微功矣。今一旦因雜居之事。使支那人嗟然立於歐美之後。以致失敗。使支那人不能自立於日本。日本將有利乎。且即使日本之商界。不因此而生冷淡。然野兔始獲。走狗已烹。飛鳥未盡。良弓遂藏。揆之人情。豈能無以怨報德之感乎。在我等因國權衰弱。政府與外交官吏。不能力爭。故遭此虧累。豈能致憾於日本。祇自痛恨耳。然以堂堂東洋文明之國。不念舊誼。而使兄弟不得與外人立於同等地位。得毋於大國之器量。稍有所損耶。竊意深情好義之君子。必有以處此也。

第四。排斥支那人。即損黃種之資望。促東洋之危機也。

今日本之以排斥支那人爲主義者。每日雜居者對等國之權利也。而支那非對等國際國也。與之以此等權利。是損優等國之權也。我等以爲此言也。出於白種人之口。吾無責焉。彼其促狹之惡性。向來不以平等待我黃人也。若出於黃人之口。則竊以爲不可也。夫

支那今日誠微弱矣。然與日本固兄弟也。當日本國權未復以前。豈曾無受侮他國之事。今前事之形。猶未脫於腦裏。而忍以此施於他人乎。譬之兄弟二人。同陷於井。敵人坐視而笑之。下石而擠之。今其一人幸脫於井上矣。則當設法援手以救井中之人。今不惟不救。又隨敵人而下石焉。夫寧忘前此之同病矣乎。且古語不云乎。兔死狐悲。惡傷其類。支那人者。黃種之最大部分也。支那人不得與他國立於同等地位。即黃種人不得與他種立於同等地位之先聲也。方今北美布哇諸地。日本人之被排斥。尙與我支那同病相憐。假使我支那終不能與歐美諸國立於對等。則日本者。爲有利乎。爲有害乎。若慮以我支那之故而襲歐美諸強國。則白種人崇拜之念盛。即黃種人獨立之氣衰。我等不爲支那一國悲。直爲亞細亞全局悲也。我支那在海外者千數百萬人。所至多受窘辱。然顧念黃種之光榮。保守亞細亞之體面。誠不忘履。人有同情。今日雖在厄運。他日未必無自立之時。若兄弟之國。因勢而利導之。不費之惠。於日本何損焉。苟不念此。使我支那本有之利權。亦歸挫敗。而支那所失者。未必日本能得之。徒落白種人之手。坐令歐人東方之勢力。日進一日。覆水難收。往者不復。他日欲補救。已無及矣。夫我黃種之互相輕侮。互相抵排。正白種人所祝禱以求也。今歐人之勢力。既披靡於全球。殘留之地。僅區區之亞洲。合力以抵之。猶懼不濟。今更摧壓支那。以爲歐人驅除。吾恐東洋之實力。益復傾陷。依於優勝

劣敗之公理。我同種之人。不知何以自立於大地也。諸君之洞察時機。扶持大局。不知何以待之。

依此諸理由。許支那人雜居。其利如此。不許則其害如彼。此我等所以外審公理。內竭私情。而不容己於請求也。然雖尋常人所持理說。有謂支那雜居。有妨害於日本。若今得述其說而一二解釋之。

一曰支那下等社會之人。多未經教育。若行雜居。恐害于日本之風俗及衛生也。

二曰支那人以尙儉爲主。不與在留之國同化。惟務積儲。持歸故國。若許雜居。恐有防于日本之經濟也。

三曰支那人工價低廉。若許雜居。恐有防于日本勞動社會也。

以上所據。雖非無一理。然大抵有此諸弊者。惟勞動工人爲然耳。若商業之人。其實情與此相反。今我支那人在日本者。多屬商人。而勞動者僅一二耳。故持此論者。在美國布哇等地。猶當於情實。若在日本。則未爲知言也。今我國人在日本三埠者。守日本之法律。號稱馴良。近年以來。一切惡風。悉歸消滅。此固日本人所同知也。且即使間有惡習。然以日本法律之嚴明。警察之整肅。以法治之。何難之有。此第一端不足慮也。我支那人在日本者。雖不同化於日本。然尙儉之風。猶不爲甚。所至市場。增進其地之繁榮者。亦不少矣。此

第二端不足慮也。至於日本勞働賃銀。比之支那。所昂無幾。與美洲及英領各地情形大殊。支那工人涉異國以與貴邦人競爭。其勢必不敵。如此則勞働人來者必少。此第三端不足慮者也。故自我等觀之。日本人所持以排斥支那人之理由。皆不當於事實。是習於美人英人之僻論。而未細察日本居留之支那人之地位而已。故願貴邦仁人君子。擴大公之心。念同種之義。一視同仁。普爲開通。如此則無損貴邦之商界。無害兩國之感情。無損大國國民之器量。無壞黃種全部之資格。近之可以維持貴邦現時之商勢。遠之可以優占大陸市場之特權。日本帝國幸甚。支那商民幸甚。僕見識淺陋。言詞拙劣。惟代我國商民述其意見。伏望諸君垂聽。

演說畢。舉座拍手喝采。次各報館主筆公舉前遞信省次官箕浦勝人君爲總代表。代各報館述意見。表切實贊成之意。舉座拍手致謝。酒數巡後。日本人起唱中國大皇帝萬歲者三。中國人起唱日本天皇萬歲者三。次各盡歡暢談而散。

二十二日諸紳商與梁君柏原君偕謁大隈伯爵。次養毅君。復以大隈伯爵之介紹。徧謁內務大臣西鄉侯爵。外務大臣青木子爵。大藏大臣松方伯爵。及其餘在朝在野政家等。諸當道及政家皆款接殷勤。深表同情云。復以三埠紳商之同意。爲陳情書一篇。譯成日本文。以呈於朝野政家。

俄國內憂

日本時事新報

頃者俄政府發布徵兵令。頗壓制人民。人民不服。普英蘭土地方。抗議於政府者不絕。前月之杪。俄國議院。因更議新徵兵令。修正令中一二章條。人民竟不服。因又刪除新令中重要條件。以協國民。國民猶抗言愈衆。官吏百方曉諭。以謀奪其志。民激而益怒。竟飛檄至波蘭。煽動民心。與政府相頡頏。政府急命吏捕草檄者。不獲。且東方大飢。士民不得食。相率而哭諸道路。凡五百萬人。政府與富豪共濟之。不能遍及。俄政府大窘。

西班牙內亂

日本時事新報

據倫敦電報。西國土寇蜂起。由人民不安於政府理財故也。西國財政紊亂。天下無比。事已顯露。前年度歲出豫算。八億六千八百萬金。即凡日本三億四千七百萬圓。內公債經費。殆至四億萬金。比法國仍加重。蓋地球中。欠公債最鉅者。法國也。前月二日。開議院。攝政太后蒞之。以行典禮。后親讀勅書。其曰。戰敗屈辱。實千古遺憾也。然余故強無由制之。不如暫忍之。次又及南洋羣島讓人之事。又曰。目前最苦者。在計歲出入均衡。據永久確實收入。償還戰鬪中所募集國債。以可整理財用。但政府極力節減歲出額。故不敢增租稅。又若假令增之。必可公平行事。諸議員誠意議之。財政大臣咕伊拉亞多。以增所得稅爲合勅意。即決意欲大增稅額。民衆聞之不悅。時西國中流輩。知政府窘於財用。聞增稅之事。愈不平之。西國

有僭王黨。扶植其勢力。以欲顛覆王朝。軍中亦不服新陸軍大臣。嫌其剛愎自用。觀中流輩憤烈政府。相告曰。是奇貨可居也。因煽煽其徒輩。令反抗政府。又向人民說王朝弊政。以圖滅王朝。是土寇蜂起。蓋由此輩所煽也。

西國巴賒囉那亞。晤士人民。怨論政府財用不節。相煽作亂。蓋前月十七日。財政大臣。咕伊拉鐸氏。提出本年國用豫算案於其議院。計爲十九億六千九百餘萬金。日本七億八千八百萬圓以其十七億九千六百萬金。充企天巴島之用。以七百萬金。充可多利咕島之用。以一億六千六百萬金。充菲律賓群島之用。猶造公債票。借十四億五千五百萬金。定以美國償金還之。猶欠三億萬金。一億二千萬圓財政大臣。再欲就他國商借。以補缺額。求議院贊成之。又見本年歲出額。有九億三千七百十八萬金。而歲入爲九萬三千七百九十三萬金。內外皆危之。相與語曰。得歲入豫算果如所計乎。不可信也。

菲律賓獨立一周年

吵爾非律賓。壯哉非律賓。彼其脫西班牙之羈絆。昂頭于世界而爲自由獨立之宣言。於茲既一星霜矣。西歷六月十二日。正其一週年之時。當時非律賓人。一任敵人劍戟在目睫之間。皆所不顧。昂然大張祝宴。歃血相盟。各以堅忍不拔之意相勗厲。其大統領阿圭拿度君起而演說曰。我非律賓自獨立以來。翻三色之旗。其三色取智與勇與平和之意苦戰奮鬥。遂至今日。我輩豈

爲鼠輩奴受其諛辭。甘言而墮其術中乎。惟當勇往敢進。守此故國。務獲獨立自由。不少挫折。我輩之權理。應亦美國人之所公認也。昔美國總統門羅氏有言。亞美利加者。亞美利加人之亞美利加也。今我輩亦云。非律賓者。非律賓人之非律賓也。今者美國之志士如的摩辣黨大翼我輩之志。攻難其大統領麥堅尼氏者。頗爲不少。我輩但當堅持初志而已。美國頃議和。謂許我非律賓以地方自治之制。然此未足以滿我輩之願也。我輩所求者在完全無缺之獨立也。大丈夫行事。當磊磊落落。光明正大。以示於天下。豈可曖昧偷安一時哉。云云。阿君爲此一段演說。神氣甚壯。抱負偉大。洵足感發全島人之志氣。今美國遠攻之軍成功既少。國內之政論亦紛亂。非律賓之完全獨立。殆將不遠哉。

杜國之兵制戰術

杜蘭斯哇兒之常備軍。僅五百人。號爲國家之炮兵。有一箇聯隊而已。本隊受德國人及和蘭人之訓練。砲術頗精。分駐于首府不力多利亞。及約哈里斯不路等各地。向日其兵器極粗惡。近日輸入德法兩國之利器。其精銳無比。此常備兵之外。全國人皆可爲兵。男子自丁年以上。皆有服兵之義務。波亞人各必有馬一頭。統一槌。一令下召集。則置鞍于馬。懷一片牡鹿之乾肉於囊中。有名之大將必多。鳩不兒氏總之。軍律極粗漫。司令官從有其名。兵員多各自行動。不用司令官之命。故隊伍甚不齊。而服色又各異。但其彈射之術甚巧妙。有百

發百中之稱。故常所帶之硝藥彈丸亦少。此因平生以獵鳥獸爲生故也。彼無衛生隊之設。又無兵站部之備。要之波亞人之戰術。亦半是野蠻。而無一定之規律也。

美國大統領詔書

美國大統領麥堅尼氏。因來月開議院決事。其所定之詔書。目下由閣員共協議。其綱領揭載如左。

對菲律賓羣島之叛亂。必要派遣軍隊以鎮定之。其主權則斷然必歸美國所掌握。但仍與其島民有寬大自治之權。建設民政以代軍政。其民政之方策。由美國之菲律賓調查委員之所報告。審察其島之事情何如。然後制定。

我美國雖占領古巴。然仍由該島得自建設獨立政府。且並任其開議會以決事之可否。波多利可島。不久將全廢其軍政而設民政。島內之事。許其自治。

布哇之制度。亦不日將決定之。使與此島之現狀相適合。

外交之策。先宜得平和之好結果。亞拉士加之問題。雖目下之現狀。頗有交涉。然由兩國委員之協議。自可望其永久矣。其他又如美國於加拿大之間。積有多年之紛議。其諸件亦漸漸得平穩決定。

今日商業之事務。雖各省分任。然尙欠統一。有許多不便。故須別新建一商務省。與現在之

各省一樣位置。而商業上一切之事務。皆盡歸其專任。

財政之整頓。先宜維持金貨。與改正幣制並銀行之條例。次國稅關稅二法。宜實施成蹟。繕修良好。雖因鎮定非律賓之叛徒。支出莫大之款。然亦無妨也。以入補出。尙有餘裕。

美國今所領之地。跨有東西兩洋。非徒商業而已。即軍事上。亦宜於兩洋之間。開鑿一運河。

名加拉哇運河使兩相連絡。以通往來。實爲目前之急務。故議會宜速決定之。

於各殖民地宜開航路。我美國商船與外國競爭。亦可藉茲航以爲補助之法。此必要之事也。亦求議會速決定之。

陸軍軍制之改正。自非律賓戰爭終結。一時延緩未能賞犒。今欲以特殊之賞牌。犒與義勇兵。

海軍整頓。欲新造柯林披亞同式之巡洋艦數艘。及克陸菩鐵甲之購買。將校水兵之增加等。皆求協贊。又於美西之戰有大功者。如沙不爽。消利。二將軍。與其他之將校。皆行賞賜。又設美西戰爭諸將校兵卒之紀念。於華盛頓與亞林格頓墓地之間。欲架設一大鐵橋。布告其旨。並求支出經費之贊成。

小呂宋禁限華工新例

近接孟尼拿稅關人員謝君子修來簡云。去歲春美西交戰。我華人以無人保護故。狼狽兵

蹇間。後得英領事出而保護之。乃幸存殘生。迨兵事稍平。羣島歸美。他事未遑。先以禁逐華工爲事。夫禁逐之於金山各埠。猶謂我國爲乾淨土。不許華人溷濁。雖私而猶未至於極。呂宋羣島。不啻華人門限內之地。一旦胙篋而得之。且不準往。將來排闥而入。堂室爲墟。又或各地紛紛效尤。何處是華人歸路。以故近又常有華工在該埠被人蒙騙。售以僞回頭紙。或他人回頭紙。還抵該埠。一經關吏盤詰。僞情偶露。即被扣留。發交審局研究。若有私逃。必株連同帮。被留之人。再加桎梏。若在船上被留而逃脫者。每逃一人。科罰該船銀一百元。由是船主不得不從嚴看管。且不準埠中人供給伙食前往。以至飢寒交困。苦不可言。其苛虐情形。可以概見矣。茲謹將美政府禁止華人前往小呂宋孟尼拿章程錄下。

一華工前曾寓小呂宋。今欲再往該埠者。必須有前大呂宋政府之的確本身回頭紙。或在現寓之港口美領事處領有實在准紙。方准入口。

二該的確本身回頭紙。或新領之准紙。亦須於入口時呈與海關考驗的確。否則不准上岸。

三中國官員遊學貿易及遊歷等人。欲往該埠。照中美合約而准者。亦須依例在中國政府或現寓之外國政府領有文憑。即於是處報與美國領事。報明落船日期。仍於入口時呈驗妥當。方准入口。

四自今後華工現寓小呂宋者。欲離埠須預先報海關稅司註冊。報明某名某歲。作何等事業。然後該稅司給回頭紙一張。逐款註明。與冊相對。以便稽查。至再回小呂宋時。呈遞該紙與該處稅司驗妥無疑。然後可准上岸。

兩共和國之危機

南非兩共和國。以不能支持之故。要求歐洲各國。從中調停。而德國因此次戰爭。關係甚重。且于英國有親密之情。故拒絕之。至于美國。則英國政府已豫先知會。使其可勿與聞。若歐洲大陸。皆因此而束手。則兩共和國之運命。不其危耶。

目下杜國與自由國兩大統領。復以媾和之意。苦求于英國總理大臣。并欲仍舊保護其獨立。而英國政府。則斷不肯承認之云。

又阿連治自由國之首都。爲英軍所佔領。後而大統領尙欲遷于他處。再立首都。以爲防禦固守之地步。而英國決然不許其獨立。恐其斷難久支矣。

檀香山華人被虐記

旅檀義民

嗚呼。國之不振。我四萬萬之同胞。受人凌辱作踐。其種種慘狀。豈意料之所能及。豈筆舌之所能罄哉。余旅居檀香山二十年矣。余恨未能一游臺灣。旅順膠洲威海大連九龍廣州灣諸故墟。未嘗覩亡國失地之慘狀。何如。然見諸報紙所記述。得諸里巷所傳聞。旣已使人怵

心酸鼻。欲讀不能卒讀。欲聽不能卒聽。然猶以爲獨被割之地。惟然耳。而不意今日乃於檀香山親遇之。而親睹之。吾欲記其事。則筆未下而淚已傾。雖然。不忍記之。又不得不記之。姑述其一二。以告我同胞之有血性者焉。若其詳細情形。則更數僕而不能終也。

檀香山。本加拿加人種之國也。自一千八百九十三年。始爲白種人所奪。立新政府。設民主。一千八百九十八年。始歸美國。爲其一省。當加拿加人有國之時。待華人頗優。我同胞旅海外者。以此地爲第一樂土焉。及政權歸白賊之手。漸設苛禁。不許華人登岸。隸美以後。所有一切美國例。尙未及施行。即先行限制華人之例。特派一員來。專辦此事。一切苛制。如舊金山故事。我華人之忍氣吞聲。旣已不可言矣。埠中有所謂唐人街者。居全埠之中。地極繁盛。白人垂涎已久。欲奪而取之。苦無其名。乘間伺隙。處心積慮。至今年十二月。而遂有借端焚街之事。

此事之起。以防疫爲名也。初十一月間。有華人士人死者各數名。其病狀頗似黑死病。即香港前年所患之疫症。然是否尙未確定也。西人醫生。有欲生事徼功者。遽指爲實。遂議關埠。將唐人埠忽然封閉。將華人生意盡行禁錮。埠外人。不許入埠。內人不許出。應寄發埠仔之貨物。不許寄出。從外埠來之貨物。不許搬入。在碼頭設一蘆棧。凡唐人來貨。皆寄放棧中。而白賊收其棧租。其中鹹魚生果海味之類。悉爲廢品。無論矣。而來往不通。貿易不行。折閱之慘。豈待言然。

後知哉。其後閱十餘日。仍有病症。夫此症之果同於香港舊症與否。固已未定。即彼西醫名家者。亦尚在爭論。以爲非疫病者。殆過半。非疫病姑無論矣。即使果有疫。然不能凡有病者。皆指爲疫也。一埠之中。萬數千人。豈能絕無頭暈身熱。跌打損傷之事。乃彼白賊。不問是非。不論輕重。一見有病。曰此乃疫也。從而剝其衣服。使入冷水池。浸洗者。半點鐘。使入硫磺房。薰蒸者。又半點鐘。從而移之於疫病所。使與疫者爲鄰。即使無病。亦可以立死矣。既死則從而燒其屍首。揚其灰於太平洋。計一月以來。死者十餘人。其他之爲疫死與否。吾不敢知。然以衆人所聞見。有某甲。乃患梅毒傷寒而死者。彼則指爲疫矣。有某乙。因搥鐵傷手腫爛者。彼則指爲疫矣。有某老婦。年已六十。病已數禮拜而死者。彼則指爲疫矣。有一小孩。年僅三歲。偶感寒熱。彼則指爲疫矣。此小孩搬往疫病院。經十餘日。至今竟已全愈。疫症固如此乎。然則其他所謂疫症者。可以類推也。彼白賊無論。是疫非疫。一遇有病。即指爲此症。於是一月之中。以疫症報告者十餘人。白賊乃張聲作勢曰。是皆由華人不潔。故生此症。不急設法摧陷廓清之。則全島無乾淨土矣。於是燒埠之議遂起。

初時定議。凡病死者。則燒其所居之屋。燒者僅一家耳。越數日。復定議。一家有病。則並其左右兩鄰。兩燒之矣。初時病死。然後燒。後乃不必待死。但有起病者。即燒其家矣。更越數日。復定議。一家有病。則將其全街而燒之矣。凡被燒者。初時先限期若干點鐘。使其將貨物器具

搬往他家。其後則一切貨物器具。不許搬移。悉以投諸一炬矣。其被燒之家之人。雖無病者。皆押往海濱。居住十日。然後許其行動矣。押往海濱之時。無論男女。皆須將其所穿衣服。盡行剝去。入冷水池洗浴。入硫磺室薰蒸。而彼白賊政府。另給一粗布衣褲。使換之。其纏足之婦女。雖其鞋襪腳帶。皆須解去。凌辱無所不至矣。雖欲乞憐求一毫人情。皆不見許。彼白賊曰。吾固以軍令從事也。夫果其軍令如此之公正嚴明。則吾華人固不得獨怨之。乃不數日。而有一德國婦人染疫死者。彼白賊則曰。其屋潔淨。不必燒。但薰以硫磺足矣。其同居之人。則不必押往海濱。聽其搬入西人客棧居住矣。有一街之中。甲乙丙丁戊五家櫛比而居者。甲丙丁戊爲華人之屋。乙爲白人之屋。甲家有病。則丙丁戊悉燒。而乙獨不燒矣。不燒猶自可也。而彼德國婦人之死。白賊謂因有華人搬貨物於其鄰屋者。疫蟲實自貨物來。於是議所有華人之貨物。盡行全燒矣。彼白賊猶以爲未足。乃倡議曰。使華人有一椽一瓦存於埠中。皆爲傳毒之線。而致病之媒也。於是燒全埠之事起。是實西歷一千九百年正月二十日。即我光緒二十五年十二月十九日之事也。

嗚呼痛哉。吾記至此。淚下髮豎。手抖抖焉。幾於不能成書矣。是日午前八點鐘。乘大風。縱大火。紅光衝天。黑烟漫地。白賊點齊軍隊。把守街口。黑奴土鬼之仰賊鼻息者。皆從而執棒持棍。助其防守。華人老幼男女。欲避火突圍而出者。則以鎗刃向之以。木棍擊之以。兩長繩夾持。

大路。凡華人不許越繩外一步。無論貴賤老幼男女。皆押往海濱。數千人如一羣羸羊。其富家婦女。金蓮三寸。東扶西倒。千推萬延。不能移寸步者。則從而鞭策之。其小孩子驚皇無措。狂叫狂哭者。則從而叱喝之。兩邊猙獰之押卒。雁行排列。長鎗短棍。以解遞此數千人。使步行十餘里。以往海濱。海濱之屋不能容。則押往一禮拜堂中。吾不能往海濱視其慘狀。惟從禮拜堂之外牆一視之。四千餘人。爾足而立於堂中。無容膝之地。露天張幕於堂階之外圍。牆之內。飢者不得足食。寒者不得足衣。婦歎童號。聲徹戶外。而防守之賊兵從而噤之。兒尋母。父尋子。妻尋夫。夫尋妻。兄尋弟。弟尋兄。各不相知。各不相見。其有親人在圍禁之外。欲往探問者。白賊之守兵。輒呵斥之。不許交一語。嗚呼。吾一不知我數千之華人。究犯了何種彌天大罪。而受遭蹋作踐。至於如是其極也。

昔者憂時之君子。每日中國不自強。則我四萬萬同胞。將爲奴隸矣。由今日檀香山之事觀之。則豈惟奴隸而已哉。夫人之畜奴隸者。未有無端而火其屋。纒其孥者。是今日白賊之待我華人。實奴隸之不如也。然則直罪囚也。然囚人雖犯重罪。未有不許親戚骨肉之探問者。是今日白賊之待我華人。實罪囚之不如也。然則直牛馬也。然畜養牛馬。猶有愛惜之心。欲其蕃息。雖束縛馳驟。亦不爲己甚。是今日白賊之待我華人。實牛馬之不如也。然則直螻蟻也。若螻蟻者。毀盡其巢穴。而不以爲罪。殺戮其千萬。而不以爲過。以爲天理人情。應該如是而已。嗚

呼。我四萬萬同胞。其果甘爲螻蟻耶。其果甘爲奴隸罪囚牛馬之不若耶。

火自辰達酉。餘燄未息。而數十年經營繁盛之地。空餘瓦礫一場。數千人殷闕雜遷之區。化作烟塵滿目。統計我華人之房屋。燒去千有餘家。華人之財產。損者四百餘萬。即中國銀七八百萬而彼白賊者。見我男婦奔走跌仆狼狽之狀。則相與鼓掌而笑。見烈燄之衝天蔽日。則憑軒譁呼。以爲平生罕見之大熱鬧。其有箱籠衣服銀兩首飾貴重物件。寄頓於未及燒之他屋者。則防守之賊兵。公然對面爲盜賊。白晝祛篋而取之。華人之實業盡矣。華人之財產罄矣。華人之命脉絕矣。而白賊之心願。亦從此遂矣。

推原此事之來由。實由檀香山近年以來。日旺一日。白人之欲行賤丈夫壟斷術者。紛紛走集於此地。而唐人埠在全埠中央繁盛之區。白賊視之爲眼中釘。恨不得一口吞之也久矣。而苦無其名。乃借防疫題目以行其狠心毒手之計。夫防疫豈非文明之舉動。然從未聞有盡燒其屋盡逐其人而云防疫者。譬如奪人之槳櫓帆纜。而云我欲救汝船之溺掠人之爐鍋碗箸。而云我欲救汝腹之飢。是直欺三歲孩童之言耳。今將我華人閉在海濱小屋及禮拜堂。云十五日內無新病。即行釋放。夫埠已燒盡矣。白人之心已鑿足矣。無論有病無病。皆可以釋放矣。而我數千同胞。釋放之後。無家可歸。無衣可衣。無食可食。不知將何以待之。今定例燒去之房屋。欲再建者。必須改建石樓。又定限一年之後。乃許再建。夫埠中生意大小。

數百家。能建造石樓者有幾人。且遲至一年之後。乃許復興此埠。此一年之中。豈能斂手而坐。是直扼我華人之吭而絕其氣而已。

嗟乎。觀此情形。真乃使鐵佛動心。石人流淚。見之而不酸鼻切齒者。非人也。聞之而不裂眦。皆賢變者。非人也。雖然。悲也何所補。怒也何能爲。昔吳王闔閭敗死於越。其子夫差嗣位。誓報大仇。每日使人呼喚於其側曰。夫差。汝忘越人之殺汝父乎。已則對曰。不敢忘。如是者。歷有年。卒乃破越復仇。霸於天下。但使我同胞兄弟。人人有吳王夫差之心。則天道好還。無往不復。將來揚眉吐氣。未必無期。請我同胞試一細思。我輩今日受此慘毒。因何而來。將來欲出這口毒氣。必如何而後可。苟日日憤心。從此想去。人人同志。每飯不忘。富者效財。能者效力。寧爲國家死。不爲偷安生。則女媧之石。尙可補天。精衛之誠。且能填海。此仇之報。可計日而待也。夫我輩今日所以受此慘毒者何也。爲國之不強也。同是戴天履地。圓顛方趾之人民。何故待他國人則如彼。待我國人則如此。彼白賊者。以爲此國已是必亡之國。此國之人。已是垂死之人。殺盡你。不算陰功。打倒你。必無還手。亦何憚而不爲哉。使我中國能維新自強。何至有今日之事。嗚呼。亡羊補牢。猶未爲晚。從前之事。既已過矣。將來禍患。爲日方長。願我同胞念之。勿忘也。

中國人之大患。莫甚於各顧身家。不顧大局。不知欲保身家。便當保國。國不能保。身家何存。

試看我檀山今日之事。千辛萬苦十餘年所積之資產。不到半日。一炬而空。前此積銖累寸。究成何用。然則知有身家而不知有國者。可不謂大愚哉。嗚呼。觀於今日。當思後來。觀於檀山。當思家裏。今者九龍廣州灣既已割棄。我廣肇潮嘉各地。豈能保十年無事乎。及到彼時。出來也是外國。歸去也是外國。茫茫天地。竟無棲身之鄉。其淒慘情形。必有十倍今日者。到彼時始思自救。已無及矣。及今奮力。尙有可爲。願我四萬萬同胞深思而猛省也。

西比利亞鐵路

俄國于東亞之陰謀。無所不至。而其所以能雄視東亞者。自此西比利亞鐵路始矣。何也。目加爾之所修設。已將告成。西可以直達俄京。東可以自黑龍江岸之司脫列唯因士。直達浦鹽。而其中雖有尙未貫通之處。亦可以黑龍江漁船爲其轉運之樞紐。便利之甚。無以復加。雄視之基。即在於此也。今將其自俄京至浦鹽之里程畧記之。

從彼得堡至莫斯科

六百一十俄里

從莫斯科至節里亞賓司苦

二千零五十九俄里

從節里亞賓司苦至貝加爾

三千一百〇二俄里

從貝加爾至梅蘇司克

四十俄里

從梅蘇司克至司脫列唯因

一千〇三十一俄里

從司脫列唯因士至哈巴魯司亞

一千俄里

從哈巴魯司亞至浦鹽

七百十六俄里

合計

九千五百五十八俄里

至於以日數論。則不過二十四日或二十六日。即得達。較之以前自恰克圖至浦鹽。尚須月餘者。相去甚遠矣。且不僅是。此鐵路者。由極東太平洋之岸。達于歐洲波羅的海之濱。使東西兩洋交通之機關。可以大有進步。猶爲受益不淺也。俄人之經營。亦可懼哉。

南非戰爭

英之與南非兩共和國。較之于日本維新前。江戶幕府之與長州藩。若出一轍者。試論之。日本當時舊幕府之征伐長州藩也。遺檄于沿道親藩。各整軍備。必欲一舉而降服之。忽爲長州藩之所邀擊。不能越雷池一步。于是甚懷不平。使大將軍親從事于軍役。然而四國九州之諸大藩。行望風雲。互持兩端。長州之志士桂小五郎等。則周旋于各藩之間。以表親密。卒能與幕府相抗焉。英國者。雖非一幕府可比。當其舉兵以征布鴉。累累爲其所敗。復累累整頓海軍。增加陸軍。遣大將以從戰事。而歐洲各國者。則儼若日本之諸大藩。布鴉中之如桂小五郎者。亦有之。非與之若出一轍而何。

且英之于布鴉也。其初不甚慮之。而且小之。因其供兵役者僅二萬餘人耳。不圖歐洲亡命

之徒。陰助其力。以後布鴉軍中。遂往往見有各國將弁及兵卒。至于今日。則供軍役者已過十萬。此又與日本諸藩之志士。自藝州。赤間關。三田尻。各地。私投長州。以攻擊幕府者。其情形相似也。

羅勺阿魯新報言。法國援布鴉之情甚熾。有官弁二百十一人。現已辭職。投入布鴉軍中云。

巴黎諸新聞言。布鴉軍在哥林時。痛窘英軍。實法國佐官非魯波哇馬若之力也。布鴉甚德之云。

又諸新聞紙中言。目下布鴉開戰及一切計畫。皆聽命于比利時將軍之策。于此亦可見各國援助之一斑矣。

雖然。英國當此。亦可謂更成騎虎之局矣。于是與德同盟。而占領葡萄牙之鐵腊。俄亞港。復加兵于好望角之戰地。以扼其險要。必欲恢復之而後已。然則其能恢復乎否乎。或者曰。布鴉一小民族耳。不能長與之抗。是必恢復無疑。但英國之弱點。已顯布于天下。戰爭結局。則世界列國間。非復如前日之關係絕少。如日本元治慶應之際。雖征長州者。奏凱還之師。而德川氏之霸業。則已不振矣。況今日世界各國之氣。遠非日本當時諸強藩之可比乎。并此十九世紀轉輪于二十世紀之一機關。世界趨入維新之一點。斷不可避者乎。

英德同盟

英國之於布鴉也。自慶巴列。司陀魯摩比庫及列唯斯米斯之三面。進而攻擊。累歸失敗。思變更其方畧。自魯陵蘇馬揭司環而攻之。且占領鐵腊俄亞港。使軍隊可於陸地往來。乃能避危險而得利益。然而鐵腊俄亞港者。葡萄牙之領地也。若占領之。謀一己之私利。犯國界之公法。英雖不顧。德必抗之。于是乎同盟之事出。受其損害者。獨葡萄牙而已。衰弱之國。亦可懼哉。

據柏林新聞紙之所報。謂英德秘密條約。乃分割葡萄牙殖民地全部之事。而英國則取南阿非利加之葡萄牙領地。自鐵腊俄亞港至雋巴西。德國則取亞細亞葡萄牙之領地云。雖然。葡萄牙政府。今猶漠然。任他國之奪取。若毫無所介意者。旁觀者醒。當局者猶昧昧。是更可哀矣。

尼卡刺運河條約

據倫敦電報所言。尼卡刺運河之條約。近已廢止。權利悉讓與美國。南非戰爭之結果。于此運河之開通。美國可謂甚得便宜云。

此條約者。千八百五十四年。英美兩國所立。不許獨占利權。而此運河者。則橫斷美國大陸。

之地峽。聯絡太平大西之兩洋。且與歐洲列國之競爭。大有關係者也。無如英國一時之勢。獨隆于其運河之東海岸。及附近之島嶼。皆建有植民地。且將席捲中央亞美利加以擴張其利權焉。于是美國乃悟此條約之不利。輿論激昂。衝突亦起。或累相葛藤。或時動干戈。而終兩不相讓。至于今日則南非事起。英國已無暇顧及。遂藉此以維持兩國之平和耳。

俄法陰謀

近據倫敦電報。及各新聞所傳。言駐羅馬法廷之法國公使。目下已歸巴黎。見法皇。爲俄法同盟之事也。其同盟之事若何。欲乘英有南非之戰。將土耳其兩分之。歐羅巴土耳其則歸于法。亞細亞土耳其則歸于俄。噫。野狼之心。不可測矣。如果約而遂行。則非惟於英有莫大之關係。即奧大利。日耳曼。其能默視之耶。後又有傳言曰。俄國既以兵七萬五千人。相集于亞弗鴨尼士敦之顛。弗里司待氣候之變。即直下協拿多。以侵入英國勢力範圍之內。英國聞之。大存戒心。無所措其手足。而俄國則愈思着着進步。以大逞其狼心矣。

演說英國近事

英人比列蘇阿陀者。演說英國之近事。頗有關係。今揭其大略如左。其一論英法之關係。曰。英法兩國互相衝突。互相摧殘。倘有時乘隙以開戰端。海峽兩岸之

地。無數人民。其將罹于殺戮滅亡之慘矣。世界上何所恃以爲太平耶。

其二論英德美同盟。曰。英德美三國同盟之說。張巴林氏發之。蓋張巴林者。剛猛之人。且好戰之人。欲爲此言以激勵法國。使相猜疑耳。然而英法兩國。卒因此變成破毀之局。亦未可料者也。

其三論英國改革兵制。曰。自南非之戰出。英國陸軍之弱。已顯布于天下。人人皆謂其法制之宜變更矣。今當局者欲于白色人種之外。採用異色人種以充兵役。雖然。不大加整頓。豈不又與前者同出一轍耶。

其四論南非之戰爭。曰。英國自有南非之敗。各處之植民地。欲起而反畔者甚多。歐洲大陸之諸強國。蠶食之心雄矣。美倘今日猶不結局。則戰爭之所失者猶小。失于漁人之所得者乃甚大也。

太平洋海底電線

美國下議院通商委員。議於檀香山非律賓日本間之海底。沈設電線。前次派出議員相麻氏所擬各條。復加審正。此線不歸私設。政府向後二十年間。每年支出三十萬元。以資補助。又此線不必全屬美國所有。但電線及沈線之船。由美國供給者。則沈設於美國國旗之下。其工事之期。自紐約至檀香山之渴挪盧路。以千九百二年一月告竣。自檀香山至日

本。以千九百三年一月告竣。總計費用約千三百萬元。

英日最捷之程

自日本航太平洋經美洲。凡二十三。四日。即可直抵英國。行程不可謂不速也。今英國政府新出計畫。更於太平洋岸及大西洋岸。添設二段鐵路。則只須十七日間。即由此達彼矣。其便捷真堪驚喜不已。蓋英國此種經營。與東洋爲最密之連絡。無非欲與俄國相制也。

法國新占非地

陰利拿地方。在北非洲利哇那大沙漠之中。鄰於法領阿魯哇里之後面。爲摩哥國往來之私道也。其土地極豐腴。工商業亦甚發達。多產麻布。最便沙漠中轉輸貨物之用。故於財政上頗居重要。其人民性甚勇悍。然皆頑迷無識。從來法國派遣之軍事探險隊。及天主教師等。多於此地遭其困難。自一千八百九十二年以來。法國的由魯康般氏遠征獲利。法之勢力。遂漸達於非洲之內地。其後那帶氏所率之探險隊。即漸漸接近於陰利拿。而每逢土民頑抗不得前進。駐阿魯哇魯之太守羅飛里耶魯氏。堅執進取之政策。夫那滿氏者精通地質學者也。遂以陰利拿探險之事。囑任之。別因氏者保護非洲遠征之能員也。更授以一軍隊。使與夫那滿氏合力從事。今次竟將陰利拿之地。占爲屬土。法國之新聞紙。同聲稱快。以揚勳其功。更盡言於政府。直乘機將附近之塔阿地方。全部。併力征服。盡歸己國所有。庶以

後該處土民不敢再侵害法人。而北非商業必更殷盛矣。

英國海電

英國之海上權力。幾如海波汪洋。無處不達。此固彰明於耳目者也。而近四十年來。於靜悄之間。着着潛勢力於海底。則尙令人不覺。在倫敦觀之。則驚其四通八達。組織如蛛網者。皆海底電線也。其增益商業之利益。轉旋政治之機關。久已獨占便宜矣。

英領北美加拿大及合衆國之間。海底電線凡十條。其三條係自巴西經西班牙。葡萄牙。以聯於倫敦。又太平洋之線。橫貫南北安他魯斯。以包圍中央亞美利加。計西半球全部之報告。總不逾數分鐘。即傳於倫敦也。

沈設於東洋之線。以亞丁爲中心點。自亞丁分三條線路。以通於中國與印度。及澳洲之由。擠朗多埠。又一線沿阿非利加之東岸。以繫於好望角殖民地。一線發倫敦。經葡萄牙及西班牙。至非洲之南端。復折回於好望角。以與東岸線相聯會。凡各國於非洲之通信。皆仰賴於英人焉。

英國於此等電線。管制極爲嚴重。電信局之職員。決不雇用外人。其本國政府及殖民地政府之公電。僅取半價。且較通常信報。特別迅速。若當英領地及屬英保護國有戰爭時。則其處之電信局。又悉歸政府專用矣。

總計世界所有之海底電線。英國實獨占五分之四。平時之利便。自不待言。若戰爭時則通信敏捷。尤爲取勝之要着。夫徒有強艦巨砲以爭於有形。而無電音以靈其消息。其艦砲未云足恃也。視曩者美國與西班牙之役可知矣。使當時西班牙無直接電信以達於古巴。則其沙別拏號之艦隊。不能受政府之訓令。本國之實情。無由得知。豈不遂及於危亡哉。今歐洲列強。電線惟英最多。故若俄若法若德。設一旦與英以兵戎相見。則通信之事。已不免先輸一籌矣。

且英之經營尙未有已也。今更於加拿大橫通太平洋至澳洲。以聯絡東洋諸國。有沈線之規畫。又於英國海岸自齊浦那路打路之地。運通數處。以達好望角。已投貲五千萬圓矣。英人嘗自謂其不履他國土地。而有範圍世界之能力。雖屬誇張之辭。然所有之海底線。既如是之節節靈通。則世界通信之權。實厚集其掌握。其勢力亦云偉矣。

婦人與政

英國西澳洲殖民地上下兩議院已議准婦人有參議政事之權。但聽其本國之認許即可通行矣。南澳洲殖民地最先已准婦人參政。此事實自該地發起之。

暹國維新

暹王有志維新。近一二年內。多聘西人教其立國之法。於農工商三事。最爲留心。王子數人

俱遊學泰西各國。去歲有一王子畢業而歸。欲圖振作。於距曼谷二百里之遙老城地方。爲一武備學堂。招募英壯子弟入堂練習。專學泰西陣法測繪地圖。購置各國器械圖籍。每月考校一次。擇其常居優等者。派往外洋遊歷。畢業回國。以備選用。是今日全地球之上。無國不變。無國不新。惟中國不死不變。未知其執何意見也。

俄國侵畧中國誌畧

日本佐藤 弘

我國當戊戌政變之後。日本法學士佐藤弘君著有支那新論。言中國之大勢。頗詳細。咳。夫俄自其先帝大彼得以來。其蠶食鯨吞之野心。爲其或滅或削者不知幾何國矣。故各國皆注意防虞之。日本年年糜重餉以修軍務。如在大敵。實以俄患之大可憂也。況我國與之比鄰。地勢相迫。正爲彼東方蠶食所先着鞭之地。又豈特如韓魏已哉。西伯利亞鐵路一成。則東方局面一變。而我國必先受其害。今彼夢夢者猶日唱聯俄之說。倚俄如長城。毋亦以俄之侵滅我惟恐其後。而先爲拱手以讓之耶。支那新論中。于北方情形較詳。故特節譯一二。以供我國人之省覽焉。

當十七世紀之始。俄國既蠶食西伯利亞各地。南方至喀爾喀。與外蒙古之庫臣汗。土謝圖汗。二部之境相接。頻營貿易。一千六百四十三年。雅克德斯克將軍官名兀老尹人名命波雅爾古。侵畧黑龍江。波氏率兵一隊下黑龍江。出鄂和達海。經三年。共越七千餘里。路而歸。此次

遂爲俄國占領黑龍江河域之始。時有哈巴羅者。聞波雅爾古探險之報告。知達瑚爾地方之富饒。遂請于俄帝。遠征黑龍江一帶之地。俄帝許之。賜以糧食皮服等。時一千六百四十九年。順治四年也。翌年。遂以兵百名下黑龍江。于河岸望見三城。皆寂無人煙。哈氏遂誘索倫種族之汗。汗。即酋長之類。曰。俄人之來此地。欲徵收毛皮稅耳。非有異也。俄而襲其雅克薩城。於是沿江而下。過精奇里河。達松花江。赴烏蘇里江。沿路之部落。皆爲所奪。中國之都統命寧古塔之章京海色。以大砲八門。兵士六百六十名禦之。敗績。全軍盡滅。後年哈氏遂歸俄京。莫斯科。受恩賞爲貴族。

一千六百五十四年。順治十一年。斯特巴諾以哈薩克兵南下。略黑龍江。直至寧古塔。爲中國都統沙爾呼達所敗。沒于陣。爾後俄國之侵略黑龍江更烈。俄帝彼得第一世使兀老尹畫兩國境界之圖。一千六百九十年。康熙二十八年。兩國之使會於尼布楚斯克。締結條約。此即所謂尼布楚條約是也。據此約。以斯塔諾威山（外興安嶺）爲界山。山之北盡屬於俄。額爾古納河之右岸亦歸俄所屬。於此條約。遂以滿洲數千里之地盡歸入俄之版圖矣。此爲中俄第一次之疆界條約。然其時猶禁俄人之航黑龍江也。

時有涅威里斯幾者。曾至東方之鄂和達港。及彼得巴布羅斯克港。越韃靼海峽。發見薩哈連島之與大陸相連。爲一世所驚。後又奉該總督之命。再至東部西伯利亞。直下黑龍江。竊

幾中兵之不備。遂襲其地而立俄幟。名其地曰尼古賴斯克。並宣言由黑龍江下流至朝鮮沿海一帶之地皆歸俄領。於是疆界問題復熾。俄國岳福將軍使人於清廷。要請黑龍江一帶之地。若不唯命。則直以鐵騎下黑龍江。與執事周旋矣。時有長髮之亂。中國政府方以全力戡定。未遑他及。岳福將軍乘此機。直沿海州。至東部西伯利亞。黑龍江下流之地。遂歸俄國之版圖。

千八百五十八年咸豐八年岳福將軍會黑龍江將軍。由於愛理。締結盟約。是即愛理條約也。此回條約盡以黑龍江外之大地歸俄國。唯以黑龍江爲二國之境界。由烏蘇里江至於海。作爲二國共有之地。黑龍江。松花江。烏蘇里江。俄人皆得航海之權。此爲中俄第二次條約。是年俄人置黑龍江省。以伯拉照夫琛斯克爲首府。其後十餘日。俄人布拉丁又要請中國政府爲天津條約。

千八百六十年咸豐十年英法同盟軍陷北京。清帝避亂於熱河。時俄國全權公使陸軍少將伊格那普業福在北京。與欽差大臣恭親王謀。調停於三國之間。而講和議。以大買中國之歡心。於是更結疆界條約。是爲北京條約。是役也。俄人盡占有烏蘇里江。興凱湖。白稜河。瑚布圖河。璦春河。圖們江以東之地。南及朝鮮。奄有日本沿海數千哩之廣野。建設浦鹽斯德。至是俄國侵削滿洲之地前後三回。其版圖遂擴張至今日之廣大。

俄國之成此偉業。非特由使臣邊將之勇略而已。實全賴哈薩克兵之力也。哈薩克兵性不務農。自幼在干戈弓矢之間。老於馬上。以兵事爲其性命。以掠奪爲其習慣。彼既喜於侵略。故一無事輒不能堪脾肉之歎。彼生地苦寒。常冀得南方不冰之地。得寸得尺。慾望無已。曩俄國之奪取旅順口大連灣。及強請建設滿洲鐵路等。人或怪其唐突。余謂此乃勢之所必至也。

夫喀希尼之密約者。乃千八百九十六年光緒二十二年九月三十日。駐紮北京之俄國公使喀希尼伯。以其賂章博得於滿朝者也。雖然。如此重大之密約。何容易得之。吾人每驚疑之。然而不足怪也。蓋與中廷相交。若以重賂遺其大吏。則無不能爲所欲爲也。

今試言此條約之所由來。曩李鴻章締結馬關條約歸國。奴輩遂誤社稷。大觸清帝之逆鱗。褫職屏居。自分無更擢之望。喀氏際此好機。遂賣恩於李。當一千八百九十六年五月廿六日。俄帝行加冕之禮。中廷使駐紮聖彼堡欽差大臣王之春致賀。喀氏不許。曰。爲此大禮。捨李鴻章無以當之。中廷遂復起李爲全權大使。於是遂携此草約乘槎赴俄。爲賀禮並畫押焉。於此役也。恭親王棹頭瞑目歎曰。持此文書去。余不欲見之。清帝亦蹙眉不展。宗人府皆有不滿之色。於是祖宗發祥之地。盡委之他人矣。喀氏又常以品物買歡於西后。並說之曰。日本雖已還遼東半島。然其恨貴國深入骨髓。臥薪嘗膽。方謀再舉。今二國結盟。是時中日同盟之說

俄國必以重軍助日本。將捲土重來也。彼以兵由威海衛直衝王城。北京如在其囊中耳。當此時其爲貴國之重援者。其唯敝國哉。敝國與貴國交誼之厚。不敢辭犬馬之勞也。西后惑之。遂墮其術中。光緒帝是西后所擁立。故不敢逆其意。於是遂不得已而准之。嗚呼。此條約實爲中國滅亡之基也。以上所述。不過內面消息之一端。若爬羅剔抉。則不可勝數矣。今試將喀希尼之密約揭載于左。

第一條 以俄國西伯利亞鐵路將成。中國許其延長線路。由海參威至于琿春。由琿春至吉林省之首府。又由西伯利亞之某都府。至黑龍江省愛琿。齊齊哈爾。伯都訥。吉林府。

第二條 吉林省並黑龍江省所建設俄國之鐵路。俱由俄國自理。其建造方法及規則等。一切皆依俄式。於中國政府毫不干涉。其全線皆歸俄國管轄。以三十年爲期。期滿之後。中國得以適當之評價贖買其鐵道、車輛、倉庫等類。而其贖買之方法。須俟後來更議。

第三條 中國政府所有欲自山海關經奉天府至吉林之鐵路。若中國建設困難。俄國得供給其資料。由吉林府建造此鐵路。於十年後中國得收買之。

第四條 中國將由山海關、牛莊、蓋平、金州、旅順口、大連灣等處建造鐵道。爲俄國通商

之利便計。當依俄國之式。

第十條 旅順口、大連灣，並其附近等處，乃軍畧上之要地。爲防豫將來之危險，速當修繕其堡寨，置重要之守備。俄國爲保護兩港，此必要之助力也。不許他邦侵入其地。中國有決不能以此地再讓與他邦之義務。倘將來或有事起，當危急之時，或俄國與他邦交戰等事，中國爲令俄國攻守之便，一時得許其海陸軍屯紮於兩港。

第十一條 若幸而無事，中國于旅順口、大連灣兩港，得有行政上管轄之全權。俄國不能干涉之。（後半畧）

右六條但擇其緊要者載之而已。其第五條是有關於鐵路守備隊。第六條是有關於運送貨物之關稅。第七條是有關於黑龍江、吉林諸省、長白山等之鑛業權。第八條是有關於中國軍隊之訓練。第九條是有關於膠州灣之租借。第十一條後半有關於旅行滿洲東三省者之保護。此等與本章之旨所關不重大，故畧之。

由是觀之。愛琿、吉林、吉林浦、鹽斯德之敷設鐵道權，俄國既得之矣。山海關、吉林之鐵道，俄國得代中國敷設矣。山海關、牛莊、旅順口之鐵道，雖中國得自建設之，然必須依俄式，是無異令齊人之盡東其畝矣。謂爲自有之物，得乎？旅順、大連二港，已爲俄國囊中物，顯然如歸其版圖矣。中國所謂於其地有行政之權者，是與敵守門，代俄人爲警察爲奴隸而已。至膠

州之請。是得隴望蜀。俄欲無厭也。

膠州灣已安然入俄人之囊中。不意德人竟敢探囊取之。俄國於此雖稍忍之。既而德國與英國同借外債於中國。破俄國之貸款。其代理公使巴布羅福氏憤極。即刻以短兵迫中國政府。俄人之每以恫喝虛嚇中國。天下人所共知矣。余故不復贅言之。中國政府不堪其恐嚇。去三月二十七日。於總理衙門又結條約。吾人即呼此條約爲巴布羅福條約。今揭其條約之全文于左。

大清國全權大臣大學士李鴻章。戶部侍郎張蔭桓。大俄國全權大臣駐紮北京代理使務寶羅夫。爲訂條約事。

第一款 因俄國願在中國北海濱境。有方便地方。以資俄國水師。得天然形勢之勝。而保俄國水師無意外之虞。故大清國大皇帝陛下。特允將旅順口大連灣兩處及鄰近相連之海面。租與俄國。惟中國帝權不得稍有損礙。

第二款 租地界線隨後測量。至於由大連灣往北之界及地方向之界。一切細情。俱應隨後由兩國政府派員勘定。惟租界境內俄羅斯應享租主權利。

第三款 租期應自畫押之日始。扣算二十五年。惟既已滿期之後。應准由兩國會商斟酌續租。

第四款 按照第一款所開。俄羅斯即可派遣官員在兩處經營水陸武備。惟一切俄人應歸俄國大員一人管轄。不得用總督巡撫等名目。中國兵隊不准在租界內屯紮。中國人民准其居住。惟不得犯租界內一切條規。如遇中國人民犯法。應交中國國家最近之地方官審判。兩國辦理罪犯情形。仍遵照咸豐十年即一千八百七十六年之中俄條約所開。

第五款 租界北界之外。應留一甌脫。即兩國不准居民之隙地。其甌脫界限。應隨後由駐紮俄國之中國使臣與俄國政府商妥。甌脫境內應中國管理。惟除先行與俄國商妥外。中國兵隊不得私入甌脫。

第六款 旅順口既允准作水師屯集之處。祇准中俄兩國之船停泊。他國不論兵船商船。一律不准駛入。至大連灣亦須擇一方便地方為中俄兩國屯泊兵船。其餘各地准作通商口岸。所有各國船隻准其出入無禁。

第七款 旅順口大連灣兩處。因地勢險要。故俄國情願自備款項建造砲臺營寨。及一切保衛地方。應行舉辦之事。隨時由俄國酌行。

第八款 中國前於一千八百九十六年。准設鐵路一條。經亞細亞鐵路軌道。接至大連灣。現准即行開辦。所有築造詳細情形。悉照中國滿洲鐵路章程。并准添造支路。從營

口鴨綠江中間接至濱海方便之處。其如何築造及勘定地址。悉由中國使臣在俄京聖彼得堡與東方鐵路公司督辦會商妥協。惟俄國築造鐵路。不准格外侵佔中國地方。

第九款 此項條約自簽押之日爲始。兩國即行遵照辦理。其換約之處。須在俄京聖彼得堡。

至是旅順大連二港實入於俄矣。中國各省之公車等慷慨悲憤上疏爭之。大意曰。伏望皇上遠慮事變。堅忍力持。勿圖朝夕之苟安。勿畏虛言之恫喝。上焉拒俄。請以聯英日。次焉公保以絕俄交。然後發憤變法。力求自強。則國家將有所賴。若猶委曲順就。苟且求安。則親俄而求其庇。已誤於前。畏俄而殉其求。復誤於後。禍變之來。必有不忍言者。事機得失。幾不容髮。乞皇上慎審先事之幾。無貽噬臍之悔。彼公車等雖如是苦苦哭陳。然無計可達天聽。旅大租與之條約既成。狂瀾之倒莫可挽矣。中國雖猶擁兩處主權之虛名。而其實權則全在俄矣。其借用之期限雖二十五年。期滿之後仍可續借。荊州一去。安有還哉。鐵路之通過遼東半島。滿洲東三省之地。早非中國所有。且中國之兵船。雖云得與俄國同得入旅順口之權利。然不見福靖號之船乎。在港外逢大風。俄人拒之不得入口。遂沈沒海中。然則條約中中國之些少權利。皆毫不可得也。今俄人一意專心經營旅順。貯藏煤炭數萬噸。府庫

倉廩充實。若一旦以保護鐵路爲名。率哥薩克兵萬人以上。由黑龍江松花江入吉林府。中國陵寢之地。早爲鐵騎所蹂躪矣。臥榻之側。他人之鼻息如雷。苟有烽火之警。俄國水陸並起。北京如風前之燈。不滅何待。中國之歷史。由來皆爲北狄所倒。吾人恐堂堂之大國。難逃爲俄國所滅亡也。俄國近來又頻倡由滿洲延長鐵路至中國中心漢口等處。吾人料俄國不日將盡括長江以北之地矣。中國之危。翹足可待也。

美營瓜摩

美國占得瓜摩島。其當初之用意。不過取便於往來檀香山及香港等處之船。中道有屯煤之所。且爲太平洋電線承接之區而已。今則非律賓羣島在其掌握。不能無就近爲之防鎖。而該島自是益重矣。故其政府決以數百萬弗之鉅款。於該島修築埠頭。建設貯煤所。造船所。及砲台等。并備新式自動起重機器。其所貯煤之重量。將來以二萬噸爲常額。蓋其擴張軍備主義。已日見進步矣。

俄國侵畧波斯

俄國既以甘言與波斯聯親密之交。使波斯清償外債。取五分之利金。借與二千二百五十萬留之鉅款。由是波斯財政之權。盡歸其掌握。更進而得其衝要之港灣。又得其國中布設道之權。其勢力實至如是之專橫矣。泰晤士新聞與京通信員之報曰。俄國于波斯已將

齊由魯胡亞打李里司等處達于巴打魯阿巴斯港之鐵道興工修築。其工事係陸軍參謀本部監督之。限千九百三年之末爲竣工期。此路之經營。明明注意於阿巴斯港。以備軍事上之用。蓋鎮踞該港。可以遮斷由阿丁入印度之路也。此後印度必當更加一層警戒。由是觀之。俄國於亞細亞之根株。不益磐固不拔乎。俄廷建策深刻。而能堅忍沈毅以行之。其着手也。分道布置。處處進步。他年全局在握。則囊括席卷。直指顧問事耳。

澳洲聯邦議案

澳洲聯邦之案。西正月二十四號。洲內尼由州沙烏斯州維魯州之各總理。會集于大總理西多尼府。商議普通之條件。即由殖民大臣查巴連氏將各條件申請英國議會提議。茲揭其重要之事項於左。

- 一 於聯邦案內。求派往英國議會。通過運動委員。每州各一名。
- 一 聯邦成立後。各州太守宜如何選任。
- 一 定總督之駐在地。宜擇何處。
- 一 清查所有人口之數。以準備選舉議員。
- 一 好望角與澳洲之間。沈設海底電線。
- 一 經理尼由起尼島之財政。

一英澳間往來船隻。寄泊於西澳洲夫里曼得魯港之件。

一瑞西別崙府郵政聯合紀念會派員與會之事。

一關係尼由黑李里的司島之件。

以上九條。由英國議會議准回復者。聯邦成立後。各州太守概歸英國委任。并統制於總督之下。其俸給之多寡。差別地方之貧富。事務之繁簡。以定適宜之額。總督之駐劄所。宜在西多尼府。及美魯波羅府之間。仍聽該總督相地自定之。清查人口選舉議員之件。各州統計官於西二月二十號會商施行。尼由黑李里的司島之管轄權。英政府決不認爲法國所獨有。瑞西之郵政紀念會。即派南澳洲在倫敦代表委員前往參與。其他各節承諾與否。尙待詳細商定。故未見決議也。

韓國鑛山

美公使向韓國政府。要求三處鑛山探掘之權。日本公使要求開探稷山金鑛。韓廷悉不許。蓋慮輕諾二國之請。則他國又將起而效尤。割一身之肉以飼羣虎。終不能飽無厭之欲也。故立確切不移之主見。無論何國指索何地。概峻拒之。雖然有國者果能持定策以自保固善也。特恐無此腕力耳。先是韓廷于殷山金鑛。曾拒英國矣。英人嗣知難以善得。遂改用強硬手段。而韓廷卒破成見。屈服于勢力之下。今美國之意向。其或有區別于英人耶。不可得而

知也。然就目下觀之。美公使既抗爭于外。而又有美人桑慈氏踞于宮中。張威于韓帝之側。則欲採礦之權。不落于其手。豈可得哉。或曰。各國于朝鮮礦業。其得有寔在利益者。僅美人所開雲山金礦而已。如德人之堂峴金礦。一年間僅收七八萬弗。現今大有難支之勢。夙聞已將中輟矣。其他金礦煤礦。雖所在多有。然韓地之礦。多係斷脉。終無甚大之利益。此中實況。豈各國竟不知之乎。若其知之。則此等礦山。得與不得。何關輕重。而何以索之者紛至沓來。且注力務求必得。若是其重要視之者。果何爲哉。嗚呼。是正所謂醉翁之意不在酒。各國之所爲。特藉索礦等名目。而伸張其國政之權力也。彼韓國者。譬之敗室不治。飄搖風雨。四面皆隙。而欲絕人之不窺而入之也。洵難矣哉。雖然。韓猶其小焉者也。

俄國鐵道

俄國目下開通鐵道。凡三萬四千英里。未竣工者凡六千里。其傾向總在軍事上也。着手于亞細亞鐵道。始于千八百八十年亞歷山大王之時。而是時英國在印度所築之鐵道。已有九千二百七十九里。

亞細亞鐵道凡四種。一高加索鐵道。二裏海鐵道。三西伯利亞鐵道。四西部西伯利亞之小鐵道。

統計各鐵道上備用客車。凡八千百十八輛。貨車凡十六萬輛。設有軍事。則發車一次。可運

兵二十九萬。

其線路方向之所注意。一土耳其。二中國及日本。三波斯、印度、及中國南方。此彰明較著者也。故其陸軍之進步地。即以俄的沙尼可列哇、些巴司得波兒、及亞拉北、爲終點。于歐洲線添設支線。即得直向君士但丁堡。又循高加索之線。即自裏海可臨時出師。

對中國之所經營者。由西伯利亞至海參崴。滿洲至吉林。旅順及牛莊。此數線鐵道悉得聯絡之後。則北京以北。長驅橫行。絕無阻塞矣。

對印度之所經營者。西北自阿富汗。西自俾路芝。又東北通巴密魯高原。皆道出土耳其。其兵可由裏海之陸軍首部發出。又其攻擊中央亞細亞之根據地。則在達斯克唔得也。

俄國與斯境壤相接。凡三百英里。其必欲併吞之。自然之勢也。但阿斯加巴得地方。高山橫斷。無路可達。若以艦隊泛裏海以爲攻取。誠甚便利。然爲各國條約所限。不能逞志也。使其軍用鐵道既成。則波斯亦終在其掌握矣。

美國開放中國門戶策

美國國務大臣赫氏。去年十月二十三日。以開放中國門戶之事。提請于與中國有關係之六國政府協議。即英俄德法意日是也。其條件如左。

第一 各國在中國所有之勢力範圍內。若租界借地等。不問從前以何法取得。但既已

與中國立有條約。則其所得權利。我各國相約不加侵害。

第二 各國之勢力範圍內。所有通商港埠。除中國自開港之外。凡一切轉運上陸之貨物。守定前與中國所訂條約。按照現行稅則完納關稅。其款歸中國政府收入。但此外并不許有別稅。

第三 各國政府于所有之勢力範圍內。各處港灣。收入港稅。不問何國船舶。當視其己國船舶所出之稅。不得加重。又於各國之勢力範圍內。所有鐵道。或係歸其管理。或原爲所修築。于營業上收入賦課。則他國公民應出之費。亦必與其本國公民所出之數相等。

歐民占納國費大概

全歐各國文明之度。日益進步。競爭之烈。更無窮期。而各國度支之費。亦因之日加繁重。其得集巨款以成非常之舉者。皆出于國民之公爾忘私以義爲利也。而究之國力充足。則各人自有之權。無不伸暢。其利益更什佰千萬。取之不竭。是國與民關係親切之顯象也。今試綜全歐各國國民每年應占國費之金額。通計而條錄之。

一 常尋軍費。約在五十三億三百萬佛郎以上。平均計之。每人每年當占金十四佛郎五十六仙。

一軍費以外之國用。均須百九十五億八千三百萬佛郎。每人平均當占五十四佛郎四十七仙。

一國債總數。約千百五十六億佛郎。每人平均當占三百二十佛郎。其利息平均以四銖計之。每年約在四十六億四千萬佛郎以上。即每人當占十二佛郎六十六仙。

以上三項。總計在二百九十五億二千六百萬佛郎以上。每人平均約占八十一佛郎六十九仙。是殆統貧富貴賤老幼男女併力一致。無可差異者也。歐洲國民之負荷國事。不亦重哉。

軍備之累

通計歐洲各國常備兵數。約三百七十萬人。每兵一名。一年經費。平均約千四百二十二佛郎。總計約須五十三億三百餘萬佛郎。此項純歸軍備直接之開銷。且此五十三億三百餘萬佛郎。全屬陸軍之費。若合海軍計之。則每年總額。實在八十三億九千五百萬佛郎以上。至陸海軍之器械等。是爲不能生息之物。凡用款以製備此類。皆所謂一去不返者也。現時此項所費金額。約在三百億佛郎以上。加以常備兵員。凡三百七十萬人。皆以強壯丁男任之。此等男子若以之執業營利。每日生出之金。平均十人可得六佛郎。而既已列于兵數。其身之產業。不能自殖。每年之間。僅計以三百日爲營業之期。所獲金額。實達十六億六千萬佛

耶。此項又屬間接之損失。而消耗于無形者也。

兵費與學費

歐洲各國國用之大者。莫如軍事及學業。二者誠立國之基也。今考九國現時川費之額。表而列之。并著其徵兵于民之數。

	常備兵數		兵費		學費	
	每千人中 之應選者	(佛郎)	國民平均 之認出額	(佛郎)	同上	(佛郎)
法蘭西	一五	二〇、八〇	三、六〇			
德意志	五	一二、四五	二、四〇			
意大利	三〇	八、〇七	一、八五			
奧大利	九	一、八五	一、七五			
俄羅斯	九	一〇、二五	〇、二五			
英吉利	六	一九、二五	二、七五			
瑞士	二五	四、四〇	七、五五			
西班牙	六	……	……			
比利時	三	……	……			

學費過于兵費者。僅瑞士一國而已。其他皆偏重于兵事。蓋大勢所逼。衝突之機。時虞發動。

不得不以全神注之也。

非律賓種族考

非律賓諸島種族繁多。然其大別有二。則列古羅種。及馬來種是也。

列古羅種。稱爲阿易達。其身僅長四尺六七寸。皮膚黝黑。毛髮捲縮。唇厚鼻低。智識劣陋。眞蒙昧之民也。羣棲于呂宋島、敏打那、哦島、敏多羅島之山中。不與他種同閭里。是蓋諸島中元來之生民。及馬來種侵入。漸次迫逐之。遂深避于內地。今其數殆不過二萬云。

馬來種人。膚色銅赤。毛髮黑直。眼瞳亦黎色。男子概乏鬚髯。是代列古羅種而爲諸島之主民者也。其總數凡七百萬。但其中又分多少種類。其數最多而勢力亦最強者。有達加羅及比沙鴉二種。達加羅種全住于呂宋及敏多羅二島。比沙鴉種則散居于呂宋及敏打那、哦島之間。比沙鴉斯島所居。又別種之人也。其他居于南呂宋者。有比可魯族。居于敏打那、哦島者。有曼打鴉族。及馬落波族。居于火羅諸島者。有摩羅族。是等皆顯著也。

西班牙征服羣島以來。歐羅巴人來住者。亦頗不少。其中西班牙人占十之八九分。中國人往住者。其數約在二十萬以上。而此等外來人與土人相婚。生出混色人數亦甚衆。悉聚處于馬尼拉都會中。

今察諸島之居民。其中有智識。有財產。而最富愛國心者。即歐人與土人所生之混色人也。

蓋彼等以歐人爲父。故幼時即沐浴學校之教化。而歐人多及時歸其本國。不得終留于該島。去時必分多少財產。以遺養其妻與子。其妻與子固依然該島人也。夫以有學有財而終身居該島之人。自必冀望該島之繁榮發達。是情勢有必然者。故論者謂菲律賓將來之眞主人。必屬此種。其獨立黨之義士。如羅哈司。如阿擬那魯多等。即此種也。但以諸島計之。則其數頗寡。雖凜然抱獨立之志。以身相殉。然運會未至。事與心違。徒遭顛沛流離之慘。不亦可哀哉。

次于混色人而爲居民之優等者。則達加羅及比沙鴉二族也。而達加羅族。尤智力優長。天性勇敢。頗具俠氣。又最善模倣技術。其工藝良有可觀。日本人嘗云。對此種人。而相其骨格容貌性質技能及習慣言語等。輒想起在昔祖先。當與之有親密之關係。蓋以爲其種出于日本也。今其住于都會近傍者。智識亦與時少進。然久受西班牙之壓制。卑屈性成。自主之氣。殆消磨盡矣。其棲遲于山野間者。從未受教育之益。尙不能達今世立國之度。故其所爲。不過蜂起烏合。偶應獨立黨之義聲。排斥外人。以泄氣于一時而已。比沙鴉族人之通世態者。嘗語人曰。我等諸島。今尙不敢冀獨立也。其故何哉。蓋文化未達此點。不能驟然增長也。今日之計。唯在去殘暴主人之羈勒。而歸命于寬仁之主人耳。其爲是言也。以獨立黨之意氣臨之。則惟見其可憐可鄙。雖然。若實按諸島文野之度而立論。則豈非穩當明爽之說乎。

德重邊防

德法之役。德國割得二州之地于法國。即亞爾沙爾斯州羅連州也。其地自屬德以來。所行制度。原與他州不同。且總督之行政。頗多出以武斷。二州議員。屢于國都議院提出廢止總督制度之議。政府常與之反對。終未見許。而近年來德法兩國日益親密。今年二月廿一日。再經該議員提出前案。議會中同聲贊成者甚多。大有決行廢止之望。然尙未經德皇裁可。不知其究竟若何也。當建議此案之時。宰相火赫唔盧氏臨場演說。以表明本國政府之主義。其大意曰。亞爾沙爾斯及羅連州。吾國之邊境也。該地最易與鄰邦開釁。其關係即在于我國之居民。與原地居民交接之間。就今日而論。兩國固甚親善。然不能保將來終無決裂之事。故扼重形勢。爲保守領土計。實爲當今之急務。凡我國民。須知所謂亞爾沙爾斯及羅連州者。非他國之所有。乃我法國之所有也。果能立此意志。依此目的。則前人所失而復得者。中古時代

二州原爲
德國所有

庶可無再失之患也云云。

聯邦成議

數年以來。英國政治之大問題。即澳洲聯合之事是也。英爲澳洲之上國。則澳洲聯合。非特英國所欲爲。亦澳洲各屬地自願聯合也。數年以前。屢有此議。不見成效。今因南非戰爭影響所及。澳洲各屬地。固見聯合之必要。而英國亦見各屬地聯合之事爲大要也。近者朝議

大行。澳洲之中。南威耳司。維多利亞。棍司蘭德。南威司熱利。達司馬尾之五屬地。採用聯合之策。舉相一致。各邦依人民之可否。及投票之多寡而定之。今聞贊成此舉者。有三萬六千百十三人云。

法國博覽會詳紀

法國之開博覽會也。於地球各國關係甚重。蓋將以驗十九世紀文明之進步也。故各國皆樂贊成此舉。于開會之日。不惜耗費重貲。羅列百物。新奇古麗。無所不有。比較物品之巧拙。即可以知人智之競爭。與國家之強弱矣。茲將各國支出會費列左。

意大利百萬佛郎

土耳其百萬佛郎

美利堅百四十萬圓

奧大利百五十萬佛郎

匈牙利三百萬佛郎

英吉利百八十萬五千佛郎

比利時三百萬佛郎

德意志六百五十萬佛郎

西班牙四萬白塞達

希臘百萬佛郎

瑞典八十萬佛郎

布牙利亞三十萬佛郎

挪威五十五萬佛郎

荷蘭十萬佛郎

此會在巴黎之格德司河岸。各國之所陳設者。皆有各本國罕奇之物。日本品物甚多。然一切美術。多為歐人所竊笑。且語不通法語。故賣出不見繁盛。除荷蘭俄之屬國在波斯二國外。其餘皆勝于日本。即羅馬。荷蘭素稱小國。其物品亦外于英美。皆大國之間。各國陳列之物。任人縱覽自如。意國雖因近來國勢衰弱。然政府為此次之事。支出百萬佛郎。而本國各商務公司贊助此舉者。所費亦復不貲。故先入意國陳列院觀之。建築之物十分炫麗。彫刻之術亦極華美。實為各國之冠。院內分上樓中樓下樓三部。下樓設有酒店陳列各種美酒。中樓建有一大堂。分為數區。陳列弗羅倫司、米蘭、拿布兒、勿尼司、各地之物。其傍有羅馬時代之金屬細工、彫刻等類。頗驚人目。至陶器硝子等類。自昔固已著名。各物陳列蒐集甚繁。繁華云。

土耳其建築之術。其模範亦有古風。駸駸乎與意國比美。不少遜色。院內進門之處。有尖穹之形。亦自古時傳來者。稱爲哥細刻之風。最爲建築家所稱贊者也。院內有雜貨店酒店及叙利亞之咖啡店。亞拉比亞之博物館云。

美國之芝加哥省在墨西哥之西南。係一大都會。兼一大著名之製造場也。該製造公司。此次十分努力。大出品物。特與各國爭美。其院兜形甚高。中央空虛。上有窓櫺。光彩奪目。第一層樓有郵政局。二層樓陳列各種物品。并有客廳廣列新聞報紙。以爲遊覽者休憩之所。三層樓有車務廳。樓下設有酒店云。

奧大利匈牙利本合爲一國。然政府有二。外交軍務二事。則歸奧帝辦理。奧大利院內建築之物。多當時路易第十四時代之風。雖裝飾不甚富麗。然亦多罕奇之物。匈牙利院內建築之物。亦多羅馬時代之風。中有一室。其形圓。彫刻裝飾。色色具備。樓下有墨畫墓碑文等。又有一室。陳列各種武器。樓上有客室。中列油畫。其餘各室所列之物。皆與歷史參攷有益者也。

英法交際。本爲世仇。近因杜蘭斯哇之事。三國仇恨益深。故博覽會陳列之物。英國不甚盡力。雖以某親王爲監督。然各物極其質朴。不甚動目。建築之物。與英國田舍無異。凡院觀之。第一室陳列畫類。第二室陳列書籍。第三四五室皆日用之具。然進而觀所繪之畫。皆古來

名人手筆云。

比利時建築之風。亦擬本國街市會堂公所之模範。中有大塔。成於意大利名手所作。石工之細。頗有可觀。樓下陳列本國新聞報紙數百種。傍列著名各物。各方面皆有圖繪。樓上有古時日用之具。

德國建築之物。古今參半。樓上有鐘錶臺。裝飾甚美。院內合樓上樓下爲十四室。陳列各器。進口之處有一大廳。中有一床。用赤色大理石爲之。天井之處。以油畫爲裝飾。中央懸有德皇維廉三世之肖像。其院例與日本略同。非携有憑票。則不能進觀。樓下第一室。陳列書籍。第二室陳列照相各器。第三室陳列彫刻各器。樓上第一室及第二室。皆爲書籍。第三室有國家所立印刷局之物。第四室財政各書籍。第五室亦爲書籍。第六室至第九室。皆德國古時佛德利兒大王之古物。

西班牙建築之物。皆方形。屋上四角皆置小塔。裝飾亦甚奇麗。院內陳列之物。想見西班牙古時技術之一斑。多係皇家所藏貴重之品也。中有銅器陶器木器祭器之類。尤有可貴者。爲加理司五世蒐集之武器。及維也納侯爵所藏之甲冑。此甲冑乃莫爾王波布加圍困于

格羅拿達

在西班牙之東南角

時所衣者云。

希臘前與土耳其交戰。至今元氣將復。建築之物。規模甚大。建造一大八角堂于十字形之

中央。方法雖舊。亦有一種古風。院內陳列之品。爲繪畫彫刻植物酒油絲綿大理石各等。并有乾葡萄甚多。蓋葡萄乃其土產也。

建築之物。最奇者莫如瑞典。中有一塔。似將斜倒。而尙存其形。館內所列多本國風景云。布牙利亞陳列各物。比羅馬雖爲質素。然其風稍變。頗有可觀。樓下陳列之品。有著名農產。林產酒類各物。樓上陳列鑛產及商業各物。傍有古畫及金類各物。又羅馬古時之七寶。今一一陳列。

挪威建築之物。純然北歐之風。其木材皆出自本國。一見有質朴幽雅之風。令人可愛。樓下陳列漁獵器具。中央有一船形。乃南成博士北極探險時所用者。樓上有一大畫。繪畫挪威風景。傍有博物館。水產上所用之器具。無不列之。最有益于觀覽者也。

荷蘭所建之室。皆擬王宮。有西班牙國之風。內有二樓。樓下有本國麥酒店。樓上有各照片地圖。及電機農具酒類金類硝子陶器鑛產等類。一一陳列。

波斯之院進口之處。左有別室。爲其國王七月來遊而設者。中所列各器。最上之物也。土耳其印度荷蘭等風。雖有大名。究不及波斯。院中玻璃箱中。陳列陶磁器類。工作色彩。自爲歐人所不及。又有寶石金銀織物酒類等。及波斯灣之真珠石酒等。歐人見而垂涎者也。樓中有六七人。舞劍而跳。又寫王宮之風景。其工作構造。可觀者不少。

羅馬建築之物。皆有十六七世紀之風。中央之堂。以棕色之瓦爲窗。金色燦爛。光彩奪目。院內陳列者。有煤炭琥珀火油等。皆有益于格致學者也。其餘繪畫製紙衛生各器。皆一一陳列之。古代技藝。亦蒐集甚多。

秘魯建築之物。皆有西班牙之風。全部皆用鐵構造。會終之日。將移之于利馬秘魯首都博物館者也。樓下陳列既製未製之農作物甚多。惟綿花與橡皮。亦有名者。

葡萄牙建築之物。極其質素。亦有可稱者。周圍石欄。皆用本國著名之石建造。陳列者有漁舟漁器林產銅鉛等物。

芬蘭院內陳列物品。極其質素。中有大花圃石砵。去年所得之大隕石。置于其中。又有學校所用物品。工作之細。亦可概見。而物品之傍。必有各地風景相片。亦可悅目。鑛產之物。一一陳列。又陳列漁業農業之器。皆有統計表示之。此國本俄之屬國。雖銅鐵鑛山甚富。而開採鑛業。未得其法。惟教育進步。稍有可觀。國中有一大學校。甚有名云。

塞威亞建築之物。皆用質朴煉瓦爲之。其窗櫺彫刻。稍近支那風景。院內陳列各物。有鑛產彈丸硝藥等。與教育有關者。則有農產林產之類。與工學有關者。則有織物之類。

莫拿哥在法國之南。爲各國公認爲公園之國。莫公最精于動物學。故院內陳列各種水族。甚多。院之中央栽植熱帶地方之植物。四方壁上張掛各圖。乃莫公前乘船往地中海考查。

地質學時事也。莫拿哥國本歐洲公共博亦大場。而莫公有學如此。亦可謂奇矣。

波斯尼亞伯林會議時爲之屬國司其政權建築之樓。升有二層。裝飾皆用青色。左有尖塔。下有油畫館。兩旁

繪有本國有名之瀑布。水色溶溶。形色如生。院中陳列彫刻之器。工業一斑。亦可概見。又各種物品甚爲繁殖。中多有益于人類學及考古學之考證者。樓上有歌舞之臺。樂師二十人。歌奏國風。可稱幽雅。兩邊有本國工部農部禮部之物品。地下有各項鑛產。傍設酒店。

日在韓商權

朝鮮京仁京城鐵道告成。京釜京城鐵道始開工築設。此二路皆歸日本人承辦。至航運之利。

亦皆歸日本人之手。日本在朝鮮權力。自爲各國所不及。惟開採鑛產之權。各國間或有之。計朝鮮各種事業。已盡爲各國所據。本國政府惟有其名而已。去年貿易之總數。二千五百萬餘圓。僅能當得中國牛莊一港。其中入口數一千六百萬圓。多係日本貨物。其中殆係中國者。出口數僅九百餘萬圓耳。英德俄美之于朝鮮。皆無直接之商權。而航海之業。中國南北海面及日本海面。皆爲日本船舶所占有。近聞俄國商會欲經營朝鮮。以旅順爲根據地。于中國朝鮮長崎間。開運航路。然其力亦不過及遼東半島而止。至朝鮮內河。及沿海各航路。名雖爲朝鮮人。其實則日本人盡握之也。而朝鮮人欲復此利權。正不知在何年代。合計將其鑛山、鐵道、土木、產業、水利各項之已爲各國人染指者。略舉如左。

- 一京仁鐵道。與京釜鐵道。爲日本人承辦。
- 一漢城電車鐵道。及帝室財產與各種營業。皆歸美國人郭布蘭及河司多威克二氏承辦。
- 一自京城至松都。自清涼里至楊州。豫築之鐵道。其材料皆爲郭布蘭承辦。
- 一雲山鑛產。爲美國人列汗德所管。
- 一股山鑛產。爲英國人慕顏所管。
- 一稷山鑛產。爲日本人所要求之物。
- 一安城鑛產。其中漣川、平山、載寧、渭川之沙金。爲日本人開採。股栗、長淵、鐵原之鐵鑛。亦屬日本人之權力。然尙未興工開採。
- 一堂峴鑛產。爲德國人哇德所管。
- 一漢江、錦江、大同江各航路。其權利皆爲日本輪船所占有。
- 一採伐樹木之權。孟山、楚山及鬱陵島一帶。屬俄人新札格。群山近海之一島及漢江上流。皆歸日本人。
- 一沿海漁業。忠清以南之利益。屬日本人。其北則屬中國人。
- 一松都所出人參。每年有二十萬元。向多爲日本人採辦。至今年有禁止此業之說。

列國兵費

奧國每年一兵所費千五百二元。英國九十五磅。奧國四十五磅。德國四十三磅。法國四十二磅。意大利三十八磅。俄國三十七磅云。

俄國奪取哈拉賓略記

俄曆七月十二日。俄國古羅參可符將軍以水陸三師襲哈拉賓。華兵馬隊四千餘。由馬支哥村落殺出。俄軍氣大阻。及後俄軍得哥薩克馬隊救助。遂奮勇相殺。鐵騎塞野。硝煙迷天。華兵雖銳。終不敵俄軍奮死相鬥。華兵遂遁走。俄兵雖在後追擊。而後援未到。故不敢以孤軍深入。無幾俄兵亦收鋒。至午後三點鐘。遂占據哈拉賓。此役華兵死傷者約二百餘名。俄兵亦頗有損傷。是時除伯利斯坦之外。各村落都會皆罹兵火。男女老幼相携奔走。爲俄兵所逐。殺手折足斷尸。橫郊野。纍纍重積。腐敗死氣。散布天地。狼噉鴉啄。過者皆掩面却走。其悽慘之形狀。非筆墨所能描畫萬一。至廿一日。俄兵由尼可利斯克到者。翌日又有二十餘號輪船入港。於是俄戰愈振。遂占奪亞支喜及馬支哥。其地各村邑之家屋爲俄兵所毀壞。劫掠淫亂。其亂暴不可名狀。俄國占據哈拉賓。所獲劫掠之財帛無算。只略指一事言之。其地有最有名之富戶名劉溫者。其家財所積不知若干萬。俄人沒取其所有。以大貨車二十駕搬運其金銀寶物。沿路村落悉用火燒焚。百姓相簇狂奔。如鳥獸之被鷹鷂所逐。而又無巢可棲止。呼號遍野。遺屍塞路。轉徙死亡於鋒鏑饑渴者不知幾人也。傳謂有俄國將官經其

地者。見有三小兒擁其親之屍哀號求乳。哭聲欲絕。將官不忍見。遂命人抱之往哈拉賓之病院保養云。

按我北方人民之受俄人屠戮凌辱。慘矣極矣。聞者亦無不髮指眦裂矣。所可惜者我國人不能一一查得之。以記之於報。而示之於天下。使死者辱者莫鳴其辜。而生者存者不知所鑒。誠恨事也。雖然其中豈盡無如揚州十日之記者。余願拜寄一言曰。請珍藏之。姑俟三五年。自可提出作一重大之案也。今回之亂。聞某國用毒藥以炮擊吾人。此藥用最毒。無人性之生番以外。不准用此砲。是以生番禽獸待我國人也。而最殘忍暴虐者尤以俄德為最。聞日本某隨軍士官歸國者之言曰。俄德人之慘殺華人。即吾外國人亦不忍見云云。即此可想見一斑矣。嗚呼。我國民何辜而受此奇禍。不得不深惡痛恨于始禍之賊臣也。

又按俄自彼得大帝以來。全是奉行掠奪之政策。此天下所共知也。今中國不幸有義和團之變。自與人以釁。使俄國得乘便利以行其志。盡掠取滿洲蒙古全部。藉勢進取。囊括中國北部。且駸駸而未有已。今對各國宣言。則曰保全中國土壤。列國不得占据而已。則今日畧取牛莊愛理。明日占据琿春蓋平。近又連奪寧古塔齊齊哈爾等地。恐招他人之見疑也。因撰言曰。今吾暫駐兵滿洲及牛莊各地。不過欲鎮靜土匪耳。不久將撤退也。今

於各地創立民政廳。設警察。擬關稅。招商旅爲久遠之計。是無意返荊也。而其口中仍不曰永久占據。誠可謂妙口妙手矣。

紀朝鮮活貧黨

朝鮮活貧黨釀亂。政府在固城派出兵士二三百名以鎮壓之。推原其故。因距釜山北九里之梁山縣附近。聚徒四百餘人。其主義在打破貧富不均之關頭。使貧富之人各得其所。兼以之改革國政。朝鮮某親王爲之首領。聲言富家欺良民。今奪掠其財。分之貧民。又值國中七月省墓之期。率黨人截于路。索祭墓者取錢百五十文。以供軍用。聞入黨者絡繹不絕云。其人皆身衣西服。手執洋鎗。四處蔓延。兵隊人員亦有附和。密陽、彥陽、慶州諸郡皆有之。慶州之湖月城爲其本營根據地。昔東學黨起。引出中東甲午之役。今此黨又作。則其前途正未可知也。

西伯利亞鐵道談

有遊俄而歸者。言及西伯利亞鐵道艱難之事。蓋西伯利亞鐵道爲歐亞交通之地。世人所驚嘆不已者。然其中之難不一而足。且將來此鐵道爲用軍之途。甚不相宜。其鐵道之線。乃爲單線。平常鐵道皆雙線或數線鐵道材料價銀甚高。而製造甚粗。且貝加爾湖東北鐵道之工師皆輕視之。百事皆取便宜。決不問製造之好否。雖有此大鐵道。而以單線之故。將來戰務一起。一日

不能送二千以上之兵。即使能送三千兵。而渡具加爾湖時。船舶亦不敷用。且大兵到則糧必不足。近來所調查西伯利亞之人口數。一方哩只有一人。平原曠野。多未耕作。其糧食萬難供給大兵之用。若使送大兵。則不能送糧食。以此單線鐵道。尙不能送二千以上之兵。遑問兼輸運糧食者乎。

雖然。俄國政府亦自知之。故在西伯利亞行屯田之法。自去年以來。送無數軍隊于西伯利亞。爲屯田之川。或放逐罪人來西伯利亞者最多。皆爲開拓此一大平原起見。然西伯利亞之北。乃一大冰地。其中部雖有平原。亦距冰地不遠。中部以下。爲大平原。樹木暢茂。可作鐵道材料。且此大平原中。礦產無數。將來之富。正未有已。然以此艱難之故。尙須七八年。方能成功。設英國自印度送三萬兵於支那。較之俄國以此鐵道送兵。尙爲容易。南部亞細亞鐵道與西伯利亞鐵道相牽制之說。至今思之。非虛語也。不知俄國政府亦嘗憂及此否乎。

美國經營古巴

古巴既脫西班牙之厄。又爲美國所屬。邇來美國政府。決定在古巴施行政策。執一定之方針。在古巴設立自治政府。使爲獨立。若與外國有關係之事。則非經美國政府允諾。則不能私自施行。又若欲與外國開戰。必問美政府可否。方能行事。如新定憲法。限定議員若干。及募借國債等事。亦必依美國之法律。且美國政府。有時可整理其財政。或在哈巴拿諸島及

各要地。管理砲壘不下。

印度盜風

印度盜賊盛於他處。緣其風氣剛狠好鬥。民之弱者流爲盜賊。有不期然而然也。然自英領以來。刑政修明。化導有方。此風稍斂。但湯網疎疎。仍有顛梟逍遙於法外者。乃近來盜賊中。竟公然立會。爲首者係積年劇盜。釀資建廣廈。并分枝他處。收攬無賴。日教以吞物之法。藏之頸中。初時以線引鉛丸。使吞下而牽出之。喉漸滑而丸亦漸大。其超詣者竟能吞銀盾七、百箇。此輩幾至蔓延通印。泥跡市廛熙攘之中。作種種演扮。或爲文士。或作營卒。商賈行客。販丐僧侶。無不有之。乘人偶爾不覺。轉瞬無論金銀寶貝。皆吞藏頸中。其攫取手法。又神捷無匹。前聞刺吉打谷士渣石公司。被土人夏里申攫去渣石一顆。值抵萬盾。人疑即此會中人也。此外又有專事途劫。且謀財害命者。彼則三五爲羣。俟於歧途或旅邸。僞稱爲巨商。窺客囊金厚重。便與同行。至四無人聲之地。胡哨一起。縱有多客。彼固孔武有力。以一敵一。猝乘不備。無不被害者。查該黨殺人。必以絲巾勒死。並不帶刀。又無血跡。且先使人掘便地穴。遂即藏埋其屍。分贓而遁。手段快捷。無跡可尋。故官役殊難捕獲。此等案中。不知凡幾。或有被害數月。本人之家屬親友。猶以爲他往者。誠爲地方之害也。但有保民之責者。盍籌法捕獲一一以懲治之。以使地方平靖。居民相安乎。

澳洲擬聯合殖民地

英國屬地。即殖民地。幾遍地球。而聯合之法。寂然無聞。自美利堅獨立以來。英之待各屬地。其壓制力爲之稍寬。茲聞有匡伯倫者。深心于聯合各屬地之事。前南非之役。爲導火線者亦此人。也。現爲英國殖民大臣。今南非之戰。英師奏凱而旋。則其待杜國之壓力。過于從前必矣。故各處屬地聯合之心。愈見其切。近澳洲擬聯合屬地一事。爲英國之大問題。今日亦漸告成。英之上下議院。及女皇陛下。皆議妥准行。遂將其聯合之法。公布澳洲云。其法約有八章。畧譯如左。

第一章 殖民地之聯邦

立聯邦之法權。必在聯邦議會商定。方可舉行。惟聯邦議會。即由女皇及上下議院所設立者也。茲擬一人爲澳洲聯邦總督。以作女皇之代表者。故有總制水陸軍之權力。與女皇在本國指英會時有比。

第二章 議院之制度

議院有上下兩院之分。其行事用人之法。亦大同小異。茲詳錄之。

上議院之議員。由每州選出。以六名爲額。又議院之中。分爲二級。第一級之員。任期限三年。第二給者限六年。期滿則改選。全議員中三年六年者各半。又由各員中選一人爲議長。若

定議長。則就議員三分之一而算。至於決事可否。則依三人占則從二人之例。下議員亦由聯邦各州選出。其數必較多于上院。選人之法。視各州人口之多寡而選之。然每州至少亦要有五人。其人必要二十歲以上。方能入格。若有入英國籍者。必要入籍五年後。能服英法律者始可。至于選舉議長。決事可否。亦如上議院一般。然無論上下議員。每年皆有例俸。

第三章 司法之制度

當議院議定之各法。則交總督。指聯邦所設者無論其認定與否。皆提出以告女皇。俟其校合。以一年內施行。又總督可設一行政署。置大臣七名。以司聯邦之法。并設聯邦裁判所。以為代表。兼主理訴訟各事。

第四章 財政

于行政署中。另設一司理出入款項者。聯邦所進支之事。須定以法律。就以稅關一事言之。自新設聯邦二年以外。其各州抽稅之法。必貴合一施行。夫如是則以後各邦通商。皆得自如也。

第五章 各州之權利

以各州之權利言之。則別無可記。各州之法律。有不及聯邦憲法實效之力者。何則。蓋以各

州不得備海陸二軍之權。且又不得有鑄造貨幣之事故也。

第六章 新設各州

當聯邦成立後。各州之外。若欲再設新州者。須經聯邦會議時。大眾同意。然後爲之。

第七章 雜則

就雜項之事言之。設聯邦政廳。其位置宜在新南威爾斯州內之西多尼府百里內。選定地方。可否設聯邦政府。至于確定。亦在梅耳波龍府。在澳洲之南域
多利亞府內開會集議。洎其議定。然後施行。

第八章 未來之事

關於日後改變聯邦之事。現未逆料。故不具載。

英德協商生意

德國政府與英國政府所希望者。在中國保持其利益。及現行條約上之權利。其關於相互之政策。約守之主義。譯載如左。

第一節 中國之河川及沿海諸港。無論何國之差別。惟以各國民之貿易及各種經濟所重者。爲自由開放。使各國共享永久之利益。英德兩國政府。苟得及其勢力之交。對於清國領土。必不失此主義。

第二節 英德兩國政府。以現時之紛擾。于中國範圍中。不得獲何等之利益。其政策亦惟向維持之目的舉動。無他變意。

第三節 其他列國。于中國現時之擾亂。不拘利用如何。亦惟各獲領土上之利益。英德兩政府。在中國執行保護自己之利權。而關於措置者。兩國預相協商。選其良者而行之。

第四節 英德兩政府。有關係于列國當通知本協定者。如法蘭西、意大利、日本、奧大利、匈牙利、俄羅斯及北美合眾國。認定主義。記載之勸告諸國。想諸國亦有同意焉。

麥堅尼小傳

麥堅尼者。美國現任之大總統也。生于一千八百四十三年。道光二十三年本年五十八歲。幼在倭

哈約省康頓市習法律學。一千八百七十一年。得選入此省下議院議員。一千八百九十一年。任此省之知事。專以保護貿易之業爲宗旨。時人遂著一關稅法則。名麥堅尼關稅則者。

于是聲名卓著。一千八百九十六年。當選舉大統領之期。選麥堅尼者二百七十一票。選布

來安者一百七十六票。比較之多。遂得登大統領之位。迄今四年之期已滿。適當再選之期。

前之得爲大統領者。以主張保護貿易之業爲宗旨。勝於布來安。今聞麥又以主張擴張國

威。伸張國力爲宗旨。日本譯爲帝國主義布來安則不然。故麥堅尼又得復任也。及麥堅尼初以保護貿

易爲主。其成效班班可據。自登位四年中。保護貿易之規則。一一施行。又與西班牙戰爭。而

美國大勝。美國之國力。頗見增大。考麥氏以前之大統領克利福能氏在位時。國中輸出品物總價額。三十四億三千萬兩。至麥堅尼登位時。輸出品物總價額。聞三十五億兩云。又前統領在位時。郵政局進款。不過八千二百萬兩。至去年收入九千五百萬兩。國中貯財銀行。至麥堅尼時亦增加四億兩。麥堅尼在位之時。古巴與菲律賓脫西班牙政府之阨。而美國則名爲保護兩國獨立。實則收爲己之屬土。尙有南太平洋島中名沙莫亞島者。美國亦占得一分。美之國力。大張于外。皆藉麥堅尼之力。今再舉爲之。不亦宜乎。

列強在韓勢力

列國駐韓使臣。于朝鮮國事。無分大小。其注意之精密。無時稍懈。如美國最爲妥洽。張勢力于各處。彼之珊茲氏之川意。以電氣鐵道水道及雲山金鑛等事業。當于政治上之交涉相連。其進增甚速。俄國欲先立俄韓銀行。以擴張勢力。今日惟有商工業爲政治上之關係。未嘗有格外之注意。英國經營殷山金鑛。務于商業上充滿實力。英人任總稅務司者甫則氏。監督海關事務。德國失敗于洞峴之採金。遂改爲岩石採金之主意。總之于政治上。各國之留心。雖甚週秘。而于事業上。唯美國之經營。爲各國所不及者焉。

杜王近事

杜蘭斯哇大統領古魯家乘荷蘭軍艦。至法國馬耳塞港上岸。法國人士極爲歡迎。觀者皆

脫帽爲禮。苦里克受其歡迎。心中大喜。臨衆演說曰。布鴉日後有何舉動。尙望今日歡迎者熱心扶助。勿負今日歡迎之初心可也。當時法國國民黨之新聞。皆極表同情于苦里克。法國大統領魯培氏。亦拜訪苦里克。其禮甚恭云。

當苦里克之過馬耳塞街中也。衆人同聲唱和。脫帽爲禮。適有英國人數名過其處。衆人大罵之。且投物擊之。仇視英人之情。衆怒如焚。後又有一羣人圍燒英人旅館。肆行暴亂。英國領事在馬耳塞。衆人對之。皆目爲仇敵。法政府恐致有大事。急派巡察官守護領事署云。今苦里克氏乘火車至巴黎時。在里昂停車。途中人士。皆備極禮貌歡迎云。

德國民氣

德國之民對德皇及各皇族。每多加不禮之行。或投石打擊。及鎗鎗刺殺。時有所聞。義和團滋事之時。德國派兵于中國。臨行之時。德皇演說。而衆人喝采。此時各新聞批評演說之言。人各異議。遂有加不禮之詞而被罰者。茲統計近十八年間人民在德皇及皇族爲不禮之行而被罰者如左。

一八八二年

一八九一年

一八八三年

一八九二年

一八八四年

一八九三年

一八八五年

一八九四年

一八八六年 四百三十七人

一八九五年 五百九十四人

一八八七年

一八九六年

一八八八年

一八九七年

一八八九年 五百十四人

一八九八年 四百三十七人

一八九〇年

一八九九年

夫人民對於皇帝為不禮之事。若是之多。其故蓋有二焉。一則德皇手段極高。一切之事。皆獨裁于已。故人民之發怨聲者此也。二則德國之民主黨。常常反對德皇之政策。故欲害之也。

尼卡拉運河工事

開鑿尼卡拉運河。其重要工事。在疏掘桑鳩安河之泥土。而放出尼卡拉湖之積水。蓋自大西洋岸。苦列頓港。至太平洋岸之普里得港。其間距離凡百八十六英里。工事着手。必須由苦列頓港達於桑鳩安河。而後引尼卡拉湖水。經普里得港以出太平洋。故工程頗屬浩大。今豫計告竣之期。非費長久時日。斷難成事。蓋須以二年為工事上種種之準備。更以八年從事於鑿掘修築也。茲揭其各項費用豫算表於左。

東部 (自苦列頓港至坡加桑加魯羅司)

八二、六六三、〇〇〇

中部	(自坡加桑加魯羅司至拉司拉齊鴉司)	二五、四二五、〇〇〇
西部	(自拉司拉齊鴉司至普里得)	五一、六八〇、〇〇〇
鐵道	(九十八英里)	七、三五〇、〇〇〇
機器	巡查 排水 其他各項	三三、四二三、〇〇〇
合計		二〇〇、五四〇、〇〇〇

依豫算表籌定經費。開工修浚。則工事告成後。兩洋交通之便。直如紅海地中海間之有蘇彝士河。且規模宏壯。現在世界中所有之巨艦大船。皆得通行自在。誠極便利也。

尼卡拉運河條約

尼卡拉運河條約。由英美兩國全權調印後。又經美國元老院之增修。茲譯其全文如左。

第一條 運河於美國政府保護之下。以美國政府之經費。或一公司之借款。或招集股份以開鑿之。據本條約之規則。美國政府。可專有關於開鑿之一切權利及管理權。

第二條 兩締盟國。維持庫禮頓。布兒瓦。所訂條約第八條之意義。因採用一八八八年十月二十九日。英國因蘇彝士河事。與諸國在君士坦丁所訂條約之諸則如左。

一 運河雖在戰時。亦以完全之平等主義。自由開放各國之軍艦與商船。不異平時。

二 運河不可封鎖。不可在內戰鬪。

三 交戰國之軍艦。除絕對之緊要物外。不可於運河內補充食糧。此際交戰國之軍艦除裝載食糧之緊要時間。宜從速出運河外。捕獲船亦與交戰國軍艦。從同一之規則辦理。

四 交戰國若無偶然之防碍。凡軍隊人等。不可於運河內登船起岸。凡戰時物品。不可於運河內裝卸。即有之亦宜從速拔錨。

五 交戰國之軍艦。除難艦外。不宜在運河內或運河兩端三哩之海面內。停泊至二十四點鐘之久。其難船不在此例。但亦宜從速。又他戰國之軍艦。非俟此戰國軍艦拔錨二十四點鐘後。不宜在運河內或運河兩端三哩海面內拔錨。

但自一項至五項之規定。若合衆國有以己國之軍隊。防備己國。及維持公安等措置。則不在限內。

六 關於運河之樹木或建物等類。亦視爲運河之一部。不論平時戰時。不許襲擊之。不許害其效用。

七 運河及其附近。不可建設砲臺。但爲防不法備變亂之故。合衆國可隨意置陸軍警隊。

第三條 兩締盟國速批准交換此條約以通知列國而促其同意。

第四條 本條約於美國元老院之協贊。大統領批准之。於英國則女皇陛下批准之。於調印之後。六個月內。在華盛頓或倫敦交換之。

按約中第一條第五項但字以下一則。乃美國元老院所增加者。其希望不外使防禦的管理權。一切歸美國也。但英國政府同意與否。則猶屬未定之問題。此兩國政治社會所最注目之點也。

俄人訴本國政府之暴虐

俄國學生之騷擾。後來雖暫停止。未必歸于鎮靜。今據泰晤士之巴里電報。俄國之著作家四十五名。以本國政府之暴虐。無不椎心頓足。乃送書于巴里。公之同地。普訴于世界之仁人。求爲止其殘酷。今譯其文于左。

我等本俄國之下民。今以苛虐難堪。不得已從事于文筆。訴諸各國之有志者。嗚呼。我雖承祖宗之訓令。毋許肆意橫行。然人有一己之自由。有一己之權能。豈可抑壓不伸。棄其身爲不痛不癢之身。甘爲囚中犯人。日受獄吏之鞭撻苛虐耶。既不甘爲囚犯。而欲超拔乎尋常之外。又豈肯任人搬弄。被人阻遏耶。今我等欲伸張自由思想。而權能被奪。眼前發生之事。雖有所述。又被檢閱官所阻。可驚可恨。猶有過于此者。似此我邦將來之如何結果。誠道

之不勝其道也。我等對於同胞民衆。互以義務相感。故欲依賴于外國有志之士。大伸自由權利于國內。以期與文明世界相通。豈意事不由人。去月十七日。于聖彼得堡卡莊。思奎亞之街角。我等爲警吏所苦。身不能藏寸針。手不能持分鐵。飛拳踢足。烏足以爲抵抗。乃至男女老幼。數千人民。際此時間。尤受殘酷。更遭暴虐。又以哥薩克之兵來。包圍更甚。草木淒涼。悉成刀鋸。雖有堂堂大道。而逃避之途殆絕。暴虐無辜。曷可言狀。此等人民。不過爲好奇之心所感而集者。而警吏肆意不察。惟得捕獲。無容赦宥。作威作福。揮其鐵拳。揭其刀背。打之擲之。踐之踏之。四面悲啼。震撼天地。其有身着制服者。而彼等誣以罪戾。亦逞其暴虐而捕之。苛刻如斯。鐵心人亦安得不爲之咋舌耶。

我等同踐此土地。同經此暴虐。塗毒生民。親見諸市府也。我等雖不能免哥薩克之鐵鞭。避警吏之鋒刃。而俯首思想于將來。不禁恐怖悲哀。手足無措。遂糾合同胞民衆。共圖芟除蔓草之策。即不能振興于目前。亦可望于將來之補救。于是廣署名于書面。俄國士子人民。忠義自矢。皆存一片自尊之心。仁慈之念。所謂守望相助。疾病相扶者也。外國有志之士。亦將聞之憤氣焉。謹以區區忠憤。訴于世界之新聞。倘爲辨護。則感之不勝云云。俄國亦爲世界之一大國。兼以土饒兵健。而國家不免騷亂者。亦以壓制太甚。民生艱苦。此輩學生。深慮結果之難全。急欲革其苛政。祛其暴官。以圖日進于文明。而政府反欲捕縛無餘。此輩乃無所

施其機謀。不得已出此舉動。是亦學生救國之苦心孤詣也。中國雖地廣民衆。物產豐饒。無一足以制勝于外國者。豈誠兵制云爾。而全國人民。猶是夢夢。呼之不醒。牽之熟睡。土地分割。無關痛癢。爲學生者。能無愧乎。能無愧乎。

俄國多魯思特意伯上奏

俄國之學者。訴本國政府之暴虐。既如上所說。美國新聞。又載阿得利有千五百名之被捕。聖彼得堡、莫斯科、阿得利及其他處。皆宣布革命之流言。至近日有四十八時間捕縛數百名之事。而流言更盛。紛擾尤熾。多魯思特意伯見事關重大。乃捧呈辭表于俄皇。其文曰：再行殺戮。再見屍橫于道。傍再用酷刑。再失命于無辜。此方冒加脅迫。彼方愈深怨恨。切齒報仇。願置身家于不惜。則將全國人民。皆爲政府之仇敵矣。夫政府之所依賴者。兵卒警官也。使彼等妄殺無辜。恐彼等亦有所不忍。倘一旦威嚇不從。必反對于政府。聯合于學生。彼時雖有強暴手段。亦無能爲力。爲今之計。欲舉鎮壓之効。斷不可有勦滅之舉動。當用溫和而善誘之始可。若惟以殘暴是逞。則彼等勢力更張。破裂更速。悲慘更大。而罪惡悉貫盈于政府耳。悔之又何及哉。

列國海軍力

西四河下。英國政府。以本年一月所查英法俄德意美日之海軍力之公書。提出于議會。

其中艦數部分如左。

既成軍艦

戰門艦	五八隻	英	二八隻	法	一五隻	俄	一九隻	德	一五隻	意	七隻	美	六隻	日
甲裝巡洋艦	九		七		一		四		五		二		六	
保護巡洋艦	一〇三		三八		三		一五		一六		一四		一四	
無保護巡洋艦	一一		七		三		二〇		〇		六		三	
甲裝海防艦	一〇		一四		一四		一一		〇		一五		四	
通報艦	一一		一		五		三		〇		一		一	
水雷母艦	三五		一五		一七		二		一四		〇		一	
水雷驅逐艦	八九		九		一〇		一三		三		三		一	
水雷艇	九五		二三五		一七一		一四〇		一四三		二〇		三三三	
潛水艇	〇		四		〇		〇		〇		一		〇	

未成軍艦

戰門艦	一六	英											
甲裝巡洋艦	二〇	一五	法										
保護巡洋艦	四	二	一	俄									
無保護巡洋艦	〇	〇	〇	七	三	〇	德						
甲裝海防艦	〇	〇	〇	〇	〇	〇	一	六	意				
通報艦	〇	〇	二	〇	〇	〇	〇	四	〇	六	九	美	
水雷母艦	〇	〇	〇	〇	〇	〇	〇	〇	〇	〇	〇	〇	日
水雷驅逐艦	二四	一四	四三	一五	三	一七	八						
水雷艇	四	四四	二四	〇	〇	一二	三八						
潛水艇	〇	一二	〇	〇	〇	七	一						

土耳其郵便局

土國郵便局問題。局面一轉。最關重大。頗出世人意外。土國政府。主張廢止各國郵便局之意更固。日來新通牒于各國大使。其意以外國商人。雖各得本國郵便局之利用。而密輸入禁制品之事。求其注意云。

列國大使。皆以爲殊屬無禮之事。當時列返其通牒。列國政府。以此事件。各遣一代表者。對于土國政府。益加強硬。且有示威運動之意。列國大使。守此訓令。事態更重一層。土國皇帝憂之。即遣外務大臣。至英俄德法奧五國大使館謝罪。謂此事全出于內閣大臣之專斷。並非帝之意思。已命閣臣依舊辦理。今後無得再蹈前愆云。列國大使。各有諒之之意。列國大使皆答之。謂本件既聞知本國政府。如上一片宣言。不能遽然解決云。列國中惟德國大使表其滿足之意。

近來各國郵便局長。雖由土國郵便電信長官通知。授受郵便物。而各國郵便物。今尙以大使館保護輸送。歐洲各漁船所載之郵便物。皆拒絕土國受取。

德接醇王

德皇在坡士登新宮接見醇王。斯時德國各王公並外部大臣。普魯士各大臣以及柏靈並坡士登兩處統兵各大員等均在。

醇親王云。大清國皇帝因上年變出意外。心誠抱歉。雖敝皇帝並不與謀其事。然臣民有罪。責在皇躬。敝皇帝豈得辭。願自上年禍變之後。中德兩國邦交儼若雲遮霧蔽。茲事既定。深望兩國後此。益臻親睦云云。

德皇答詞云。中國上年所犯之罪。實屬僅聞。本皇帝深悉貴皇帝並無躬親與謀其事。皆非

左右諸大臣之罪。但貴政府不可因曾經遣使前來。即期悉泯前嫌。欲冀補贖前愆者。則將來貴政府務必善爲設施。並須依照公法辦理一切交涉。然後我兩國可望復好如初。而貴國亦得列入有教化之邦也。

以上詞語。爲德皇繙譯者。乃前駐津德國領事薛鏗多夫。代醇王傳譯者。則蔭昌副都統也。德皇答詞既畢。醇王即將國書呈上。書內略云。大清國皇帝因上年德公使克林德遇害之故。深抱歉忱。茲已令於北京立碑以誌惋惜。並謝德皇遣兵來華。勦平匪亂。末云。深望此後中德兩國永敦睦誼。較前益增親密云云。

醇王禮畢而退。兵隊獻鎗。樂兵奏樂。以送王出宮。

同日下午。德皇啓鑾。至阿藍齋利醇王行宮回謁。

醇王於是日下午。乘車至前德皇弗烈篤力克墳處。安置花園於墳上。蓋循西禮也。

又文匯報得英京廿二日來電云。德皇本日正位皇座。接見醇王。德皇先以手招。王應召而前行三鞠躬禮。退時禮亦如之云。

非律賓近況

人口。據最近之查核。該島人口。約共二十四萬四千七百餘人。內美國人八千六百人。軍人在外。

軍政 美國占領以來。該島尙統於軍政之下。當局者雖銳意欲化全島爲美國風。處處有改良之舉。然其進步甚遲。又諸島中尙未配置守備兵之處甚多。如悶駝羅一島。殆全爲閉鎖不通之地。日下該島港灣。外國船之可以隨意通行者。不過馬尼刺、衣路、衣路、塞布、漸婆安庵等處。

立法部 該島立法權。今屬希肥兒空密守晤。議員每禮拜一會。討議一切法案。議決以後。直發布爲法律焉。其空密守拿斯。以五人成之。今爲議長者。泰富島氏也。

民政施行期日 該島民政。聞將以七月一日實施云。又因一切未備。或延期至九月以後。亦未可知云。

馬尼刺市中工事 美國占領菲律賓羣島以來。所費資金甚不少。僅以馬尼刺一市言之。亦在一千萬佛幣中歐一千萬元幣中歐一以上云。但其結果亦甚好。如稅關製冰所。市場之新築。橋梁之架設。道路之修繕。及衛生教育等類。皆着着進步云。

物價 該島自歸美國建領後。物價異常騰貴。如房租現已較前增四五倍。然猶無止境云。

使節致賀

摩洛哥王國。在非洲西北海岸。國雖褊小。獨立於列國互相猜疑之際。依然保存中古之習慣。而不受某國之影響。各國公使謁見其君主之際。炎天之時。傲然跨馬。執傘而坐其上。使

各國公使脫帽爲禮。俯伏於地。以示其尊嚴。英國與此國。交際甚深。國在直布羅陀對岸之地也。故英國新君即位。君主特遣使節致賀。英國朝廷。派軍艦以迎之。同行者共二十九名。衣摩洛哥禮服。在波特毛司英海軍港上岸。乘火車入倫敦。正使有妾二名同行云。其不受歐人之感化。不畏歐人之威勢。亦足觀矣。

地中海英軍力

英之海軍力。在能制地中海之運命。若此事稍有變動。則歐洲各國均勢之力。爲之遷動。各國之對東亞關係。亦蒙其影響。此世人所注目也。英國海軍少將培列士花。現任地中海艦隊之副司令官。專盡力於練習艦隊之事。然事不如意。寄書友人。深嘆地中海海軍力之不振。既以其意見陳之常道。載在報章。其論甚確。今裁錄一二曰。地中海海軍力之強弱。非因艦數之多少。艦隊之優劣。在其根據地之如何而已。直布羅陀之地。爲地中海西方門戶。已爲英國所扼。已得制西部地中海之運命。自此地至亞力山大港。中途有馬耳達島。久爲英國地中海海軍根據之地。東部地中海之權。已歸其掌握。不圖法國南方都隆軍港。大爲振頓。介立於英國兩根據地之中。將來有事之際。爲害非淺。茲舉其重者而列之如左。

一俄國黑海艦隊。以賽巴司特波爲根據之地。在苦里米亞海岸俄國艦隊。不能越土耳其海峽

而出地中海之事。條約所載。班班可攷。雖然俄國當有事之際。其眇視此條約必矣。以英

國今日之外交。既不能保護土耳其。而以土耳其起防禦波司花拉司海峽之工程。俄國復不承認之事觀之。則他日黑海艦隊之能出地中海必矣。果爾。則由達達惹兒司至馬耳達。與由都隆至馬耳達。皆同其距離。俄法二國之艦隊。皆得合攻馬耳達矣。

二阿非利加洲北岸突尼斯國爲法國所保護以來。飛則達港。已變爲海軍要地。須數點鐘之久。可襲擊馬耳達矣。

三阿非利加洲北岸自倭耶至飛則達之間。港灣甚多。使用水雷艇。大得其便。法國欲利用之。已製成水雷艇百五十艘矣。

觀於此。若英國與俄法開戰之事。敵之強如此。我之弱如彼。豈不可畏哉。英國地中海海軍力之不振。亦有各種原因在也。

一列國軍艦。時有增加英國雖有增加軍艦之意。自一千八百七十九年。造船廠工人同盟罷工之後。而進步甚遲矣。

一以昔日攻城材料。而守直布羅陀。恐難爲用。若敵之大砲自西方來擊。恐有陷落之虞。欲修補其弱點。自不能不侵西班牙之半權。恐無實行之望矣。

一艦隊不在之際。而防敵人上馬耳達之岸。須兵二萬二千人。然該島之守備兵僅七千人。恐未能禦敵矣。

觀於此。英國政府不能不有戒心。然南非洲之戰。將亘至兩年之久。財力兵力耗盡無數。政
府苦之。加之殖民地散在各地。一旦有事。則先派地中海艦隊若干。以從事鎮壓。再以英國
近海之艦隊若干。以補地中海艦隊之缺。英國之常海軍將官深爲遺恨。蓋新艦隊與舊艦隊相
混自不能指揮如意謂此事大不利於維持地中海海軍之力云。

檀旗故事

檀香山自來酋長之雄者。以金美金章爲最。然彼所以得撫有全島之地。全賴英人某君授
以鎗炮之法。既得酋長之位。英人勸其藩屬英國君主。佔士第一許之。故檀山之國旗。懸用
英旗。迨至美國倡獨立之後。美人勸其變用美國旗。當是時。從英則美怒。從美則英怒。是以
土酋將其旗變爲英美相合之旗。此旗本英旗之式。而加以八畫。蓋指檀香山八畫海島之
意。此旗改變之原因。各國皆知之。惟中國不通外事。懵然罔覺。某年檀香山有船載檀香至
廣東發賣。中國官吏不准其進口。因其所懸之旗。素所未見故也。中國官場置國於不問。除
鑽營巴結外。無他事。故有此弊。此旗至一千八百九十八年。則盡變爲美國旗矣。

西伯利亞鐵道之失敗

自哈拉賓達旅順口之鐵道。以西歷七月十八日完成。故近欲着手於西伯利亞鐵道全部
之轉運。然據阿地士沙所發之報。則與最初之計畫。大相違異。自莫斯科至旅順口之旅行。

至少亦要二十八日間。初擬一下鐘之平均速力。行卅五哩。實際不能出九哩以上。據阿地士沙奴威士之報。謂一年之中。有種種之窒礙者。居六個月。故鐵路局於一月有半四十可到着之議。亦不敢擔保云云。則前云自歐洲之中心。至東亞極端。或云七日。或云十九日之旅行日數者。皆成夢想。於經濟上及軍事上。西伯利亞鐵道為可失敗之一證也。

河內法亞博覽會

印度支那總督府。以一千九百零二年十一月。於河內開法亞博覽會。已通知於有關係之列國。河內為東京之首府。中有紅河。其廣約千里。日本里日本一里可以巨船直溯於河內。此地洋樓。現有五百六十九間。有逐年赴於繁盛之觀。人口則安南人十五萬。中國人二千。歐洲人一千五百。又約有一千五百之法兵。自河內經北寧至諒山之鐵道。經已通行。其他鐵道。皆以此地為起點。如雲南鐵路完成之後。其為世界一大都會必矣。博覽會之正室。長約四十丈。廣約十丈。閉會後擬為博物館。存之永久。又其周圍築夥多之陳列所。分之為左之三部。

第一部 法蘭西本國及印度支那以外之各殖民地部

第二部 印度支那部（東京安南交趾東埔塞拉阿士）

第三部 極東部（中國日本暹羅朝鮮蘭領印度菲律賓賓諸島新嘉坡及英領緬甸）

香港上海膠州灣海參崴

爲各國設一間之陳列所。依地理上之順序。而排列其出品。分左之三區。

第一區 教育學術技藝門。即美術品古董學術上之器具等。

第二區 天產物及工藝門。即鑛物類農產類林產類消耗品等。

第三區 機械建築土木門。即農工業之諸器具航海鐵道水力利用蒸氣及電氣應用等之諸機械類。

於陳列所。不必納租。電燈煤氣。及蒸氣動力。亦無庸給值。全以博覽會場爲稅關之倉庫。固不須納關稅。且直接而送至博覽會之各物。亦低減運送金。是館工事。已成十分之三。自英國之殖民地。已有輸送出品云。

美國新大統領小傳

美國新大統領羅維福者。紐約人也。以一千八百五十八年。生於此地。其先祖爲荷蘭人。移住北美。已及八代。實紐約市豪商之一名家也。其父大工業家。大慈善家。被知於世。羅維福既藉祖宗傳來之巨富。本得送華侈奢美之生活。然此非其所志。又無蓄富之念。彼以入政治界。送生活爲目的。嘗言曰。世界上無如亞美利加人之可賤種類國民。彼等者。不識義務。一意致富。不顧他事。使其子孫。徒懶惰放蕩。散財而送日云云。即此數語。亦可覘其志。非與

尋常執紼子同日語矣。彼三十二歲於蝦巴道大學。卒業史學及法學。後直至紐約。翌年被選爲立法部之代表者。彼年少氣銳。不問己之黨派。及反對黨。於立法部內。指摘弊端。一無所隱。使各老政治家飽喫一驚云。

羅維福者。實一戰士也。彼極愛體力之養成。頗嗜冒險。其在蝦巴道大學時。以銃獵家鳴。後退出政界。稍就閑散時。於西方之寒村。賃一茅屋。暫爲獵夫。然彼之名心如燃。到底不忍長臥田園。以消長日者。遂出而與軒列初治等。爭紐約市長之位。功不成。一八八四年。加入政黨。無幾於大統領蝦利遜之下。爲事務官。後爲紐約市之警部長。後當選舉大統領時。彼爲紐約州之委員。矯所治下之陋習。誠不少云。

一八九七年。由麥堅尼之所命。爲海軍次官。熱心主張與西班牙戰。翌年戰端既開。彼直辭職。下於民間。集熟練銃獵家。及新墨西哥。阿利達拿各地之牧童。組織一義勇隊。自爲之將。出陣於喬巴。陷喬巴之三治亞。告之際。彼肉薄西班牙所守之十壁。進擊而大獲勝利。因此戰功。博非常之名望。戰後一八九八年十一月。任紐約之知事。昨年十一月。改選大統領之際。彼被選爲副統領。及元長院議長。因此回之事變。累進而就大統領之位。彼雖武夫。然亦爲學問之士。彼雖實行家。然亦爲文學之人。其所著書頗多。如「西方之領得」茅屋人之遊獵」及「茅屋生活及獵」皆描寫彼之實歷。而出以瀟灑活脫之筆。又「亞

美利加之理想。」是表彼之政見者也。上自共和政府之初。下至今日帝國主義之新時代。所以發達之事情。叙述詳明。皆推重歷史的。且求所以振興之。此外更編纂歷史上之圖書。及紐約之歷史摩利士傳等書。

彼又以家庭爲養氣之地。其夫人生三男三女。親龔和睦。而送家族之生活。其年齡至今。尙未上四十。又其狀貌。雖非魁梧奇偉。然英姿颯爽。廣額豐鼻。眼炯炯而放光。鬚鬚而繁植。一望而知其爲渾身都膽精神滿腋之士。彼之辯舌。雖非顯著。然其語重而心長。言短而意賅。一登演壇。威風凜凜。使聽衆傾耳而不忍去。彼對資產家。常警告其勿怠義務。欲遂己之義務。不可不入政治界而送生活云云。又謂欲事業之進步。已須先爲實行。彼自爲空言虛論者。必無行之日。又時在大庭廣衆中。表示政治家之腐敗。及無道德心以警世。觀其言論行事。其英氣勃勃。亦可想見矣。

故麥堅尼大統領。頗富精力之人。彼之氣力稍異其種類。前者傾全力而集於合衆國經濟生活上。後者注重於國防問題。期補從前大統領之所忽於孟路亞美利加者。亞美利加人之亞美利加之言。非獨觀爲神聖。且欲進而精練之者也。彼經濟界之智識。及其辯言。雖遠在麥堅尼之下。然其強大兵力之志。則比前者固過之遠也。彼大學教授。熟知其學生時代之覺道利蒿衣氏。今駐德公使嘗評羅維福曰。我合衆國公共精神之健存與否。全觀此壯年政治

家所齋來政治成責之如何而決定。云云。其爲人所屬望。亦可略見一。斑矣。



地球大勢第二

萬國平和同盟說源流考

國家學會雜誌第四百四十四冊。載日本法科大學教授法律學士寺尾亨氏所講演之一篇。題曰萬國平和同盟說源流考。其言曰。

自俄皇一倡平和會議。環球新報。評之者不啻千百。然至言此說關於古來之沿革者希矣。余所以欲先舉其沿革之概。次論現下之情形。并述將來之意見也。然日晷有限。請主沿革而述之。

此次平和會議。新報記者多疑之。謂由俄國從來政策觀之。恐不過一時之權變也。余亦不知俄皇真意所在。然不論其真意何如。但由其言觀之。其旨固甚善甚美。世人亦應心許耳。余故姑視此議爲平和理論。實施今日之見端而暢述之。

按此會之主旨。不出三者。一曰除去現今列國紛爭之原因。二曰禁止軍備之擴張。三曰永遠設置保列國平和之公法廷。一切之國際事務。當從法律調理之。

然而由此會議果能使一變現今弱肉強食之世界。而副俄皇及古來學士之所企望否乎。果能永行於將來否乎。縱令行於將來。而自今日進其步。果能得到幾程否乎。是余之所疑也。夫戰者。不獨不能廢於今日。即將來亦恐不能也。古人有謂爭戰爲世間不可缺之具。且

謂有益於世。又謂將來亦然者。今日哲學家之論。亦有尙戰非戰之兩宗。吾人之學。雖與哲學異域。今舉其一二言之。則尙戰家云。爭戰者合真理。屬正義。又云。爭戰者爲善事。爲有益。然現今學說多非之。故余亦姑以平利論在今日爲得真理者。尙戰論爲不得真理者。試詳而論焉。

余尙有一言者。凡欲列國平和。苟無中立以裁決之者。則勢不能行也。何則。如今日列國對

峙之時。每生國際交涉。

國與國有交涉。謂之國際公法。交涉公法謂之國際公法。

欲使之相結和局。則必不得不創由法律裁

決之方。即開辦萬國公法廷是也。夫開辦之法。雖有數種。要之。猶一國內法廷之裁決涉訟。

使原被結其局。其所異者。祇在兩造之爲人與爲國而已。故余之說平利會沿革。間有涉中

立裁決之沿革者。聽者諒之。

考之史乘。古代爭戰最多。人民交通。概以干戈爲紹介。若不折一兵。而兩族相見于樽俎玉帛之會。則幾希矣。蓋古之民。各從其種族。各異其宗教。視他族爲敵。所由戰爭不絕也。然世運稍進。則戰鬪之術亦進。其害愈大愈烈。於是乎人民起期望太平之念。昔在印度。抹紐出。而後人民始知結和局。在支那有唐虞之治。周孔之教。而後生長平和之思想。泰西亦然。如希臘之初。聚落各相凌轢。紛爭無虛歲。然人文漸開。冀平和之念亦漸熟。及伯刺敦出。始創一聯邦於亞都耶幾島上之策。持廢絕兵爭永保和局之見。其後有法蓮古士。又擬創完美

聯邦於意荷尼安島中。又安費克舍尼名會之成也。亞然斯巴塔諸邑。咸出代理人。代理人即代表表者代其會之人。表其意。代理者代其國。其也。理其事。即公法謂君為代國行權。公使為受君命代國行權也。弭兵爭。裁決國際諸案于此。是今之主張平和之說者。猶往往引此事而證之。曰。昔時已有此事。今日豈有不能為之理哉。希臘已衰。羅馬嗣興。羅馬之民。長於干戈。常事爭戰。及後成一大帝國。遂生平利之念。漸取懷柔之政策。欲俾宇內之民庶。咸安堵於己之管理。乃命黑是亞官。官法推啓贊之由。考其曲直。以決其可戰與否。夫已問其曲直。則屬法律之事矣。足證人心傾向於平和也。當時羅馬法章中。有所謂萬民法者。已設裁決國際案之章程。法家多以為現今萬國公法。實始於此。及至中古。世運復替。蠻人侵入之世。兵馬倥傯。紀綱壞亂。以及封建之世。更相兼并。以及王國之世。攻伐尙不已。反覆沈痼。生民之患極矣。於是人人專務傳播耶蘇教。以圖和平。故當時羅馬法王之以結和局勸諸王侯也。有神命之休戰。神意之和局等語。降及近古之初。爭戰之數。較之往古頗減。且自國力平均之說起。至不得猥以攻伐闢國土。然往往有藉口於是。却資攻伐者。然文化稍開。國際諸案多主和局。唯交涉漸繁。時不能無開釁。當其開釁。則戰鬪尙慘。未曾有所謂戰時公法者也。至十七世紀之初。和蘭骨羅修司。始有和戰法律之著。蓋骨氏以前。雖非無倡此說者。而世之能傾耳者少也。骨氏之法。固未能使凡百之國際案悉成和局。然自非有至當之理。干戈決不易動。並戰時亦有多少法規。

等。俾戰鬪漸帶法律氣味云。若夫欲實施一切禁絕爭戰。永維持平和之說者。實自法國顯理四世始。蓋出於其臣修禮之意也。顯理近代之明主。已能治其國。乃進擬結合全歐爲一大共和國。以維持治平於無疆。多以此之宗旨。解既成之軫輻。其後至綠樹四世之朝。法國又有教士仙彼爾。著萬世平和策。以公于世。蓋亦在推演顯理四世之意而完成之。會有注烈比條約。乃本之而詳論平和之畫策。千八百十五年。德意志聯邦之成於維也納一會者。實全賴此書之力也。後至蘆錯氏。愈敷衍此書。遂立原則之體。現今所謂戰時法之原則曰。爭戰者。成於國家與國家之公事。非一人一人者法律學之定語。蓋謂私人與國家無涉者也。與一人之私事。有兵卒軍隊之職分。而後始生此關係焉。是雖係蘆錯氏之言。實胚胎于仙彼爾氏之說者云。爾後倡平和說者。接踵輩出。我福駱克、孟的斯鳩、亞談、蘇米斯、諸碩學。亦皆抵掌掉舌焉。然其說不過從人類之所好。而望環球平和於百代之後。至于實施之方略。皆措之闕如。蓋未免爲空言也。當時不甚重之。亦有故矣。

既而辨散出。康得起。均倡此說。然二氏之學。其始殊塗。其歸則一。亦可以知平和說之近理矣。夫辨氏之學。專求諸實。英國學士之風。此類爲盛。所謂實利派也。故其說務避急進躐等之弊。欲順序漸進。以俾歸平和也。氏云。俾歸平和之手段。宜先制定國際法典。不必要完成於一時。但探國際上已實施而無礙者。隨時纂輯。以期成功於數年之後可也。又云。國際上。

有由一事物方所了結之新案。宜速添補之於約款中。其既成約款中。所有不合公理。生梗議啓爭端者。宜速刪改其條目。又云。兵爭之端。易發於軍備之盛強。不如使列國節損之。又云。列國之殖民地。宜使其脫本國之羈絆而獨立。凡此數項。氏之所以使天下弭兵絕爭。以漸達於平和之方策也。其著書具論此宗旨。

康氏之學。專求諸理。所謂理想派也。故其說反覆縱橫。詳論人間之不可不平和。即使今日互相攻伐。自後亦無不歸平和之理。無氏亦以爭戰不能遽行禁絕。蓋欲欲以漸弭之也。當時雖非無如黑給兒駁之以立異說者。然後之學者。多左袒康氏。蓋自辨康二氏之出。列國之倡平和說者愈多。尙戰之說始微焉。

今也更進一步。欲說近代及現下之情形。請先以法國革命為發軔。夫法國之革命也。斷頭流血。其慘酷不忍言。固諸君之所知矣。然本是出於平和之意見也。蓋其所謂三大宗旨者。自由平等友誼是也。夫崇自由。則束縛抑制固不可。主平等。則強凌弱大吞小固不可。重友誼。則爭鬪誑詐固不可。故革命以還。環球之倡道平和說者。愈多滋熾。遂至公法家中。殆靡不言之者。如彼伯倫知理。費爾士。裴律大。持編纂國際法典。實施諸環球列國之宗旨。是等之宗旨。非特出於學士之間。而此種之協議會。亦蔚然基布于天下。如赤十字社。即其一也。蓋平和也者。不問政治法律宗教財務工藝。凡在天地之間者。孰有不希望者哉。故其會亦

不問屬何種。至其所準的。則必歸于平和之一點焉。其蔚然大興不亦宜乎。氣運已如此萬國會議遂不能已矣。乃千八百八十九年。乘法京有大博覽會之舉。初開此會議。嗣後續開設于倫敦。及不拉錫爾。或討論國際法之原則。或講究國際法實施之方。成安商關於經濟教育物質之進步公共諸案。以圖使一切之國際關係。不訴之於干戈而和諧于公論之方策。其他如英法之學會。亦咸持此意見而起。其影響之所及。此種報紙亦紛然出于英美法德諸邦。然曰某協會。曰某報者。其種未免爲私。即謂非如往時法王顯理等之所爲者也其得公而實者。蓋近代始於北美合衆國見之云。

美之爲邦。創建以來。自負爲通商國而非尙戰國者。其國本有平和協會。至千八百三十五年。提起於馬擦酒錫都州議會。以應創辦國際公法廷。使其裁決一切國際案之議。間一歲始被採用。無幾更上中央議院之案。後至千八百七十四年。遂見議定。爾來美國當與諸國訂條約。輒加以兩國若生轉轉。則當乞局外中立國裁決。必不得即動干戈之一款。此風直動英國。以勝布來都等。嘗謀于美國。擬與辦常設中立裁判院。美國議院議定。美國之與外邦有生交涉。則許以大統領之意。委局外國裁決之事者。正在此時也。

在英國。則千八百四十九年平和之說。始起于議院。如議員哥伯蘭。最銳意倡道者也。然其議連蹉跌而不見納。及至千八百七十三年。顯理利渣復大倡其說。遂使議院定凡駐外外

交官于國際諸案均令務以平和結局之議。然其實不見施行。但爾來議院中。每有張皇兵備。其倡異說者。輒引此議定以爲據云。

歐洲大陸諸邦。平和說之上議院者。以意大利爲先鞭也。千八百六十年。嘎李哈底始提倡此說。頒撤兵公文於諸邦。然無幾不幸自執干戈。千八百七十一年。木累理復倡此說於議院。不見納。間一歲。政治公法二學大家。夢幾爾。又于議院提起國際之案。當付于中立裁判。及訂結條約之際。當以此項入條目中。并私法上緊要原則。亦當入約款中。數案遂見採用。後夢氏之入政府也。多賴其力。得見于實施。及與蒙的內克羅暨英國訂條約。即以此等各項入其約款。時千八百八十三年也。

自是平和之議。滋熾于歐洲。荷蘭、諾威、噠馬、葡萄牙、奧地利、匈牙利諸邦之議院。採此者相先後。然亦不過謂不得已之外務當行之而已。在德國。則千八百七十年以還。議院已有此議。且銳意倡道之士。亦爲不乏。然本是尙武之國。自七十年役後。民視征戰。有若國之固然。平和之說。迄今不見採用者。不足怪也。在法國。則此議之上于議院已久。千八百四十一年。福烈的律罷石宜。復大掉舌。然人徒稱其有理而已。千八百七十九年。此論復盛起。然沮於爲時尙早云之俗議。千八百八十七年。旋起旋敗。逾年又復起。勢焰更烈。於是其議之一斑。始見可決。提議案之被採用謂之可決。被排斥謂之非決。即議院之定語。即嗣後訂約款中。當加國際案者。務乞局外國裁決。而

結和局之一項是也。然亦不過具文而已。在俄國則平和說之有無未嘗聞之。蓋其爲世人之傾聽者。以此次提倡爲始云。

若夫以乞中立裁判之條目。實載約款中者。其草案成於千八百七十三年。雖非萬國平和會議。而千八百八十三年美國之與瑞西。千八百八十八年法國之與也哥華士爾。皆訂結一切國際案。統決以中立國裁判之約。千八百八十七年以來。英美法三國之間。亦有此議。然梗塞不協。事遂中止焉。後有此約之更廣而其効之更大者。則千八百九十年四月十八日華盛頓條約是也。先是南美諸邦。開衅相續。騷擾弗已。於是北美合衆國與南美十有七國。聯結此約。以弭兵爭。條目凡十數款。開辦裁判院之方。亦頗完備。

然而萬國公法廷之開設。後來果可期否乎。今舉其已見端緒者。蓋有數類焉。如捕獲裁判院。如戰時有捕獲外國或敵國之裝載軍火船舶等其如何處置皆裁決於此院也 聯成裁判院。即謂聯合與其事有關之數國領事官使其當判決之任者也 皆據國際公法而

裁斷者是也。然如捕獲裁判院。一國之所設。非他邦與共裁決者也。惟聯成裁判院。裁決涉于民事刑事等件。彼我法官。咸蒞于廷而聽之。萬國公法廷。其於此爲見端乎。此種又有塔牛布委員會。亦曾爲各邦聯合裁判院。其他因某某一事。嘗開辦中立裁判院者。亦不爲少。然此等裁判院。未得謂爲備萬國公法廷之規模者也。況其非常設乎。今環球法家之所希望者。則在開創可裁斷一切國際案常設公法廷。而構成之方策。諸家各異其說。然是本至

大至難之事。故其說於理雖切。於實則不免爲迂。均未知其可否也。今試以類分其說。則有七焉。次第之如左。

第一說曰。要使平和策行於實際。則止當少改現今國際舉措。其術無他。只使開辦中立裁判之數務加多耳。蓋姑息之策也。第二說則更進一步。爲宜創辦常設公法廷。限某種之案而裁決之者。第三說則更又進一步。苟爲屬國際交涉案件。一切可裁決之者。第四說則更加於前說。以爲宜設制裁之事者。制裁者法律之語。謂當必使遵奉其法之權力也。第五說則更講所以使其制裁確立之

方者。其說曰。以全地球爲一大聯邦。或一大合衆國。以建中央集權之制耳。第六說則更進一步。以爲宜混一全地球。以成一國者。第七說則更進一步。以爲宜舉全地球億萬之民族。渾使歸于一類者。其方策。在不獨以同一政治。合有形制度。更以同一宗教。改鑄無形心性。使好惡總歸一途也。是等七說之利害得失。及實行之難易。未可猝爾論定也。然望宇內之平和。則必先設一公法廷。設公法廷。則不能不附制裁力者。亦是自然之勢矣。然則附其制裁力方策之若何。吾人講之於今日。亦未必爲屬徒勞也。故今遭俄皇之提倡萬國平和會議之時。聊舉此事關於古來之沿革者。以污諸君之清聽焉。

開議平和會要旨

據美國新報所載歐洲電報曰。萬國平和會議即弭兵會定於西歷三月初旬。開於聖彼得堡。俄

十
帝提倡領要。一曰。此五年間。禁止戰爭之事。二曰。此次會議。係協商各國軍費。以現在之最
多額爲准。在此期內。不許再行增加。三曰。入會各國。或啓釁端。其未開仗之前。必先求斷於
局外諸國。

全球產金數

日本希露西報

美國鑄金局總辦某君云。一千八百九十七年。地球產金之數。共值二百三十七兆五千
萬四千八百元。較一千八百九十六年。增產三十四兆八十二萬二千五百元。以現時各地
產金之情形計之。則一千八百九十八年。數必增廣。就南非洲一地十月內產金之數計之。
較九十七年增多二十一兆八十五萬二千元。新金山一千八百九十八年產金。較九十七年
增多十兆三十三萬五千元。又由加拿大天近地方寄往美國山博蘭思士_{即舊金山}及屑頓地
方。不下十兆元。可知加拿大於一千八百九十八年。較前一年產多金八兆五十萬元。又以
合衆國計之。于一千八百九十八年內。產多金五兆元。總計地球內于一千八百九十八年
內。較之一千八百九十七年。產多金四十五兆六十八萬七千元。共產金二百八十三兆一
十九萬二千八百元。考一千八百九十一年產金之數。不過一百三十兆元。以一千八百九
十八年較之。增產實倍其數。又總計前十年時。所產金銀之數。以今較之。祇產金之數。即并
其金銀之數而過之矣。是亦地不愛寶之實也。

列強新闢屬地表

日本希露西報

近十八年來地球內各國新闢屬土。共增八兆六十七萬零一百二十丁方英里。英之吞沒埃及大地。猶不在此數之內。今更將各國闢地廣狹數表列於下。

英吉利 共增三兆九十八萬七千三百十二方里

法蘭西 共增二兆九十三萬六千五百六十二方里

德意志 共增一兆零二萬零七十七方里

俄羅斯 共增二十六萬五千三百八十一方里

美利堅 共增一十六萬零六百零一方里

荷蘭 共增一十二萬三千六百七十七方里

葡萄牙 共增九萬六千六百零五方里

西班牙 共增七萬九千九百十一方里

西班牙近雖失其菲律賓羣島。然較諸一千八百八十年該國所領屬土之數猶過之。至丹墨一國。從前亦多屬土。然在十九世紀內。未嘗增多尺寸。統計以上八國。於十八年間收得屬土。比諸八國原有之土地。共多七倍七。在英國則增七十五倍云。

太平洋海底電線

通太平洋以連絡東西兩洋之電線。工事非小。現已有所計畫。約區分四端。一英國線。二美
國線。三萬國之通線。今略舉其大概以供衆覽。

英國線者自英領加拿大之班古巴。通于牛唯倫多之海底電線。約有七千九百八十六海
里之長。其聯絡之線及支線即列于左。

自班古巴至灣銀庫島 三千五百六十一海里

自灣銀庫島至非唯島 二千零九十三海里

自非唯島至羅夫耶枯島 九百六十一海里

自羅夫耶枯至牛唯倫多 五百三十七海里

合計 七千一百五十二海里

又自羅夫耶枯至枯因士倫多支線八百三十四海里

總計延長線并支線 七千九百八十六海里

此線者經過商業要重之區。其位置頗關係于各國。英國欲通本國與遠隔殖民之地。使其
商業聯絡為一。特每年支出二萬磅金以加保護。

美國線者自舊金山通檀香山并連日本及菲律賓羣島。約有六千六百四十海里之長。今
將其桑港通至非島之線列于左。

自舊金山至檀香山 三千海里

自檀香山至烏耶枯島 一千九百五十二海里

自烏耶枯島至古哇摩 一千二百三十四海里

自古哇摩至菲律賓羣島 一千四百五十四海里

總計 六千六百四十海里

此線者較英國線更有利益。然工費甚巨。海底電線會社長豫算之。須一千萬磅方能敷設云。

萬國通線者。其一連絡北亞美利加之太平洋海岸與亞細亞。其二自由根河通亞細亞以聯絡西伯利亞者。今舉其線之延長如左。

自敷拿爹里岬至睢利哥島 一千二百五十四海里

自睢利哥島至鴉茲島 一千二百六十二海里

自鴉茲島至日俄境界 六百四十三海里

自日俄境界聯絡西伯利亞 五百二十八海里

自日俄境界聯絡日本陸上 六百九十三海里

自日本線通菲律賓 六百海里

總計

五千零四十海里

此線者貫通太平洋之大波濤。復沿北部太平洋海岸。以使各島嶼皆相聯絡。較之前一端尤為利益多矣。若能速于成就。世界進步。烏可遏抑哉。

世界鐵道之增加

自千八百九十三年以來。鐵路日日增加無已。及至于千八百九十七年來。延長之里數。實有可驚。今將其所比較者列焉。

	千八百九十七年末里數	千八百九十三年末里數
歐洲	一六四、四六五、六二五	一四九、〇四八、七五〇
南北亞美利加	二三七、七四〇、〇〇〇	二二五、五二六、二五〇
亞細亞	三一、一〇二、五〇〇	二三、八〇九、三七五
亞非利加	九、九六七、五〇〇	七、七三六、八七五
澳大利	一四、三八三、七五〇	一三、二四九、三七五
合計	四五七、六五九、三七五	四一九、九三三、一二五

各國鐵路比較

鐵路事業進步之顯然者。果屬何國。美國之理科雜誌。英國之世界鐵道一覽。為最近之對

酌而比較者。以此觀之。可以知其一斑。今請先將其中比較各國線路之長短者列于左。
所第西伯

美國 一八四、五三二里 德國 二九、九八四里

法國 二五、八六二里 俄國 二五、三五八里

英國 二三、五三四里 英領印度 二二、五四三里

雖然。徒以線路之長短例之。不足見鐵路進步如何。國有大小之別也。故遂將其機關車及貨車客車之數通列于左。

一機關車之數

美國 三六、七四六 英國 一九、六〇二

德國 一六、八四二 法國 一〇、五〇二

俄國 八、七四八 印度 四、二五八

所列美國雖居第一。而以線路全里數比較之。則猶其少焉者。何以故。鐵路既多于各國數倍。則此者亦必多於各國數倍。方能適宜。而不至相形見絀也。

二客車之數

英國 六二、二五二 德國 三四、五九〇

美國	三三三、八九二	法國	二八、七五〇
印度	一四、七四三	俄國	一〇、五六〇

歐洲諸國之客車。四輪或六輪者居多。而美國則通是八輪。故以此而比較。美國當稱世界第一。

三貨車之數

美國	一、二八四、八〇七	英國	六五六、七三五
法國	三六〇、七二一	德國	三三〇、四六〇
俄國	一九五、五五六	印度	八〇、〇五三

美國一貨車噸數。在十噸與二十噸之間。而運貨噸數。則英國多三倍也。今更將各國一年運貨大約之噸數。列之于左。

英國	一、〇六二、九一一、〇〇〇	美國	六九八、三四二、〇〇〇
德國	六四六、四六一、〇〇〇	法國	三八二、二四〇、三一六
印度	一六〇、七二〇、五二二	俄國	九七、一四三、六五五

最後一年間運貨之噸數

美國	九二二、九七三、八五二	英國	四三七、〇四三、二六五
----	-------------	----	-------------

德國 一二七五、六二八、〇〇〇 法國 一二〇、四八七、〇〇〇
 俄國 九七、一四〇、〇〇〇 印度 三八、九四〇、〇〇〇

歐洲人口總數

最近查山全歐人口之數。總計三億八千一百萬人。以一千八百七十年之表較之。加數有七千九百萬之多。歷年平均計之。即每年加三百萬。以地之面積分配之。即一方克羅美他。約合華里一。方里有半。有三十九人。分計各國之原數人口。最稠密者。如比利時。一方克羅美他。有二百二十四人。次之。如荷蘭。有百五十二人。英國。百二十七人。意大利。百一十一人。德國。九十七人。瑞士。七十六人。法國。七十二人。噸國。五十八人。又人口疎薄者。如俄國。一方克羅美他。有二十一人。瑞典。僅十一人。挪威。且僅六人。更查各國市鎮。過十萬人以上者。英國。有三十四區。德國。二十六區。俄國。十六區。法國。十二區。意大利。十二區。奧大利。六區。西班牙。六區。比利時。五區。荷蘭。三區。葡萄牙。與瑞典。各二區。其餘若希臘。挪威。羅馬尼。瑞士。土耳其。皆止一區。市鎮。過五萬人以上者。英國。凡六十七。德國。凡五十七。俄國。凡五十。法國。凡三十四。意大利。凡二十七。奧大利。與西班牙。各凡十八。比利時。凡十。荷蘭。凡八。羅馬尼。與瑞士。各凡四。希臘。與瑞典。各凡三。葡萄牙。與挪威。各凡二。些魯卑亞。凡一。通算。凡三百八區。人口五千六百二十五萬。占全歐總數百分之十五。溯查一千八百七十年時。此項五萬人以上之市鎮。通計不

過百七十一區。人口不過占全數百分之九。乃三十年間。而至如是之發達繁聚。雖因生機之日盛。亦可見本世紀之下半期。人民多出村落。而爭入競爭之場也。

亞細亞之鐵道

亞細亞各國敷設之鐵道。共延長三萬英里。析而計之。其內俄國自西伯利亞至裏海。共三千二百里。中國政府所有者僅三百里。各國於中國索得修築之權而興修者。共三千六百里。日本全國已有三千二百里。法國於印度有百二十里。交趾安南東京有二千四百里。別西嗟拍島有一千里。土耳其於亞細亞已成者千五百里。尙擬添築者六百里。俄國於火俄魯加河左岸。更有接修之計畫。此線係與其國鐵道之大幹路。及裏海西北岸阿斯得拉康相連絡。其路落成。則交通中央亞細亞及波斯之間。極靈便矣。

亞非利加之鐵道

世界列國於二十世紀之活動舞臺。其在亞細亞乎。然今日中國之生死猶未決。苟亂雲一起。則將見硝烟彈雨。迷漫於太平洋中。是固一大戰場也。而所謂劇場者。殆非其地矣。數十年來。各國政治家所注目。資本家所熱心。而各用其智謀。各張其腕力。經營奔走。爭先恐後者。其孰不趨向於亞非利加乎。雖然。現在之亞非利加。固若是矣。而其未來之前途。果得而測知之乎。則請觀該地近年增設之鐵道而一決之。

地名	既成里數	未成里數
鳩尼斯阿魯克里亞	二、三六二	六九〇
些劣加魯蘇丹	二七六	二二四
法領苦易阿那	……	三四二
英領苦易阿那	三五	一六三
阿易烏哦里可司德	……	二八〇
哥魯度可司德	四二	八二
打利美	……	四九七
拉哥斯	四三	一四三
秘魯克阿唔寬哥	二四九	一、二四三
葡領寬哥	二二一	……
德領西部非洲	七二	三六三
克孛可羅尼	四、三五〇	……
可昂打	二八八	六四四
馬達加斯加島		二四九

總計

七、九三七

四、九二〇

二十

軌道彙攷

英泰晤士報嘗載地球上最快之火車。首推美國某公司之路。由肯莫登至愛蘭狄城。計長五十五英里。有半。每次常行僅需五十分鐘。推算每點鐘能行六十六英里有奇。洵天下至快之車也。次則法國某公司從磨塞士至堡的合士路。長六十英里。又四分里之三。每點鐘常行六十一英里有半。可與美國肯莫登之車相伯仲也。至路長車快之路。則當首推法國某路。自法京巴黎起。至秘恩尼地方。計長四百八十六英里。又四分里之一。間分車站六所。該車每點鐘常行。折中扯算五十四英里有奇。內在各站停車時刻。係統核並計。若開除外。則每點鐘當不止五十四英里有奇也。次則美國某公司由紐約埠至拔弗潞路。長四百四十五英里。扯算每點鐘常行五十三英里有奇。英國長路最快之車。則莫逾于欽吉士柯羅斯至扼丁伯弗之路。計長三百九十三英里有半。每次常行僅需七點零四十五分鐘。此外地球每國火車。每點鐘能行五十五英里者。計有五十七處。英國僅得其五。至每點鐘能行六十英里以上者。英國惟有一路。計長十五英里。自多榮士透以至華亭而已。

近世大戰爭時日

近世大戰爭日期。比較之如下。英杜太戰爭。自一八百九十年十月十一日始。至

於今日以後。美西戰爭三月間。始于一千八百九十八年四月二十一日。至七月二十六日。中日戰爭九月間。始于一千八百九十四年七月二十五日。至一千八百九十五年四月十七日。普法戰爭十月間。始于一千八百七十年。至一千八百七十一年。俄土戰爭十一月間。始于一千七百八十七年四月二十四日。至一千八百七十八年三月初三日。普里米亞戰爭二月間。始于一千八百五十四年三月二十七日至一千八百五十六年三月三十一日。南北美洲戰爭四年間。始于一千八百六十一年四月十三日。至一千八百六十五年五月二十六日。希土戰爭四月間。始于一千八百七十四年四月。至于七月。

各國軍人俸給比較

美國	一弗合中國銀二圓	
中將(大將之分未詳)	月額	千八百三十三圓餘
少尉	同	二百五十圓
上級下士	同	百圓
最下級兵卒	同	二十六圓

英國 一磅合中國銀九圓上下

大將	月額	三千五百六十五圓餘
----	----	-----------

少尉	同	百四十一圓餘
上級下士	同	八十五圓餘
最下級兵卒	同	十八圓六角一分
意國 一法合中國三角八分六厘上下		
大將	月額	五千七百九十圓
少尉	同	百五十五圓餘
上級下士	同	八十二圓六角餘
最下級兵卒	同	七圓七角三分
法國 法國之換算與意國同		
中將(大將之分未詳)	月額	八百二十六圓餘
少尉	同	百八十四圓餘
上級下士	同	六十三圓餘
最下級兵卒	同	八圓七角餘
俄國 一留合中國銀一圓一角		
中將(大將之分未詳)	月額	千百十圓餘

少尉

同

百八十圓餘

下士以下之分未詳

奧國海軍將校 一枯囉劣合中國銀四角上下

大將

月額

七千八百三十二圓餘

少尉

同

六百八十圓餘

下士以下之分未詳

日本 與中國銀相差不遠

大將

月額

七百圓

少尉

同

四十二圓

上級下士

同

二十二圓五角

最下級兵卒

同

一圓三角五分

各國中軍人之俸給。最少者莫如日本。其故一以國家貧困。一以兵士忠悃。不然。烏足以與各國軍隊相聯合耶。中國兵士固多。俸給亦居日本之上。而卒不能效力于國家。亦可悲乎。

三大戰爭戰死比較

倫敦泰晤士之一通信員。以南亞英軍之死亡數。比較普法戰爭及美國南北戰爭之死亡數。

作一表而為之說曰。於第一年英軍死亡之成數。與第二年大異其性質。是英兵於前者未熟近世之戰爭。於後則頗為熟知也。觀第一年英軍士官之戰死之多。可為實證。左之表是示南亞戰爭第一年與第二年之英軍士官死亡。及於普法戰爭士官死亡之比較者也。

士官
千人中死
亡之比較

南亞自一千八百九九年
至一九〇〇年止

南亞自一九〇〇年至
一九〇一年止

普法自一八七〇年至
一八七一年止

戰死 七一、四八

二七、九四

六五、五

病死 二九、〇八

一五、〇三

八、九

合計 一〇〇、五七

三六、九七

七四、四

下士官及兵士死亡之成數。於第二年雖大減少。然不及士官死亡成數之減少也。

下士官及兵士
千人中死
亡之比較

南亞自一八九九年
至一九〇〇年

南亞自一九〇〇年
至一九〇一年止

普法自一八七〇年
至一八七一年

戰死 一九、六二

二〇、八七

三〇、九

病死 三一、〇七

二〇、五六

一四、三

合計 五〇、六九

三二、四三

四五、一

由此表而觀，於戰場士官之死亡，二倍於兵士。非獨南亞戰爭為然。普法戰爭亦如此也。左表者，示南亞戰爭與南北戰爭士官與兵士之死亡。

士官兵士千人中死亡之比較

南亞自一九〇〇年	南北自一八六二年	南北自一八六三年	南北自一八六四年
戰死 二一、〇三	一六、八四	一五、一八	一五、一六
病死 三一、〇三	四九、四六	六三、四	四八、四四
合計 五二、〇六	六六、三	七八、五八	六三、六
南亞自一九〇〇年	南北自一八六四年	南北自一八六五年	
戰死 一一、二五	一七、二四	三七、七	
病死 二〇、三七	五六、七六	二七、七二	
合計 三一、六二	七四、	四六、四九	

萬國禁酒會

西五月開第八次禁酒會于維也納。奧國文部大臣為會長。總理大臣柯耶爾孟為開會演說員。各黨派皆屬溫和。互相一致。各國人員共有千百名。此會之目的，以飲酒之弊害甚深。設此問題以求救治之方法。各自研究。于演說時互相討論。以導公眾。開會之題目有四。一自

醫學上觀察亞鹵苛製飲料之弊害。二社會上之弊害。三救治策。分爲二科一治飲酒家一禁止專門病院及行政上飲酒四奧大利地方委員之報告。是時演說之數。七十人以上。每日散會。各處亦有響應。禁酒會之會員。皆飲麥酒。或三鞭酒。全都之新聞格外丁寧。痛言飲酒之弊害云。

全球人數

統計全地球人數。共有一千五百兆之多。內有一千二百三十八兆。即八成之八。已將男女分別列表。計歐洲人數三百三十四兆。其中女子多于男子三兆零三分之二。其餘別洲則男子多于女子。如亞洲人數八百一十五兆。其中則男子多于女子十六兆。非洲人數二十五兆。男子多于女子一兆有餘。美洲人數一百零二兆。男子多于女子亦不祇一兆。澳洲人數四兆。男子多于女子半兆。總計一千二百八十三兆人之中。男子多于女子十五兆零三分之一。計百男之中。率多女子一名。

分裂之非洲

非洲內地尚多人跡未通之處。故欲考其面積。頗難得精詳。大抵出于各國遊歷家之想像而已。近有某國人盡力稽查。以其所得者載于倫敦泰晤士報。其大要如下表所列。夫非洲原爲野蠻民族所居。人知之矣。自歐洲列強領其土。奴其民以來。而局勢遂大易。舊觀有。唐土衆民而不求自立者。其能不引爲前車之鑒乎。

國名

里數

英國	二、七二三、九一〇
法國	三、八〇四、九七四
德國	九三三、三八〇
意國	一八八、五〇〇
葡萄牙	七九〇、一二四
西班牙	一六九、一五〇
土耳其	三九八、九〇〇
埃及	〇一〇、〇〇〇
公果自由國	九〇〇、〇〇〇
利比里亞	五二、〇〇〇
摩洛哥	二一九、〇〇〇
阿比西尼亞	三二〇、〇〇〇

全世界負債額

美國某雜誌記者阿士煎氏曰。世界各國現時負債之總數。起於今年中者。英國債一億五十萬弗。俄國債八千五百萬弗。德國債七千五百萬弗。實為三百十八億。拿破崙戰爭之始。

千七百九十三年頃。世界列國之負債總數。不過二十五億弗。至千八百四十八年。增加八十五億弗。千九百年忽增三百十八億弗之巨額。是十九世紀之後半。各國之負債額。增四倍有奇。誠爲可驚之巨額云。

世界之豪富

據巴黎孖但新聞之所報。現世界有兩大富翁。一爲英人。一爲中國人。前者爲梅道氏。有南亞非利加鑛山之半。又有端巴列之鑛山。財產之總額。約二十億馬克。後者爲李鴻章。足與梅道氏相匹敵。第二名則爲南亞非利加之大鑛山主路邊遜氏。彼以己之名而名此鑛山。約有十六億馬克之財產。美國稱爲煤油王。紐約之路威拉氏。約有十二億之富。實爲第三名。此外有八億之富者。英人忽道威士路及俄國貴族爹美氏。氏生前曾以金錢之過多。日思散財之善法云。美國之加納藝氏。爲第五名。目下約有六億五千萬之財產。至彼門摩覺及威打卑氏等。約有五億至六億之財產云。

世界人口充滿日

近刊之哥士毛波利但之新聞。有一新趣之記事。謂世界人口。不久便可充滿。凡一平方哩。載一千人。如現時比利時之人口。其稠密爲世界之冠。苟增一倍餘。即足一平方哩。載一千人之數。是所謂充滿者。非公園空庭農業地鑛山等。皆無餘地之謂。可知讀者請勿誤解。觀

十九世紀中人口增加之成數。一年一百人中增加一人。苟此後依舊增加。則豫算如左表。

年次

人口數

一平方哩
之人數

一九〇〇	一、六〇〇	百	三一
二〇〇〇	四、三二八		八三
二一〇〇	一一、七〇六		一三五
二二〇〇	三一、六六二		六〇九
二三五〇	五二、〇七三		一、〇〇一

今陸地之全面積。實五千二百萬平方哩。於將來二千二百五十年。有五百二十億七千三百之人口時。即渾圓球上。以纍纍圓顛方趾之物而充滿之日也。

世界產銅數

一千八百九十八年。及一千八百九十九年。兩年之中。參考各國產銅之數。有精于斯道者馬頓氏。據其所查如左。

國名地名

一八九八年

一八九九年

亞節利

北非洲

五〇噸

……噸

亞爾然丁 南美洲

一二五

六五

澳大利亞洲

一八、〇〇〇

二〇、七五〇

匈牙利

一、五四〇

一、五〇五

波里威亞

二、〇五〇

二、五〇〇

加拿大

八、〇四〇

六、七三二

好望角

七、〇六〇

六、四九〇

智利

南美洲之西

二四、八五〇

二五、〇〇〇

德意志

二〇、〇八五

二三、〇六〇

英吉列

五五〇

五〇〇

意大利

三、四三五

三、〇〇〇

日本

二五、一七五

二七、二六〇

墨西哥

一五、六六八

一九、三三五

紐封德蘭德島

加拿大之東

二、一〇〇

二、七〇〇

挪威

三、六一五

三、六一〇

秘魯

三、〇四〇

五、一六五

俄羅斯	六、〇〇〇	六、〇〇〇
西班牙及葡萄牙	五三三、二二五	五三三、七二〇
瑞典	四八〇	五二〇
合衆國	二三三九、二四一	二六五、一六六
共計	四三四、三二九	四七三、八一八

由是觀之。各國產銅之數。以美國爲最盛。眞世界第一之產銅國也。

世界產鉛額

前此四五年。世界上產鉛之額。弱于人氣。其出產不過六十一萬七千噸。價格則每噸祇有九元。復行有低減之患。及後漸事擴張。用途漸廣。產額漸盛。價格亦比前二倍。終至千九百年。產有八十五萬噸之多。更足以形前此出產之短少矣。然美國以出產既多。供給繁費之地。因以漸行低其價格。至于今年每噸實有十二元也。今表其產額之狀況如左。觀此則足以知其消長之大概矣。

年次	美國	各國合計	年次	美國	各國合計
一八九二年	一五六、〇〇〇噸	六九五、〇〇〇噸	一八九七年	一七九、〇〇〇噸	七二一、〇〇〇噸
一八九三年	一五一、〇〇〇噸	六四一、〇〇〇噸	一八九八年	二〇七、〇〇〇噸	七八一、〇〇〇噸

一八九四年	一四六、〇〇〇	六一七、〇〇〇	一八九九年	一九六、〇〇〇	八〇三、〇〇〇
一八九五年	一四二、〇〇〇	六五〇、〇〇〇	一九〇〇年	二五〇、〇〇〇	七五〇、〇〇〇
一八九六年	一五八、〇〇〇	六七六、〇〇〇			

此外復由英國商務院所報告列之亦可以知英國之輸出入高度焉。表內有●字者乃商務院報告所缺也

年次	西班牙	美國	澳洲	合計 <small>合其餘各國</small>	輸出
一八九〇年	●	一五八、六四九	五五、五三六
一八九一年	七〇、〇六六	●	五五、六三四	一六九、七二四	四八、七二六
一八九二年	八七、六九四	●	五三、二三九	一八二、七八二	五八、一〇五
一八九三年	八三、七〇三	●	五六、六三四	一九一、一七四	四八、九三五
一八九四年	七六、三八三	●	四九、五七九	一六一、八六一	四七、〇八〇
一八九五年	八八、〇〇三	●	三七、三三七	一六二、九二四	四一、六六五
一八九六年	九〇、四一七	●	二六、一二九	一六七、五九四	四一、二四七
一八九七年	九八、〇九六	●	一六、三九四	一六七、四四二	四〇、五〇三
一八九八年	一〇三、四八一	●	四二、二三〇	一九四、四七九	三八、〇三一
一八九九年	九九、四二二	●	五三、六六九	一九八、三七七	四〇、二八一
一八九〇年	八七、八七三	●	四〇、七二四	一九五、三八〇	三六、二六九

世界產酒數

世界著名之酒。麥酒首推德國。葡萄酒首推法國。計去年全世界中釀造之葡萄酒數。二十四億四千四百七十二萬八千四百六十四牙隆。一牙隆爲二升五合比前年增加四億六百二十萬三千九百七十三牙隆。其間法國占十二億六千五百萬牙隆。爲世界最多之額。次則意大利占七億六千六百萬牙隆。又次則西班牙占五億九千四百牙隆。然查此三國之額。法國比前年增加四億牙隆。西班牙減六千萬牙隆。意大利減六千五百萬牙隆云。

世界最貧之國王

葡王一國。數多之臣民。歸其治下。誰不思其權勢赫耀。安享榮華耶。然世有不幸之國王。每年收入。不及市役所之一書記官。其亦可哀之至矣。葡萄牙之國王。於歐洲主權者之中。爲最貧之一人。年年所受之王室費。定八十二萬圓。然以國帑缺乏之故。久無收入。摩阿王則自千八百八十九年之伯林條約。定每禮拜得二十二圓半之俸給。打蒿迷王曾爲法國政府所追放。每禮拜得十圓之俸給。又路三不依王。雖有十五萬之歲入。然有時千圓之歲入。亦不能得云。

煤礦出產

地球上各國。遞年產煤共六百五十兆墩。內有三分之一。爲美境所產。英國三島產二百零八兆墩。德國一百二十四兆墩。西班牙僅二十兆墩。實不敷其本國之用。其餘歐洲各國。每

國僅產數兆墩而已。中國礦產極盛。人皆知之。然採煤礦尙少。因人多守舊。拙于製造。不知用煤之利。若將英國所製之採煤器運至中國。採掘煤斤。則中國所產之煤。可比各國現時所產之貨得四分之一。

刊行數目

宇內各國新報雜誌及書籍刊行之數。經美國紐約刊有統計全表。內稱本年在北美合衆國刊行新報雜誌。凡三萬八千種。發行之數一億二千萬部。比利時刊行者。四千七百種。法京巴黎刊行者。二千四百種。發行之數至二億萬部。及據該報所稱刊行書籍。以日本爲最多。每年刊行二萬五千種。其數二倍於英法兩國。其外又有新聞雜誌八百種。大有增加之勢。刊行書籍之多。除日本之外。即德國也。然以出書與人口比較其數。則德國不及英法遠甚。在英法一部書充當一千六百人。而德國則當二千二人耳。次則荷蘭。丁抹。諾威也。又其次則波蘭瑞典也。然意大利雖出書無多。而亦勝於俄國之太少也。又據最近時所查。德國著書輸出外國者。以近年更多。比之前十五年。其數不過二千七百萬部。而今年刊行已六千五百萬部之多。查德國發出之書。奧國已購其一半。又德國書售於法國者。僅二百萬部。而法國書籍運入德國者。則二百七百萬部。又據倫敦刊行書籍雜誌表所查。其所著作以說教集及神學書爲最多。次則說部。其數每年凡八百餘種。要之大地各國。其刊行書籍。逐年

增加。如一千二百五十年。全球製紙之重數。凡三百六十六萬七百餘担。爾後未經五十年。而用紙之數。已增十倍以上云。



中外瑣記第三

德創簡電

德政府近創一通電簡法。如在華德兵欲致電與其家屬者。祇須將本人名號。及電報號數繕明。即可送至柏靈。由彼處郵政局代譯。送往其家。兵官電費。每字六馬克。約合英洋三元。兵丁減半。至尋常信件。由德國書信館遞寄者。均不取費。

意國新器

意國人近製就一照片。呈於兵部署。能臨陣遙照敵人軍勢。如敵兵來攻。至十五里內。十里外。如法照之。則敵軍多少。將帥形狀。及所踞之地勢險易。炮位大小。無不則若列眉。曾試之於八英里。以至軍士之鬚眉面目。亦皆畢現。遇素識者。可指為某人也。查此法英京亦有之。但不如意人所照之遠。故無用於軍中者。英包探恆携此片於身。設遇歹人行竊。或要犯在前欲遁。料追不及。即於片上加一遠鏡。立刻照之。舉動眉目。亦無不備。以原片控官按圖索驥。無能脫者。其片但能照一二里。若加一上等遠鏡。自能及遠。想意國之法亦如是而已。

世界第一大砲

日下美國所製一種大砲。其彈距二十里及百分七十六。重百二十六噸。長四十九尺六寸。其砲本位直徑六尺二寸。砲口十六寸。彈丸之重二千三百七十磅。丸長六十四寸。其所用

之彈藥。一回需一千六十磅。速力一秒時間。可貫穿二十六百尺四十一寸十分厚之鐵。發射之時。所用大砲之壓力。一平方寸三萬六千磅。其發砲之費用。除試發費用之外。尙要八百六十五佛郎。其中彈藥費二百六十五佛郎。彈丸費六百佛郎云云。

新式氣球

德國軍隊氣球營。新製二氣球。其起落駛行之捷速而耐久。爲從前所無。今其營中有二弁。於禮拜四日將新球試演。是日十點鐘十二分。初離德京。時值順風。至午後一點鐘時。即過到霸利士留城。三點鐘時。即抵德奧交界地。是時氣球離地約有五千尺。四點鐘時。球落於奧國架利垂之霸加勞士卡地方。計球行六點鐘之久。已共行得四百五里。該地民人忽見球墜地。莫不驚惶。蓋疑爲空中鬼物。故球之墮地多時。尙無人敢近。適遇一猶太人。能操德語者。上前詰問。球中一武弁。央他引導至電局。發電回國。初時地方官疑其爲奸細。欲置之監中。以恐嚇之。後有軍營中人爲之解免。旋代他僱六頭牛車。運氣球至火車站。俾過返故國云。

無綫電信

英法兩國間。爲百英里。無綫而得通電信。經係意人麻兒格爾氏之所創。旣在兩三年前。其說曰。于發信受信兩處。各縱立一銅線於空際。則兩處之間。不樹一桿。架一綫。必可通音信。

然曾實查之。兩處距離。過十_二米里則不通。麻氏謂銅線短耳。若能長之。豈有不達遠地之理。精究益勉。想此次遂奏其功也。又聞美人尼可拉的斯刺氏。亦創有不用一綫送電流。可以轟沈兵艦之法。要之。無綫送電之法。見其實用。將在近矣。

繞地一周

意國人布拉尼。欲徒步游歷五大洲各國都會名勝。自一千八百九十年由法國巴黎起行。現今已到橫濱。聞布氏起行之時。囊中不携一錢。迄今九年間。已經過阿非利加。南北亞美利加。亞細亞之四大洲。今欲於此二十箇月內。經過西伯利亞。嚴冬冒風雪。而於千九百年。趕歸法國。看萬國博覽大會云。即此可見西人之好奇。與其堅苦刻厲之概矣。

畢公自傳

畢斯麥公自著傳。中外喧傳。德京有紙價爲貴之概。頃售出三十一萬八千冊。其售價至六百五十萬馬克。約三百二十萬圓。定購者尙絡繹不絕。印刷製本。夜以繼日。所費板紙千二十四坑都烈都威圖。約一萬四千貫目。布一萬八千碼。牛皮四百枚。絹片六萬五千枚。金一萬八千五百馬克。膠一萬四千馬克云。

大年訪古

大年與宋卡相毗連。爲暹羅所屬。亦南洋羣島之一也。有某君游歷斯土。遍尋古蹟。在內地

得一古廟所祀神像。乃華人林道乾。及一比丘尼也。巫來由人聚族而居。羣奉爲始祖考妣焉。其廟旁曠野。一望焦土。不生草木。相傳爲林道乾鑄礮處。土人皆能道之。聞當時所鑄之礮。大小不一。迭次試放。以致草木皆枯。地皮盡熱。其礮最巨者。口徑以數尺計。尙存一尊。早爲暹官所運去。至今猶在曼谷都城也。查林道乾之所與比丘尼並祀者。緣其地素尙佛教。該尼不知是何種人。到此說法。信者頗多。林係鰥夫。來自華海。乃與該尼同參歡喜禪。卒爲夫婦。該廟卽其故宅。今土人之奉爲始祖考妣者。想卽其苗裔也。又查漳泉人有林道乾鑄銃自擊之謬。蓋指害人害己之意而言也。及詢以出處。則云鑄礮者始於林道乾。後竟引以自擊。因而斃命云云。惟某說部紀載其事。頗能詳確大略。謂林係明末流寇。祖籍泉州。而徙居漳州者。其妻亦善於兵法。海口一帶。受其蹂躪者頗多。及大清定鼎燕京。林勢不敵。夫婦奔竄。轉而圖南。初擬屯兵於安南崑侖山。僅逾兩閱月。復遠避南洋云云。今以大年之古廟考之。其爲林之遁跡無疑。至該女尼。或卽其妻所改裝以爲引人入勝之計。未可知也。姑記所聞。以俟續考。

文萊島土番多王姓

文萊島與實勝越埠相毗連。本巫來由部落。從前兩地各立酋長。各治其民。惟越埠海口常有劫掠之事。爲行旅患。嗣經英人調戰艦以攻之。廢其酋而收其地。墾荒招徠。漸臻興盛。然

每年當納文萊酋長地稅金五千餘元。至今仍之。而文萊所轄之地。又多爲英所割矣。茲接某君來信。謂該埠巫來由人。有熟諳華語者。多自認爲華種。爲王姓。因查其所以得姓而爲華種者。果有確據否。對曰有。不觀內山有華式塚墳乎。伊之始祖王總兵。自數百年前出中國。統率師船一艦來征其地。不料風波大作。船艦沉溺。所有軍士。誕登彼岸。得慶更生。不致與波臣爲伍。由是娶婦生子。歿而葬於島上。今子孫永遠祭掃。無忘漢家體制云云。伊等卽其苗裔也。以上土番自述之語。查該土番既自認爲華種人。族且能追述其始祖來歷。其爲華種無疑。惜乎不達華文。又無彼族文字可考。不能指出年代及乃祖之名耳。然以意度之。是必前明永樂時之事。按明史永樂元年。遣中官侯顯等使外域。越三年。又使中官鄭和。王景弘多資金幣。率兵二萬七千餘人。造大舶由蘇州劉家港入海。歷福建達古城。以次遍歷西洋耀兵絕域。諸邦震恐。來朝者日衆。據此以觀。似與文萊等土番所述頗能接筭。惟當時船中軍士不止一姓。卽在該島娶婦生子者。亦不止一人。特以該船爲王總兵所統轄。故多認爲王姓。理或然也。

吉隆紅雨

雨露風雷之理。雖聖人有所不能盡。蓋其理幽深微奧。卽西國窮理格物之士。有時亦莫測其所以然。况中國皮毛影響之舊學哉。如雨澤一事。爲地中濕氣上升太空。升之不已。散而

爲雨。斯說也。中西同解。盡人而知。奚須饒舌。惟有時雨水變色。則其理又當別求。非淺學者所能妄測矣。吉隆自九月後。雨水頗多。然均上午。天氣晴和。下午則雨。連旬以來。悉皆如是。乃二十晚忽然天降紅雨。其時夜深。衆人方在黑甜鄉中。懵然不覺。次晨察之。渠池殘溜之間。積水均作淺蘇木色。以玻璃罇貯之。其色更現。亦異事也。

軍中妙器

行軍由氣球携照片以探敵。巧矣。然而安球積氣。動需時刻。且又易受砲擊。猶未善也。乃有川火器以助照片。霎然而起。便將敵人布置山川險要。立即照下。如按圖索驥。不更巧且神耶。西報載英有博士以南非軍中。由氣球探敵。每聞失事。殊爲不便。因制一照像機。具以火箭。升於空中。用線繫之。爆然一聲。箭尾散開兩翅。如一傘然。以抵空氣。悠悠而下。其器則已制鬆機動。輪振齊轉。所藏藥紙亦隨之舒卷。然後將線收下。則山川形勢。了如指掌。以助帷幄謀畫。其費既微。又易携帶。旋發旋收。不延時刻。殿前聚米。無此清晰。比用氣球。其便何如也。聞經試驗。已奉國家飭往軍前聽用云。

古圖書館

據美國新報所載。美國彭西兒哇尼亞紐約之西大學生。在土耳其京城附近尼巴地方。發見地中太古之圖書館。有四千餘年歷史文學之書類。一萬七千冊。皆係紀元前二千二百八十

年以前之物。中國黃帝時代其未發掘者尙多。尙須五年後始能取出。若事果然。則此館爲世界中第一大圖書館也。此地爲往古文學之中心。雖埃及尙且不及云。夫太古文物。一旦發見于今新世界之中。亦可一新世人之耳目矣。

北極探險

窮探北極之事。所益良深。于世界中則發見新地。于學問中則增益新理。且能長人之冒險力。西人爲此事者極多。前死後繼。今有意大利人亞布機公爵者。自北極探險而歸。述其所經路程。與前者南成博士探險時相對。而行程較南成尤遠。所乘之船。歸時已破壞不堪云。

西藏風俗

沈君錫者。前奉命駐西藏。辦理西印度事務。居於拉薩京城。歷經三載。此次回華。道及西藏風俗。今錄一二。以供衆覽。據云西藏奇俗甚多。其最語者。則莫如兄弟同室。不以爲嫌。家居器具絕少。人皆席地而坐。其大致相同。服飾亦皆相仿。惟因缺水之故。人多污濁。沐浴浣衣。罕有其事。衣服但藉手裁。不知縫法。且慣食生物。如牛肉羊肉。但生切而食之。每人腰間必繫一長刀。蓋以備切物之需也。飲茶必和之以鹽。益之以牛油。後用黑麥餅浸而食之。至吸煙則用煙葉磨成煙粉。拈而食之。如鼻煙之類是也。西藏無酒。好飲者必用開水沖酒餅。以竹管吸之。藏俗重於飼養驢馬。尋常之家所畜。必有三四十四。則貧賤之家。亦必有驢馬數

匹而後可。蓋土人持此爲養生之具也。藏地缺木。房屋皆用泥石建造。凡遇雨天。則滲漏不堪。其最佳之屋。則皆華工所建。但僅有樓屋一層而已。拉薩街道之廣。將四倍于香港大馬路。但未經鋪砌。殊穢濁不堪耳。拉薩沿街並無鋪戶。每有所需。不知何從購取。蓋沿街並無一見售物者也。土人所造之紙頗佳。筆則用竹製就。嘗見土人左手舉紙。右手執筆。揮寫如意。西藏風氣未開。至今仍禁用洋貨。懸爲嚴禁。甚如印度茶葉。遍覓市中。亦不可得。凡屬洋貨。則惟華人購用之耳。西藏人民。非有奉准。不得擅離本國。據云。定例准假至多以三個月爲限。倘有過期。或逾限數日。則必永遠不准回國。以故商民大爲所窘。拉薩盜賊。並不多見。因其例禁森嚴。無或敢犯之者。按其刑罰。第一次犯罪者。以火焚其一目。第二次再犯。再焚其一。至犯第三次。則將其人拖擲江心。藏地死罪人之法。有三。川火焚斃一也。拋擲江心二也。最奇最酷者。則莫如扯肉以給狗磨骨而成粉三也。男女定親。畧如華例。必用媒人聘定。男家必備白絲一方。將男女姓名。各載其間。致送女家。依例慶賀。藏俗男人各有兩辮。兩耳各載大載一隻。礦產之說。絕無所聞。嘗見附近喇嘛所居之處。堆金成塊。無有覬覦之者。雖由守舊甚嚴。然亦因畏懼有碍風水之說。蓋西藏人酷信風水。有甚於華人也云云。

俄獲古書

俄軍抵中國取奉天省時。任意奪掠。獲得東方古文件甚多。俄國政府一聞得此奇貨。即令

送歸俄京聖彼得堡。交皇家書藏。并請國中。有名之士考覈。聞該文件內有希臘俄羅斯古文不少。此物於十三世紀時。爲蒙古人由歐洲奪來者。今又付諸歐洲人之手。不亦物歸原主乎。

算家談奇

西國算學家云。計以一萬馬力。運用五百年之久。積算之。可以將地球舉起至一尺高云。

法國新砲

法國人某氏。近製一新大式砲。在平野試驗之。以見其功效何如。聞此大砲一發。雖隔二十英里。可能擊中。然法國海峽與英國海峽。其最短之地。不過十六英里。若此砲果有此功效。則在法國可以射擊英國矣。此事英國人上下皆有不安之念云。

仇視別種

美國支加哥埠有西人私立一會。名曰白人義和團。某日在該埠三十一街七十七號門牌會所聚集。有一人身材高大。戴一白假面具。登堂演說。左右各一人。均戴假面具。靜坐不動。以堂聽者約三百餘人。童子已居二百餘名。堂上正面稱爲大師兄。左右爲二三師兄。該會入逐黃黑兩種人爲主義。該會內有一人名傳會芬士打壁。稱該會爲保種起見。入會者多屬名望中人。內有百萬富翁。恐人知悉。致生謠謗。遂隱名。本會有留心考究種類興廢之人。據言

綜視萬國時勢。將來黃黑白種並立。至黃黑兩種。終必勝于白種也。故白種亟宜設法除去。黃黑二種人。以保我白種人云云。

婚禮奇聞

歐之北有小國名立蘭者。男女匹配之例。與英殊別。英則男女自由。但求相悅。便可至教堂成禮爲夫婦。此則其權半持於女之父母。半持於女。且其間亦有不可知者在也。如男欲求某人爲婦。則先向其父母求之。不允不能也。父允而母不允。母允而父不允。皆不能也。必女之雙親允焉。功過半矣。其後則兩家訂某日某地。同備杯勺。邀戚友觀男女賽走。名曰魚諧。蓋取魚將散子時。牝牡相追逐之意也。所走之路。由兩家商定其遠近。大抵男家必欲爭其遠者。女家則欲爭其近者。因賽走之法。男必讓女前立一頭地。乃始發脚。路若過近。則一息已盡。男子雖具捷足。亦無所施其先登之技。故每議必斤斤然以此爭。爭而不下。有因而散者。然女家每持男下女之說。而爭勝者多。女若有意。則姍姍其遲。以俟男之至。至前抱之。接唇焉。噉面焉。恣意戲狎。又令入室成夫婦。觀者不爲訝。且鼓掌稱賀焉。女如無意。則事未有諧者。或女雖欲奔。倘偶爲物絆足而踣。男得乘勢擒抱之。則衆謂爲天婚。其事亦諧。故謂不可知者在此也。禮成後。彼此闐然散。更無所謂告親友之席。初若兩家議或不成。彼此亦不沾唇。謂此爲喜筵。爲媒酌。媒不能撮合之。更無喜。不應空叻杯勺也。其俗如此。至若國家森

律亦殊重。強姦者。固死無赦。和姦者亦死。以未經父母之許。雖和亦以強論。倘奸未成。則坐男。或則二人皆坐。此等律法。却在不言不野之間。可謂另有其法。然恐未成奸之和奸。在女子死。認爲強迫。此事問官未必親見。而不知更作何分斷也。

近製新砲

俄國政府在美國紐約製砲公司定做一速射砲。一分鐘能發二百八响。此砲置在軍艦帆檣之上發射。能達二哩之遠。在其距離內。能破碎敵軍之水雷艇。俄國將來擬將一切軍艦悉用此砲云。

海底艇成績

近日法國以海底潛行船成績。舉行海軍演習。初近于海底潛行船之艦體。而艦體之所在。毫無由窺知。水雷艇及甲鐵艦。整列經過艦線。似無有船艦潛行一般。船艦之進步。誠可羨哉。

新製潛水艇

近日俄國技師某。改良新創一種之軍艦商船。其速力遠非尋常所及。依向有之潛水艇。參酌由英至美。僅須二日半。海上有風濤險惡。則潛入水中。可以前進無異。蓋船體外別有裝置以爲之護衛也。

中丞奇奏

陝西巡撫升允平日最信神鬼。相傳去年義和團設壇。中丞極力懲息之。近聞因八仙菴道士李宗陽呈稱該菴爲關中第一叢林。道士黨羽亦有數百人之多。該菴之神最爲靈顯。道士且有奇術。業經請旨勅建該菴之宇。其摺內有三輔編氓。旣已普霑沃澤。百神効順。自應共沐懷柔之語。聞皇太后嘉納。已依議勅建該廟宇。並賞給該道士頂戴以示鼓勵。此事可與裕綱請封呂祖並傳矣。



[G e n e r a l I n f o r m a t i o n]

书名 = 近代中国史料丛刊三编 (1 4 9) 清议报全编 (九) · 新民社辑著 · 文海出版社 · 1 0 4 8 4 5 1 1

作者 = B E X P

S S 号 =

加密地址 =

页数 = 3 0 8

下载位置 = <http://book3.5read.com/300-24/diskwt/wt265/11/!00001.pdg>